





CHR. G. HEYNII

PROFESSORIS ELOQV. ET POES. GEORGIAE AVGVSTAE
M. BRITANN. R. A CONSIL. AVL.

OPVSCVLA
ACADEMICA
COLLECTA

ET
ANIMADVERSIONIBVS
LOCVPLETATA.

VOLV MEN III.



GOTTINGAE
APVD IO. CHR. DIETERICH.
1788.

W. W. W. W.
1914
W. W. W. W.

CONSPECTVS

PROLVSIONVM

VOLVMINIS TERTII

- I. *Vita antiquiffimorum hominum Graeciae ex ferorum et barbarorum populorum comparatione illustrata.* Commentatio I. Ad commendandum nouum Prorectorem Godofr. Lefs d. 2. Iulii 1779 Pag. 1
- II. — Commentatio II. Ad indicenda Anniverfaria facra XXXXII. d. 17. Sept. 1779 17
- Epimetrum* ad duas has Commentationes 31
- III. *Foedera Carthaginiensium cum Romanis super navigatione et mercatura facta.* Commentatio prior. Ad
- X 2

Ad commendandum nouum Prorectorem Chr.
Frid. Ge. Meister d. 2. Iul. 1780 39

IV. — Commentatio *posterior*. Ad indicenda
sacra Anniuersaria XXXXIII. d. 18. Septemb.
1780 55

Epimetrum ad duas has Commentationes 76

V. *De Romanorum prudentia in coloniis regendis*. Ad
commendandum nouum Prorectorem Io. Andr.
Murray 2. Iul. 1781 79

VI. *De animabus fideis ex Heracliteo placito optime ad
sapientiam et virtutem instructis*. Ad indicenda
Anniuersaria sacra XXXXIII. d. 17. Septemb.
1781 93

VII. *De febribus epidemicis Romae falso in pestium
censum relatis* Ad commendandum nouum Pro-
rectorem Io. Chph. Gatterer d. 2. Iul. 1782 108

Epimetrum 125

VIII. *De Leone M. Pontifice Rom. Attilae et Genferico
supplice facto *)*. Ad indicenda Anniuersaria sa-
cra XXXXV. d. 17. Sept. 1782 127

Epime-

*) Incidi nuper in aliam, quae memoria exciderat, descriptionem ta-
bulae a Raphaele pictae, ab Equite d'Hancarville sermone verbis
exube-

▼

Epimetrum super fabulosis narrationibus de Attila - 142

IX. *De belli Romanorum socialis causis et euentu, respectu ad bellum cum Colonis Americanis gestum habita.* Ad commendandum nouum Profectorem Io. Benj. Koppe d. 2. Iul. 1783 144

X. *Foederatarum rerump. coalitio vix vnquam satis fida, exemplis ex antiquitate illustrata.* Ad sacra Anniuersaria indicenda XXXXVI. d. 18. Sept. 1783 162

XI. *Cur virgis caesi Romano more, qui mox securi percutiendi essent I liſſor conliga manus.* Ad commendandum nouum Profectorem Io. Steph. Pütter d. 7. Aug. 1784 184

XII. *Historiae naturalis fragmenta ex ostentis prodigiis et monſtris.* Commentatio prior *). Ad indicenda sacra Anniuersaria XXXXVII. et ad celebran-

)(3

exuberante, nec ad descriptionis subtilitatem instituto factam, subiecta quoque delineatione ad manum Raphaella extimo formarum ambitu graphide expresso, in Picturis Etruscis To. II. p. 14 sqq. Algardiani autem analyphi praeclaram dedit notitiam subtiliore iudicio adhibito, exquisita artium elegantiorum doctrina et sensu instructus idemque nobis amicissimus F. W. Baſil. de Ramdohr: *Ueber Malerey und Bildbauerkunst in Rom* III. Th. p. 234 sqq.

*) v. mox n. XV.

brandas *ferias muneris professorii semisaeulares*
Sam. Chr. Hollmanni, d. 17. Sept. 1784 198

XIII. Ad indicendam munificentiam regiam *in praemiis academicae Iuventuti constituendis et ad argumenta certaminis proponenda*. Kal. Nov. 1784. 216

XIV. Ad promulganda nomina eorum, qui praemia in IV. Iunii proposita ordinum academicorum iudiciis reportarunt; nouis simul quaestionibus in annum sequentem propositis. M. Iunio 1785 234

XV. *Historiae naturalis fragmenta ex ostentis, prodigiis et monstris*. Commentatio posterior. Ad commendandum nouum Prorectorem Henr. Aug. Wrisberg d. 2. Iulii 1785 255

XVI. *De foederum ad Romanorum opes imminuendas initorum euentis eorumque causis*. Ad indicenda Anniuersaria sacra XXXXVIII. d. 17. Septemb. 1785 275

XVII. *Demogorgon, seu Demiurgus, e disciplina magica repetitus*. *) Ad commendandum nouum Prorectorem Luder. Kulenkamp d. 2. Ian. 1786 291

XVIII.

*) Cf. Tiedemann v. c. in Disp. *Super Quaestione de artibus magicis proposita a. R. Sc. Soc.* p. 69. 70. ubi ex Lucani et Statii locis sagaciter elicit magiae vulgaris incrementa inde a Neronis temporibus.

- XVIII. *Ad promulganda nomina eorum, qui praemia in IV. Iunii proposita ordinum academicorum iudiciis reportarunt; nouis simul quaestionibus in annum sequentem propositis.* M. Iunio 1786 315
- XIX. *Saeculi felicitas in numis.* Ad commendandum nouum Prorectorem Godofr. Lefs d. 3. Iulii 1786 *) 322
- XX. *Res a Phocione in rep. Atheniensium gestae in disceptationem vocatae.* Ad commendandum nouum Prorectorem Io. Nic. Möckert d. 2. Ian. 1787 344
- XXI. *Ad promulganda nomina eorum, qui praemia in IV. Iunii proposita ordinum academicorum iudicio reportarunt; nouis simul quaestionibus in annum sequentem propositis.* M. Iunio 1787 365
- XXII. *Rerum Chersonesi Tauricae memoria breuiter exposita.* Ad commendandum nouum Prorectorem Aug. Gottl. Richter d. 2. Iulii 1787. 384
- XXIII. *Georgiae Augustae inaugurationis sacra Anniversaria L. adeoque semisaecularia sollemniori ritu fessis-*

*) Quod proximum tempore abhinc fuit *Obss. ad LL et resp. Magnae Graeciae Supplementum*, ad indicenda sacra Anniversaria d. 17. Sept. 1786. iam insertum est *To. II. p. 278.*

festisque caerimoniis celebranda in diem XVII. Septembris 1787 indicta 398

XXIV. *Oratio in panegyri sollemnium semisæcularium
Academiae Georgiae Augustae d. XVII. Sept.
1787 habita* 411-430

I.

ACADEMIAE GEORGIAE AVGVSTAE
PRORECTOR
LVDERVS KVLENKAMP
CVM SENATV
SVCCESOREM
GODOFREDVM LESS D.
IN
MAGISTRATV ACADEMICO GERENDO
CIVIBVS
OFFICII ET HONORIS CAUSA
COMMENDAT
IN A. D. II. IVLII CLD ID CCLXXIX.

*Vita antiquissimorum hominum, Graeciae maxime, ex feror-
um et barbarorum populorum comparatione illustrata.*

Commentatio I.

Cum omnis verior philosophandi ratio ab ac-
curatiore naturae rerum cognoscendae et in-
genii humani, in diuerso culturae et expolitionis
genere ac gradu constituti, intuendi et explorandi
studio sit profecta: dici vix potest, Commilitones,
Heynii Opusc. acad. Vol. III. A quanto

quanto humanitatem beneficio obligauerint ii, qui diffitas et longinquas orbis terrarum partes aditas a se describere, et de naturae copiis, incredibili proventus et cultus varietate, de hominum ingeniis, moribus institutisque, ad primum intuitum toto caelo a se inuicem abhorrentibus, communem tamen, si diligentius contempleris, naturam, communem naturae auctorem, eumque optimum, sapientissimum, pollentissimum, arguentibus, paullo curiosius tradidere. Illorum enim virorum labore, periculo, opera, rerum noscendarum campus latissimus apertus, angusti philosophiae studii, quale antea erat, fines, vt *extra anni solisque vias*, ita vltra exiguos fundi, quo quisque natus et altus erat, limites, quos eosdem rerum quoque naturae terminos statuebat, sunt prolati. Itaque liberiore nunc cursu exspatiatur mens humana, nec vnus modo loci quasi vestigio, cui insistimus, circumscripti prominemus ad prospicienda pauca vicina iugera; sed *immenso*, vt poëta ait, *spatiantes viuere caelo* audemus, ab innumeris prauis opinionibus purgati ac liberati, quae animis infederant et tam altas radices egerant, vt nec summa iudicii subtilitas, quae in hominum per superiores aetates ingeniis erat, nec reuelata de rebus diuinis humanisque doctrina ad eas euellendas vim haberet, quin potius eas altius infigere, laetius alere, et nouis errorum surculis disseminare videretur. Postquam vero melioris naturae studii fax semel, tanquam de sapientiae arce, fuit prolata; cum intellectum sit, tantam ingeniorum, morum et studiorum varietatem in genere humano non minus a summo eius auctore esse

esse profectam quam infinitam hanc varietatem in caeli solique naturis, rerum animantiumque seminibus, formis, incrementis; nec reuocari posse numinis curam ac providentiam ad vnum populum, ad vnam sectam et professionem opinionis ac cultus: superstitionum et opinionum ludibria passim sunt dispulsa, et coepit tandem aetas statuere digna numine diuinaeque naturae maiestate, quam paullo ante quo quis magis ad naturae humanae imbecillitatem detraxerat, hominique assimulando deum diluerat, eo verius et magnificentius de deo sensisse videbatur.

Verum ad historiae quoque veteris fidem firmandam plurima sunt, quae ex his peregrinantium narrationibus peti possunt. Multa in iis occurrunt de populis ac familiis eodem fere vitae cultu victuque vtentibus, qui nunc passim per Americam, inter populos nondum ad vitae melioris initia progressos, visitur. Herodoti fides quam vexata fuerit, satis constat; quam tamen recentiorum de Asia et Africa scriptorum consensus egregie liberauit et stabiliiuit, quum iam ante duo saecula ab Henr. Stephano coepta esset vindicari. In ipsis sacris Hebraeorum libris, cum magna rerum expositarum pars ad homines spectet, qui aut sub ipsa societatis humanae primordia viuerent aut nomadicam vitam agerent, aut inter barbaros et incultos populos censendi essent, satis constat, quam multa, ad nostras notiones, opiniones, sensus ac iudicia deflexa, miseros errores ac superstitiones in hominum animos inuexerint: quorum expeditissima ratio est, si

notiones earum rerum attuleris, quae etiamnum inter populos in simili conditione vitae agentes natura, vita et usu, obtinent.

Cum in hoc scriptionis genere, Commilitones, non tam requiratur, ut subtilius aliquod ex disciplinis depromptum caput exponatur, quam propositum esse debeat acroama aliquod, quod non sine utilitate et cum voluptate aliqua in hoc sollemnium apparatu legi et audiri possit: non iniucundum cognitu argumentum deligere nobis videmur, si commemoremus nonnulla ex vita antiquiorum hominum, Graeciae maxime, forte et Italiae, a nostris opinionibus et institutis abhorrentia, quibus tamen alia similia apponi possunt, quae nostro aevo peregrinatores per diuersas orbis, qua patet, terras, de ferorum ac barbarorum, quos adierant, populorum vita et moribus tradidere. Quo ipso et fidem antiquae historiae passim adstruere, et loca scriptorum nonnulla illustrare, et interponere interdum licebit ea, quae ad notiones vulgares emendandas utilitatem habere poterunt; instillabitur quoque animis vestris, Commilitones, sensus gratus et iucundus, reputantibus, quam bene nobiscum actum sit, quorum vita in haec tempora est delata, quibus in hoc caelo, in his locis gigni, nutriri et institui contigit, in quibus earum rerum, quae ad humanam naturam ornandam et locupletandam comparatae sunt, summa copia, summa oportunitas est proposita.

Antequam tamen ad hanc differendi prouinciam accedimus, cuius causa ea a nobis suscepta sit,
primo

primo loco commemorandum esse videtur. Scilicet magistratu in annum sesquialterum prospere continuato decedet is, cuius nomen huic paginae praescriptum est, et transferentur die crastino insignia academica cum honore summi inter nos magistratus in virum summe reuerendum,

GODOFREDVM LESS, Theol. D.

collegam coniunctissimum, vestrique, Commilitones, amantissimum, quem vobis amplioribus commendare verbis si vellemus, verendum esset, ne vestris iudiciis et voluntatibus diffidere videremur; cum viri grauissimi fides, pietas, ac beneuolentia vobis iam satis cognita et spectata sit, cum aliis in rebus, tum sermonibus e sacra cathedra ad vos habitis, quibus amorem et affectum animi sui erga vos tam luculenter declarauit, vt non magistratus magis, quam parentis loco, illum a vobis amari et diligi aequum esse arbitremur.

Eorum igitur, quae in vita hominum obseruari solent, alia cum vitae necessitatibus, cumque praesidiis, auxiliis et copiis, quibus vita seu toleratur seu recreatur, seu deliciis frangitur, sunt coniuncta; eaque pro caeli solique ratione, naturaeque facie et ingenio sunt diuersa; tum vero, auctis hominum coetibus commerciisque, et per artes excultis sensibus, multo magis ea variant inter se ac discrepant, ipsis modis et instrumentis artes exercendi: vt in victu, vestitu cultuque corporis, in habitatione paranda, in vtensilibus, apparatu, instrumento. Alia ad vitam socialem spectant; ea-

que ad lubitum magis et arbitrium instituta esse videntur; etsi natura fere aut casu aut opinione praebente seu obiiiciente id quod in morem abiit. Sic in familia habenda, liberis educandis, republica constituenda, in negotiis publicis priuatisque, contractibus, connubiis, innumera sunt, a iudicio aliquo hominum profecta, nec tamen ita necessario, quin alia ratione eadem constitui potuissent; vt tamen causas ab initio haud obscuras, ab iisdem, quae paullo ante commemorauimus, profectas adfuisse credendum sit, quibus sua rebus facies, suus habitus indueretur. Sunt tandem plurima, quae ad meras hominum opiniones, iudicia, persuasiones, se referunt, super rebus quidem naturalibus earumque causis, super natura diuina, rerum origine et causis; ad quod genus omnino religiones spectant. Iam ex cunctis his, inprimis vltimo loco commemoratis, alia vitae siluestri, alia campestri seu nomadico, alia hominibus per familias, per tribus, per vicos, per ciuitates habitantibus, et esse propria, et omnibus in locis saeculisque communia fuisse, necesse est, alia in hoc caelo, in hoc solo, in hoc hominum vitaeque cultu in animos se insinuassee. Verum in his tam multiplex et perplexa causarum est coagmentatio et confusio, vt et difficilis sit ambiguaque earum indagatio et obliterata fere obscurataque vestigia. Nisi itaque in rerum generibus nos contineamus, vix commode eiusmodi disputatio iniri potest; quae tamen a singulis exemplis arcessita nisi sit, ad vana et inania delabatur necesse est.

Vt a nouissimo, quod commemorauimus, genere initium faciamus, omnibus barbaris populis, qui non, siluestri ac belluina vita efferati, ab omni, praeter quam famis et ceterarum vitae necessitatum, cogitatione vacant, commune est, vt naturas humana maiores mente et animo concipiant *a*). Verum qui ad hanc cogitationem eos naturae rerum contemplatione aut aliqua caussarum et effectuum reputatione adduci putant, egregie falli necesse est; nimis enim subtile hoc pro istorum hominum stupore; sed, quoties aliquid euenit, quod terrorem ac metum iniicit, aut mirationem mouet, (in vita autem illa omnium rerum rudi et ignara multa animos percutere et sensus perstringere aliter, quam in hominibus ad humanitatis cultum institutis fieri solet, reputandum est,) hoc illi suspiciunt, venerantur, adorant. Itaque animans insolitae magnitudinis, aut follertia ingenii aut quacunque alia arte notabile, inprimis serpentes, quorum tot sunt genera, aliud alia de caussa, mirabilia, tum arboris species adhuc non visae, porro arte et ingenio humano effectum aliquid, etsi manu ad sensum nostrum rudi, haec et similia animos barbarorum ad laetandi et exultandi insaniam adspectu efferre solent. Iam cum politiores populi hunc gestum, hunc affectum saltantium, prostermentium se, adorantium, ad religiones fere referant: folleenne est

A 4 omnibus

a) Non attingemus ea, quae in sua Americae historia libro IV. de religionibus sapienter exposuit Robertsonus, V. Cl. multo minus in refellendis iis, quae ab aliis parum subtiliter disputata sunt, morabimur. Ab iis tamen, in quibus Robertsonus substitit, ad remotiora et altiora procedere et assurgere nunc propositum est.

omnibus fere auctoribus, vt id ipsum pro religioso cultu habeant, vtque eidem, id quod inter nos haberi solet, numen aliquod propositum in illorum hominum animis esse iudicent. Hinc natam arbitramur peruulgatam illam opinionem, vt barbari res inanimatas quasuis sibi obuias, modo iudicio delectas nescias quo, modo informi specie adumbratas, *colere* dicantur, interdum tanquam deum O. M. interdum Geniorum aut Daemonum loco, ex ipso adeo illo genere, cuius nulla nisi ex sanctiore nostra disciplina esse potest in hominum animis notio. Ita sibi ipsis passim illudunt homines, facta per rerum nomina ac vocabula, quibus ad designandas eas vtantur, fraude: cumque barbari ii nec cultus diuini nec diuinae naturae notiones vllas habeant, quae vllō modo iis, quibus nos vtinur, assimulari possint; de iltarum tamen notionum, ex nostris ingeniis ad eos translatarum, caussis et origine inter feroces et barbaras gentes, infinita disputatio veteres inter et recentiores agitata est; atqui de illis notionibus primo loco videndum est, an in istorum hominum animis vere illae sint, et si sint, quales sint. Sunt autem nullae, nec esse possunt; quod facile intelligat, qui apud animum ea reputet, quae, antequam notiones illae nostrae cultus diuini et numinis alicuius seu metaphysicae seu ex reuelata doctrina ductae insidere possint, seu more seu institutione animis instillata esse debeant. Nec ex barbaris illis Africae et Americae, qui gestu, ore, saltatione, clamore incondito, mirationem vel gaudium declarant, multi esse possunt, qui vltra rudem ac ferocem animi impetum aliud quid mente et cogitatione

tatione complectantur; iungunt tamen et communicant gaudia et ludos, mutuo inter se ac naturali impetu, liberi, familiares ac tribules, forte etiam repetunt per certa ac fixa tempora, aut ut fert casus.

Exsistunt tamen passim ingenia minus tarda et obtusa ceteris, quibus de causa eius rei, quam mirantur, cogitatio forte aliqua incidit; at ea prorsus aliena a nostro more; nam quaecunque noua et insolita rei species obiicitur, aut corporis humani more animata esse creditur, aut subesse putatur natura aliqua inclusa et abdita, quae motus vel formae, omnino miraculi, quodcunque tandem illud sit, causa et auctor sit: hanc illi mirantur, huic plaudunt, clamant, exsultant, ut solent barbari animi sensus exprimere quoscunque. Orta hinc opinio nostrorum hominum, qua sibi persuadere, illos barbaros unicuique rei suum Genium, (*Spiritus* fere appellant) tuum inesse Deum, credere; quod dum facerent, grauissimum errorem commiserunt, cum dei vel spiritus notionem iis affinxere, qualem ipsi ex puerili institutione, et ex philosophica aut theologica praeceptione, mentibus circumferrent. Multa adeo pro diis haberi vulgo illi aiunt, quae, ut ex ipsorum narrationibus intelligi potest, barbaris cara tantum sunt et in pretio habita, et seposita festis sollennibus; in quibus prolata ea ac proposita incondito clamore et exultatione prosequuntur, laetitia ad recordiam abrepti. Ita passim audias ab Americanis lustrarum seu martium

tium exuuias pro diis penatibus haberi, *b*) cum eas festis saltationibus adhibeant; si tamen quaeras, quinam religiosi cultus modus ille sit quem barbari exhibeant, nihil habent nostri homines quod ad eum describendum afferre possint *c*). Falsa scilicet persuasione ex suo more et ritu inter Christianos et Europaeos recepto iudicant de barbarorum sensibus et iudiciis: de quibus tamen, nisi ad ipsorum mentem et intelligentiam accommodate, quod probabile sit, statui nequit. Neque aliter statuere licet de iis, quae terrorem iniiciunt, metum mouent, mala inferunt, quae eadem religiose colere et adorare vulgo feruntur barbari. Adumbrata est haec opinio e nostro sensu ac more; non vero ex sensu ac iudicio hominum rudium et a nostris religionibus et institutis alienorum.

Cum autem nihil sit, quod mirationem, qualis quidem in rudibus et obtusis mentibus esse potest, cum tripudio illo et gaudio immodico aut metu ac terrore fere coniuncta, facere possit maiorem iis, quae in rerum natura apparent: ut fluminum catarractae, lacuum immensa vorago, silvarum vastities; tum fulmina, procellae, tempestates, omnes-

b) Ita nuper quoque *Carver*, a cuius lectione recentes eramus, cum haec scriberemus; itaque, etsi in rebus a multis aliis traditis, fide eius potissimum et auctoritate uti licebit, *Travels through the interior Parts of North America*, p. 277. 8. 309. Apud eundem legimus serpentem ingentis magnitudinis, calliditate hominis domitum ac cicurem, pro Genio, *Manitu* ipsi appellant, habitum p. 43. At quaeri debebat, quo sensu, qua notione illis barbaris *Manitu* diceretur.

c) v. c. idem *Carver* p. 386.

omnesque aëris, maris et terrae motus et explosiones: mirum haberi nequit, si ab his potissimum, quae humana vi maiora esse stupidissimis ingeniis obuium fit, barbarorum religiones procedere viderimus. Vt vero de auctore earum rerum cogitationem admittant, non nisi fero fieri credere licet; quod si auctorem assignant, eius notionem tamen aliter, quam ad humanum exemplum, tale quidem, quale ipsi oculis animisque perceperant, suscipere nequeunt. Inesse itaque fulminibus, ventis, mari, et sic porro, statuunt naturas, quae ea moueant; de ipsa mouendi ratione parum solliciti. Imbuuntur tamen animi sensim sensimque persuasione roboris, virium, celeritatis, efficaciae quae in illis naturis sit. Ex his aliquando sensus aliquis religiosus enascitur; cumque is ab iis, quae terrent, minantur, nocent et enecant, processerit, omnis barbarorum religio a metu ac terrore proficiscatur necesse est; ut adeo hactenus recte dictum esse videatur, quod poeta habet: *Primus in orbe deos fecit timor*. Ad nostrum potius quam ad rudium et incultorum hominum sensum comparatum est, quod pie magis quam intelligenter arbitrari solent multi, ab adspectu siderum ac caeli mirabili primam religionem proficisci debere. At plurimi sunt barbari, ad minima quaeque stupentes, qui solem et caelum nunquam suspexisse videntur; nec iis, quibus adfuevere, intendere solent animos barbari; nec in contemplationem rerum caelestium pronos animos rudes et obtusos credere licet, nisi repentino aliquo solis aut lunae defectu. Ab hoc forte aut simili casu erecti fuere nonnullorum populorum animi, ut
solent

folem mirarentur; ut vero diuino aliquo cultu eum venerarentur, fieri non potuisse videtur ante agrorum cultum repertum vel illatum, quo demum intellectum est, quanta sit solis vis ad fruges producendas; tum temporum vices ad eius vices ac cursum constitutae; inde ad lunam ac sidera simili admiratione ac religione complectenda processum. In iis itaque locis, in quibus maturior fuit aratio, maturiorem quoque solis et siderum cultum prodiisse, quis non intelligat, et simul illud perspiciat, ab iis ingenii humani progressum fuisse facilem et prouum ad naturae vires generatrices indagandas; quas cum suo more per symbola constituerent, idololatriae inde, quam appellant, femina iaci debuisse, et ea pro ingeniorum ac locorum varietate varia ac diuersa. Alii subodorati sunt rerum elementa, ignis in primis et aëris; inde caeli religionem et elementorum suis symbolis expresse runt; per temporum decursum variatam et a primorum auctorum sensu admodum deflectam. Atque ita res se habuit inter Chaldaeos et Babylonios, inde per Aegyptum, tum per Orientis terras alias; non item apud alios barbaros, in aliis locis ac vitae generibus.

Alii enim barbari, siluarum horrore, fluminum fremitu, lacuum altitudine, montium vertice elato, contactis animis, ad alias naturae partes stupuerunt; inde miratio, horror, metus, qui ad religionem paratos ac procliues reddidit. Inesse et iis rerum miraculis aliquam naturam, quae, ut ea essent, ut durarent, ut feris, piscibus, utensilibus, abundarent, efficeret, facile sibi persuasere. Inde prolapsae passim, saltem cum temporum successu, mentes

tes ad Genios locorum et Deos certis locis assignandos. Alii tandem, quem Larem gentis auctor coluerat, deum patrium factum coluerunt, deum *unum*, sed *gentis suae*.

Cum, a sollicitudine et metu, ut supra vidimus, inter terrores et minas nato proficiscatur fere omnis barbarorum religio; et ea quidem instituta inter homines feros et immanes: multorum hinc populorum ritus sacrorum ad feritatem et crudelitatem et fuisse et esse compositos nemo mirabitur; seruantur enim ritus sacrorum patrii etiam in meliores aetates. Quod humanas victimas mactarunt tot populi, idque religionis loco habuerunt aut ipsi, aut ii, qui eos adiere: sacrorum ritus arguit in ipsa feritate et barbarie enatos. Multo vero latius, et apud omnes utique populos, quibus nondum melior diuinae humanaeque philosophiae lux affulsit, obtinuit ea persuasio, ut numen haberetur iracundum, morosum, truculentum, vindictae cupidum, ob leuem interdum culpam vel errorem calamitates ac miseras publice priuatimque infligendas praeceps, idem muneribus ac votis factis exorari se patiens; totum omnino ad hominum, nondum ullo sapientiae ac virtutis studio exultorum, morem compositum. Haec semel barbaris mentibus impressa opinio ac notio, etiam ad numinis O. M. cogitationem miserrimo errore translata, per ea quoque tempora duravit, quibus, melioris iam philosophiae luce diffusa, expolita ad omnem humanitatem hominum ingenia persuasionem illam diuina natura indignam, qua omnis melior dei notio tollitur, respuere et abhorreere debuisse putares;

res; ita relictum est passim in numine id, quod dudum in se ipsis non tolerabant homines. Adeo difficile est sapere, vbi maiores desipuerunt, et recedere ab iis, quae perperam a patribus tradita accepimus.

A quibus populis semel pluribus rebus ac naturae partibus et formis sua esset assignata natura, quae eas incoheret, moueret, forte etiam procrearet ac fingeret, hoc est, genius aliquis, quem nos solumus appellare, seu deus: eorum ingenia procliuius esse crederes ad eam persuasionem, vt praeesse iis numinibus numen aliquod, ordine, vi ac dignitate superius, aut numen aliquod summum, opinarentur. Tarda tamen est mens humana ad hanc opinionem amplectendam, nec facile eo processit, nisi in iis locis ac populis, qui regis, multos regulos suae ditioni subiectos habentis, imperio parent. Attemperauere alii deorum coetum et ordines suis rebus publicis, aliis aliter constitutis. Vt vero, omnibus exclusis, vnum tantum numen esse sibi persuaderent: si non superbia et arrogantia populari, qua suum deum indigetem omnibus aliis praeferrent, eundemque alienigenis diis tanquam in honorem ac locum sibi debitum subrepentibus infestum et in eorum exitium imminentem statuerent, adducti erant homines: id, nisi duce philosophia, seu reuelata seu subtiliore aliqua, non magis expectari potuit, quam vt a sensibus ad intelligentiam et mentem numen reuocarent. Itaque in nostros Germanos prisca aevi nimis indulgentes ac liberales esse videntur, qui iis eam religionum subtili-

subtilitatem, quae acutissimo quoque nostrae aetatis philosopho digna esset, tribuunt. Narrantur ab iis, qui Americam peragrarunt, multa de deo aliquo summo, quem indigenae vniuersis rebus praesse credant; alii de numine gemino, altero bono altero malo, quorum huic, quam illi, curiosiorem ac diligentiore plerumque cultum exhibeant. Quae tamen ad suos quemque sensus adumbrasse arbitramur; quae ipsi barbari sentirent, non nisi ex ipsorum sensibus assequi licet; eos vero ad rerum vniuersitatem aliquam assurgere solere dubitare licet. Neque dubitationem eximit, quod numen aliquod caelum insidere nutu ac verbo declarant; nam quale illud esse arbitrentur, vnumne, aliis sublati; an, quod probabilius fit, adscriptum et inclusum huic mundi parti, vt alia aliis; an potentius ceteris diis, nemo facile nos docuerit. Vt autem caelum dei alicuius, mox et plurium, ab naturae elementis ductorum, deorum sedibus assignarent populi, in promptu vel ad vulgarem intelligentiam fuisse videtur.

Restat vt haec vniuerse disputata ad veterem Graeciam referamus, atque notiones eius, religiones et cultum, cum iisdem comparemus; quaeque ex iis aut cum aliis populis communia aut ex caeli solique ratione, aut fortunae casibus et vicissitudinibus habuere propria, paullo curatius inquiramus. Verum festinantes nos vrgent sollennia, quae crastino die agenda instant: in quibus pompa ex aedibus academicis ducetur, et in templo orationes ac caerimoniae solennes rite habebuntur. Iis itaque

itaque vt vos, Comites S. R. L. illustrissimi, vosque aut auita generis nobilitate illustres, aut propria virtute ingenique laude nobilitatem vobis paraturi, cum honoris et officii significatione interesse velitis, ita rogamus, vt pro amore vestro, necessitudine, ac studio erga nos, precibus vos nostris locum facile facturos esse persuasum habeamus. PP.
Gottingae, Kal. Iul. c1010ccclxxix.

II.

ACADEMIAE GEORGIAE AVGVSTAE

PRORECTOR

G O D O F R. L E S S D.

C V M S E N A T V

ANNIVERSARIA INAVGVRATIONIS

SACRA XXXII.

IN A. D. XVII. SEPTEMB. MDCCCXXIX.

RITE INDICIT.

*Vita antiquioris Graeciae ex ferorum et barbarorum
populorum comparatione illustrata.*

Commentatio II.

Anno iterum verso, Commilitones, redit sollennis dies, quo huius reipublicae academicae faustos natales grata et iucunda recordatione, gratulatione laeta, piis votis precibusque prosequimur. Habemus enim, quod laetemur, gratulemurque rerum nostrarum statum incolumem, nulla calamitate, nullo per hunc annum casu graviore, perculsum aut conuulsum, ne tentatum quidem ab aliquo inde tempore minoribus illis, quibus academica res laborare solet fere omnis, malis et morbis;

Heynii Opusc. acad. Vol. III.

B

bis;

bis; metu vero illo, qui superiore anno, cum hunc diem celebraremus, animos nostros non parum sollicitos haberet, ne belli ciuilis per Germaniam spargeretur latius incendium finibusque aliquando nostris contagio aliquo adhaeresceret, sublato; ita ut nunc supersit vnum illud votorum genus, quod pro Occidente pacando facimus: quod tamen non remissius aut segnus, sed eo ardentius facimus, quo magis, cum humanitatis communisque naturae ac necessitudinis causa, tum Regis nostri Indulgentissimi gratia, quem omni prosperitatis genere cumulatam vtinam videremus, vota ea suscipimus, pacemque ac tranquillitatem terrarum orbi generique humano restitutam cupimus. Interea ea saltem fruamur felicitate, quae diuino aliquo munere ac beneficio nobis contigit, et oculos animumque recreemus adspectu et cogitatione laetius in dies efflorescentis rei academicae nostrae. Quod enim aut bonorum aut ornamentorum genus, quod quidem aut traditum nobis sit ab iis, quibus nos successimus, aut nostra virtute partum, aut labore et industria quaesitum, dici potest, quod non integrum et illibatum sit, multa etiam sint aucta magisque cumulata? Nec vero ut res nostras laudemus ac commendemus, haec commemoramus, sed commemorando ut illud efficiamus, ut appareat, quantum singulari alicui beneuolentiae numinis et tutelae debeamus. Siue enim interiorem nostrae reip. habitum, seu externam speciem, dignitatem et famam, contemplemur: occurrunt vndique, quae gratam erga numen pietatem incendunt, et diei huius prouocent hilaritatem. Quid enim? festus hicce

hicce dies non tanto candidior faustiorque illuxerit, quo laetius ciuitatem hanc enitescere, ciuium frequentiam increfcere, studia excandescere videmus? non laetemur numerum ciuium auctum, sed eiusmodi iuuenum accessu et supplemento, quorum ingenia expoliuerit, quorum mores finxerit aut fortuna lautior aut melior institutio? qui cum, ingenua indole, vitae elegantia, morum probitate ipsi se contineant, academica disciplina haud difficulter contineantur? vt, si academiae humanitatis non minus quam litterarum officinae esse debeant, hoc nomine nunc cum maxime Georgia Augusta appellanda sit; quam etiam aduenae, qui nos adeunt, quique ex incessus modestia, nullo viarum nisi ad auditoria festinantium strepitu, ex frequentia in templis compositoque ad pietatem et audiendi studium habitu ac vultu, indicium faciunt, hac laude eximie commendant. Nihil enim segniter, nihil socorditer et supine agi vident; fedulitas, industria, studium acre et incitatus mutuo adpectu, exemplo, contagione, stimulat et excitat, et pudore suffundit etiam tardiores.

Quam vtinam laudem sibi propriam ac perpetuam habeat haec nostra academia! vtinam ea vobis, Ciues, proposita sit gloriosa et memorabilis concertatio, vt factam hanc exemplis vestris, morum ac disciplinae honestate et dignitate, conspicuam academiam tueamini, quaque locastis laude ac fama, in ea firmetis illam et stabiliatis, diligenterque prouideatis, ne, quod saepe factum, hac parta per vos exiltimatione et laude vnus alicuius

inutilis ciuis culpa ac fraude excidatis vniuersi. Nam ne nos officio nostro ac fidei deesse videamur, et curauimus studiose, et religiose curabimus. Sunt vero etiam, quae studium nostrum incendere possint: Regis Optimi indulgentia, Virorum summorum, quibus cura nostrae rei academicae tradita est, propensissimae voluntates; institutorum nostrorum tutela et inspectio assidua; studium ornandae Bibliothecae publicae et Musei academici. Experti sumus hoc quoque anno munificentiam singularem, cuiusque similis aut par memorari hoc in genere alia vix posse videtur, Viri Illustris et summo cum honore cum antea nominati, tum nunc quoque a nobis nominandi, L. B. DE ASCH, qui sumtibus, pro priuata fortuna satis opiparis et amplis, conquiri ac mitti curauit omnis generis res raras ex Asia et Europa septentrionali, inprimis quae ad naturae opes Musei nostri locupletandas, et ad numerorum rariorum, quibus aut historia illustrari aut regnorum et imperiorum rationes numismaticae declarari possint, augendas copias nostras spectent, Qua sua liberalitate vti vir praestantissimus memoriam suam in hac Musarum sede ad perpetuam eamque gratam recordationem consecrauit, ita inter nos, dum viuimus, commemorationem sui honorificam et iucundam merito est habiturus.

Videtis, Commilitones, quae adhuc à nobis narrata sint, sine grato pioque animorum sensu et cogitatione indulgentiae diuinae, cui et haec et innumera debemus alia, narrari non potuisse. His itaque ipsis sollennibus quorum indicendorum
caussa

caussa haec proscripta sunt, Deo O. M. publice agentur gratiae. Ducetur enim a viris Ordinis Senatorii Professoribusque ac Doctoribus in templum academicum pompa sollennis, et, quod speramus, frequens: nam in bonorum fructu communi nefas foret communem pietatis sensum gratum ac religiosum non praestare. Votis autem publice nuncupandis habebitur primo loco oratio a Collega spectatissimo GE. LVD. BÖHMERO, Iuris Antecessore primario, Ill. Ordinis Ictor. Ordinario, M. Britann. R. a Consiliis Iustitiae secretioribus, Viro et doctrina, et auctoritate ac virtute animi meritisque eminentissimo, nunc felicissimo Parente, quippe cui rara illa et vnica forte contingit felicitas, vt duobus filiis, *Io. Friderico Eberhardo* et *Io. Ludouico Bechtoldo*, praeclarae spei adolescentibus, comitatus prodeat, eosque summis in Iure honoribus exornandos in concionem producat. Consequetur cum ipsis summos in Iure honores eodem brabeuta *Ge. Lud. Krukenberg*, ornatissimus Candidatus. Quibus rite factis adscendet in cathedram facietque verba a) Vir Experientissimus, Collega coniunctissimus, IO. ANDREAS MURRAY, D. Medicinae et Botanices Professor, idemque summos Medicorum Ordinis honores Candidatis quatuor dignissimis, *Ge. Philippo Lehr*, Moenofrancofurtenfi, *Theodoro Frid. Trendelenburg*, Lubecenfi, *Car. Henr. Wertmuller*, Stockholm. Sueco, et *Io. Frid. Adolpho Becker*, Lippensi, impertiet. Ad haec sollennia, praesentia vestra, Comites Illustrissimi, vestraque frequentia,

B 3

a) de limitanda laude librorum medicorum practicorum vsui populari destinatorum.

quentia, fauore ac studio, ornanda, Illustres ac Generosissimi Iuuenes, et quotquot vobis ipsi vestra virtute ac doctrina nobilitatem facietis, Ciues ornatissimi, vt, si quis beneuolentiae, amoris ac pietatis sensus animis vestris insidet, conueniatis ac confluatis: non tam nostro, quam almae vestrae Parentis, Georgiae Augustae nomine, quae a liberis suis hoc honoris genus, hoc nutritionis praemium, expectare ipsa videtur, rogatos vos esse existimatote.

Interea, dum sollennium curandorum apparatus fiet, ne vlla hora vacua sit ab officii honestate et a studii vtilitate, agite, Ciues, disputationem, nuper sumtam *b*), et manu dimissam, iterum repetamus. Substiterat autem opera nostra in eo, vt ad Graeciae aetates antiquiores transferrentur ea, quae adhuc vniuerse de rudibus ac vix inchoatis religionibus siluestrium et campestrium populorum ita erant dicta, vt liberatos a nostris opinionibus ac notionibus animos indueremus ea cogitatione ac ratione, quam illa vita, illa aetas postulat. Cum iis igitur, quae, ex ipsa rerum hominumque natura ducta, a nobis commemorata erant, conuenit id, quod fama acceperant Graeci, Herodotique inprimis auctoritas firmavit *c*), cum primo Pelasgi deos haberent nullos, postea eos habuisse deos sine nominibus. Cum enim homines palantes ac sine certa sede vagantes, re ipsa ferente, per familias coirent: religiones sibi quaeque suas constituit, rudi aliquo

b) Pröluf. ad 11 Iul. h. a.

c) lib. II, 52.

aliquo signo posito, ad quod ritus certos faceret; neque alio nomine aut signum aut religio indigebat, quam quod eius familiae et esset et haberetur. Mansere ex hoc genere sacra pauca familiarum, quae opes et potentiam inter suos consequutae erant, quippe in quarum sacra transiisse videntur alii seu clientes seu populares ac ciues. Superfuit tamen ex vetere more religio Larium ac Penatium, multo magis frequentata illa in Italia quam in Graecia; in qua religionibus publicis omnino priuatae cessasse et in desuetudinem abiisse videntur; apud Romanos vero et Etruscos minus obscuratus Penatium ac Larium honos, nisi sub Caesarum demum tempora. Sed in Graecia vetere, cum magni hominum coetus e pluribus familiis confluerent, *dii patrii*, stirpium primo, tum vicorum ac ciuitatum facti, nomina quoque sua acceperunt, quorum tamen vim et originem plerumque obliterauit vetustas. Eminuere autem inter eos nonnullorum nomina, quibus adiunctum quoque saepe loci nomen declarat patriam religionem, vt Iouis Lycaeï, Iunonis Argiuae, Apollinis Amyclaei, et sic porro: at in ipsis religionum locis *πατρώου* Ioues, Apollines, Mercurii, audiebant; vt ex Pausania inprimis ad cognoscendum in promptu est. Verum haec iam alio loco diligentius exposita *d*) summatim nunc memorauimus. Attigimus illud quoque, quod cum barbarorum populorum communi more ac ritu conuenit, quod certis locis suum assignarunt numen veteres Graeci, inprimis montibus, flui-

B 4

flumi-

d) de Origine et Causis fabularum Homericarum in Novis Commentar. Soc. G. Vol. VIII. p. 37.

fluminibus ac fontibus; quae opinio non vnam eandemque habuisse videtur causam et originem; cum modo obscura aliqua alicuius rei, quae naturam loci singularem constitueret, notio, modo ipse adspectus, silvarum et montium solitudo, rupium et antrorum horror, conuallium amoenitas, modo antiquae maiorum sedis recordatio, locis religionem faceret. In multis Graeciae partibus, inprimis iis, quae vetera instituta et ritus diligentius seruarent, ut inter Laconas et Argiuos, prisca Nympharum nomina, ut Taygetes, Spartes, quae Eurotae esset filia, Amymones, Nemees. Asopi filiarum, et sic alia, audiebantur, e quibus heroes indigetes susceptos ferebant; at in reliqua Graecia obscuratis nominibus omnino Genii locorum, Nymphae, Naiades, Oreades, Dii ἐγχώριοι celebrabantur.

Recte, inquis, haec disputata funto; Graeciae numina nata putabimus partim e priscis Pelasgorum diis familiarum, partim ex diis locorum; plurima quoque esse innouata seu figmentis seu philosophematibus nonnullorum acutiorum, tum institutis, usu, vita, rerum vicissitudine ac temporum decursu: vnde tamen illud euenisse dicendum erit, ut Graeci nullas deorum formas, praeterquam humanas haberent? Habuere vero alias; et plurima passim memorata sunt, et adhuc Pausaniae aetate per Graeciam visa, signa deorum rudia et informia, seu ligno seu lapide facta, modo columellam modo faxum coni vel cubi forma referentia. Rudes scilicet homines deficiebat ars meliorem formam effingendi: quae quum primum incrementa inter eos habuit,

habuit, ad formam humanam Graecia omnem religionem reuocauit, et vero reuocare debuit. Quam enim numinis formam ac speciem effingant aut mentesua cogitent homines aliam praeterquam suam? Itaque per omnem septentrionem et veterum et nostrorum temporum constans est barbarorum mos, etiam in rudissima arte, exprimendi deos suos facie humana. Vt vero ad animantium formas in diuina specie effingenda aberrarent homines, factum est, ac fieri debuit, inter eos populos, qui hieroglyphis ac symbolis a natura per sensus obiecta ductis notiones animorum declarare soliti sunt aut adhuc solent. Recedunt hi a natura humana in diis, quando quidem, de iis quae animo sentiunt, parum explicita et explorata, nec verbis nec scriptura quomodo commode reddant, in promptu habent: Obscura itaque per multo etiam obscuriora exprimunt, a vulgo mox omnino ignorata et seruii stupore temere repetita. Verum in Graecia multa euenere, quae aliis barbaris non contingere, quibusque adeo effectum est, ut ab eo feritatis gradu, in quo adhuc multi populi subsistunt, ad meliorem cultum ipsi progredierentur. Primum aduenae ex aliis populis, maiore ingeniorum, artium et litterarum cultura expolitis, religiones ac ritus intulere, si non saniores ac puriores, ingeniosius tamen descriptos et constitutos, et ex notionibus certi generis philosophicis, quales illa hominum aetas ferebat, compositos; quorum rituum cum haud adeo magna esset dissimilitudo cum iis, quos ipsi a patribus acceperant, nec primo statim nutu imperaretur caue necessitas imponeretur, ut omnes

suas opiniones animis euellerent, cunctos ritus patrios abolerent, maiorum auctoritatem defererent, instituta eierarent; haud paullo facilius eae religiones in animos hominum illabebantur et se insinuant, quam nunc nostra sanctior doctrina et institutio, a sensu, ingenio, animorum vi, intelligentia, more, usu, natura adeo ac coelo barbarorum, quos adimus, alienissima; ex qua si quid aut percipiunt aut memoria retinent barbari, rudes quidem nec aliis artibus ac doctrinis imbuti, nihil tere aliud id esse apparet, quam ritum aliquem supersticiosum cum prisca ac patria superstitione confusum. Itaque mature coaluere veteres illae religiones cum nouis et aduentitiis, aliis ex his acceptis, aliis spretis ac posthabitis. At rituum illorum causae narratae a maioribus mira varietate ad posteros peruenerant: coniunctae cum iis commemorationes maiorum, gentisque ac stirpis, fortunae; multa aetate, multa multorum iteratione ac frequentatione, auctae omnes in maius rerum miraculum. Extitere tum vates, qui religiosos hos mythos, varie confusos ac mixtos, fundum suae poetices et argumentum carminum facerent, iisque adeo suauitatem, elegantiam, copiam varietatemque miram affunderent. Idem vates iis vixere temporibus, quibus vitae priscae vestigia necdum omnia euanuerant, philosophiae tamen incunabula aliqua erant constituta, sermo autem nondum ad subtiliorem rationem compositus, non tam falsa fingendi, quam vera, aut pro veris accepta, rerum verborumque figmentis exornandi, licentiam non modo praebebat, sed etiam requirebat. Quae omnia nullis aliis barbaris

barbaris cum fortuna obtulit, tum Graecis illud tribuit, vt, cum meliorem animorum cultum per artes et doctrinas induerent, non hieroglyphicam aut aliam minus commodam litteraturam acciperent; qua vna ratione et caussa vt Aegyptiorum ita Sinensium profectus tolluntur; vtque iidem non alium populi alicuius peregrini sermonem adsciscerent, quo ad peregrinum habitum mores, ingenia, litteras, deflecti, indolem propriam ac virtutem extinguere necesse est, sed vt sibi scaperent, suaeque retinerent. His omnibus effectum est, vt Graeci, ab iisdem initiis profecti, priscorum institutorum vestigiis vbique seruatis, multa tamen, etiam in religionibus, multo melius, quam alii populi, constituta haberent; saltem vt barbaries ac foeditas a publicis sacris abesset, quae aliis gentibus, inprimis ex prisco Naturae, cuius vis procreatrix per symbola a generatione petita declarari solebat, cultu, adhaeserat. Cum autem deos humana formâ indutos *e)* accepissent poetae: quam accommodatum id poeticis rationibus esset, facile intellexere; et primo quidem etiam res, quae in natura apparerent, rerum elementa, naturae partes vel vires vel effecta, tum notiones aut symbola, quibus notiones animorum redderent, in similem naturam deorum mutauere; tum vero vtrumque deorum genus epicis narrationibus adhibuere, quoties aliquid perficiendum esset, quod maiorem ac potentiorum auctorem, quam hominem aut heroem, desideraret. Elaborata hinc est vetus illa hominum rudium et imperitorum

e) *ὁ ὁρῶντος* v. Herodot. I. 131. Foucher V. Cl. in *Hist. de l'Acad. d. I. Tom. XXXV. p. 15. sq.*

ritorum animis insidens ratio, vt humanis ingeniis, moribus, virtutibus vitiisque ex eo quidem genere, quod inter homines eius aetatis maxime vigebat, deos insignirent, cuncta tamen et aucta in maius, vltra humanae naturae modulum, et corporum et animorum virtute; adumbrata deorum vita ex vita heroum; assignata sedes in Olympo monte: quem ante oculos habuisse necesse est poetas eos, qui primi eam rationem sequuti sunt. Coniuncta cum iis, quae exposita sunt, erat illa quoque ratio, vt has ipsas naturas, quas deorum nomine impertierant, interdum, prisco saltem acuo, inter homines versari, hominum more agere, ferrent et putarent; cuius similis ac par persuasio inter plerosque barbaros etiamnum obtinet. Forma quidem ac species, qua in conspectum venire crederentur, erat humana, sed maior et augustior, nonnunquam horrida, minax et terribilis. Scioribus temporibus, cum deorum apparitiones minorem iam fidem repèrent, spectrorum terriculae succedere; de quibus non minus absurda, quam quae inter nos audiri solent, narrata olim sunt. *f*) A diis iratis immitti morbos, pestilentias, agrorum sterilitates, omne calamitatum genus, et nunc barbari sibi persuadent, et olim antiquitas credidit, iram autem deorum prouocari iisdem fere causis, quibus hominum impotentia, incontinentia et libido incitari solet; sunt in his morbis inprimis furor et insania, diuinitus fere

f) Narrantur enim congressus cum spectris, stupra, pugnae, caedes. Nota narratio de spectro Temessensi ab Euthymo Locro pugile debellato. Paus. VI, 6. Aliud *Φίσμα* ab Hippota victum v. ap. Conon. narrat 26.

fere infligi crēdita, de qua alio tempore erit agendum. g) Cum dii certa loca, imprimis siluarum solitudines aut consecratos agros, frequentare crederentur: orta est vetustissima illa religio, vt consecrata diis loca et omni humano vsu exempta, (ἀνισμύνα) vna cum feris et armentis, quae in iis errarent, intacta seruantur, vtque ea adire aut quicquam inde subducere nefas haberetur: vt adeo Solis armentis mactatis Vlyssis socii impio et vix expiando scelere se obligasse existimarentur. Neque alia etiamnum multorum barbarorum est religio. Sunt verbi causa in lacubus Huronensi, et superiore Canadensi, insulae plures, quas certis Geniis consecratas et ab iis habitari creditas nemo barbarorum adire aufit h). Attingere tantum solemus haec et strictim commemorare, quandoquidem in iis, quae aut satis vulgata, aut late per plures populos, terras ac faecula, sparsa sunt, exemplorum auctoritas desiderari nec solet nec potest. — Verum instat nunc sollennium agendorum tempus, iubetque adeo ipsa festi diei religio alia in aliud tempus differre ac seruare. Nunc, quod felix faustumque sit, dum sollennium apparatus fit,

*Vos ite actutum, atque opere magno edicite
Per urbem, ut omnes, arcem qui astuque accolunt,
Ciues,*

g) In Comment. de maribus inter Scythas morbo effeminatis et de hermaphroditis Floridae. in Commentationib. Soc. G. Vol. I. 17.

h) Vt nuper iterum Carver docuit, (*Travels to the interior Parts of North-America*) p. 144. 134. 5.

E p i m e t r u m.

Præscriptam habebam animo formam eorum, quae scriptionibus pluribus ulterius persequeretur. Duxi lineas in Comment. I. p. 5. 6. seposui tamen incepta, mox etiam omisi et abieci, cum viderem Collegam doctissimum, me iuniorem, maiore copia-ram apparatu et otio iulstructum, ad haec eadem tractanda accessisse, conuersis ad generis humani, quam appellant, historiam studiis. Ne itaque, ab aliis rerum principiis et argumentis ipse profectus, de nonnullis aliter sentiendo ac statuendo, aliorum placitis ac studiis obrectare velle viderer; cum ab omni hac contentione sim alienissimus; ab toto hoc genere recessi; inprimis cum Genius natalis auri meae aureum illud insufurraret: *laudato ingentia rura, Exiguum colito*. Illud tamen, quod in binis his commentationibus exposui, sic satis bene mihi obseruasse videor: omnem de barbarorum et ferorum populorum moribus, institutis et opinionibus, disputationem esse inanem, si, vbi *verbis nostris vulgaribus*, quibus tamen ea in re vtendum est, enuntiatum aliquid a peregrinatoribus et scriptoribus, qui de iis tradiderunt, acceperis, barbarorum hominum animis arbitreris easdem rerum notiones obuersari, quas ipse teneas, cum eadem verba audieris, sique reliqua inde argumentando constituas. Immo vero ad *sensus* istorum barbarorum, quantum quidem licet, assequendos intendendus est animus, quales illi fuerint aut esse debuerint, in sequendo vel faciendo eo, quod nostrates ex Europa aduenae familiari sibi nomine, et ex sua opinione, appellarunt; videndum

dendum est, in illa vita, in illo caelo soloque, in illo culturae seu defectu seu progressu, quales possint ac debeant esse hominum notiones: ad has exigenda sunt narrata, non quae peregrinantium quisque statuerit aut ariolatus sit, sed facta et res, quas sensu oculorum et animorum integro et incorrupto illi cognouerint. Docuisse hoc mihi videor in notione numinis ac religionis; hoc idem doceri poterat in omni religioso cultus genere. Sic vocabulo sacrificii, cui innutriti sumus, decepti, quam multa de priscis populis aut de barbaris nostrarum aetatum apposuerunt scriptores aliena et parum consentanea! dum adorationis voce utimur, quam falso plerumque de barbarorum populorum sensu statuimus! dum mysteriorum nomini indulgemus, dum magos, vates aut sacerdotes pronuntiamus, quam multa se in animum insinuant, perfecta ex iis notionibus, quae, nominibus illis auditis, cum impellere solebant! De Geniis veterum, ac Daemonibus barbarorum nostrae aetatis, locus est et copiosus et lubricus. Incredibili modo variata eorum fuit notio et acceptio per omnes aetates. Vellem utique totum hoc genus subtiliter satis a quoquam declaratum dari. Accedendum vero est ad eam rem nulla cum opinione praeconcepta, nec statuendum est ab initio quid effectum esse velis; verum videndum, quid ex iis, quae rimanti et investiganti se obtulerint, reuocatis singulis ad genera sua, statuendum esse videatur. Vt in malos Genios malosque deos incideret hominum multorum opinio, proclive esse debuit mentibus indoctis et ultra sensuum impulsus non assurgentibus, quum vitae
mala

mala et aerumnas, naturae ruinas et excidia facta viderent: obscurum est alterum, quali natura, ingenio, vi, pollentes et instructos eos putauerint. Hoc igitur in toto hoc genere difficillimum esse arbitror, a nostris sensibus auocatam mentem transferre ad eos sensus, qui hominum ipsorum fuerint de quibus aliquid traditur, multo magis, si aut aetas, qua vixere, aut vitae genus ac conditio a nostra vita et aetate valde discrepat et abhorret. Sensu animi molli, ingenio versatili ac facili et sagacitate opus est; ab omni opinandi temeritate et arrogantia, tuendaeque opinionis semel conceptae pertinacia, alienus esse debet, qui in aliorum sensum, morem cogitandi et opinandi, tamquam subrepere vult et se insinuare.

Alia in comparandis hominum diuersi caeli diuersaeque aetatis ingeniis, moribus et institutis, posita est commentatio, multo minoribus difficultatibus obsepta, minore quoque acumine ac sollertia indigens, dum non nisi ad diuersas caeli solique naturas, ad statum conditionemque vitae et culturae modum, et ad vim quam illa ad corpora ac sensus hominum habent, est attendendum, vt intelligas, in simili locorum hominumque habitu similes quoque, saltem haud multum discrepantes, mores et instituta obtinere. Et sunt quidem horum alia in vitae necessitatibus aut rerum copiis parandis seu fruendis occupata, quorsum cultus quoque, cura habitusque corporis, habitatio, instrumenta, vtenilia spectant; alia in omni re domestica, ineundis matrimoniis, liberis educandis, negotiis ciuilibus, republica regenda, spectantur,

quae politicum omnino genus constituunt: quorum alterum hoc genus multa habere potest vtilia ac praeclara, prius illud plura, quae delectant, at minus vtilitatis afferunt. Vtriusque generis multa colligi possunt ex Herodoto, Diodoro et Strabone, multa ex aliis non sine fructu cum scriptoribus de Americae Africaeque barbaris comparanda. Esse, verbi causa, et olim fuisse, qui in specubus habitent, Troglodytas appellant, nihil habet in quo multum moreris. Terras incultas abundare serpentibus ac feris, paludibus locisque vliginosis laborare, ut veteres Delphos, Arcadium, Argolidem; succedere adeo monstra et monstrorum domitores; promiscuos ferorum hominum esse concubitus; matrimonia barbarorum emtione venditione parata et pro dominii genere habenda; vlciscendae iniuriae et poenae caede facta expetendae inter barbaros propinquis impositam necessitatem; ignem terebrando ligno extundi solitum; (Apollon. I, 1184) corpora picta et stigmatibus puncta, ut Thracum (apud Herodot. V, 6. et alios); a Scythis caluariam itidemque cutem detractam pro victoriae signo habitam (apud eund. IV, 64. sq.); inprimis rituum funebrium memorabilem inter multos populos consensum; fetialium sanctitatem, oliuae usum in supplicatione; fagittas in capitis diademate fixas (ap. Aethiopes: Luc. de saltat. c. 18): haec et alia, memorauimus enim temere quae menti ac memoriae se offerebant, communia esse barbaris et veteris et nostri aevi, res est ad obseruandum expedita satis et obuia, nec adeo difficile est causas exputare ex vita, studiis, necessitatibus istorum hominum haud inter se dissimilibus.

milibus. Ita moris exponendi pueros et necandi, aut ita educandi, ut vix patria aliqua in eos auctoritas esse videatur; conditionis, qua feminae habentur, facile reddi potest ratio: omninoque illa, quae ad causas physicas retrahi possunt, expeditu sunt facilia. Maiorem tamen delectationem ad meum sensum habent, plusque utilitatis ad mentis humanae naturam et indolem per omnem vitae culturam eiusque incrementa variabilem et ad novos habitus induendos habilem aptamque declarandam, afferunt illa, quae ante haec omnia primo loco posui: sensus barbarorum religiosi et de rerum causis originibusque iudicia, et opiniones ac superstitiones; tum primorum sapientum philosophemata; cumque ea per symbola et mythos fere declarentur, accendit haec ipsa res animadversa studium ista cognoscendi. Accedit enim haec nova difficultas in comparandis veterum populorum ac recentiorum opinionibus quod plurima in utroque genere per symbola sunt declarata: quae si quis ex nostro sensu interpretetur, ut plerumque fieri solet, alienissima eum de populorum ingeniis ac sensibus profiteri necesse est. Sunt in his multa etsi diversis a causis inter diversos populos profecta, ad communem tamen humani generis indolem et naturam facile reuocanda. In hoc rerum ordine sunt opiniones de monstris, prodigiis et ostentis. Ut sint, qui praestigiis mirationem faciant aliis, eaque re inter suos auctoritatem consequantur, etsi variis modis et artibus id efficitur, in natura tamen humana ubique causas habet idoneas. Non nunc praestigias commemorabo v. c. Telchinum in Rhodo (Diod.

V, 55) haud absimiles earum fraudum, quas nunc inter barbaros Asiae et feros Americae populos vbique faciunt certi homines aut furore percussi aut furorem simulantes. At mirationem facere potest morbus ille per omne humanum genus vulgatus, multo vero maxime inter populos barbaros, stupidos et omnium rerum ignaros, vt, cum nihil quod ante oculos positum sit, intelligant, sint tamen qui futura praeuideant ac praedicant. Nihil forte est, in quo ingenii humani imbecillitas in magis conspicuo loco posita sit quam in hoc, quod, quo magis obtusa hominum sunt ingenia, eo plus sibi vindicant in videndis futuris; et quo minus rerum in sensus incurrentium naturas explorare laborant, eo plura de geniis ac daemonibus comminiscuntur, quos oculis vsurpauit aut alio sensu cognitos habet nemo. Potest tamen et huius rei ratio reddi idonea. Naturali enim cupiditate cognoscendi futura incitatos multo magis irritant somniorum ludibria; quibus cum viderent interdum ea, quae mox euenire necesse fuit aut quae casu contigerunt: arripuerunt id, quod natura obtulerat, atque etiam in artis commentum conuerterunt. Itaque somniis tantopere indulgent barbari, vt etiam ieiuniis diuturnis ea sibi arcessant. Ab his iisdem somniis profectam putabimus opinionem de animabus post mortem superstitibus; nam a philosophica contemplatione peti illa non potuit. Obiicitur viso nocturno Achilli vmbra Patrocli: vmbra igitur eius superesse creditum est. Viderat idem vmbra Patrocli currum agitantem et arma tractantem: quid mirum, si in inferis vmbra studia pristina seu armorum seu venationis prosequi credi-

credidit? Cum porro animi vis concitata, et seu corporis motu vehementiore seu potione inebriante incalescens, seu morbo inflammatus furor, nouarum rerum species menti obiciat: non mirabimur incidere in hanc ipsam opinionem homines nonnullos, ut ea, quae aut ipsi aut alii cognoscere cupiant, his artibus praesentire sibi videantur, utque motus hos animi vehementiores potionibus Cassiavae aliorumque vinorum arte factorum sibi arcessant. Hac stultitia fraudi praestigiis doloque malo parata est via. In Mingreliis vix sensu communi praediti Papas rerum omnium ignoratione notabiles sunt, praeter quam quod artem praedicendi futura profitentur (*Chardin. To. I. p. 69*).

Est tandem locus comparisonis et utilis et iucundus in ipso progressu vitae et opinionum in diuersis populis a feritate ad cultum meliorem, in multis etiam ad ipsa philosophorum placita, aut ad artium ac scientiarum elementa ac principia. Saltatio omnibus barbaris communis est in festis ac sollennibus omnis generis etiam religiosis. At apud Graecos ea deducta est ad chori numeros ac modos doctiores, hinc ad drama. Res carissimas offerre iis quos honore afficere velis, plerisque barbaris in more habetur. Processit inde mos populorum adeundi ac salutandi reges virosque principes, munere oblato; et inter Graecos progressa hinc sunt donaria diis in templis consecrari solita. Placandae numinis irae, expiandae culpaе, lustrandi, consecrandi, deuouendi, quot ritus, quot religiones tetrae et horrendae inter populos cum feros tum

barbaros tum cultu expolitos fuere inuentae! omnes a prauo studio homini assimulandi deum profectae. Petita sunt morborum remedia a vatibus et ab oraculis, quae inter feros populos plerosque a praestigiatoribus expectantur, qui, etsi herbis ac radicibus adhibitis salutaribus, ad morbos tamen depellendos eos, quos genios seu spiritus appellare solemus, innocandos sibi esse putant. Atqui inter haec ipsa artis medicae inter Graecos prima iacta sunt fundamenta. Quo ipso fit, vt in omnium fere artium et scientiarum originibus inuestigandis ad priscorum et barbarorum hominum opiniones et instituta redeundum ab iisque prima sint rerum earum elementa deducenda. Adeo numen O. M. constitutum esse voluit, vt ea, quibus inuentis humana mens vel maxime superbit ac gloriatur, a summa imbecillitate et infantia ingenii procedant, vtque, vbi ad fastigium subtilitatis et scientiae peruenisse nobis videmur, iterum subsistendum nobis sit eo in loco, quo imbecillitatem et infantiam ingenii nostri arguit inscientia omnium eorum, quae ad ipsam rerum naturam eiusque causas tenendas nos perducere possint.

III.

ACADEMIAE GEORGIAE AVGVSTAE
 PRORECTOR
 G O D O F R. L E S S D.
 CVM SENATV
 SVCCESOREM
 CHR. FR. GE. MEISTER D.
 IN
 MAGISTRATV ACADEMICO
 CIVIBVS SVIS
 COMMENDAT
 IN A. D. IVLII II. CLD ID CCLXXX.

Foedera Carthaginiensium cum Romanis super navigatione et mercatura facta illustrantur.

Commentatio prior.

Exit iam annus, Commilitones, ex quo apud eum, cuius nomen huic pagellae praescriptum videtis, magistratus academici fuerunt insignia; transferentur ea nunc, Senatus academici auctoritate a Regio Reginine firmata, in domum Viri Ill. et Consultissimi,

CHR. FR. GE. MEISTER D.

qui cum iam antea hoc magistratu vna et altera vice feliciter functus sit, cumque amorem eius in vos, Commilitones, perspectum fatis habeatis, vestrum

omnium bonis cum votis ominibusque initurus est magistratum, eumque auspicabitur die crastino sollennibus ex more in templo academico habitis: quo vt hora X. pompam ducatis, Illustrissimi S. R. I. Comites, tuque, Generosissima et cum genere tum animis, moribus ingeniisque, nobilissima Iuuentus, frequentes fauentesque adsitis, humanissimis precibus contendimus.

Quibus sollennibus cum nunc praefandum sit a nobis, et, dum praestolamur pompae aduentum, vos, Commilitones, tanquam confabulatione aliqua, detinendi sitis: vt variemus sermonem, age seponamus nunc in aliud tempus inceptam nuper *de vita antiquioris Graeciae ex ferorum et barbarorum populorum moribus illustranda* disputationem, et otio- lum horarium, quod in manibus est, consumamus in re, in quam *inter bella haec maritima, quae a potentissimis Europae gentibus geruntur*, nonnunquam cogitatione incidimus. Quandoquidem enim et olim fuere populi navigationis studiis maritimisque opibus clari, in quaestionem venire potest, an iisdem his institutis et legibus, artibus consiliisque, in parando tuendoque imperio maritimo vfi sint, quae nunc sequi videmus populos nostros maritimo imperio praeualentes. Atqui, si pauca ea, quae ex antiquitate his de rebus tradita supersunt, diligenter inspexerimus, videbimus *vix aliquid seu iuris seu prudentiae causa institutum commemorari posse, quod non et olim frequentatum esset*; idque operam dedisse potentiores populos, vt excluderent alios certorum locorum, tractuum ac littorum aditu, aut, si ab
aditu

aditu interdicare non possent, faltem, ne emporium aut castellum ibi habere possent, cauerent; vt prohiberent a certo commerciorum genere, arcerentque a coloniarum suarum accessu; vt interiora terrarum adire exteros vetarent, arcanaque aliqua nauigationis et negotiationis sibi quique seruarent; vt mercaturam seu exterorum seu coloniarum seu sub ditione habitarum ciuitatum variis modis, circumscriberent, nec nisi certis in foris, certis sub legibus, merces et vendere et emere iuberent; vt eius vrbs, quae princeps populi esset, avaritia omnia ad se raperet, et socios popularesque eidem lucro ac quaestui inhiantes iure ac legibus excluderet; in bello autem vt naues commeatum hostibus aduehentes interciperent, naues submergerent, nauas vinculis traderent; porro, vt nauas, qui emporia sua contra vetitum adirent, mari demergerent aut necarent, merces aduectas publicarent; et sic alia.

Quae cum vel ex nobilissimis illis *foederibus*, quae *inter Poenos et Romanos* inita propitio aliquo fato in Polybianis reliquiis ad nostra tempora seruata sunt a), doceri et declarari possint: iuuat nunc haec ipsa foedera eo consilio perlustrare, vt et tem-

C 5

porum

a) Polyb. III, 22 sqq. Nec neglecta suere haec monumenta antiqui iuris publici praestantissima a viris doctis. Inseruit ea supplementis suis ad Corpus Diplomaticum Barbeyracius (*Suppl. au Corps Diplomatique* T. 1. Art XCVII. CCLI. CCXCVII. CCCXXXII. cf. *Guthrian. hist.* T. III. p. 315. 345. *Huet Hist. du Commerce* c. 21.) Nec tamen sublegere placet ea, quae in controversia de mari clauso ac libero a viris doctis, Seldeno imprimis, disputata sunt.

porum rerumque statum, qui sub cuiusque foederis pactionem fuit, contemplerur, et, quae ex foederum legibus intelligi aut elici possint, inprimis quae consilia, quas artes, maritimi populi iam tum amplexi sint, inuestigemus. Nondum enim hoc a quopiam accurate factum vidimus.

Polybius, ubi in causas belli ab Hannibale in Romanos moti inquit, ut calumnias in Romanos iactas, ac si cum Poenis pacti essent ab initio, ut hi Italia, ipsi Sicilia uniuersa abstinerent, refellat, eo descendendum sibi esse vidit, ut, quotquot inter utrumque populum foedera perscripta essent, omnino repeteret: inprimis cum natu etiam maximis et rerum patriarum callentissimis ea passim ignota essent, inspecta tamen a se diligenter in tabulis aeneis in Aerario Aedilium ad Capitolinum Iouem seruatis *b)*, et interpretata, quantum intelligitur, amicorum opera adhibita; quandoquidem veteris sermonis Romani ipse monet tantam esse diuersitatem, ut vel peritissimi nonnulla vix intentione animi summa explanare possint *c)*.

Ad bellum igitur Punicum II. sexies aut septies omnino foedus inter Romanos et Carthaginienses actum constat. Adscribemus vno loco singulorum foederum tempora, sine quorum notatione nemo in historiis excutiendis satis feliciter versari potest.

I. Foedus factum V. C. 245. a. C. 509. Ol. 67, 4.

II.

b) III, c. 26.

c) c. 22.

II. V. C. 406. d) a. C. 348. Ol. 108. 1.

III. V. C. 448. a. C. 306. Ol. 118, 3.

III. Sub Pyrrhi in Italiam traiectum; is factus
V. C. 473. a. C. 281. Ol. 124, 4,

V. Bello Punico I. finito V. C. 513. a. C. 241.
Ol. 134, 4.

VI. Anno inde quarto V. C. 516. a. C. 233.
Ol. 136, 4.

adiectae foederi superiori conditiones nouae, vt
Sardinia decederent Poeni.

VII. Facta cum Asdrubale in Hispania pactio,
ne belli caussa Iberum annum transfirent Poeni. V.
C. 526. a. C. 228.

Iam foedus illud *primum* ab V. C. 245. eo ipso
anno ictum est, quo Romani regibus eiectis liber-
tatem receperant. Porfenna quidem, Clusinarum
rex, armis infestis Romam adortus erat, vt regem
pulsam restitueret; discessit tamen, foedere satis du-
ris legibus perscripto, vt ne ferro, nisi in agro co-
lendo, Romanis vti liceret. Inter haec principa-
tum illi inter Latinos societate iunctos, Tarquinii
Superbi maxime opera, tenebant, aliquoties cum
Veientibus, Fidenatibus, aliisque Etruscis ciuita-
tibus, etiam cum Caeretibus, conflixerant; oram
maritimam, qua Latium patet, socii Latini inco-
lebant.

At

d) M. Valerio Coruo M. Popillio Laenate IV. Coll. qui
ex Liuii rationibus, lib. VII, 27. est a. 407.

At Poeni, multis cum Mauris et Numidis factis proeliis *e*), iam tum late Africam imperio tenebant, partim in loca per colonias a communi stirpe profectas obfessa successerant. Phoenices enim iam ante ea tempora extremam Africam ingenti coloniarum, seu emporiorum multitudine obsepserant; CCC. ciuitates a Pharusiis et Nigritis XXX. dierum itinere a Lixo habitantibus euerfas narratum est *f*). Siciliae oram maritimam Poeni occupauerant, Machaei maxime fortuna vfi, minus tamen prospera illa in Sardinia *g*): sed cladis acceptae damna mox ab iis esse reparata, docent ea ipsa, quae in foedere commemorata videbimus *h*). Opibus tamen maritimis non minus illo tempore valebant Etrusci, et inter eos Agyllaei seu Caeretani. Italiae extrema et Siciliam tenebant coloniae Graecorum, quarum nonnullae nauigatione et rerum omnium affluentia ex laeto agrorum prouentu florebant; in his etiam Cumani *i*). Inter haec Phocaeenses Aleriam in
Cyrno

e) Iustin. XVIII, 7. XIX, 1, et 2.

f) Strabo XVII. p. 1182. C. 1185. B. add. lib. I. p. 83. A. cf. Plin. V, 1.

g) Iustin. XVIII, 7. Oros. IV, 6. Si recte rationes suas subduxere viri docti, iam tum Hanno (circa a. C. 570.) magnam Africae occidentalis partem nauigatione obierat, ultra tropicum Cancris vsque ad Promontorium Palmarum, nisi forte ad ipsam insulam S. Thomae, euagatus; vt altera ex parte Himilco occidentale Europae littus vsque ad Insulas Silures l. Cassiterides, (*Sorlingues. Scilly*) lustrauerat: Plin. II, 68. vid. Hannonis Periplus inprimis a Viro sollertiss. *Bongainville*, et nuper a Viro Cl. *Campomanes* illustratus.

h) v. Polyb. III, 22. et c. 23. p. 284. med.

i) v. Dionys. H. VII, 3.

Cyrno feu Corfica condiderant; XX annis post, patria euerfa (Ol. 60, 7. a. C. 539.) eadem in infula reliquiae gentis nouas fedes quaefitum iuerunt; cum latrociniis mare infestarent, aut forte metum ac fufpicionem facerent, ipfi nauigationis studiis incluti, conflatum in eos bellum a Poenis et Etrufcis: pugna naualis in mari Sardoo facta. Victores Phocaeenses, fractis ex pugna viribus, Corfica relicta difceffere; vt tamen aut nauium praestantia aut rei naualis peritia eos excelluiffe putemus, inde colligimus, quod eductis in aciem LX nauibus CXX naues hostium superarunt *k*). Cessit inde Poenis Corfica *l*). At mare aliquoties legimus fuiffe infestum, modo Etrufcorum latrociniis, quae repressere Siculi *m*), modo Poenorum, quibus restiterunt Massilienses *n*).

Inter haec (Asiae enim res Poenorum animos eo tempore sollicitos habere non poterant; a Cambyse

k) Herod. I, 166. 7.

l) vt ex Diodoro intelligimus XI, 88.

m) Diod. eod. l.

n) Thucyd. I, 13. Paus. X, 8. modo non Phocaeensium pugna in duas abiit. Audiendus tamen Iustin. XLIII, 5. Videtur ex manubiis huius victoriae fuisse Apollo Massiliensium Delphis dedicatus Paus. X, 18. p. 841. f. Ceterum praedationis maritimae frequens est in antiquis historiis commemoratio. Multa iniuriae genera ad id nomen videntur referri. Ita qui alios aditu locorum ac littorum exclusos esse volebant; qui iniurias acceptas ultum ibant, non minus latrocinia in mari facere dicti videntur, ac si vere fecissent. Poenorum *λῆστες* et Tyrthenorum inprimis infames; Festus in *Tyria Maria*: *Tyro oriundi Poeni adeo potentes maris fuerunt, vt omnibus mortalibus nauigatio esset periculosa.*

byse XV. annis ante subacta Aegyptus tum feruientium pars erat vilissima; Xerxis autem in Graeciam transitus non nisi XXVIII, annis post haec factus est) *foedus Poenorum cum Romanis sancitum; cuius leges, secundum ea, quae dicta sunt, caussarum momenta minus obscura speramus esse habituras o*).

Scriptum itaque fuit foedus ita, *ut et Romanorum et Carthaginensium socii eo tenerentur*. Quinam hoc tempore illi fuerint, paucis declarandum venit. Romanorum quidem nulli alii esse potuere quam Latini, foedere illo memorabili, quo prima futurae potentiae Romanorum fundamenta substructa fuere, cum Romanis iuncti: v. Liv. I. 49-52, et multo magis Dionys. IV, 41-49. Nominatim paullo post in ipso foedere memorantur Ardeates, Antiates, Laurentes, Circeientes, Terracinenfes, littoralem fere plagam incolentes. Carthaginensium autem socii fuere partim Phoenicum partim suae ciuitatis coloniae. Diuersa earum erant iura, diuersa conditio. Utica quidem meliore iure vsa est; aliae sub ditione et imperio Poenorum erant. Durius habitae eae, quae a Libyphoenicibus habitabantur; erant hi a Phoenicibus, qui cum Libybus coniugia contraxerant, oriundi: ex eo genere inprimis fuisse videntur ii, qui Byzacenam prouinciam incolebant. (Plin. V, 3.) Poenorum in eos non minor erat superbia, quam nunc Hispanorum in Mestizos, populares suos cum Indis permixtos *p*).

Scriptum

o) ap. Polyb. III. 22.

p) bene de his vir cl. de Ste Croix l. mox c. p. 32. sqq.

Scriptum autem foedus, *petentibus*, quantum quidem assequi licet, *Romanis*, nam arbitrio Poenorum leges constitutas esse plerasque ad intelligendum in proclui est. Cum Etrusci, inque iis Clusini, Tarquiniorum vrbe pulforum caussam fusciperent: probabile fit Romanos Poenorum, qui solitum Etruscorum opibus et copiis maritimis haud impares erant, amicitiam ac societatem sibi adiunxisse, inprimis eo consilio, ut agri prouentum, quem Etruscis adhuc vendere soliti erant, exclusi inter arma ab eorum commerciis, ipsi in Africam transueherent. Quam quidem rem acerbam accidere debuisse Etruscis apparet.

Cautum vero est in foedere:

I. *Ne Romani et Romanorum socii ultra Pulchrum Promontorium nauigent, nisi tempestatis aut hostium vi coacti; sin coacti fuerint, ne quis ibi aut mercetur aut capiat quicquam praeter necessaria reficiendis nauibus et sacris faciendis; nec ultra V. dies commorandi sit facultas.*

Iam primum hoc statim memorabile in hoc foedere occurrit, quod exemplum in eo prostat *libertatis nauigandi circumscriptae*, adeoque seruitutis non nauigandi, quam vocant *pp*). *Promontorii* quidem *Pulchri* situs non satis definitus est *q*); ex iis tamen, quae

pp) cf. Grotius I. B et C. 11, 3, 15.

q) De *Promontorio* hoc *Pulchro* alter locus est *Liuii*, qui rem facit ambiguam, lib. XXIX, 27. ut ad *Viticam* illud referendum esse videatur; id quod sequuti etiam sunt viri docti, *Cellarius*, qui tamen haerere se fatetur, et *Shaw*, doctissimus *Britannus*, (*Travels* p. 142.) qui *Promontorium Candidum* etiam *Pulchri* nomine venisse

quae a Polybio paullo post subiiciuntur, firmatur id, quod ipsa res docet, ad oram ab oriente Carthaginis

venisse contendit. Non meminerat nostrum Polybii locum, cuius haud dubie maior hac in re est auctoritas; id quod et Schwarzius bene observavit ad Geogr. ant. Cellarii p. 887. Et si enim ea, quae ille nimis subtiliter de nominis causis disputat, sequi nolimus; manifestum tamen sit e Polybi verbis c. 23. nomen *Pulchri* Pr. habuisse procurrens in septentrionem ab oriente Carthaginis promontorium, *Hermæus* seu *Mercurii*, nunc *Cap Bon* et indigenis *Ras-Adder* appellatum, aut, quod d'Anville, sollertissimus vir, amplexus est, eius partem aliquam, forte interius illud promontorium, quod *Herculis* nomine declaravit *Shaw* in Tab. ad p. 148. Locus quidem Liuii, qui fraudi viris doctis fuit, commoda interpretatione bene expediri potest. De Scipionis traiectu in Africam et Sicilia agitur: *Iam terram cernebant, haud ita multo post gubernator Scipioni ait — Mercurii promontorium (hoc est illud ab oriente Carthaginis prom.) se cernere; si iubeat eo dirigi, iam in portu fore omnem classem.* (Sunt autem eo in littore loca appulsui navium idonea sub Aquilariam: v. *Shaw* p. 158.) *Scipio — dare vela et alium infra (propius ad Carthaginem) navibus accessum petere iubet. Vento eodem ferebantur, — ubi illuxit, ventus idem coortus, nebula disiecta, aperuit omnia Africae littora (eundem adeo cursum per noctem tenuerant, versus interiorum sinum, in cuius recessu Carthago sita.) Scipio, quod esset proximum Promontorium percunctatus, quum Pulchri promontorium id vocari audisset, placet omen, inquit, huc dirigite naues. Eo classis decurrit: copiae omnes in terram expositae sunt. — (c. 28.) Expositis copiis Romani castra in proximis tumulis metantur. — Postero die — iam Scipio classe Uticam missa, ipse, haud ita multum progressus a mari, tumulos proximos ceperat — (c. 29.) urbem etiam proximam Asrorum satis opulentam cepit. (Male ad Locham Uticae vicinam referunt, ex Appiano T. I. p. 14. nam ea serius capta. Fuere in eodem tractu, quo appulerat Scipio, Aquilaria, Carpi, Misua.) Paulo post c. 34. Ad Uticam tum castra Scipio ferme clo.*

thaginis versus septentrionem procurrentem illud spectare; ultra quod versus orientem Byzacena regio in campos fertilissimos patebat. Vt ab horum locorum aditu Romanos interdicerent, causſae esse potuere plures: forte sociorum fidem habebant suspectam, quorum animos auaritia Carthaginiensium publice et priuatim saepe a rep. abalienauit; vnam ipse Polybius memorat causſam: ne vbertatem soli summam cognoscerent r). Ita vero nec minus coloniae ac socii exclusi fuere a commerciis cum externis populis, et necessitas iis imposita, vt a solis Poenis emerent, vtque Poenis solis ius esset mercatum per sociorum vrbes habendi. Adco nec sagacitas illa, in necessitate huiusmodi mercatus coloniis aut sociis denuntianda. recentiorum demum ingeniorum felicitati adscribi potest.

Porro

clo. passus ab vrbe habebat; translata a mari, vbi paucos dies statim coniuncta classi fuerant. Omiserat Liuius monere, Scipionem exercitum duxisse terrestri itinere per mediam terram ita vt Carthaginem a tergo circumiret, classe interea praeter eandem urbem vecta. Appianus p. 13. Toll. multo minus subtiliter in his est versatus. Nuper vidimus doctissimum auctorem libelli de coloniarum veterum conditione (*de l'Etat et du Sort des Colonies des anc. Peuples* p. 38.) Promontorium Pulchrum in Porto Farino quaerere, qui portus Promontorio Zibib s. Apollinis subiectus est. Enimvero hoc Apollinis Prom. ab occidente Carthaginis esse, non magis dubitari potest, quam ab oriente esse Mercurii illud, quod paullo ante diximus. Ceterum cum apud Liuium Pulchri Promontorium sit, suspicamur, nomen ab Appio Pulchro ductum esse, qui forte ibi cum classe fuerat.

r) Polyb. I. c. c. 41. διὰ τὸ μὴ βούλεσθαι γινώσκειν αὐτοὺς ὥς ἡμοὶ δοκεῖ, μήτε τοὺς κατὰ τὴν Βυσσάτιν, μήτε τοὺς κατὰ

Porro occurrit animo, si quis eum intendat statim illud, quod ex Livio non constare poterat *Romanos iam tum mercaturam maritimam exercuisse* eorumque naues Africae littora adiisse. Nisi forte id tum primum a Romanis tentatum esse credendum malimus s).

Quod, *hostium. vi coacti* Romani ne de cursu deflecterent ad ea Africae loca, verendum erat: respicere inprimis videtur Etruscos, cum quibus perpetua fere bella Romanis erant: ut adeo navium in mari occursum non infrequens forte esset. Ad rem sacram tandem faciendam quae necessaria peti possent, fuere inprimis victimae. Obseruanda autem est Romanorum religio ac pietas in curandis etiam per nauigationis incerta sacris ac caerimoniis.

II. Porro quae sequuntur, ad eos spectare putanda sunt, qui citra Promontorium loca adierint, quae accedere mercandi causa licet: in ipso illo

κατὰ τὴν μικρὰν Σύρτιν τόπους, ἃ δὲ καλοῦσιν Ἐμπορία, διὰ τὴν ἀρετὴν τῆς χώρας. Ita interpungendus locus. Male accipiunt: quae propter soli ubertatem vocant Emporia. Immo vero loca illa, Emporia dicta, noluerunt Poeni a Romanis cognosci propter soli ubertatem. Paullo ante μακροῖς ναυσὶν ex Polybii interpretatione ponitur. In foedere non de bellicis navibus, sed omnino de nauigiis vniuerse memoratur.

- s) Admodum ieiuna vel sic est I. Fr. Gronouii disputatio adv. Salmaf. ad calc. lib. de Pec. vet. p. 583. sq. Qui miraculum rei naualis intra paucos annos constitutae a Romanis ad miraculum augere voluerit, ante h. Punici I. tempora Romanos omnino a re maritima abstinuisse tradidere. Saltem dicendum erat, a triremium fabrica eos se cohibuisse.

illo sinu, in cuius intimo recessu Carthago sita erat t): qui ad mercaturam venerint, *veſtigal* nullum pendunto, extra quam ad praeconis aut scribae mercedem; quicquid autem hisce praesentibus fuerit venditum, publica fide venditori debetur; quod quidem in Africa aut Sardinia fuerit venditum. Sin quis Romanorum in eam Siciliae partem venerit, quae imperio Carthaginienſium paret, iure aequo Romani in omnibus utuntur.

Scilicet mercis, quam afferebant Romani mercatores u), priuatim vendendae ius et facultas nulla erat; sed quicquid venderetur, publice vendendum erat, praecone et scriba praesente. Simili modo mercatum exterorum circumſcribi in multis Indiae emporiis nouimus. Quod si publica fide debetur id, quod publice venditum fuerit: facile intelligitur, in iis, quae priuatim vendita erant, exigendi debiti et perſequendi ius et facultatem fuiſſe nullam. De emtione nihil cautum: nam haec ad Poenorum vtilitatem tota per se erat comparata. Obſeruetur et illa Poenorum prudentia, quod interiores terras adire noluerunt Romanos mercatores; sed ex iis terris merces sua opera advectas ipsi vendidere Poeni Romanis, et ab iis emtas merces per Afrorum fora pretio, quod ipsi ſtuebant, venditarunt. Verum circumſcriptum illud

D 2

vendendi

t) Dura oratio eſt, quis neget, etiam in ceteris nonnullis. Sed in tam priſco monumento quis ſermonis aſperitatem miratur!

u) Quae res eae fuerint, quas Romani in mercatum apportare poſſent, non inuenimus memoratum. Frumento ipſa Africa abundabat. An coria? lanae? vina? lina? ſar?

vendendi ius ad Africam (h. e. agrum Carthaginiensem, vt ipse Polybius interpretatur α) et vt ex altero foedere, si comparetur, intelligi potest) et Sardiniam solam spectauit; in Siciliae vrbibus, quae in Poenorum ditione erant, liberius ius fuit, ita vt eodem cum Poenis iure vterentur Romani γ). Quid Poenos adduxerit, vt maiorem in hac insula mercatus libertatem permitterent, num quod Italiae vicina erat, an quod aliae erant Graecorum ciuitates in Sicilia, quas adire poterant Romani mercatores, si minus liberaliter haberentur a Poenis, nunc quidem vix coniectando assequi licet.

III. *Carthaginieneses ne iniuriam inferunt Ardeatibus, Antiatibus, Laurentibus, Circeiensibus, Terracinenibus, neque ulli alii e Latinis, qui sub ditione (Romanorum) erunt. Quae non sub ditione erunt, etiam ab iis vrbibus*

α) c. 23. p. 284. εἰς δὲ Καρχηδόνια καὶ πᾶσαν τὴν ἐπὶ ταύτῃ τοῦ καλοῦ ἀκρωτηρίου τῆς Λιβύης.

γ) ἐν (f. ἐν δὲ) Ῥωμαίων τις εἰς Σικελίαν παραγίγνηται, ἥς Καρχηδόνιοι ἐπάρχουσιν, ἴσα ἔστω τὰ Ῥωμαίων πάντα. sc. τοῖς Καρχηδόνιοις, eodem iure vtuntur quo Carthaginieneses. Ita locum accipiendum arbitramur, in quo haesit Barbeyracius; qui ita accipere iubet, vt sit: eodem iure ac in Africa et Sardinia vtuntur. Ita vero scriptum fuisset, ὅσα ἂν ἢ ἐν Λιβύῃ ἢ ἐν Σαρδοῖ προ-θῇ ἢ ἐν Σικελίᾳ: otiosa essent reliqua omnia. Quae in sequ. c. 23. a Polybio subiiciuntur, ad declarandum id, cuius causa omnem hanc disputationem ingressus erat, spectant: vid. c. 26. At verum verborum sensum satis declarant ea, quae in altero foedere disertius perscripta videbimus: ἐν Σικελίᾳ, ἥς Καρχηδόνιοι ἐπάρχουσιν, — πάντα καὶ ποιεῖτω (Romanus) ὅσα καὶ τῶ πολίτῃ (Carthaginienf) ἔξῃστιν. (atqui hoc est ius aequum, πάντα τὰ ἴσα) ὡσαύτως δὲ καὶ ὁ Καρχηδόνιος ποιεῖτω ἐν Ῥώμῃ.

*bus abstinento; si tamen ceperint, Romanis sine noxa
vlla reddunto. Castellum vllum in Latino agro ne ex-
struunto. Si infestis armis terram ingressi fuerint, in
ea ne pernoctanto.*

Accurate in his cauent et prouident Romani, ne Poeni in Latio, intra Romanorum ditionem, confidere possint; Mercatum autem in iis locis facere, forum habere, mari terraque vrbes circumire liberum Poenis relictum. E sociis Latinis nominatim appositi, qui maritimam oram incolebant. Extrema verba eo referenda sunt, quod saepe factum legimus, vt iniuriis acceptis siue in mari a praedonibus, siue in terra, vel fraude emtorum et insidiis, vel vi publica priuataue, si publice satisfactum non esset, agros praedarentur: hoc igitur in iis Latii terris, quae sub Romanorum ditione non sunt, adeoque nec in societate, facere licet Poenis elensione facta, modo ne loca capta sibi retineant aut praesidiis impositis pedem in Latio figant. De Latio autem, nec de Italia, memoratur: quia Romanorum imperium angustis illis finibus eo tempore continebatur. 2). Inter Latinos focios iam tum fuisse nonnullos iniquo foedere, ita vt sub ditione essent a), cum aliunde non constet, ex hoc foedere discimus.

Ceterum in eo foedere mirationem facere possunt haec: quod non aequè sibi Romani prospiciunt, in circumscribendo mercatu Poenorum, qui ad urbem Romanam

D 3

man

2) vt ipse Polyb. monet. p. 284.

a) ὑπήκοοι.

nam merces adueherent. Iis ne liber omnino fuit commeatus? ut Romanis in Siciliae urbibus, quae sub Poenorum ditioe erant? id quod altero foedere disertius enuntiatur. Nam probabile haud fit, licuisse Romanis, sibi ipsis merces ex Africa petere, Carthaginiensibus ab aditu Tiberis exclusis. Quod si tum primum tentata res est a Romanis: ut ipsi prouentum agrorum in Africam transportarent, quum adhuc Etrusci forum in urbe Roma habuissent: suspicio esse possit, Poenos omnino adhuc parum frequentasse Tiberis ostia. Sed probabilius fit prius illud, quod posuimus: nihil de Poenorum navigatione in foedere esse memoratum, cum iam antea more et usu illa esset constituta, in foedere autem perscriberentur tantum ea, quae noua fancirentur. Promiscua adeo Etruscorum et Poenorum fuere in urbe Roma fora et commercia. Forte Etruscorum et Poenorum ea de re fuere pactiones. Neque id statuendum est, Poenis Latii littora adire hoc demum foedere esse permissum; immo vero dudum fieri solitus accessus ille nauium Carthaginiensium coercitus nunc est et circumscriptus certis legibus.

Ad *alterum* foedus festinabamus. Sed ecce sufflammat impetum pompa ducta. *Templa patent auresque* — iungamus vota precesque publice priuatimque pacemque et felicitatem generis humani a deo precemur. PP. in Georgia Augusta Kal. Iul. clō Iō cc lxxx.

IV.

ACADEMIAE GEORGIAE AVGVSTAE

P R O R E C T O R

CHR. FR. GEORG. MEISTER D.

C V M S E N A T V

ANNIVERSARIA INAVGVRATIONIS

SACRA XXXXIII.

IN A. D. XVIII. SEPTEMB. MDCCLXXX.

RITE INDICIT.

*Foedera Carthaginiensium cum Romanis super navigatione
et mercatura facta illustrantur.*

Commentatio posterior.

Incolumi rep. nostra academica, pace et tranquillitate per fines Germaniae integra et (vtinam in longum tempus) firmata, rebus florentibus; anniversaria sacra celebraturi quid prius antiquiusque habere possumus, quam vt animis omni pietatis sensu perfusis et rerum prospere fluentium cogitatione erectis tantorum bonorum fontem et auctorem grati, hilares et deuenerabundi, adoremus? Non itaque ex more et consuetudine repeti, sed ad officium pertinere putabimus, Ciues, quod crastino die agen-

tur sollennia in templo academico, quibus vt, **vestra** praesentia, Comites S. R. I. Illustrissimi, **Com-**
militones ingeniorum, natalium, studiorum laude
 probatissimi, celebritatem addere velitis, humanif-
 sime rogamus. Vota publico nomine perfoluet sus-
 cipietque brabeuta honorum, quos Ordinis medici
 iussu duobus Candidatis probatissimis, ISAACO GRVNO,
 Hamburgensi, qui idem orationem gratiis agendis
 habebit, et IO. CAR. WALLBAVM, Hannouerano,
 impertiet Vir Experientissimus,

HENR. AVG. WRISBERG D.

oratione sollenni ex superiore loco habita. Memo-
 rabit ille ea, quae fausta ac secunda per superio-
 rem annum academiae contigerunt, auctos Biblio-
 thecae academicae nouarum aedium accessione locu-
 los, auctas eiusdem et Musei opes, muneribus quo-
 que nouis cum aliorum tum viri immortaliter de
 nobis meriti, Georgii L. B. DE ASCH, cuius muni-
 ficentiam admirabilem iam saepius praedicare in his
 scriptionibus obtigit.

Interea nos, quibus praefandi munus imposi-
 tum est, bona cum pace vestra absoluemus dispu-
 tationem nuper institutam de iis, quae inter Roma-
 nos et Carthaginienes super mercatura et nauiga-
 tione foedere pacta esse legimus.

Ad alterum substiteramus *foedus* V. C. 406. per-
 cussum: XII. annis ante Alexandri in Asiam traie-
 ctum. Etruria in armis erat iam inde ab V. C. 398.
 Tarquinienes aliquoties caesi cum Faliscis: Caeri-
 tes eorum, quae ausi crant, mature poenitentia
 cepit.

cepit. Gallorum ingens multitudo in agro Latino confederat: ipsi Latini obsequium detrectabant: quos ut terrore tenerent, cum fides non tenuisset, extendere omnes imperii vires Senatui placuit, X legiones scriptae a). Inter haec Liuius: *Mare infestum classibus Graecorum erat, oraque littoris Antiatis, Laurensque tractus, et Tiberis ostia; ut praedones maritimi cum terrestribus congressi ancipiti semel praelio decertarint.* — Et anno sequente: *Graeci — Italiam relinquere.* Cuius populi ea, cuiusque gentis, classis fuerit, nihil certi est; maxime Siciliae tyrannos fuisse crediderim. Nec male hoc credidit Liuius; dubitari enim vix potest, Dionysii iunioris classem eam fuisse. Nam is paullo ante (V. C. 398) Syracusis eiectus in Italia circa Locros confederat, donec altero abhinc anno 407. iterum Syracusas recepit. Per decem hos annos in Locrenses multa libidinoſe ac crudeliter (statuerat b); nec minus Italiae littora latrociniiſ infesta feciſſe videtur.

Poeni interea intente agere, ut imperium Africae Siciliaeque amplificarent et firmarent, Romanis nondum ad ſe quicquam horum pertinere arbitrantibus c). Inprimis vero Hispanias ſui imperii arcem, ſuarum opum ac copiarum robur, commerciorum

D 5

ciorum

a) 42.000 pedites, 3000 equites. Nam legionem quaternum millium et ducenorum peditum, equitumque trecentarum fuiſſe, addit Liv. VII, 25.

b) Nota res ex historiis huius temporis v. Strabo VI. p. 397. D. et al. v. Progr. de Locror. rep. II. ſub f. (Opuſc. T. II. p. 57.)

c) Liv. IV, 29.

ciorum cardinem, fecerant. Cum ab initio in Erythia seu Gadibus emporio contenti fuissent: Tyro ab Alexandro euerſa, in Phoenicum locum ſucceſſiſſe videntur *d*). Sed fuit Hispania Poenis prima exitii cauſſa; vt Aſia victa Romanis; America Hispanis, Oriens Luſitanis, Batauis, Britannis et Gallis. Immenſis diuitiis Carthaginem delatis et congeſtis, fortunarum inaequalitas, luxus, auaritia et omne publicae priuataeque corruptelae genus, diſciplinam, inſtituta, leges, remp. peſſumdedit.

Tyrriorum opes, qui emporia condere fatiſ habuerant, vbique a barbaris oppreſſas Poeni viderant. Quid ipſi? praefidiis occupare loca, oppida muris cingere, ciues ac ſocios in colonias educere, fatius eſſe viſum eſt. Traxit ea res vel inuitos ad arma. Milites alere neceſſe fuit. Cum ciues ad ſupplementa deficerent, *mercede conducere milites coepere e*). Ita vno ſatu ſeges malorum prouenit. Nec alia res noſtra ac ſuperiore aetate mercatorum ſocietates, per Aſiae et Africae littora et inſulas eadem conſilia ſequutas, opibus exhaustit. Scilicet
ea

d) cf. La Croix p. 50 ſq.

e) Mercede conducere milites Poenis ſolenne fuit; primum id in bello cum Timoleonte factum volunt, adeoque circa Ol. 109, i. a. C. 344, V. C. 410. ſed falſo; num ſaepius iam ante id tempus Poeni mercenario milite in Sicilia conſlixere; vide v. c. Diodor. XIII, 80. et tanquam perpetuo Poenorum more et uſu receptum illud memorat Polyb. I. 67. Si tamen coniecturae locus eſt, Hispania demum occupata, et metallis inuentis, conſilium illud maxime ſequutos eos eſſe arbitramur. cf. Diodor. V, 38. Copias tamen navales ſemper ex focis conſcripiſſe videntur, quod et Romanos ſequutos eſſe nouimus.

ea communis est mortalium fors, ut rebus secundis cupiditate abrepti res praecipites dent, mox ut ea, quae medendis malis remedia prudentia repererit, noua mala inducant, quibus antea carebant. Qui maiora pro sorte sua appetunt, qui imperia ac regna seu vi seu consilio astuto sibi parant, regniue fines latius extendunt: ut vi parta tueantur, non nisi aliis violenter factis ac destinatis grassari possunt. Ita per vtramque Indiam ab Europaeis imperia exercentur, quibus nulla barbarorum crudelitas et atrocitas comparari potest. Grauiam porro bella in Sicilia cum Dionysio seniore Poeni gesserant, fortuna varia. Cum *Etruscis* foedera fuisse et pacta conuenta *de rebus importandis, de non inferendis iniuriis et de societate*, ex Aristotele nouimus *f*): nec ab Italiae accessu eos abstinuisse, id saltem docet, quod sub V. C. 375 commemoratum legimus, eos Vibonem Valentiam seu Hipponem, in extrema Italia, reduxisse exules *g*).

Inter haec adeo, cum communis esset Romanorum et Poenorum metus a Dionysio, cumque a praedonibus infestaretur Italiae littus, Latinorum autem defectio, ne in agrum suum aduenas illi acciperent, sollicitudinem faceret: renouatum foedus
inter

f) Aristot. de Rep. III, 9. (6) εἰσι γὰρ αὐτοῖς συνθήκαι περὶ τῶν εἰσαγωγίων, καὶ σύμβολα περὶ τοῦ μὴ ἀδικεῖν, καὶ γραφαὶ περὶ συμμαχίας.

g) Diod. XV, 24. XIV, 107. Hipponem Dionysius senior diripuerat: qui idem Agyllam s. Caere classe adortus templum opulentum Leucotheae spoliarat V. C. 368. Diod. XV, 14. Aristot. Oecon. II, p. 506. B. du Val.

inter Romanos et Poenos, inque eo adeo nouae adiectae conditiones sunt pro temporum illorum rationibus. Videntur Poeni priores adiisse Romanos *h*).

Comprehenſi hoc foedere a Carthaginiensibus *Tyrrii*, in quorum extrema tempora haec incidunt, et *Vtices* cum eorum sociis. Inter *Tyrios* et *Carthaginienses* mutua fuiſſe rerum commercia nemo dubitet *i*). *Vtices* iam ante Carthaginem conditam ea loca infederant; Poſtea in ſocietatem pertractis tandem obſequii neceſſitas impoſita *k*), etſi meliore, quam ceteri, conditione fuiſſe videntur.

I. Promontorio Pulchro antea pro termino nauigationis conſtituto adduntur nunc *Maſſia* et *Tarſeium* *l*). Cum antea vltra eum terminum nauigare vetiti

h) Liv. VII. 27. -- et cum Carthaginiensibus legatis Romae foedus iſtum, quum amicitiam ac ſocietatem petentes veniſſent.

i) cf. Liv. XXXIV, 61. vbi *Tyrus* et alia emporia, in quae frequentes commeant Carthaginienses.

k) Praeſidium Punicum habuiſſe leguntur ap. Diod. Exc. T. II. p. 567. Weſſ. Appian. T. I. p. 68. Forte etiam belli iure id factum erat, cf. Polyb. I, 88. Deſteſtabilis illa bellorum neceſſitas, quae coegit tributis atterere ſocios, inter ceteros ſocios et foederatos etiam *Vtices* adeo animis a Metropoli abalienauit, vt primum bello mercenariorum ſtatim accederent, poſtea vt Romanis ſe dederent, quae res excidium Carthagini maturauit. Polyb. T. II. p. 803. in Exc. Iniurias coloniis et foederatis illatas grauiffime expoſuit idem lib. I, c. 72.

l) τοῦ καλοῦ ἀκρωτηρίου, Μαστίας, Ταρσηίου μὴ ληΐζεσθαι ἐπέκεινα Ῥωμαίους, μὴδὲ ἐμπορεύεσθαι, μὴδὲ πόλιν κτίζειν:

vetiti essent Romani: nunc disertius declaratum: *ne praedas agerent, nec mercatum facerent, nec urbem ullam conderent.*

II.

πρίζειν: et ipse Polyb. pr. c. 24. πρόσκειται δὲ καὶ τῷ πηλῷ ἀκρωτηρίῳ Μαστία, Ταρσηῖον, ὧν ἐκτός etc. quod male accipiunt, etiam Jac. Gronov. cui adjacent. Immo vero: *accedunt in hoc foedere. Mastiae et Tarsei* situs obscurus sane est, non tam per se, quam ad huius loci rationes. Nam eius nominis vrbes ac populos Hispaniae extremi Occidentis versus fretum Herculeum fuisse, dubitari nequit. v. inpr. Auienus in ora marit. v. 422 sq. ubi et vrbs Massiena 452. Apud Steph. Byz. in Μαστιχοί; ἔθος πρὸς ταῖς Ἡρακλείαις στήλαις. Ἐκαταῖος Εὐρώπῃ. Εἰρηται δὲ ἀπὸ Μαστίας πόλεως. (v. id. in Ἰβηρίαι et Constantin. Porphy. de adm. Imp. c. 22. Banduri T. II. p. 76. Imp. Orient. Videtur vrbs esse eadem, quae paullo ante in Stephano Μασσία, χώρα ἀποκειμένη (attributa) τοῖς Ταρτησίοις. Et Μαῖνόβωρξ πόλις Μαστιγῶν. In Constantino Porphyrog. (extat quoque Excerptum ap. Hudf. Geogr. min. ad calc. T. IV. p. 40.) Μαστιχοί in Hispania inter Tartesios, Elufios et Calpinos memorantur. Mirum tamen, quod Steph. Byz. in Ἑλβέστιοι. ἔθνος Λιβύης. Φίλιστος ἢ. περὶ δὲ τοὺς Λιβύης ἐκτός Εἰρώπης Ἑλβέστιοι καὶ Μαστιγοί. Nisi leg. ἔθνος Ἰβηρίας -- Ἐκαταῖος Εὐρώπῃ. Iam Ταρσηῖον ap. Steph. πόλις πρὸς ταῖς Ἡρακλείαις στήλαις. Πολύβιος τρίτῳ. Respexit adeo hunc ipsum locum. Inf. III, 33. ubi milites ab Annibale ex Hispania in Africam et ex hac in Hispaniam traiectos narrat, qui in Africam transiere, sunt Θερσίται (s. Ταρσηῖται) Μαστιανοί, ὀρεῖται Ἰβηρες (an Ὀρητικοί, Ἰβηρες?) Ὀλκαδες. (Ὀλκάδες ap. Steph.) Secundum haec Romanis libera esset navigatio per totam Africam vsque ad Gades et hinc in Hispaniae ora citra Malacam; quod per se parum sit probabile, cum versus Orientem non vitra proximum a Carthagine promontorium Romanos euagari vellent; et quam suspiciosi fuerint Poeni, notum est vel ex eo, quod peregrinos, qui ad Columnas Herculis naue accedere auderent, mari missi narrantur; (Strabo XVII. p.

II. *Si in Latio urbem aliquam Carthaginienses ceperint, quae sub ditione Romanorum non erit: praedam et captiuos ipsi habento, urbem reddunto m).*

III. *Si qui Carthaginiensium aliquos ceperint, quibuscum foedere scripto iuncti sunt Romani, qui tamen sub Romanorum imperio non erunt: hos in populi Romani portus ne deducunto; si quis erit deductus et manum Romanus iniecerit, liber esto. Eodem iure et Romani tenentor n).* Barbeyracius praeclare haec illustravit,

1154. C.) tum cur non scriptum simpliciter, per totam Africam et partem Hispaniae? cur in Hispania ignobiles istae urbes pro finibus constitutae? nec aliunde constat, Romanos Gades iam tum nauibus adiisse; et si adiissent, quam parum expectandum, ut extra illud in Oceano Atlantico praedarentur! Id curae scilicet Poenis fuit, modo ut intactae essent interiores Africae et Europae orae! Bochartum, qui adeo Tarsum in Tarseio quaerit, Phaleg. III, 7 haec concoquere potuisse non miramur, quippe qui persuadere sibi potuit, iam Moysis tempore extra Herculis columnas nobilem fuisse Phoenicum coloniam. Probabilius itaque est, fuisse Mastiam et Tarseium urbes vicinas Carthagini ab occidente, quarum nomina impertita mox sunt coloniis Hispaniae, ex more communi Sidoniorum, Tyriorum et Poenorum non minus quam aliorum populorum. Urbes illas postea e notitia hominum abiisse, si quis miretur, cogitet, quam ingens urbium multitudo per Africam interierit. Nec tamen cum viro doctissimo de S. Cruce p. 38 asseuerare audeamus, *Mastiam esse le Cap Blanc, Tarseium le Cap Serra*; quod sine omni auctoritate pronuntiatur.

m) In priore foedere: *Ῥωμαῖοι ἀποδιδότωσαν ἀνέροιον*. Excideritne hoc, ut Romanistradendae sint, an omnino relinquendae a Poenis sint urbes, nec in ditione sua retinendae, non definiri potest.

n) *ὡσαύτως δὲ μήδ' οἱ Ῥωμαῖοι ποιεῖτωσαν*. pariter nec Romani id faciunt, ut, si quem e populo cum Poenis foedere

strauit, tria populorum genera, respectu ad Romanos habito, constituendo: aut enim illi socii Romanorum sunt; ii vero ab omni Poenorum iniuria intacti et tuti praestantur, vi ipsius foederis; aut sunt populi in Latio, qui sui iuris sunt, nec in ditione a Romanis habentur: horum si quam urbem ceperint, praedam et captiuos ipsi habento, vrbes reddunt; quod iam priore foedere sancitum, ne Poenis aliquam agri Latini partem insidere liceret; aut sunt foederati Romanorum, sed nullo imperii iure obnoxii: ex his captiuos in portus Romanos abductos liberare ius esto Romanis. Recordandum est illorum temporum more captos homines pro mancipiis vendi: hinc escensiones in littus; praedationes, latrocinia. Quod nunc Europaei in Africa faciunt, ut multis modis seruitia inde parent: hoc fecere Phoenices, Poeni et alii, per littora maris mediterranei; *abducebant Poeni ex Europa homines in Africam*. Tanta rerum est vicissitudo! Redeunt ceteroqui ea, quae in foedere scripta recitauimus, fere eodem, quo ea foederum nostrorum capita, in quibus perscriptum est: captas naues eorum, quibuscum societas et amicitia nulla est, in portus nostros adducere licere; fociorum contra non licere; tempestate

foedere iuncto ceperint, in Carthaginiensium portus deducant. Hunc loci sensum ratio grammatica et sensus fatentur. Minus bene Barbeyrac, accepit l. c. p. 222. Conueniunt fere cum supra dictis ea, quae in recentioribus foederibus conuenta legimus, v. c. inter Britanniam et Russiam a. 1734. (v. *Chev. d'Eon Loisirs* T. V. p. 329.) ut ex naualibus copiis naue in portum subducta redeantur amicis illi, qui ex eorum sunt ditione.

tempestate vexante naues eas in portum admitti, sed in paucarum horarum spatium o).

IV. *Si ex aliqua regione, quae sub Carthaginiensium imperio est, Romanus aquam commeatusue sumserit: cum his commeatibus ne cuiquam iniuriam facito eorum, cum quibus pax et amicitia est Carthaginiensibus.*

V. Caput foederis quod sequitur obscurum et ambiguum est, cum et lacuna in verbis sit et verborum iunctura sit varia et multiplex, vndique tamen impedita. Interea acquiescendum in ea sententia, ut, si iniuria cuiquam seu Poeno seu Romano facta fuerit, apud iudicem vel magistratum is ius petat; sin minus obtinuerit: publica illa censenda sit iniuria et armis vindicanda a republica, cui ille adscriptus fuerit p).

VI.

o) v. Paſſionem inter Gallos et Britannos de navigatione et commercii Ultraieſt. 1713. Art. XV. XXXVI et VII. ap. *Lamberti* T. VIII. p. 85. et cum Belgii foederati Ordinib. art. XIII. p. 146. Hispaniae et Britann. de 1667. quae paſſio pro fundo ac formula aliorum foederum conditionibus adhiberi coepit.

p) ποιῆτω. εἰ δὲ, μὴ ἰδίᾳ μεταπορεύσθω, ἐὰν δὲ τις τοῦτο ποιῇ, δημόσιον γινέσθω τὸ ἀδίκημα. Videri potest ad illud caput superioris foederis pertinere, quo, ne quis priuatim mercetur, interdictum est; sin factum fuerit, ne exigito vi priuata debitum; (sed ad iudicem deferat) sin factum fuerit, publica ea erit iniuria. Grotius de iure b. et p. lib. II, 21, 6. not. 9. iubet iungere: εἰ δὲ μὴ, ἰδίᾳ μ. quem sequitur Barbeyracius, ita ut plura suppleat: ὡταύτως δὲ καὶ ὁ Καρχηδόνιος ποιῆτω. εἰ δὲ μὴ, ἰ. si quis (seu Romanus seu Poenus) secus fecerit, (is cui iniuria facta fuerit) ius suum priuato iudicio persequatur; si quis hoc fecerit (nec is ius suum obtinuerit) publica esto iniuria (sc. populi eius, apud quem ius suum consequi non potuit). Durissimam esse orationem facile sentias. Quod ad

VI. *In Sardinia et Africa neque quisquam Romanorum negotiator, neque urbem condito, (neque eo appellito) q) nisi commeatus accipiendi causa aut navis reficiendae; si tamen tempestas detulerit, intra dies quinque excedito.* Superioris foederis caput agnoscimus hactenus nota lege sancitum, vt, cum in Sardinia et in Africa adsumto praecone et scriba mercari antea liceret, nunc ab vtriusque prouinciae aditu interdicatur Romanis. Adeo mutatus erat rerum status. De Sardinia aliunde nouimus, ponto submersos esse aduenas, qui adiissent r). De Africa dubitari posset s): enimuero statim in sequenti capite manifestum erit, ad solam urbem Carthaginem omnem negotiatorum exterorum turbam fuisse confluere

ad ipsam rem: melius prouisum est in recentiorum foederum sponcionibus, vt ne, si qua talis iniuria incidere, publica pax turbetur, aut iniuriae iniuriis vindicentur, verum vt missis vltro citroque idoneis viris componantur res: *Nec guerra ob id fieri vel moneri debet, sed per Principes vnius vel alterius partis attentata ipsa debite reparabuntur et in priorem statum reponentur; cap XXVIII. Tractatus Pacis et Commere. inter Henric. VII. R. Angl. et Philippum Archid. Austr. 1495. Tr. Navigat. et Commere. inter Gall. et Britann. 1713. Ultraieſti art. XXXVIII. ap. Lamberti Tom. VIII. p. 90. cum Belgis foed. art. XXXII. ibid. p. 150.*

q) excidit hoc, si quid recte percipimus. Sic sup. foedere: *μη πλεῖν Ῥωμαίους* etc.

r) ap. Strabon. XVII. p. 1154. C.

s) videri potest καὶ Λιβύη additum a male sedulo, qui in priore foedere vtrumque iungi viderat. Si tamen verum est, ea Libya est, quae vltra Tarſeium et Maſtiam ſita erat. Sed potius abeſſe iubebo.

fluere coactam. Adeo occaecauerat animos auaritia, ut ciues Carthaginienses ad se et suam ciuitatem omnem quaestum, omne ex negotiatione et mercatu commodum raperent, ut nec vrbes in vicinis locis socias a peregrinis adiri vellent.

VII. *In Sicilia tandem, quae quidem in Carthaginiensium ditione est, item Carthagine, omnia Romanus facito, vendito, quae cui licebit t): idem Romae Carthaginiensi ius esto.* In Sicilia adeo omnia liberioris iuris, ut in priore foedere; nunc accessit eadem negotiandi libertas in ipsa Carthagine.

Tertio foedus renouatum V. C. 448. u) iisdem, ut probabile fit, conditionibus; etsi res Polybium fugisse videtur. Carthaginienses in summum discrimen ab Agathocle adducti, eius discessu ex Africa vix respirare coeperant eo anno: attritis itaque in Africa et Sicilia rebus, videntur sociorum studia in se et animos firmasse.

Quarto, aut ex Polybiana ratione, tertio, foedus inter Poenos et Romanos sancitum tempore Pyrrhi in Italiam traiectus x): neque causas inuestigare

t) haec erant in superiore foedere: ἵσα ἔστω τὰ Ῥωμαίων πάντα.

u) Ita Liv. IX, 43. disertè, P. Cornelio Aruina Q. Marcio Tremulo Coss. et cum Carthaginiensibus eodem a. foedus tertio renouatum; legatisque eorum, qui ad id venerant, comiter munera missa.

x) Polyb. III, 25. κατὰ τὴν Πύρρου διαβασιν. Pyrrhus traiecit Tarentum V. C. 473. Foedus tamen sub id demum tempus pactum esse videtur, cum Pyrrhus in Siciliam vocatus esset: adeoque sub a. V. C. 476. a. C.

figare difficile est: imminebat ille Siciliae, cum belli in Italia successus votis haud responderet, Siculi autem, intestinis discordiis et Poenorum armis attriti, eum ad se vocassent. Seruatae in hoc foedere conditiones pristinae; adiectae hae:

I. *Si societatem cum Pyrrho alteruter populus foedere per scripto inierit: foederis legibus uterque caueo, ut si alterutrius (Romanorum et Carthaginiensium) ditionem hostis (externus) inuaserit, inuicem sibi opem ferre liceat.* Quo ipso adeo caueri debebat, ne, pace cum Romanis facta, Poenos armis peteret Pyrrhus. Praeclara cum prudentia scripta foederis lex, cuius exempla plura sunt in recentioribus foederibus.

II. *Vtriusque autem opus auxilio habuerint, naues a Carthaginiensibus praebentor, et ad iter et ad praelium; stipendia suis utrique danto.* Perperam haec accepta a viris doctis ita sunt, ut nullas omnino naues Romanis fuisse tum putarent: cum tamen ipsi illi bello, quod cum Tarentinis gestum, facta navibus Romanis iniuria causam dederit, et Antiatum naues abactae et in naualia Romae subductae, partim incensae, rostris in foro fixis, iam sub a. 417. memoratae sint.

III. *Carthaginienses etiam classe, si opus fuerit, auxilium ferunto. Socios nauales inuitos nemo nauibus exire cogito: sc. ad militiam terrestrem obeundam.*

E 2

Similia

278. Idem ex rerum narratarum ordine in Liuii Epit. lib. XIII. intelligitur: *Iterum aduersus Pyrrhum dubio euentu pugnatum est. Cum Carthaginiensibus quartum foedus renouatum est.*

Similia interdum foederibus recentioribus pacta esse, ex rerum gestarum memoria facile repetas.

Non satis constat, sitne ad tempus ante foedus percussum referendum, an iam facto foedere sequutum sit, quod a Iustino narratur: missum a Poenis auxilium cum CXX nauibus fuisse a Romanis remissum; si tamen verum est, quod Valerius Maximus in eadem re subiicit, superbe a Romanis esse responsum, pop. R. bella suscipere solere, quae suo milite gerere posset: serius missa auxilia esse necesse est, cum aut Romani iam satis fiderent viribus suis, aut iam refrixisset gratia inter vtrumque populum; quandoquidem eodem illo bello cum Pyrrho gesto prima dissidiorum semina sparsa esse intelligi potest y). Poeni clam id agebant, ut Pyrrhus in Italia detentus attereretur viribus, nec in Siciliam traiceret. Manifestiores etiam odii causae paullo post in arce Tarentina occupanda apparuere sub a. 482. a. C. 272. z).

Iusiurandum, quo foedera sancita fuerint, addit Polybius a); sed ad causam nostram ea res nihil facit: uti nec de reliquis Poenorum cum Romanis pactationibus nunc laborabimus. Ut ne tamen desiderari aliquid possit, quo consiliorum utriusque populi ad nauigationem et mercaturam spectantium rationes patefiant, ex iis, quae postea pacta con-

venta

y) cf. Iustin. XVIII, 2. Valer. Max. III, 7, 10.

z) Bene has exposuit Freinsheim. in Suppl. Liv. XIV, 44-46. Suppl. an Corps dipl. T. I. p. 293.

a) Polyb. I. c. c. 25.

venta sunt, ea feligamus, quae proposito nostro consentanea sunt.

Igitur bello primo Punico id actum a Romanis, *ut Poenos Sicilia excluderent*, mox altero, *ut omni mari mediterraneo*. Nec tamen ipsi Romani in eorum locum *succesuisse* vidcri possunt; nam nec maritimis opibus magis, quam terrestribus copiis imperii robur inesse voluere; maritimorum autem negotiorum libertatem potius ciuibus reliquerunt et sociis, quam vlli magnopere curae habuere. Habetur hoc inter praecipua sagacitatis ac prudentiae huius saeculi argumenta; quod primum intellectum est, ab imperio maritimo Europae principatum pendere, regnorum neruos ac robur mercatura et nauigatione contineri, classibus et copiis nauticis ut quisque populus sit instructissimus, ita etiam ad ipsum continentem reuerentia maiestatis suae, interdum etiam metu, continendum plurimum virium habere. Enimuero Romani sua per tot aetates experientia exploratum habebant, *non magis diuturnas ac perpetuas esse opes maritimas quam reliqua humana*; virtuti bellicae cedere omnia, etsi nec ipsa quicquam facere possit diuturnum, nec ipsi successe diu superstes esse. Ut taceamus florentissima commercia Tyri maritima ab exercitu terrestri Alexandri euerfa et profligata; ut nec attingamus alia externa exempla: ipsi Romani ab omni nauigationis studio alieni Etruscos et Poenos maritimis opibus validissimos fregerant et perdomuerant; et Etruscos quidem saepe mirati sumus in bellis cum Romanis nusquam legi virium aliquid, seu comparandis seu reparan-

dis opibus, ex re maritima habuisse; Poenos autem maris imperium tenentes, classibus instructissimis valentes, Romani recentibus classibus mari superarunt; nauium regendarum peritia Poenis relicta, ipsi pedestrem pugnam in nauale inferentes praelium, et cominus tanquam in continenti e naui pugnantes; mox quotannis in Siciliam et Africam exercitu pedestri misso adeo fregere Poenorum opes, vt victos se faterentur. Hoc idem sequuti sunt in bello Annibalico et in bello nouissimo, vt pedestri exercitu in Africam traicerent. Etsi itaque Poeni classe et re maritima superiores essent, Romani tamen multis praeliis eos profligarunt, prouinciis externis exuerunt, tandem cum imperio vniuersam remp. Poenorum euerterunt: adeo *virtus et bellandi peritia praevaluit opibus maritimis*. Nec tamen Poenis prudentia aut mens aut animus defuit. Nullum facile est aut inuentum aut commentum aut consilium, quod nostrae Europae auaritia atque auiditas inextinguibilis excogitauit, quod non Carthago iam olim adhibuisse reperiatur, vt studia navigationis aleret, opes sibi soli pararet, aliorum lucro inhiantium cupiditatem aut reprimeret aut eluderet, emporia opportunissima, munitissima, instructissima haberet; vna defuit virtus, quae nulli facile populo in simili fortuna adfuit, moderatio. Et haec cognoscere et declarare possumus, cum ex Poenorum historiis vix exigua aliqua fragmenta supersint. Quam velle-mus vnam Carthaginensium rerum historiam magno Romanorum scriptorum numero redimere! Sed redeamus ad id, vnde haec orsa est oratio.

Bello Punico I. confecto V. C. 512. pax his conditionibus facta, ut Carthaginienses Sicilia et omnibus, quae inter Italiam et Siciliam sunt, insulis decederent; utriusque populi socii ab utroque populo tuti essent; ut neuter in alterius populi ditione aliquid imperaret, neve publice inaedificaret, nec militem conduceret, nec alterius populi socios alter populus in amicitiam reciperet; ut Carthaginienses intra X. annos c10c10CC. talenta conferrent, c10 sine mora persoluerent; captiuos omnes ut Romanis sine pretio redderent b).

Integra in ceteris prouinciis ac locis praeter Siciliam mansere omnia. De mercatu in Africa et aliis locis faciendo a Romanis, et de iis, quae superioribus foederibus cauta erant, nihil memoratum legimus. Videtur tamen parum probabile, seu tacito seu publico consensu ea sublata esse et abolita.

Postea bello cum mercenariis finito a Carthaginiensibus postulatum a. V. C. 516. *ut Sardinia quoque decederent* et ad compensandas impensas in apparatus belli, quod, etsi nulla idonea de causa in se susceptum, Poeni tot calamitatibus fracti deprecabantur, factas alia cloCC talenta soluerent. Nihil superbius vnquam factum legimus. Haec iniuria et iniquissima perfidia Romanorum, si quid aliud, valere debuit ad belli Punici II. incendia conflanda; satis enim manifestum erat, si vel maxime se intra Africae limites Poeni continerent, a cupiditate huius populi parum tutos se fore. Sardi cum in Romanorum

E 4

norum

b) Polyb. III, 27. cf. I, 63. Alios ap. Barbeyrac. l. c. p. 310 sqq.

norum ditionem detrudi se aegre ferrent: ortum bellum atrox, ingenti cum Sardorum internecione; vnde *Sardi venales*.

Sub initium quidem belli cum mercenariis aequiores se prae buerant Romani. Permissum ab iis fuerat, ut ad hoc solum bellum militem Italum mercede conducerent, quod ex foederis legibus non debebatur. Missi etiam a Romanis, qui pacem inter Poenos et Afros rebelles componerent; nec receptae ab iis ciuitates Africae, quae sub Romanorum imperio se futuras dixerant c). Interea mercatores ex Italia in Africam nauigabant et com meatum hostibus comportabant: *hos Carthaginienses in suos portus deduxere iamque prope D. id genus homines carceribus inclusos tenebant*. Iure factum quis dubitet? iure quoque nostrorum populorum maritimorum communi, foederibus quoque firmato. Romani tamen succensere et tanquam de iniuria facta conqueri. Missi legati, qui ut redderentur postularent. Carthaginienses temporibus cedendum esse rati remisere. Vetitum inde ab Senatu, *ne ad hostes commearent socii, Carthaginiensibus autem ut com meatum apportare liceret d)*. Cum vero, quod non expectauerant, tantarum calamitatum fluctibus emer sisse viderent Poenos Romani, iniuria rem gerere maluere;

c) v. Appian. fragm. de reb. Sicul. (ed. Schweigh. p. 95. 96. de b. Pun. lib. I, p. 7. Toll. (p. 301. ed. Schweigh.) in his Uticenses. Polyb. I, 83. iidem bello tertio Punico vix orto se in Romanorum potestatem tradiderunt: v. Polyb. Exc. Legat. CXLII. To. III. p. 803. Appian. VIII, 75.

d) Polyb. III. 83.

maluere; nauigant, vt modo commemoratum est, in Sardiniam, et Poenis bellum denuntiant. Nec tamen vel sic, cum Sardinia cessum esset, Romanorum suspiciones dimotae aut sublatae: nam sub a. 521. per legatos Carthaginem missos conquesti sunt, Poenorum clandestinis artibus ad defectionem allici Sardos bellumque minati sunt: ferociter responsum est a Poenis minaeque legatorum reiectae e).

Poeni inde suarum rerum praesidium in *Hispania* quaerere; nec sane ad maximas opes parandas aliud potentius et efficacius a Poenis cogitari poterat: adeo terrarum situs, rerum copiae, metallorum inexhausta vis, littorum opportunitas, incolarum frequentia conducendis militibus nouo semper hominum prouentu propullulans, potentiae materiam praebebat. Quod cum Romanis patefactum esset, in omnes illi partes se vertere, varia tentare; tandem missis ad Senatum Carthaginiensem et ad Asdrubalem legatis a. V. C. 525. pactum est cum Asdrubale, vt Iberus vtriusque populi ditioni fines faceret f). Mox cum disiuncti Ibero interiecto focii Romanorum Saguntini ab Annibale armis essent petiti et Romani Poenorum perfidiam incusarent, responsum ab his: Asdrubalis pactionem non ratam factam a Senatu Carthaginienfi, in pacis autem foedere de fociis vtriusque populi *qui tum essent*, non de iis, qui

E 5 ad

e) v. Zonaras VIII. p. 401. (302.)

f) v. Polyb. II, 13. (Non satis exploratum est, an iam tum in foedere Saguntum versus occidentem ab Ibero situm, exceptum fuerit. cf. Liv. XXI, 2. Appian. Hispan. 7. et ibi V. C. Schweigh.)

ad societatem post pacem factam accessuri essent, scriptum esse. Saguntinos autem ex hoc, non ex illo genere fuisse g).

Belli Punici II. qui exitus fuerit, nota res est: *fraëdae et euerfæ Poenorum opes maritimæ*; naues rostratas, præter X. triremes, habere iussi nullas; bellum iniussu pop. Romani ne gererent; vt tamen legibus suis viuerent, quas vrbes, quosque agros, quibusque finibus (in Africa) ante bellum tenuissent, tenerent h). Ne accisis quidem rebus his diu frui licuit. Perfidus Numida, Masinissa, ex inuidia et odiis, quibus Poeni a Romanis habebantur, crescere didicerat; is nullum iniuriis modum statuere, cumque armis vti Poenis non liceret, ipse in fines eorum incurrere, agros, oppida, castella, occupare, Romanorum animos per ea ipsa, quæ Poeni conquerebantur, exacerbare i). Poeni, cum se infensissimi hominis libidini et arbitrio condonari viderent: alia præsidia circumspicere, cum Perseo Macedone consilia communicare, tandem aduersus pestilentem hominem arma sumere coepere: versum id ipsum in perfidiæ crimen. Ita exarsit *bellum illud vltimum*, quod excidium attulit vrbi florentissimæ non sua magis quam temporum, in quæ inciderat, iniuria; nam nec prudentia et consilio Poeni, nec patientia et moderatione rebus suis defuisse videntur.

g) v. Polyb. III, 29. Liv. XXI, 18. et Appian. de reb. Punic. 67.

h) Liv. XXX, 47. Appian. VIII, 54. qui vrbibus et agro extra fossam Punicam cedendum fuisse ait: etiam c. 32.

i) Liv. XLII, 23.

cor. Omnino in iis bellis, quae cum Romanis gesta sunt, vel Romanis scriptoribus testibus adhibitis, *Poenos caussa, consilio, fide ac religione, superiores, nec, nisi fortuna, inferiores fuisse* apparet. Adeo per iniurias et superbiam Romanorum expetitae ab iis sunt poenae eorum, quae in alios populos, quos dominatus acerbitate vexauerant, commissa ab iis erant; etsi nec horum populorum conditio in melius est mutata; nihil enim nisi novas Romanorum iniurias post veteres illas Poenorum sunt lucrati. Ceterum per vltima haec tempora nihil de mercatura et nauigatione actum, nec de facto aliquo adversus foedera conquestum meminimus.

Adoremus, Ciues, venerabundi numinis O. M. potentiam, libere, sed haud dubie consiliis sapientissimis iustisque cum caussis, per imperiorum et regnorum fata grassantem, et pro rerum hominumque naturis de eorum ortu et occasu statuentem. Sane quidem nos talpis caeciores homunculi arcessimus caussas modo ab his modo ab aliis rebus: nec male; videmus tamen iisdem artibus, corruptelis, flagitiis et facinoribus, quibus alii euerfi fuerant, alios populos ac reges creuisse, opes imperiaque parasse; aliorum mox iniuriis et ipsa ruitura; temporibus et fortunae omnia seruire, etiam sapientiam mortalium et prudentiam. Scr. Gottingae d. XVII. Septemb. cl^o l^o cc lxxx.

E p i m e t r u m.

In hac foederum inter Romanos et Poenos factorum illustratione operae me haud poenitere lubenter profiteor; quam multa enim ex ipso foedere elicita a me et expressa sunt, quibus iura maritima et merciorum artes nostratum tantum non mutuatas et in vetus aeuum traductas esse putes. Videmus *libertatem nauigandi usu et pacto circumscriptam, marium aditum interdictum, leges mercatus faciendi scriptas*; omnino pauca in hoc genere sunt, quae non in istis foederibus occurrant. Fac Poenorum annales et historias ad nos peruenisse integras, quibus omnis eorum nauigatio et mercatura exposita esset! quae in illis rerum memorabilium huius generis seges futura esset, cum ex paucis stipulis tanta messis facta sit? Quid? quod haud pauca alia, non memorata, ex iis, quae memorantur, si sagacitatem adhibeas, elici possunt. Negotiorum gestores, quos Consules vocamus, in emporiis constitutos, memorari non memini: cum tamen tot emporia Poenorum et Graecorum in terris barbarorum memorentur, praefuisse his necesse est non vnus ordinis homines. Negare tamen ne sic quidem ausim, multa nostris temporibus ad nostras necessitates melius, subtilius et curiosius, esse constituta et circumscripta. Ita de vendendis mercibus praeclare prospici coepit nostrorum temporum foederibus, vt in Vltraiectino foedere a. 1713. art. XII. inter Gallos et Britannos (Lamberti T. VIII. p. 84).

Inter

Inter has Poenorum cum Romanis pactiones mirari satis nequeo, *nullam fieri aut Aegypti et Alexandriae mentionem*, aut *Ptolemaeorum intercurfus* in rebus maritimis et mercaturis. Tertium foedus tempore Ptolemaei Soteris, quartum Philadelphi, factum; succedere bella Punica cum Romanis. Est locus Appiani in Excerptis Legat. (ap. Schweigh. p. 92) qui ad annum belli Siculi seu Punici I. duodecimum spectat, ab V. C. 502. Missi a Carthaginiensibus legati ad Ptolemaeum Philadelphum, ut peterent ab eo mutua duo talentorum millia *), subiiciuntur haec: fuisse Philadelphum amicitia cum Romanis iuxta et Carthaginiensibus deuinctum, tentasse quoque pacem inter eos conciliare: quod cum efficere nequiret, „amicis, inquit, „*aduersus hostes, non aduersus amicos opem ferre oportet.*„ Quo quidem intelligitur, a Poenis eum, ut aduersus Romanos auxilia mitteret, sollicitatum fuisse. Iunxerat autem ille iam antea amicitiam cum Romanis accepto nuntio de Pyrrho a Romanis victo, quem rex sibi inimicum habebat. (v. Dio. Cass. et ad eum laudd. T. I. p. 61). Philadelphi iudicium amplexi et sequuti sunt successores. Ademptum est Poenis et translatum ad Romanos imperium tum maris mediterranei, tum Africae; nec tamen aut odia aut studia Ptolemaeorum in Poenos Romanosue emiuerunt. Expectares tamen, ad Alexandriae commercia Carthaginis opes, siue auctas siue fractas, non contemnendas; a regum autem curis, Poenorum, quorum finibus contermina erat Libya et Cyrenaica a Ptolemaeis occupata, fortunas nullo modo alienas fuisse

*) 2,400,000 thaler.

fuisse *). Verum ex veterum saeculorum historiis tam multa ad nostram memoriam non peruenere, ut temerarium sit, ex iis quae nouimus, de iis quae ignoramus, iudicium facere velle. Vnum tamen est, quod assequi licet. Alexandrinorum commercia, regum quoque opes maritimas, quantum intelligo, ad Orientem maxime spectabant, Poenorum ad Occidentem; porro, cum Romani commercia spernerent, nihil habuere Alexandrini quod eorum potentiam per insulas et maris mediterranei littora auctam metuerent, cum contra de Poenorum opibus multo magis iis metuendum esset; reges autem Aegypti illo maxime tempore, quo cum Poenis bella gessere Romani, fuere luxu, mollitie et seditionibus domesticis a rerum externarum curis abducti. Inierant quoque aut renouauerant foedera cum Romanis Ptolemaei, Philopator, Epiphanes, Philometor, Euergetes II. verum partim regum Syriae metu, partim ut in turbis domesticis Romanorum interuentu reges aut retinerent regnum aut recuperarent. Ad mercatum et nauigationem in his foederibus et legationibus nihil spectasse video. Interea satis assequi licet uti antea Tyro ab Alexandro euerfa, Carthaginem ita nunc Carthagine, et eodem anno Corintho excisa, *Alexandrinorum commercia mirum in modum fuisse aucta.*

*) Non oblitus est vir Ill. Fr. Sam. de Schmidt in Diff. de Comm. Ptolem. p. 297. sqq. Carthaginensium et Alexandrinorum commercia attingere; nec tamen materiem disputandi reperisse videtur idoneam, cum nihil ex veteribus narratum sit.

V.

ACADEMIAE GEORGIAE AVGVSTAE

PRORECTOR

CHR. FR. GEORG. MEISTER D.

CVM SENATV

SVCCESOREM

IN

MAGISTRATV ACADEMICO

IO. ANDR. MURRAY D.

CIVIBVS SVIS

COMMENDAT

IN A. D. II. IVLII CLD ID CCLXXXI.

De Romanorum prudentia in coloniis regendis.

Rem Romanam ad tantas opes tantamque imperii magnitudinem excreuisse, non adeo miratione dignum videbitur, Ciues amantissimi, si Italiae, in paruas ciuitates diuersis studiis agitari solitas districtae, et reliquarum terrarum statum et conditionem, qualis illis temporibus fuerit, et alia, quae ad fortunam et fatorum ordinem referri solent, reputaueritis; in primis hoc, quod ipsi barbari et in omnium rerum egestate acrumnis et laboribus tolerandis affuefacti imminebant finibus Etruscorum,

rum, quos commerciorum et nauigationis studia a bello abduxerant, luxuries autem et mollities corporum robur fregerat. Etsi porro non armis magis ac virtute, quam consilio et prudentia excelluisse Romani videri debent: in hac tamen prudentia contineri videbitis multa, quae cum iustitia, humanitate et moderatione, parum sunt coniuncta: vtenim priuatae fortis homines, ita ciuitates et imperia haud facile ad insignes aliquas opes et fortunas perueniunt, nisi interdum vtilitatis causa ius sibi deferendum esse statuerint. Romani autem omne fere ius ad reip. vtilitatem reuocabant, quam tamen ex philosophorum placitis constitutam ab iis nolite putare: se superesse, res gerere, opes et copias habere, cum totius generis humani seruitute, et, si ferre iugum nollet, excidio, dignum et aequum habebant.

Inprimis vero consilia et artes, quibus Senatus vsus est, ad tot tantosque populos et terras in obsequio retinendas, etsi summis laudibus a multis sint celebratae, ita tamen comparatae sunt, vt partim ad ius, quod in manu positum est, quodque is, qui ceteros viribus excellit, potentior ipse et fortior, exercet, et ad vim iniuriamque omnia fere redeant, partim tam abominandae sunt fraudis, infidiosae astutiae et superbiae, vt legentibus indignationem et horrorem faciant. Itaque, vt populi, hominum rerumque copiis florentissimi, et prouinciae latis finibus patentes, imperio tuto haberi possent, hominum caedibus, vrbium excidiis, vastitie et solitudine agrorum effectum est. Nihil adco esse videatis

videatis haftenus, quo Genghiscanis aut Timuris meliores ac praestantiores videri debeant, praeter quam quod diuturnior Romanis imperii fructus fuit, quo plura rerum momenta et mutationes euenire et in illa vrbium agrorumque vastitie iterum noua hominum stirps efflorescere posset. Nec vero vllum magnum imperium esse potest, quod non vastas agrorum solitudines aut habeat aut faciat.

Si tamen Romanos tantum coloniarum numerum *a*) in obsequio ac fide retinuisse audiamus, saltem hac in parte insigne illi prudentiae exemplum proposuisse videri possunt; inprimis si nostrae aetatis casus et euenta comparemus. Inquiramus itaque, agedum, Ciues, quos communia litterarum studia in eandem seu ciuitatem seu coloniam adduxere, in causas ac consilia, *b*) quibus effectum sit,

a) Recensum coloniarum Romanarum diligenter fecit Sigonius ad Liv. XXVII, 9. et de ant. Inre Ital. II. 5. III, 4. ex eoque Beaufort de la Rep. Rom. T. II. p. 246. cf. Pilati: Tr. des Loix polit. des Romains T. I. p. 288 p. 351. 5. Loca classica sunt Livii XXVII, 9. 10. XXIX, 15. XXVII, 38. XXXVI, 3. et Veliej. I, 14. Vsque ad a. 663. coloniarum LIV. nomina reperiuntur. Sub aduentum Annibalis in Italiam coloniae deductae fuerant LIII. e qua superstites erant non nisi XXX. reliquae XXIII. iam tum e medio erant sublatae.

b) De natura et generibus coloniarum, de earum iuribus, de educendi et describendi more, de consiliis et de causis, cum modo ad liberandam a ciuibz egenis vel seditiosis urbem, modo ad sustinendam egestatem, modo vt praesidii loco essent in terris ab hoste captis, modo vt praemii loco ager distribueretur, nunc non disputamus; prostant libri hisce de rebus satis multi: et tradi solent haec cum in antiquitate tum in historia Romana. Cf. de vet. coloniar. iure et causis. To. I. Opusc. p. 290 sqq.

Heynii Opusc. acad. Vol. III.

F

fit, vt colonias suas Romani adeò obnoxias et iussis imperiisque parentes haberent. Iamprimum iis ea felicitas contigit, vt mature coloniarum sortem et conditionem certa lege constituerent, nec, quod Europae populi admiscere fere omnes, cum non consilio certo, sed partim temerario nonnullorum priuatorum ausu, partim auaritia, partim odiis ciuilibus ac religiosis, fusciperentur coloniae, casui rerumque fortunae eam permetterent. Cum autem ad retinendas in officio ac fide colonias duae maxime viae et rationes sint, vt aut pari cum metropoli iure constituantur, aut deteriore sint: Alterum, quod quidem iuribus humanitatis consentaneum, et ad felicitatem publicam ac priuatam, quae sine iuris aequitate non nisi ad partem tantum ciuium manare potest, primum est, non nisi consilio et prudentia stare potest summa; videndum enim, vt metropolis omnium rerum summam et imperium retineat, et vniuersarum vt prouinciarum, ita coloniarum, caput, omnis iuris et auctoritatis fons et origo, omnium rerum sit principium, vt coloni et sua sibi iura habeant et ius summum a metropoli petant, vt ne ipsae inter se plures paucioresue artius, quam cum metropoli, vinculum et coniunctionem habeant, et sic alia, quae prospicere difficile est, imprimis in magna locorum longinquitate et coloniarum, caeli, soli, institutorum, diuersitate; Alterum exigua perficitur sapientia, cum in parentium et seruientium locum et ordinem detruduntur capita libera; multo magis, si libertati naturali ac ciuili ciuium subducitur et auellitur omne id, quod imperio in eos vim et momentum satis graue addere potest;

batür facies reip. Romanae et forma: erat senatus, Decurionum nomine, cum magistratibus, Duumviris, Aedilibus, Cenforibus: *ut effigies paruae simulacraque esse quaedam urbis videri possent; at iura institutaque omnia populi Romani, non sui arbitrii, habebant: quae conditio magis obnoxia et minus libera erat; ut notis Gellii d) verbis utamur.* Interdum coloniae descriptae sunt in formulam iuris Latinorum et Italici; in his *iura quoque priuata Quiritium* amittebant ciues Romani nomina in iis deducendis professi: ut adeo vix, nisi pauperes et egeni, qui domi ciuitatis fructum sibi exiguum aut nullum esse videbant, nomina dare voluisse videantur. Factum quoque interdum, ut iam adscripti in colonias aut sorte ducti recusarent in colonias ire. Sic V. C. 260. cum Volscis deuictis ager Veliternus esset ademptus, Velitras coloni ab urbe missi et colonia deducta; sed non nisi grauissima et inexorabili poena proposita exire, qui sorte ducti exire detrectauerant. e)

Igitur principio statim id curarunt Romani, ut colonias haberent sibi obnoxias, ad obsequium paratas et imperio parentes. Iam in quaestionem venit, quid illud fuerit, quod ad tam sapiens et prudens institutum eos deduxerit; miraue ea res videri debet eo magis, quo municipia multa ea lege essent, ut Romae suffragii et honorum ius haberent, melioreque adeo iure essent quam coloni. Cum omnino pauca de iis, quae ad ius publicum Romanorum spectent, in scriptoribus Romanis occurrant, probabili

d) Gell. XVI, 13.

e) Dionys. VII, 13. cf. Liv. II, 31.

babili aliqua opinione pleraque sunt constituenda. Manifestum autem fit, tempora et res ipsas potius quam exquisitam aliquam prudentiam, principio saltem, morem et institutum hoc in remp. intulisse.

Omnino ut colonias mitterent, Romanis necessitatem fecit immane, quod tum erat, ius belli, cum omni pube caesa aut sub corona vendita vastitatem agrorum facerent. Ut agri capti usus aliquis esset, deducendi erant coloni; nec minus tum, cum mitiore consilio ad augendum civium numerum victi et capti Romam traducerentur. Cum coloni longius ab urbe abscederent, ad suffragium ferendum Romae cum commodo suo adesse nequibant; gratum itaque et pro beneficio habitum, si suis rebus sine interpellatione vacare liceret. Versum hoc postea in morem, quem in comitiis habendis utilitas reip. commendare debuit; isque mox in ius abiit, iurisque Quiritium caput constituere coepit praecipuum. Adempto autem iure suffragii reliquis omnibus Quiritium iuribus, quae quidem ad statum publicum, ut nunc loquimur, pertinent; excidere colonos necesse fuit. Nec vero, etiamsi consiliorum prudentia haec ita instituta esse liquido constaret, mirationem id facere deberet: nam facile eam subiicere animis potuit ac debuit status et conditio quae tum erat Italiae: habitabatur illa ab omni inde memoria a coloniis Ausonum, Etruscorum, Pelasgorum et Graecorum; Latium XXX. coloniis Albae Longae erat frequentatum; erat in iis ipsa Roma. Multa igitur tempus et res docere ac suadere debuit, quae nunc ignoramus. Videntur igitur

tur in his coloniarum descriptionibus Romani aut morem sequuti esse sine consilio, aut consilium, quod vsu et experientia illorum temporum satis obuium et in promptu esse potuit. Enimuero fuere plura, quae in coloniis constituendis difficultates, quas nostra aetas sentit, tollerent. Nihil enim illo tempore de mercatu et nauigatione, operarum et rerum commerciis, mercium, opum et operarum interceptione et occupatione erat statuendum. Liberum erat, merces petere aut mittere, vnde et quo quisque vellet; nihil haec reip. ab omni commerciorum vsu alienae intererant; si interfuissent, ipsa res docuisset, coloniarum iura in his quoque circumscribere. Nam in vtilitate sua perspicienda acute quisque facile videt; caecutimus fere in ea cum aliorum vtilitate ad aequitatem comparanda. Numerus colonorum primis saeculis admodum erat exiguus et agri iugera pauca singulis assignata: huius generis colonias in obsequio retinere, non adeo difficile esse potuit, inprimis cum intra Italiae fines haberentur omnes. Ex quo vero validiores et numero ciuium et iugerum frequentiores colonias educere placuit, satis firmae iam tum erant res Romanae. Mox Senatus alienior ab hoc instituto visus: nec inmerito, non enim suppetebat ager in Italia, nisi publicus ac vectigalis: quo per leges agrarias Gracchorum, Drusi, Caesaris, remp. priuari aegre ferebat. Extra Italiam colonias deducere, si Aquas Sextias (V. C. 629.) et Narbonem Marcium (V. C. 635.) excipias, consultum haud visum; exemplo Carthaginis, Syracusarum et aliarum vrbium discere in promptu erat, potentia et opibus colonia-

rum

rum premi posse urbem, ex qua eae exierant *f*). At metu omni mox sublato, Caesar et Augustus per Hispanias, Gallias, Macedoniam, Asiam et Syriam aliasque provincias magnum coloniarum numerum constituerunt, omninoque tanta rerum conuersio successit, ut nomen adeo et iura coloniarum peterent et acciperent urbes in provinciis *g*). Verum haec notiora sunt quam ut ea copiosius persequi necesse sit; nec de coloniis militaribus mentionem faciemus, quae ad nostram disputationem non faciunt.

Imperio igitur ac metu colonias continuerunt Romani, vbi cum maxime eas in obsequio ac fide retinere: idque multo magis intellectum est aduersus reip. temporibus; nam coloniarum defectiones cum ceteris Latii et Italiae focis memorantur plures; vt satis appareret, non admodum eas in sua conditione et statu sibi placere, nisi vis ac metus circumfisteret. Nec vero non indignum videri debuit colonis, se ciuitatis iure potiore esse priuatos, h) et tantum non capite deminutos: hinc odia

F 4 mutua

f) Ipse Vellej. Paterc. II, 15. hanc rationem asserre putandus. Quod ibi adiectum: *ut ciues Romanos ad censendum ex prouinciis in Italiam renouauerint*, perperam inter causas consilii refertur. Est uero declarationis causa adiectum: *ita ut etiam*.

g) cf. Spanhem. de V. et P. Num. T. I. p. 106. 602.

k) An ii, qui colonia relicta Romam redissent, ius suffragii recuperauerint, quæri videas, affirmari quoque. (Vt nuper quoque a *Ferguson* V. C. lib. I. hist. incrementi et excidii reip. R. interpret. Germ. p. 17. et 102. sed ibi plura sunt quæ expuncta esse malim) Ita vero fieri non potuisset, ut interdum vni et alteri ius ciuitatis daretur (cf. Cic. pro Balbo 48) interdum municipii

mutua et sublesta fides. Incendere animos potuere Latinorum et aliorum sociorum, inter quos vivebant, consilia et studia, cum iura sibi aequari cum Romanis ii postularent: vnde orta bella grauissima, et clades mutuae: quibus finis plerumque ita impositus, vt interneccione delerentur focii, vastarentur oppida et agri. Raro Senatus, quae prudentia et aequitas suadere poterat, sequutus est: quod semel factum Camilli maxime consilio V. C. 417. i). Per eadem tempora euenisse videtur, vt tot coloniarum, quae per Italiam fuerant, iam sub Punicorum bellorum tempora non nisi nomina extarent. Non enim ad eos, quos suis legibus parere iussisset, in obsequio continendos, sapientia Senatus Romani meliora consilia reperire potuit, quam quae omnibus iis, qui magna imperia condiderunt, vsurpare solenne fuit, ad quae quidem excogitanda nec adeo magna ingenii sollertia opus est, vt, quos vi ac metu oppresserant, si ira ob amissam libertatem aut ob seruitutis onus auctum incensi imperium detrectauerant, non tam onere eos leuarent, ad aequitatem et humanitatem consilia reuocarent, et, cum se ipsos culpae auctores habendos esse meminissent, ad ignoscendum essent faciles; verum vt in noxios aut suspectos poenis ac suppliciis saeuirent, iniurias veteres nouis iniuriis cumularent. Ita statim V. C. 320. cum quarto inde anno Fidenae ad Veientes defecerant, victis Fidenatibus et Veientibus oppugnata

nicipii iura impertirentur. Et pessimi exempli res fuisset, si colonia deserta Romam noui coloni redire potuissent.

i) v. Liv. VIII, 14.

gnata vrbs, capta et diruta k). Velitrae in Volscos (circa V C. 260) vix erant deductae, cum consilia cum Volscis ad recuperandam libertatem inire coepere. Non satis constat, quid Romani in eos statuerint; l) verum vbi aliquoties rebellauerant, cum a. 417. de toto Latio a Camillo ad Senatum esset relatum, in *Veliternos, veteres ciues Romanos, quod toties rebellassent, grauiter saeuitum*: et muri deiectioni, et Senatus inde abductus, iussique trans Tiberim habitare m). Etiam Antiates cum Latinis defece- rant: Antium colonia noua missa; n) Antiatibus naues longae abactae et incensae (rostris in foro sug- gestus exornatus) interdictumque mari. Nec minus tamen etiam haec colonia noua cum Latinis bella aduersus Romanos fecit, donec a C. Maenio 416. de Antiatibus triumphatum est.

F 5

Condi-

k) Liv. IV, 17. 22.

l) Cum Circeiis defece- rant, circa 372. Liv. VI, 21. Ve- litrae expugnatae 375. Liv. VI, 29. vbi nil memora- tur, quid Romani in eos statuerint. Iterum bellum renouant VI, 36. vrbs obsessa c. 42. nec constat, quo euentu. Faciunt nouam incursionem Veliterni VII, 15. a. 397. deficiunt tandem cum Volscis et Latinis 415. Liv. VIII, 3.

m) Liv. VIII, 14.

n) ibid. Liuii verba difficultatem habent iam ab aliis ani- maduersam: *Antium noua colonia missa, cum eo ut An- tiatibus permitteretur, si et ipsi adscribi coloni vellent* — interdictumque mari Antiati populo est et ciuitas data. Si coloni adscripti, quomodo ciuitas data? Et si tam grauis multa imposita, vnde ciuitatis beneficium? Nisi verba nouissima ab aliena manu sunt, tenendum est quod Sigonius suppeditat; *ciuitatem* accipiendam h. l. de iure Quiritium, quod coloniae Romanorum com- petebat; quod adeo consequebantur Antiates adscripti ciuibus Romanis in coloniam Romanam deductis.

Conditio coloniarum, ut fociorum, maxime dura et interdum vix toleranda videri poterat maxime in hoc, quod per continua Romanorum bella stipendia et milites imperabantur. Ita opibus et viris exhauriri eas necesse erat: in iisdem bellis haud raro ab hostibus Romani nominis oppugnatae et expugnatae ipsae, ager incurfu hostili direptus et vastatus. Inprimis autem bello Punico II. attritae cum fociis coloniae. Itaque a. 545. (qui erat belli fere decimus; continuatum tamen illud est in annum abhinc septimum) delectibus stipendiisque exhausti focii detrectare militiam; cum his XII ex XXX coloniis P. R. quae tum erant, *negauerunt Coss. esse, unde milites pecuniamque darent; quotannis ferme clade magna pugnari; alios in acie occidi, alios morbi absumi, magis perire sibi ciuem, qui ab Romano miles lectus sit, quam qui a Poeno captus; quippe ab hoste gratis remitti in patriam, ab Romanis extra Italiam in exilium verius, quam in militiam ablegari.* Detestabile visum consilium detrectandi munera militiae, a quo eas castigando increpandoque potius quam leniter agendo deducere placuit. Satis adeo visum est Senatui, postulare ut praeberent coloniae, etsi, unde sumerent, non haberent o). Quarto fere inde anno, demito a Poenis metu, memoria rei patribus renouata, memorabili cum seueritate decernitur, ut XII illae coloniae

o) Liv. XXVII, 9. Totus locus est gravissimus. Verum quod eae Coloniae XII. altero loco XXIX, 15 *Latinae* appellantur, scrupulum iniicit, etsi nullam inde molestiam creatam videamus. Certe in Latinarum coloniarum numero eas Intpp. fuisse aliunde non constat. Latinas vero dici posse quia in Latio sitae erant, valde dubitare licet.

loniae militum numerum duplicatum darent stipendiumque in millia aeris asses singulos, censusque quotannis ageretur e formula a Romanis cenforibus data *p*). Pari modo coloniae maritimae exhaustae fociis in classes datis frustra vacationem petierunt *q*); nec vacatio quidem a militibus dandis e legibus sacrae impetrata *r*). Praeclare haec pro imperio et ex reip. forte temporibus. An vero harum coloniarum conditio ab hoc inde tempore satis prospera resque florentes fuerint, Liuius narratione sua non adiecit. Tandem in bello sociali coloniarum magna pars aduersus Romam conspirauit; vnde etiam ciuitas Lege Iulia Sociis data coloniis nonnullis, quae mox inter municipia censentur, impertita esse videtur; qua quidem lege tanta hominum omnis generis colluie in ciuitatem recepta suffragiis comitiorum turbatis, vt resp. paullo post esset nulla, est effectum.

Mirentur itaque, qui volunt, praeclaram illam Romanorum prudentiam in regendis et in obsequio retinendis coloniis. Praestat diligenter videre, ne res in eum locum adducantur, vbi regni causa ius violandum est. Vbi semel vi et imperio agere aut licet aut lubet, expedita sunt consilia. Nec quicquam inesse videas quod magnam mirationem facere possit, modo viribus, copiis, opibus, praeualeas,

p) Liv. XXIX, 15. Stipendii sane seu tributi summa ceteris non respondet; esset in annum $\frac{1}{6}$ in centena. Sed laborant verba.

q) Liv. XXXVI, 3.

r) XXVII, 38.

valeas, si in obsequio retineas vel inuitos eos, qui, quo se tueantur, non habent. Miramur tamen vulgo omnes eos, quibus maiores vires et copias fortuna praebeuit; esset saltem videndum, an cum istis opibus, quae suppetunt, aut virtus adsit maior, aut maior prudentia ad arripienda ea, quae idonea consiliis seu tempus seu ratio seu calliditas afferre potest.

Et haec quidem praefandi causa, ut mos ferebat. Properandum est ad id, cuius causa haec praefati sumus. Crastino die, Iulii II. insignia Magistratus Academici, quae per totum hunc annum in domo eius, cuius nomen huic paginae praescriptum est, fuere, transferentur ad Virum Experientissimum, Collegam coniunctissimum,

IO. ANDR. MURRAY D.

quod cum et nunc precamur, ut reip. nostrae felix faustumque sit, tum in ipsis muneris auspiciis bona vota et omnia conceptis sollennibusque verbis nuncupabuntur. Ducetur pompa crastino die h. x. ad templum academicum, cui ut, studiosa et nostri et litterarum Iuventus florentissima, adesse velitis frequentes, publico priuatoque nomine rogamus. Hoc igitur est, Comites S. R. I. Illustrissimi, Generosissimi et Nobilissimi Ciues, quod, si a vobis impetrauerimus, amoris vestro et benevolentiae imputatum habebimus. PP. Kal. Iul. cldccclxxxi.

VI.

ACADEMIAE GEORGIAE AVGVSTAE

PRORECTOR

IO. ANDREAS MURRAY D.

CVM SENATV

ANNIVERSARIA INAUGVRATIONIS

SACRA XXXXIV.

IN A. D. XVII. SEPT. MDCCLXXXI.

RITE INDICIT.

*De animabus fideis, ex Heracliteo placito, optime ad
sapientiam et virtutem instructis.*

Iterum vitae rerumque cursu, quod propitio numini debemus, delati ad ea sollennia, quibus recolentur vniuersitatis huius initia, tam faustis auspiciis facta, vt nec nunc post XLIV. annos, qui elapsi sunt, fortuna nos destituat; quid magis ad officium nostrum, quid ad pietatem pertinere putabimus, aut rerum humanarum fluxam instabilemque conditionem reputantibus quid magis consentaneum videri potest, quam vt ad auctorem et moderatorem secundi huius rerum cursus referamus actorum factorumque principia et exitus, grataque
et

et pia mente quicquid publice priuatimque per hunc quoque annum in vtramque fortunam euenit, recolamus. Et publice quidem, recensu facto, rerum nostrarum incolumitati et prosperitati detractum videbimus nihil; contra accidisse multa, quibus reipublicae nostrae seu stabilitati seu dignitati et splendori haud parum accederet. Augmenta habuit laetissima Bibliotheca nostra academica, Georgiae Augustae Palladium, decus ornamentumque palmarium, quod, quamdiu naturae beneficio ingenia non deficient, acuet ingenia facietque doctos quos indoctos acceperit, salutareque in tota Germania operam sacris profanisque litteris praestabit. Naturae opes nonnullae cum corpore Aegyptio medicato accessere Museo. Celebritas nostro Musarum sacratio noua ex eo quoque accessit, quod multi per hunc annum aduenae, et in his Serenissimi Principes Ducesque aliquot, illud adire et plures nostra inter sacra dies exigere, lectionibus habitis interesse, suaque praesentia studia nostra accendere novosque animis stimulos ad mouere haud sunt dedignati.

Haec nos non iactantiae causa, quae a nobis alienissima est, sed eo consilio memorari, Ciues, facile intelligitis, ut ne bonorum nostrorum ipsi incuriosi supina negligentia transmittamus ea, quae animis rerum nostrarum fiduciam, studiorum ardorem, ferendis iis quae secus ceciderint robur, addere possint; simulque ut vos excitemus, quo frequentes coeatis ad celebranda sollennia ea, quae nunc in crastinum diem indicimus in templo academico habenda. Ornabitis, si nos amatis, praesentia

tia vestra, Comites illustrissimi, pompam in sacrum adytum ducendam, aderitisque, Cives natalium ingeniorumque laude conspicui, sacris rite celebrandis. Agentur pro rebus laetis et iucundis, quibus alma numinis prouidentia remp. nostram auxit, gratiae debitae: soluentur suscipienturque vota cum pro incolumitate academiae et stabilitate, tum pro vniuersa rep. praeibitque verba Themidis sacerdos, nunc pietatis nostrae interpres, Ill. ICtorum Ordinis Decanus Spectab. cuius caritate vos duci et alias vidimus,

GE. LVD. BÖHMER,

oratione sollennibus ritibus praemissa, quibus Candidato dignissimo, IO. RVTGERO FLOR, Hamburgensi, summos in vtroque Iure honores impertiet; quo facto rite creatus Doctor alia oratione et ipse bona vota precesque faciet.

Interea, Commilitones, quandoquidem vsus et mos ita fert, vt indicendis sollennibus praefanda sint non nulla, eaque non tam ex intimis disciplinarum recessibus petita, quam potius, vt in amicorum circulis et in familiari sermone ipsa humanitas postulare videri potest, de re aliqua, quae ad communia studia spectet, aut ex vita cummuni petita, aut quam casus obtulerit, seu cofabulantium memoria et recordatio suggererit, seu quae ex proximo arcessita, nuper lecta auditaue, aut curis studiisque sollennibus agitata, in animum venerit: agitedum, ne nunc quidem altius aliquid repetere, aut de consilio doctam scriptionem instituere, quam potius aliquid, quod casus modo obtulit, ad vos adferre,

adferre, vobiscumque recolere curatiusque excutere placet; si forte inde vtilitas aliqua, aut taedii salutem, quod mora, quae intercedit sollennibus, facere potest, detractio vobis parari possit.

Cum in hoc essemus vt scriberemus haec, aliud agentes incidimus in *Musonii Rufi*, philosophi Stoicorum placita aemulantis, et Neronis Vespasiani-que aetate *studia iuuenum praeceptis sapientiae fouentis a)*, sermonem apud Ioannem Stobaeum memoriae mandatum *b)*. Grauiissima est Rufi disputatio aduersus intemperantiam, qua sane nihil esse potest ad mentis vim et acumen retundendum perniciosius: obnubere ait et offuscare animam vapores impuros, qui ex cibis male concoctis, acescentibus et corruptis, cerebrum infestant. Iam reliqua eius argumenta, e Stoicorum disciplina petita, parum forte ad iudicium nostrum subtilia, omittamus nunc; sed post alia multa, praestare ait alimenta, quae sunt leuissima et purissima *c)*; *ita et animam nostram fore puram*

a) Tacit. An. XV, 71.

b) Serm. XVII. p. 160. l. 34. Ed. Gen. Male adscriptum: *Musonii in libro de alimentis*. Immo vero sunt petita, si recte iudicamus, ex Pollionis Valerii Alexandrini, qui sub Adriano vixit, libro, qui inscriptus erat: ἀπομνημονεύματα Μουσωνίου τοῦ φιλοσόφου.

c) οὕτω δ' αὖν καὶ τὴν ψυχὴν ἡμῶν ὑπάρχειν καθάραν τε καὶ ξηράν, ὅποια οὖσα ἀρίστη καὶ σεφωτάτη εἰς πᾶν· καθάπερ Ἡρακλείτῳ δοναὶ λέγουσι οὕτως· αὕη ψυχὴ σεφωτάτη καὶ ἀρίστη. Lectionem restituit P. Wesseling in docta complementatione super hoc dicto Heracliteo Misc. Obs. crit. Vol. V. T. III. p. 42. sqq. Repetitur illud in multis veterum locis, sed fere vbiq; corruptum est illud αὕη mutatumque in αὐτῇ, αὐγῇ, substituto

puram et siccam, qualis anima ad omnia est optima et sapientissima; uti Heraclito quoque visum est dicenti: SICCA ANIMA SAPIENTISSIMA ET OPTIMA. αὕη ψυχὴ σφωτάτη καὶ ἀρίστη. Magnum vero hoc ac consideratione dignum, quodque nostri omnium, qui in litterarum et sapientiae studio cum maxime versamur, haud parum interesse videtur, si *sicca anima est sapientissima et optima*, ut cognoscamus, quaenam illa sit, et quomodo ea possit parari; si forte eam et ipsi habere aut nos ita, ut eam habeamus, instituere possimus.

Iam primum cum in omnibus philosophorum placitis diligenter indagandus sit sensus is, quo ille, qui primus dictum aliquod protulit, istud extulerit, discernendaeque sint ab eo rationes, quas mox intulere alii, qui iisdem verbis in suam rem vfi sunt: tum multo magis in antiquissimorum philosophorum dogmatibus praecepti huius memores ut simus necesse est: faciunt enim cum multa alia, tum ipsa philosophiae ratio nondum ad hanc subtilitatem euecta, et multo magis sermo parum verbis dialecticis et metaphysicis instructus, sed in verbis fere a rerum sensu petitis, adeoque in ipsis rebus quae sensibus subiectae sunt, occupatus, ut multa pronuntientur aut pinguius aut obscurius, aut tam ambi-

tuto interdum *ἔρη*, quod vir doctissimus ubique emendavit. Satis antiquum illud lectionis vitium fuisse vel ex Clementis et Galeni loco p. 44. suspicari licet. Nos utemur auctoritate viri docti, sed multo magis erimus occupati in dicti Heraclitei sententia diuersis modis a scriptoribus accepta.

ambigue, vt plures sensus dicta facile admittant: quae ipsa res scholarum ac coetuum necessitatem illa aetate facere debuit; plurima enim ex philosophi, sua placita interpretantis, ore erant accipienda, quae aliis ab iisdem, qui acceperant, quasi per manus tradebantur; ita vt, quo sensu ea intelligenda essent, non lectione magis quam auditione constaret. Nec dimittendum animo, quod eadem philosophandi ratio isque sermo propius ad eum sermonem, quo tum vates maxime utebantur, accedebat: quo ipso magna subtilitatis pars non tam ad iudicii acumen, quam ad ingenii sollertiam imaginandique vim redibat. In Heraclito vero etiam haec tenenda sunt: quod is ex primis fuit philosophis, qui a carmine et oratione vineta ad solutam profamque deduceret philosophiam; quique adeo laboraret luctareturque in verbis, quae non nisi inuita sententiam sequebantur; multa idem ex antiqua ratione retinebat, poeticis similia: vt in omnibus eius aetatis ad Platonem vsque philosophis multa veteris symbolicae orationis per mythos et apologos grassantis vestigia, tropis et allegoriis variata, deprehendimus. Iam autem in tali oratione multa occurrere necesse est, acutorum dictorum similia, eademque ad interpretandum difficilia, obscura et ambigua, in primis cum illa interpretatio, quae discipulis in scholis tradita fuit, non ab his ipsis perscripta, sed per seriora et aliis dogmatibus imbuta ingenia ad nos sit propagata. Paucissima itaque sunt veterum philosophemata, de quibus, auctorum mentem satis nos perspicere, pignore proposito contendere liceat. Neque, si scriptorum non modo grammaticorum, sed

sed et aliorum antiquorum interpretationes sequimur, tutiore nos via incedere putabimus; nam iam a Platone inde, tum multo magis a Stoicis aliisque philosophis, plurima Pythagorae, Heracliti aliorumque placita ex sui saeculi notionibus perperam esse interpolata, multis exemplis manifestum fit. Etsi igitur haud dubie, si quis induat eius aetatis mores et ingeniorum habitum, sermonemque rite teneat illum antiquum, multa declarari possunt accuratius et declarata sunt a viris doctis cum ab aliis tum nuper a viris praestantissimis; in plerisque tamen hariolari nos verius, coniectorum more, quam interpretari vetustissimos Graeciae philosophos, fatebimur: neque aliter in Heraclito rem se habere arbitrari licet.

Dictum enim illud *de animabus siccis*, si quod aliud, interpretationes admittit plures: quod vel Musonii exemplo intelligitur. Cum animi nostri instrumenta iis, quae a cibo potuque secernuntur, exhalationibus plurimum et acui et obtundi, fibrasque cerebri intensas inde vel laxatas aut diuersis vtique modis impulsas varie mentem ipsam afficere, facile vnusquisque sentiat; inprimisque vino largius haulto vaporum ad cerebrum se insinuantium vis cogitandi intelligendique facultatem modo intendat, modo obtundat et offuscet: accommodatissimum sane ad hoc obseruatum videri debet Heracliteum illud: *animam siccam esse sapientissimam*, quam minimum scilicet infestatis eius principiis et instrumentis per alimentorum vinique exhalationes. Neque tamen ita confectum est, Heraclitum quoque hac

eadem acceptione pronuntiasse dictum illud, de quo nunc agitur.

Simili fere modo Plutarchus *d*). cum ex cruditate et crapula grauato corpore turbari animam et hebetari docet, ad Heracliteum dictum prouocat. Nec admodum diuersum est, quod ad animorum sollertiam ex tenuitate aeris et siccitate, nebuloso contra et crassiore caelo mentis facultates obtundente, hoc traxere Galenus *e*) et Philo *f*).

Inde Stoici et Platonici Heracliteum dictum ad alia traduxere, lusu potius accommodatis verbis quam

- d*) Plutarch. de Esu carniom (T. II. Opp. p. 995. E.)
 οἶνος γὰρ καὶ σαρκῶν ἐμφορήσεις σῶμα μὲν ἰσχυρὸν ποιοῦσι καὶ βραμάλιον, ψυχὴν δὲ ἀσθενέα — τοὺς γὰρ Βοιωτοὺς ἡμᾶς οἱ Ἀττικοὶ καὶ παχέας καὶ ἀναισθήτους καὶ ἡλιθίους, πάνιστα διὰ τὰς αἰδήφας. προσηγόρευον. οἱτοὶ δὲ αὐτοῦ, καὶ ὁ Μένανδρος, οἱ γνάθους ἔχουσι. καὶ ὁ Πίνδαρος γινῶναι τ' ἔπειτα. αὕη ψυχὴ σοφωτάτη κατὰ τὸν Ἡράκλειτον· οἱ πῖθοι κρουσθέντες etc. Ita (saltem haec legenda sunt, extruso altero loco γινῶναι τ' ἔπειτα quod ex margine repetitum cum ἔοικεν, cum grammaticus quis non recordaretur verba esse ex Olymp. VI, 151. Vulgari autem dicto hoc idem obseruatum in multis veterum locis occurrit, quae collecta videas a Dauisio ad Cic. de N. D. II, 16. Fere eodem spectat Prolusio b. Richteri in Opp. T. III. p. 469. de siccis et sobriis.
- e*) Opp. ed Bas. T. I. p. 346. l. 48. καὶ γὰρ οὗτος (Heraclitus) εἶπεν· αὕη ψυχὴ σοφωτάτη. Sed videndus est de h. l. Wessell. l. c. p. 47.
- f*) Philo apud Euseb. Praep. Euang. lib. VIII. sub f. p. 399. A. vnde in Ed. Mang. sub f. T. II. μόνη γὰρ ἡ Ἑλλὰς ἀψευδῶς ἀνθρωπογονεῖ — λεπτόγχι αἶρος ἢ διάνοις πέφυκεν ἀκονασθαι. διὸ καὶ Ἡράκλειτος οὐκ ἀπὸ σκοποῦ φησιν· αὕη ψυχὴ σοφωτάτη καὶ ἀρίστη. Locum apposuius ex necessaria medela Wessell. l. c. p. 46.

quam ex philosophi Ephesii consilio et mente. Et Plutarchus quidem g) per idem placitum vim diuinandi calore per cerebrum didito illustrauit; subtiliorem enim magisque purum et aethereum reddi animum, calore et siccitate; quippe incalescere animum sentiunt ii, qui deum recipiunt et extra se rapiuntur. Idem h), vbi animas ait corpore exutas sibi reddi, purasque et mundas, carnisque tabo ac sanie quasi liberatas exilire, leues, agiles, aetheris ac fulguris similes, eodem Heracliti dicto si non vere, ingeniose tamen et suauiter, vtitur. Quis enim non cupide amplectatur hanc animae suae quasi in speculo propositam imaginem, corporis vinculis solutam eam auolare per aethereum et implere se lumine vero, *stellasque vagas mirari et astra fixa polo, ac videre quanta sub nocte iacet haec NOSTRA DIES.*

Iam Stoicos omnino plura Heraclitea suis rationibus accommodasse fatis nota res est, imprimis

G 3

vero

- g) Plutarch. de Orac. def. (Opp. T. II. p. 432. F.) ἄμα δ' ἂν τις κοῦκ ἀλόγως καὶ ξηρότητα φαίη μετὰ θερμότητος ἐγγινομένην λεπτύνειν πνεῦμα καὶ ποιεῖν αἰθερώδες καὶ καθαρόν. αὕτη γὰρ ψυχὴ κατ' Ἡράκλειτον. (nihil amplius apponendum; ex more eorum, qui vulgare dictum laudant, reliqua omittit) ὑγρότης δὲ οὐ μόνον ὄψιν ἀμβλύνει καὶ ἀκοήν, ἀλλὰ καὶ κατόπτρων θίγουσα (quae hic interponuntur καὶ μέγας καὶ πρὸς αἶρα corruptionis sunt et, ut arbitror, e margine profecta) ἀφαιρεῖ τὴν λαμπρότητα καὶ τὸ Φέγγος.
- h) Plutarch. in Romulo (T. I. Opp. p. 35. extr.) superstes est anima. τὸ γὰρ ἐστὶ μόνον ἐκ θεῶν ἦκει γὰρ ἐκεῖθεν, ἐκεῖ δὲ ἀνίστησιν. οὐ μετὰ σώματος, ἀλλ' ἐὰν ὅτι μέγιστα σώματος ἀπαλλαγῇ καὶ διακριθῇ καὶ γένηται καθαρόν πνεῦμα καὶ ἄσπερον καὶ ἀγνόν. αὕτη γὰρ ψυχὴ εἰρήστη κατ' Ἡράκλειτον.

vero hoc de animabus ficcis. Nam etiam Zeno ex ignea subtilissima materia animam gigni statuebat: *ignem esse ipsam naturam quae quidque gigneret et mentem atque sensus i*). Nec repugnat, quod alii Stoici spiritum vel aerem laudant: est enim πνεῦμα ἑνθερμον, vel vt apud Theodoretum *k*) πνευματικὴ φύσις πλείστου μετέχουσα τοῦ θερμοῦ. Igitur et ipsi animam esse ἀναθυμίασιν statuebant, eamque colligi subtilissimis particulis ex calido humore exhalatis seu terrae et aquae seu corporis et sanguinis: nam in hoc aut variasse aut vtrumque iunctim assumfisse videntur. Haec autem vt declararent, ipsis Heracliti verbis saepe vsi sunt.

Verum videndum est quid in hoc dicto *de animabus ficcis* ipse Heraclitus senserit: in quo quidem, cum a philosopho ipso, quae discipulis proposita fuit, interpretatio ad nos nulla peruenerit, duo maxime sunt, quae sequi licet: primum vt ex systemate, adeoque ex doctrinarum indole, nexu et ordine, eruamus, quid ipse sensisse videri debeat, tum an forte eius, quod senserit, in aliis eius verbis vestigium indagare liceat. Iam, vt omnium rerum principium ille materiam igneam constituit, hoc est, (etsi, quae notio eius animo obuersata sit, nemo indubitanter asseuerare aufit,) materiam subtilissimam, leuissimam, celerrimam, qualis ignea esse

i) Cic. Acad. Qu. I, 11, 39.

k) lib. V. ad Gentes p. 822. ed Schulz. Apud Nemes. de Nat. hum. c. 2. πνεῦμα ἑνθερμον καὶ διὰ πυρον cf. Tie-demann. Syst. philos. Stoic. T. II. p. 146-152.

esse deprehenditur: animarum quoque ortum ex eodem igne duxit l).

At idem ἀναθυμίασιν dixisse animam fertur, m) (*exhalationem*, etsi vox parum accommodata videtur) ad quam omnino philosophematum Heracliteorum summa redibat; n) hoc est materiam illam subtilissi-

G 4

mam

l) πυρώδη τὴν φύσιν ap. Theodoret. Or. V. ad Gent. p. 822. T. IV. ed. Schulz. Cum Heraclito sensit Parmenides et Hippasus.

m) Obscura est oratio Cleanthis (ex Porphyrio de anima) ap. Euseb. Praep. Ev. XV, c. 20. p. 821. D. esse animam ex Heracliti sententia *effluuium*, ἀναθυμίασιν, collectam adeo ex particulis igneis ex materia crassiore emicantibus. Circumsusum itaque hunc aerem animabus quasi scaturire: iam cum hae sensum et mentem habeant, ipsum hoc caelum νοερόν esse sequitur. Verba autem sic constituenda videntur: Κλεάνθης μὲν — Φησὶν, ὅτι Ζήνων ψυχὴν λέγει (αἰσθῆσιν ἢ haec tollenda sunt ab aliena manu inserta ex seqq.) ἀναθυμίασιν, καθάπερ Ἡράκλειτος. βουλόμενος γὰρ ἐμφανίσαι, ὅτι αἱ ψυχαὶ ἀναθυμιώμεναι νοεραὶ αἰεὶ γίνονται, εἰκασεν αὐτὰς τοῖς ποταμοῖς, λέγων οὕτως· ποταμοῖσιν τοῖσιν αὐτοῖσιν ἐμβαίνουσιν ἕτερα καὶ ἕτερα ὕδατα ἐπιβρεῖ (male haec accipiunt Interpretes: *in fluuios, licet iidem usque decurrant*, aliae atque aliae illabuntur aquae. Graecis ποταμοὶ non dicuntur ἐμβαίνειν, sed ii qui ingrediuntur eas. Est adeo: iis qui fluuium intrant, etsi idem esse videtur, aliae tamen atque aliae aquae itidem affluunt, plantasque alluunt: ita etiam continuo exhalantur animae, ignea materia ab humido et crasso sursum elata. Diversum adeo hoc ab illo altero, quod iam ex Platonis Cratylo p. 402. A. innotuit, δις ἐς αὐτὸν ποταμὸν οὐκ ἐμβαίνομεν, et disertius apud auctorem de Alleg. Homer. p. 443. legitur: ποταμοῖς τοῖς αὐτοῖς ἐμβαίνομεν τε καὶ οὐκ ἐμβαίνομεν. εἰμέν τε καὶ οὐκ εἰμέν. id quod ad continuam illam rerum ῥοήν spectat, quam ipsa illa ἀναθυμίασις inferre videri potest.

n) Post Brucker et al. inspiciendus saltem est doctissimus Collegae coniunctissimū MEINERS liber *Gesch. der Wiss.*

mam igneam, quae crassiore materia soluta in altum euolat, eumque adeo aetherem constituere videri debet, qui nos ambit. Cum porro materia illa animam constituat, adeoque mentem et sensum: et ipsam habere mentem et sensum necesse est o). Quo ipso fit, vt natura quoque diuina ad eandem illam materiam igneam subtilissimam referenda sit. Quod si animas nunc ab igneis, alias ab humidis exhalationibus ducit Heraclitus: non tam inconstantia aliqua haec dixisse videri debet, quam ea ratione, qua et Stoici igneum vaporem modo ignem modo humidum appellant; colligitur enim ignis ex iisdem corporibus humidis tanquam per vaporem.

Videtur porro ita statuiffe Ephesius philosophus, vt igneam naturam, quo magis ab humido illa liberata sit, tanto plus diuinitatis habere, saltem maiorem mobilitatem, celeritatem, puritatem consequi existimaret: Delatas vtique in corpus animas

Wiss. in Griech. T. I. p. 622. sq. Sufficit praeter Diog. Laert. IX, 9 et II. vnus Nemesii locus de Nat. hom. c. 2. Ἡράκλειτος δὲ τὴν μὲν τοῦ παντὸς ψυχὴν, ἀναθυμίασιν ἐκ τῶν ὑγρῶν (dicit), τὴν δὲ ἐν τοῖς ζώοις, ἀπὸ τῆς ἐκτὸς καὶ τῆς ἐν αὐτοῖς ἀναθυμιάσεως ὁμογενῆ πεφυκέναι. De humana autem anima per ἀναθυμίασιν declarata v. inpr. Aristot. de anima I, 2.

-) Bene adeo Sextus lib. VII. p. 398. ἀρέσκει γὰρ τῷ Φυσικῷ, τὸ περιέχον ἡμᾶς λογικόν τε ὄν καὶ Φρενήρες — τοῦτον δὲ τὸν θεῖον λόγον κατὰ τὸν Ἡράκλειτον δι' ἀναπνοῆς σπᾶσαντες νοεροὶ γινόμεθα: quae sequuntur de somno. Sexti potius interpretamentum habenda sunt quam Heracliti. Similia Stoicorum sunt. Sed in illis ap. Diogen. VII, 145. τὸν μὲν ἥλιον ἐκ τῆς μεγάλης θαλάττης νοερόν ὄντα ἄνσμμα non dubitamus praeferre νότερον, vt et rescribendum arbitramur in Porphyrii loco c. II. etfi enim et τὸ νοερόν in ea re locum habet, non tamen in hac orratione ferri potest.

mas humidi aliquantum habere; eo tamen ipso vitam hanc mortalem lucrari *p*). Quae quidem cum Stoicorum simili placito conspirant *q*). At vero quo magis humidum, crassus ille aer, seu materiam dixeris, defluit, igneumque illud superat, calidiorque adeo et purior natura animae redditur. liberata a terrena faece corporis, seu humore isto inerti: eo melior anima ac diuinior, eoque in sapientiam ac virtutem prominentior; ita tandem αὖν ψυχὴ σοφωτάτη καὶ ἀρίστη *r*). Contra vero animarum exitium

G 5

praesens

- p*) Itaque nascendo animabus dixit gratum esse, non mortiferum, si humidae nascuntur: ψυχῇσι φάναι τέρψιν, μὴ θάνατον, ὑγρῇσι γενέσθαι· τέρψιν δὲ εἶναι αὐτοῖς τὴν εἰς γένεσιν πῶσιν. Ultima haec de suo addit Porphyry. de A. N. 10. quae vero ibidem subiiciuntur: καὶ ἀλλαγῶν δὲ φάναι, Ζῆν ἡμᾶς τὸν ἐκείνων θάνατον, καὶ Ζῆν ἐκείνας τὸν ἡμέτερον θάνατον· vix aliud sunt quam Porphyrianum interpretamentum (non male expositum a b. Gesnero de animab. Heracl. T. I. Commentat. loc. p. 105. 6.) Nam Heraclitus paullo aliter haec de dis extulerat, sententia satis ambigua. Videntur enim verba apud Auct. de Allegor. Homer. p. 442. (Alia loca congeffit Fabric. ad Sext. p. 185. C.) in hunc sensum accipienda esse: Sunt dii et hominum animae ex eadem ignea materia: dii igitur sunt homines immortales, nos homines sumus dii mortales, ζῶντες τὸν ἐκείνων θάνατον· h. si ignis ille in animam humanam colligitur, non ille fit deus; si dens fit, non humana inde conflatur anima. In hunc fere sensum interpretatus haec esse videtur Maximus Tyrius Dissert. XLI. p. 489. At Sextus et ex eo alii vulgo ita accipiunt: cum anima corpus subit, igneam ac diuinam vim oppressam quasi mori; at per mortem liberatam animam ad diuinam naturam redire. cf. Brucker. p. 1222.
- q*) Animas enim in corpus immigraturas λέγειν πρὸς τὸ ὑγρὸν Porphyrius ex Stoicis refert de A. N. c. 11.
- r*) Nondum harmoniam illam inter τὸ θερμὸν καὶ τὸ ψυχρὸν, καὶ τὸ ξηρὸν καὶ τὸ ὑγρὸν cogitavit Heraclitus; sunt tamen eius commentii elementa ap. auctorem libri de Diaeta; v. in recensione Gesn. p. 111. 121. 126..

praefens ac certum est humor τὸ ὑγρὸν, quo op-
primi igneam materiam necesse est s); quod quibus
verbis, aut quo sensu enarrauerit philosophus,
non constat: nisi quod apud Theodoretum memo-
ratum reperimus: animas humano corpore solutas
redire ad animam communem, hoc est ad circumfu-
sum illum aetherem, qui igneas illas particulas
emicantes recipit ac continet t).

Paullo minus ad consilium nostrum spectant
reliqua Heraclitea, etsi cum his ipsis, quae dispu-
tata sunt, admodum coniuncta u); attingenda enim
est

s) Loca Clement. Alex. Procli et Philonis nota sunt. cf.
Brucker. p. 1219. XXII. In Clementis quidem verbis
(Strom. VI, p. 746.) ψυχῆσι θάνατος, ὕδωρ γενέσθαι,
ὕδατι δὲ θάνατος, γῆν γενέσθαι, quae sequuntur: ἐκ
γῆς δὲ ὕδωρ γίνεται, ἐξ ὕδατος δὲ ψυχὴ, aliena ab re
et ab indocto homine ex Orphicis versibus paullo ante
recitatis expressa sunt. Neque ea in Philonis loco oc-
currunt, de Mundo incorrupt. p. 958. (T. II. Mang.
p. 509.) nec placitis apud Diog. IX, 8. 9. conueniunt.
Traxit ad hanc sententiam verba Heraclitea, supra p) in
diuersum sensum allata de animabus in corpora abditis
Proclus in Timaeum p. 36 med. καὶ ἄλλως οὗτος ψυχῶν
τῶν νοερῶν θάνατος ὑγρῇσι γενέσθαι φησὶν Ἡράκλειτος,
inuito, vt arbitramur philosopho Ephesio. Obliti su-
mus illo loco monere, ab auctore libri de diæta σύγγρα-
ψιν πρὸς καὶ ὕδατος corpus ingredi narrari: v. Gefner.
l. c. p. 91. qui tamen nimis diuersa ad eam illustran-
dam affert.

t) Theodoret. l. c. p. 824. verbis utique haud Heracliteis
usus: ἐς τὴν τοῦ παντός ἀναχωρεῖν ψυχὴν, εἰα δὲ ὁμο-
γενῇ οὔσαν καὶ ὁμοούσιον, h. e. in θεῖον illum καὶ κοινὸν
λόγον, ζ. τὸ περιέχον ἡμᾶς λογικόν τε καὶ φρενῆρες.

u) vt de perpetua illa rerum vicissitudine per τὸ εἶναι et
εἶναι declarata; de via ἀνω et κάτω bene a Gefnero ex-
posita p. 77. p. 115. add. Bruck. p. 1219. XXIV. Lo-
cus praecipuus est Diogenis lib. IX, 7. 9. ex quo de-
claran-

est verbo saltem altera illa ratio, qua in ipsis Heracliteis vestigia interpretationis *animarum siccarum* deprehendere licet. Occurrit locus, in quo Heraclitus non multum abfuisse videtur ab ea sententia, in quam iam alios discessisse vidimus philosophos, ut alimentorum potusque copia oppressam animam vocaret *madentem et humefactam*, contra vero sobriam *siccam* x). Probabile igitur fit, ipsum Heraclitum ad sensus rerum hoc reuocasse, ut humidum illud, quod nimio cibo vinoque ingurgitantium se corpus obruit, igneas particulas animae extinguat, calorem opprimat, vim motricem interimat. Neque esse potest vlla res ad sensus nostros magis accommodata, quam si intemperantia animorum igniculos extinguere dixeris: uti nihil est, quod eos magis excitet, acuat et incalescere ingenium faciat, quam temperatus cibi potusque usus: cuius adeo ad sapientiae studia laudem honoremque praecipuum esse, nobis momentibus vix indiget. Nulla itaque grauior sententia reperiri potest quam illa Epicharmi: *Νᾶφι καὶ μένται ἀπιστίη. ἄρδρα ταῦτα τῶν φρενῶν*. Scr. Gottingae d. XVI. Sept. c180cclxxxi.

clarandus locus Iamblichi de anima ap. Stob. Ecl. phys. p. 113. ext. ex hoc emendandus Plotini locus p. 468. cf. Aristot. de anima 1, 2. Verum de his in transcurso. Nec disputandi nunc copia datur, e quibus antiquioribus sua repetierit Heraclitus.

- x) apud Stob. in tit. de temperantia ed. Gen. p. 74. Ἀνὴρ ὁκότεν μεθύσθῃ, ἀγεται ὑπὸ παιδὸς ἀνέβου, σφαλλόμενος, οὐκ ἐπαίων ὅκη βαίη, ὑγρὴν τὴν ψυχὴν ἔχων. αὕτη ψυχὴ σοφωτάτη καὶ ἀρίστη. Videtur ad hanc opinionem devenisse auctor de diaeta, qui ab igne vires humani corporis repetit: v. p. 138. et 98.

VII.

ACADEMIAE GEORGIAE AVGVSTAE

PRORECTOR

IO. ANDR. MURRAY D.

CVM SENATV

SVCCESOREM

IN

MAGISTRATV ACADEMICO

IO. CHPH. GATTERER

CIVIBVS SVIS

COMMENDAT

IN A. D. II. IVLII CLD ID CCLXXXII.

*De febribus epidemicis Romae falso in pestium censum
relatis.*

Magistratu academico, Commilitones, per hunc annum gesto, nunc ad exitum spectante, cum Vir Illustris, Collega coniunctissimus,

IO. CHPH. GATTERER

in munus hoc et onus succedurus sit, eique rei solennia in a. d. II Iulii sint indicenda, quibus insignia academica transferentur in aliam domum: nostrum est, florentissima Iuventus, rogare vos et hortari, ut ad solennia haec conveniatis frequentes, audiat orationes ex more hinc et inde habendas,
fauca-

faueatis ore animoque votis pro salute et incolumitate reipublicae faciendis, constitutumque apud animos vestros habeatis: ad res prospere et ex vestris parentumque votis agendas quam maxime interesse, vt legibus magistratuique obsequium praestetis, et ad litterarum studia, quorum causa huc venistis, rite prosequenda, tranquillitate et securitate vos non minus, quam rempublicam, opus habere.

Panegyris haec nostra insignem mutuabitur celebritatem et splendorem ex praesentia vestra, Princeps Serenissime, *) Comites Illustrissimi, Com-militones generis ingeniorumque nobilitate commendatissimi, qua vt eam condecorare velitis, sum-mopere contendimus.

Interea, cum tanquam ad salutationem et congressum inter nos deducta res sit, faciamus, quod in confabulatione familiari plerumque fieri videmus, vt prima quasi verborum velitatione commissa transfiliat statim sermo ad nuperam veris inclementiam contagiumque febriculae, quae ab extremis septentrionis oris progressa late per tot prouincias est vagata, nec nostram urbem reliquit intactam; **) etsi, id quod in aliis quoque contagiosis febribus experti sumus, in hac vrbe multo mitior quam in plerisque aliis locis morbus fuit. Iucundum erit aliquando audire et cognoscere, a quibus oris primo exorta, quibus immutationum gradibus ad caeli, temporum corporumque habitus facilis illa sit progressa

*) *Henr. Lud. Car. Albertus, Princeps Nassouienfis.*

**) *L' Influenza.*

gressa et citra quos fines substiterit *). In illam autem cogitationem facile incidat animus, an non in superioribus aetatibus eiusdem huius luis per terras nostras grassantis vlla vsquam facta sit mentio; audiuius quoque fide nescimus qua traditum, saeculo superiore haud absimilem luem, ex Hispaniis progressam, versus boreales oras contagio manasse. De antiquitate vero si quis quaerat, occurrat ne in ea aliqua similis contagionis mentio; miserandam esse in hoc, vt in aliis, videmus sortem humanam, si cogitamus, quam obscura et manca sit ab rerum inde primordiis per orbem terrarum hominum rerumque memoria; ex sexaginta fere, quae effluxisse creduntur, saeculis vix esse sex, quorum notitiam habeamus paullo exploratiorem, atque etiam hanc vix vnus alteriusue populi, et maximam partem in populorum excidiis per bella et praelia, exitiosioraque his regum imperia, occupatam:

- *) Egere de ea ab eo inde tempore plures viri docti et acuti, et febris quidem naturam, affectiones et medelas bene describere; causae tamen remotiores adhuc in penetranti Naturae latent abditae et arcanae. Inquisitum quoque est in alias similes febres epidemicas, quibus Europa vexata est, praecipue a. 1580. 1675. 1729 et seqq. annis. Primi, si bene memini, de ea egere Itali: *Saggio sopra il Morbo detto Russo di Bened. Gallico. Vicenza 1782.* Guil. Lud. Hoffman *constitutio epidemica Heidelbergensis 1781. Heidelbergae 1782.* Variosum medicorum obseruationes in *Medical Observations and Inquiries by a Society of Physicians in London* Vol. VI. p. 340. — 407. (Est in illis vir doctus Tho. Glass, qui p. 377. adeo statuit, pestilentiam Achluorum castra tentantem apud Homerum nullam aliam fuisse quam simile epidemiae genus). *I'ber den ilingsten epidemischen Katarrh von D. Phil. Lud. Witiwer. Norimb. 1782.*

patam: iacere reliqua nocte tenebrisque sepulta; adeoque nos, quibus hoc terrarum orbe iam senescente nasci contigit, rerum tamen euentorumque notitiis esse pueros; adeo multa ex superiorum saeculorum memoria ignoramus; ut saepe, cum doctos viros de antiquorum populorum opinionibus, religionibus moribusque, tamquam de re luculenta et explorata, tam asseveranter pronuntiare audimus, in animum veniat illud, quod apud Platonem sacerdotes Aegyptii occinebant: *Graeci, semper pueri estis! a)*

Inter haec animus recurrit ad res Romanas, et ad memoratas toties a Liuiο, quod vel puerilis doctrina in memoriam reuocare potest, pestilentias; quae si vere ex eo, quod nos hoc nomine appellare solemus, genere fuissent, mirationem facere deberent, quod populi Romani his cladibus stragibusque exhausti tanta superesse potuit frequentia. Enimvero pestilentiae vocabulum, nec nostris aetatibus satis subtiliter constitutum, cum nec inter medicos omnino conueniat, quinam potissimum pestilentiae character habendus sit, *b)* multo magis vetere

a) In Tim. 'p. 22. Tom. III. ὁ Σόλων, Σόλων, Ἕλληνες αἱ καὶ παῖδες ἐστέ. γέρων δὲ Ἕλλην οὐκ ἐστίν. — νόοι ἐστὶ τὰς ψυχὰς πάντας. Omni hoc generi humano dictum putabimus; inprimis sapientibus ac doctis, quibus omnia a se ad liquidum perducta videntur.

b) cf. v. c. de Haen Ratio medendi P. XIV. S. 2. c. 2. 3. p. 225. sq. vbi Hippocrates p. 240. perperam laudatur, nam is pestem proprie dictam non attigit. Galenus autem, qui sua aetate saeuissimae pestis vim grassantem vidit, tam parum subtiliter de ea agit, ut naturam eius potissi-

tere aevo ita frequentatum fuit, vt omnem febrem malignam, inflammatione corpus occupantem, exanthematicam, epidemicam, homines eo nomine appellarent. Quod vero multo grauius est, re accuratius pensitata, et locis in Liuiio aliisque scriptoribus, in quibus de pestilentia agitur, consideratius exploratis, manifestum nobis fieri videtur, ne vllam quidem inter Romanos pestilentiam memorari, quae pro pestilentia proprie dicta haberi possit, nec ante Saec. II. a C. N. vllum exemplum, de quo fatis certo constet, occurrere: siquidem, in quo fere omnes conueniunt, pestis naturam, a putredine ortam et contagio manantem, per tumores glandularum, anthraces, parotides, bubones, contactu mortifero, ad praesentem mortem properantem, certa sui signa, quibus ab aliis febribus putridis discerni possit, suppeditare concedamus *c*). In iis saltem, quae scriptores de pestilentiis subinde Romanam vastantibus narrarunt, nihil eiusmodi commemoratur,

potissimum in hoc ponat, quod multos illa perimat: ad Epidem. III, 20. p. 263. To. IX. οὐ γὰρ θὴ νοσήματος γέ τινος ὄνομα ἐστὶν ἐπιδήμιον ἢ λοιμῶδες, ἀλλ', ὅτι περ ἂν πολλοῖς ἐν ἐνὶ γίναται χωρίῳ, τοῦτο ἐπιδήμιον νομίζεται· προσελθόντος δὲ αὐτῷ τοῦ πολλοὺς ἀναιρεῖν, λοιμός γίναται. Fuit hoc plerumque inter causas incrementorum quae pestis contagio habuit, quod ipsis medicis controuersa res fuit, pestilentielle an alia febris luesue corpora tentaret. Ita Massiliae, 1720, ita Venetiis 1576. et aliis locis ac temporibus se res habuit. (cf. Galliccio *Saggio sopra il Morbo detto Russo* p. 4. 199. della *Comprovazione*).

- c*) v. Mead de Peste c. I. nec valde diuersa sunt, quae a de Haen l. c. disputantur; etsi ille recentiorum de peste disputata aut ignorare aut eleuare velle videri potest.

moratur, quod non in quacunque alia febre putrida euenire potuerit.

Quod igitur asseueramus, hoc est, vt non pronuntiemus, nullam omnino ante Saec. II. a C. N. Romae fuisse pestilentiam, verum vt statuamus, ea, quae apud Liuium aliosque leguntur, pestilentiae proprie dictae signa satis certa nulla habere. Non enim ignoramus, de saeculis Romae prioribus in multis rebus nos certi et explorati aliquid non tenere; famam enim obscuram et exilem a maioribus acceptam litteris consignarunt primi Annalium scriptores a Saeculo inde ab V. C. sexto, et variis pro suo quisque ingenio modis amplificarunt ornaruntque; ex iis arripuit ea, quae maxime probaret, Liuius, alia Dionysius, alia Plutarchus, saepe dissona inter se et discrepantia, eaque suo quisque more tractarunt et ornarunt, vt in ipsis locis de pestibus intelligere licet. Quod si vero ea, quae aetati suae propiora erant, certiora et exploratiora tradere potuissent videri debent: non tamen ea naturae rei-que medicae ista aetate vigeat notitia, vt morborum calamitates satis diligenter et presse exponere possent. Etsi itaque, quoniam ad religiones spectabant morborum notationes, in Pontificum annalibus vna cum prodigiis prodigiorumque procurationibus pestilentiae accurate suis annis adscriberentur, non tamen expectari poterat, vt de earum natura, ortu ac progressu, aliquid diserte et docte satis memoriae mandaretur. Hoc enim erat illud, quod antiquitatem omnino ab subtiliore naturae, adeoque et morborum cognitione reuoca-

vit et retraxit, quod ea, quae ad interiorem eius notitiam spectabant, inprimisque quae ab sollenni rerum cursu recedebant, ad religiones metumque deorum referebantur. Adeo nulla grauior ac pestilentior ignoratio est quam naturae seu hominum seu rerum; *Hoc fonte deriuata clades Inque patres populumque fluxit.* Quot prauis religionibus ac placitis, quot superstitionibus perniciosisque institutis liberata esset aut intacta mansisset gens humana, si naturae et suae et rerum accuratiore scientia cum ipso ortu imbuta fuisset, aut ab his tanquam omnis verae scientiae elementis sua rudimenta petiissent ii, qui religiones et iura condere videri volebant! Cum itaque semel imbibitum esset animis, nihil mali, nullam calamitatem, nullam febrem ac morbum grauiorem nisi ab ira numinis immitti, declarari hanc iram certis euentis naturae insolitis, hoc est ostentis prodigiisque, curationem morborum a placata numinis ira esse expectandam, nec placari eam posse nisi certis ritibus et formulis a Pontificibus praescriptis: inter haec, fieri nullo modo potuit, vt sagacitas aliorum de morbis his sollertius observata et inuestigata traderet. Quo factum est, vt diserta fatis sit scriptorum narratio de prodigiis eorumque procurationibus, de morbis autem non nisi pauca, eaque vulgaria commemorantur.

In his tamen prodigiis agnosci interdum possunt vestigia caussarum, a quibus lues ortum traxerit: sunt autem eae nullae aliae, quam quae febres putridas vulgares gignere solent: acris intemperies, anni vel frigoris inclementia, intolerabilis calor aestiuus,

aestiuus, siccitas, agrorum sterilitas cum fame, ventorum procellae, terrae motus, ignes e soli visceribus erumpentes cum mephitibus. Nullum enim, quod satis constat, in iis, quae ab Liuiio aliisque commemorata sunt, prodigium ostentumque, ne imbrium quidem cruentorum aut quod lapidibus pluit, occurrit, quod non ad naturae euentum casumque referri possit. Alia a metu repetenda sunt et a terroribus falsisque persuasionibus, quas mentibus, semel perculsis et attonitis, religiones deorum iniicere solent; vt, si auditaе fuerunt in montibus siluisque voces aut mala ominantes aut sacra intermissa repetentes; et quae huiusmodi sunt alia. Vt igitur, quam vere haec a nobis dicta sint, intelligatur, agendum pestilentias, quae a Romanarum rerum scriptoribus commemoratae sunt, breuiter pro consilii ratione recenseamus: si modo hoc monuerimus, plerumque malum intra urbem et agrum Romanorum substitisse; quo ipso pestilentiae notio circumscribitur.

Prima pestis sub Romulo post Tatium caesum narratur a Dionysio, d) multoque ornatius a Plutarcho, nam agrorum pecorumque sterilitatem pluviasque cruentas adiicit; cui quidem narrationi tam disertae in tam remotis aetatibus, nulla rerum memoria per libros prodita, parum fidei habemus: si tamen fidem habere placet, luis causa inde manifesta fit. Iterum sub Tullo Hostilio pestilentia

H 2

labo-

d) Dionys. II. 54. Plut. in Romulo Opp. T. I. p. 32. F. vbi inter alia: ὅσθι δὲ καὶ σταγόνιν αἵματος ἡ πόλις non, ἥσθι.

laboratum est: praedicta ea prodigiis, cum in monte Albano lapidibus pluisset: *e*) quo ipso intelligitur, ventorum procellis agros vexatos fuisse. Memoriam huius pestilentiae insignem fecit Tulli mors, quam a ritibus occultis procurandi morbi vetustas repetiit *f*). Ab hoc tempore nulla pestilentiae mentio nisi V. C. 266. ex fide Dionysii: *g*) qui Marcio pulso, morbum pestilentem non modo multitudinem tentasse, sed et pecudum stragem fecisse narrat: quo ipso intelligitur, luem, non pestem, eam fuisse. Eodem auctore V. C. 284. morbus pestilens inuasit maxime mulieres, inprimis grauidas; *h*) quae res in multis pestilentis non minus obseruata est; *hh*) sed eadem paullo post saeuus exarsit nec ulli aetati aut sexui perpercit; *i*) illud memorabile visum, morbum tam atrocem celeriter euanuisse. — V. C. 292. iterum pestilentia; sed luem potius arguunt ea, quae Liuius addit: „graue tempus et forte annus pestilens erat vrbi agrisque, nec hominibus magis, quam pecori; et auxere vim morbi, terrore populationis pecoribus agrestibusque in urbem acceptis.„ Exornauit haec mirifice Dionysius pro more suo. *k*) V. C. 301. „duo mala ingen-

e) Liv. I, 31. at Dionys. III, 35. in suis auctoribus nihil de his narratum inuenerat; saltem non repetit.

f) v. Liv. l. c.

g) Dionys. VII, 68. Nam Liuius II, 36. tantum de praefultore ludorum memorat.

h) Dionys. IX, 40. similem luem idem IV, 69. sub Tarquinio II. commemorat.

hh) cf. Mercurial. Lectt. de Pestilentia c. 10.

i) id Dionys. IX, 42

k) Liv. III, 6. Dionys. IX, 67.

ingentia exorta, fames pestilentiaque, foeda homini, foeda pecori., Ita Liuius; at Dionysius iterum rhetorico spiritu: „mancipia tantum non omnia absumta, ingenuorum dimidiam partem sublata, vt aegrotorum numero non suppetere medici;,, ac si iam illo tempore Roma medicos suos habuisse videri possit. *l)* V. C. 318. „pestilentia populum inuasit; — ceterum magis vis morbi ingrauescens curae erat terroresque ac prodigia; maxime quod crebris motibus terrae ruere in agris nuntiabantur tecta., *m)* Probabile fit, hiatis foli corruptum aerem contagium sparsisse: quo fere modo pestes Saec. VI. et XIII. a C. N. ortae feruntur. *n)* Videtur ea lues seu reuixisse seu durasse vsque ad annum hinc quartum, V. C. 321 et iterum V. C. 324 inualuisse ex siccitate. *o)* — Iterum a. 342. „pestilentia coorta, minacior tamen quam perniciosior, — defuncta ciuitate plurimorum morbis, perpauca funeribus, pestilentem annum inopia frugum, neglecto cultu agrorum, vt plerumque fit, excepit *p)* —, a. 355., insignis annus hieme gelida ac niuosa, adeo vt viae clausae, Tiberis innaugabilis fieret; tristem hiemem siue ex intemperie caeli, raptim mutatione in contrarium facta, siue alia de causa, grauis pestilensque omnibus animantibus aestas excepit., *q)* Suspecta est omni-

H 3

nino

l) Liv. III, 32. Dionys. X, 53.

m) Liv. IV, 21.

n) vid. Chicoyneau p. 61.

o) v. Liv. IV, 15. et 30.

p) Liv. IV, 52.

q) Liv. V, 13.

nino pestilentia a. 372, Manlianum supplicium breui insequuta, et ex ea ortum habuisse magnae parti visa r); at ea, quae a. 389 exarserat, hoc et insequente anno saeuiit: maxime eam insignem mors M. Furii Camilli fecit s). Omitto fabulosam de Curtio, qui in voraginem tetro halitu urbem instantem se immisisse fertur, narrationem a. 392 t) ex qua tamen intelligitur, in media vrbe mephitis seu putorem sulfureum e terra prorumpentem vicina loca pestilenti afflatu infecisse, donec alia soli mutatio venam occultam spiramenti occluderet seu elideret; omitto aliam pestilentiam a. 406 u) et alteram a. 420 uu) tum tertiam a. 441 x) et quartam a. 451 tanquam parum memorabiles, nisi quod in hac „terram multifariam pluuisse, et in exercitu App. Claudii plerosque fulminibus ictos nuntiatum est y);“ vt grauibz tempestatibus aerem turbatum eo anno fuisse facile intelligas. Alia pestilentia a. 562. Aesculapio Romam arcessendo locum fecit z), a. autem 476. et insequente pecudes hominesque communi strage corripuit pestis, grauidarum maxime abortibus infamis. a) Pestis, quae in castris Poenorum et Romanorum ad Syracusas a. 542. perintole-

r) Liv. VI, 20.

s) Liv. VII, 1. et 2.

t) Liv. VII, 6.

u) id. VII, 27.

uu) ibid. VIII, 17.

x) IX, 28.

y) id. X, 31.

z) id. X, 47.

a) v. Oros. IV, 2.

intolerandam aestus vim corpora labefactavit *b*), ut et altera, quae in Brutiis vtraque castra pari clade affecit, *c*) causas habuit satis obuias; ea autem quae a. 546. in urbem agrosque incidit, vix in censum venit; „nam in longos magis morbos, quam in perniciales, euasit.“ *d*) Inde a. 573 „pestilentia in agris forisque tanta, ut Libitina vix sufficeret,“ eaque in tertium annum urbem Romam atque Italiam vastavit. *e*) Perculsi terroribus animi ad varias superstitiones sese appulere; inuenta quoque arca sepulchralis Numae cum eius libris; adeo praeconi in superstitiones leuesque persuasiones esse solent homines calamitatibus publicis oppressi. Memorabilior ceteris est pestilentia a. 580. quae priore anno in boues ingruerat, nunc autem verterat in hominum morbos: „qui inciderant, haud facile septimum diem superabant; qui superauerant, longinquo, maxime quartanae, implicabantur morbo.“ *f*) Non pestem vere dictam tum corpora tentasse, vel verba extrema docent. Nec affirmare audemus, an inter veras pestilentias referenda sit atrocissima illa, quae a. 627 Africam, pestilentiae nativam sedem, vastavit, locustarum ingenti multitudine, postquam in agris fruges herbasque exederant, in

H 4

pela-

b) v. Liv. XXV, 26.

c) a. 546. *ibid.* XXVIII; c. 46.

d) XXVII, 23.

e) XL, 19. add. *Obsequ. de Prodig.* c. 60, ubi praeterea narratur, per sex menses non pluuisse.

f) Liv. XLI, 21. add. *Obsequ.* c. 65. Idem aliam anno 589. assignavit c. 72. tertiam a. 612 c. 81.

pelagus merſa et iterum in littus expulſa. *g*) Antecedente anno Inſulas Liparaeas peſtilentia afflixerat, ex terrarum motibus flammisque ex terra marique emicantibus. *h*) Ab hoc tempore, per ipſa bella ciuilia, non vidimus memorari peſtem, praeterquam eam quae a. 711. Hirtio et Panſa Coſſ. totam Italiam corripuit; praeeſſerat tamen exundatio Padi et Tiberis ingens, vt eiectorum in littus piſcium tabes inficeret aerem; quae vnde proſecta ſint, colligere licet ex eo, quod eodem tempore inter prodigia procellae, terrarum motus, variaeque caeli ſpecies memorantur. Simili modo a. 732 cum Auguſto principatum tenente peſtilentia per totam Italiam graſſabatur, praeeſſerat Tiberis exundatio cum procellis. *k*) Sub Nerone C. N. 69. Romae peſtilentia unius auſtumni fuit, quo XXX funerum M. in rationem Libitinae venerunt. *kk*) Iterum ſub Tito peſtilentia fuit, quanta non temere alias *l*), et iterum ſub Antonino Pio ſub a. 141. multas Imperii R. partes peruagata. *ll*) Prima peſtis vero nomine ſic dicta a. C. 169. a L. Veri Imp. exercitu a Parthis reduce in Italiam eſt reportata;

g) Oroſ. V. 11. Auguſtin. C. D. III., 31. Liv. Epit. LX. Obſeq. c. 90.

h) Digna res, vt de ea conſulantur ſcriptores Strabo VI. p. 424 C. (277.) ex Poſidonio. Oroſ. V. 10. Obſeq. 89.

i) v. Dio XLV, 17. Fuit haec annium elunies aliis quoque temporibus, vt 590. ſub Gregorii M. pontificatus auſpicio, inter peſtilentiae cauſas.

k) Dio LIV, 1. eſt ea, quam Plin. VII, 45. ſ. 46. innuit.

kk) Suet Nero 39.

l) Suet Tit. 8.

ll) paſſim Galenus.

tata; Babylone illa, fomite pestilenti ex abdito loco in aerem protracto, tabem in Parthos vulgauerat; *m*) inde vsque ad Gallias et Rhenum cuncta contagiis et mortibus polluit; altera quae sub Commodò a. 189. ingruisse dicitur, nisi prior illa tum forte recrudit, vix in censum venire potest. *mm*) At Romanum imperium peruagata est tertia a. 252 Gallo et Volufiano Imp., orta et haec in Aethiopia; *n*) tandem quarta famosissima illa 543. Iustiniano principe: *o*) quae ab Aegyptiis orta, Pelusio hinc Alexandriam inde per Palaestinam sparsa, fequente anno per extremos terrarum fines diffundi coepit.

Ex his igitur, quae commemorata sunt, manifestum esse arbitramur, ante L. Veri tempora nullam pestilentiam memorari, cuius signa satis certa memoriae tradita sint; etsi res ipsa satis probabile faceret, bellis cum Poenis gestis populorumque mutuis per Italiam, Siciliam et Africam commerciis, pestilentiae semina ex Africa per alias terras ferri spargique debuisse; nam in his terris zonae torridae propioribus pestem gigni indeque contagio

H 5

aliis.

m) Iulius Capitol. in Vero c. 8. add. Ammian. XXIII, 6. p. 293. ed Lips. Oros. VII, 15. et quidem per plures annos. cf. Jebb in Vita Aristidis ad ann. 173. 5.

mm) v. Dio. LXXII, 14.

n) v. Oros. VII, 21. Est haec illa. de qua Cypriani libellus de mortalitate agit, Opp. P. I. p. 156. etsi pauca inde de ipsa lue discas: conf. tamen ib. not. et Dodwell. Annal. Cypr. ad. a. 252.

o) Praeclara de ea loca Procop. de b. pers. II, 22. Evagr. IV, 29.

aliis terris inferri, constans nunc est virorum doctorum opinio. Quod si de Carthaginensium rebus fatisque plura ad memoriam hominum propagata essent, luculentiora forte pestilentiae iam antiquioribus aetatibus argumenta haberemus; nunc pauca, eaque parum diserte et accurate exposita. *p*) Antiquissima haud dubie esset pestilentiae memoria in Chronico Eusebiano memoratae sub ipsum dilunii Deucalionis tempus, nisi illud commentum esset indocti hominis, cui male fides habita est. *pp*) Pestilentiam Mosi bene innotuisse fatis constat; ab Herodoto tamen ea non memoratur in iis quae de Aegypto exponit. *) In Graecia auditur quidem nomen λοιμοῦ ab ultima inde memoria: depulisse pestem narratur Aeacus precibus ad Iouem factis; item

p) Vt ante C. 372. Olymp. CII. v. Diod. XV, 24. in oppugnatione Syracusarum Ol. XCVI. 1. ibid. XIV, 70. 71. et in obsidenda vrbe Agrigento Diod. XIII, 86.

pp) In Aethiopia multae pestilentiae locales, vt Plato meminit, fuere: Chron. Euseb. Hieronymi Nu. 490. Eadem Orosius et alii repetierunt. Si tamen Platonis Timaeum inspexeris p. 22. C. (Bipont. p. 291) facile patet hominem plura diuersa in idem miscuisse. Male quoque prouocatur ad Maxim. Tyr. Diff. III. extr. nam is de peste sub b. Pelop. ingruente agit.

*) Potuit in antiquioribus aetatibus sacerdotum cura et inspectione multis modis, v. c. religiosis lustrationum et castimoniarum ritibus, pestilentiae contagio prouidum esse: vt acute suspicatur Collega coniunctiss. Gatterer (*Weltgeschichte* 1785) p. 209. Nec magis tamen sub Ptolemaeis vlla pestis mentio occurrit. Omnino illud, quod vulgo de pestis in Aethiopia ortu et per Aegyptum in Asiam descensu traditur, nondum fide fatis explorata niti constat.

item Aristaeus sacro facto circa Sirii ortum; q) Notissima est pestis in castris Achiuorum in primis Iliadis versibus; Sequioribus aetatibus feruntur alia, sed fabulis propiora, de Epimenide Athenas arcessito ad liberandam peste urbem, et de Empedocle, pestem ab Agrigentinis, ciuibus suis, miris artibus auerruncante. Verum vna est, cuius memoria ita ad nos peruenit, vt de ea iudicium facere liceat, pestis, quae sub belli Peloponnesii initia Atticam inuasit; etsi de ea quoque Hallerum dubitasse videmus: „non putes, inquit, vero nomine pestem fuisse,, r).

Etsi essent adhuc nonnulla, quae forte non iniucunde commemorari possent, veluti de auertendarum pestium modis ac consiliis apud Romanos, quibus subest plerumque ratio aliqua a vanis religionibus petita; porro, si comparatio instituatur inter morbos contagiosos veterum et recentiorum aetatum

q) v. Apollon. II, 520. Diod. IV, 82.

r) Haller Biblioth. med. pract. To. I. p. 102. Pestem illam accurate narratam esse a Thucyd. II, 47. III, 87. Diod. XII, 45. 58. ex alio auctore, tum a Lucretio, nota res est; Etiam illud vulgo nunc tenetur, ab Hippocrate in Epidem. I. non veram pestem, sed febrem epidemicam, quae Thasios et alias Graeciae vrbes infestabat, narrari v. Freind, Comment. ad eum lib. p. 119. Fuere viri docti qui recensensus variarum pestilentiarum, quae vsquam traditae sunt, ediderunt; in his est ad calcem (Franc. Rondinelli) *Relazione del Contagio stato in Firenze l' a. 1630 et 33.* Firenze 1714. Verum parum explorata et locis ad nullam criticam historicam exactis ista apposita sunt.

tum, vtri maiorem corporum stragem ediderint, quibusque de causis id factum sit in tanto maiore corporum robore victusque simplicitate: dimittenda tamen est de manibus disputatio tam male ominata, et a sacris et sollennibus his, quae indicimus, aliena. Meliora omnia et faustissima auspicia petetis, Commilitones, ab iis, quos verba facientes in ipsis sollennibus audietis. PP. Kal. Iuliis c1010ccclxxxii.

E p i m e t r u m.

Cum ad hoc argumentum ab eo inde tempore redire non licuerit: adiiciam saltem nonnulla super iis, quae in extremis versibus e manibus dimissa sunt.

Incuria et socordia partim in providendis et cauendis iis rebus, quae aerem corrumpere solent, partim in depellendis aeris caelique iniuriis, soli porro et aquarum vitiis tollendis, vt inter omnes populos barbaros, inprimis magna hominum multitudine in vnum locum congregata, ita et Romae haud dubie febres leuiiores in malignas plerumque mutauit. Si in vilo populo politia ad summum, quo ea adduci potest, peruenerit fastigium: probabile fit, febrium vim malignam obscura sui vestigia esse relicturam. Vt in nostrarum ciuitatum fastis, ita Romae pestilentiae mentio crebra per antiquas aetates fit: in recentibus rarior occurrit. In tanta rei medicae ignoratione nihil recte curabatur. Vbi corpora morbo essent tentata, cum ad deorum iram mali causas referrent, a superstitiosis ritibus auxilium petere: sacrum nouendiale indicere, clauum pangere, expiatione lustratione et supplicatione pacem et veniam deorum expetere. Quid? quod sacra arcana curarunt, quibus ipse Iupiter eliceretur, cogereturque fateri, quibus ritibus ira eius placari posset; vt a Tullo Hostilio factum: Liv. I, 31. Casu accidit vt is fulmine ictus cum domo sua conflagraret; nam, eum arte aliqua temere adhibita ignem caelestem in se deriuasse videri, temporum barba-

barbaries credere vetat; etsi potuit certos ritus patrare, sacris factis, in loco incluso, quibus fulminis vim alliceret; potuit quoque res fabulose ornari, quum fama tantum hoc constaret, incendio Tullum periisse. Dionysius e suis auctoribus nihil ea de re memoravit III, 35. Nihil ad superstitionem Romanorum defuit, quam, quod per Orientem a tot populis factum videmus, ut graui calamitate afflictis deorum iram sacrificiis humanis placarent.

Romae antiquioribus temporibus habitationis ad corporum valetudinem instituendae cura fuit nulla; tantum conuallium inter montes ab aquarum colluie liberandarum rationem inierat Tarquinius cloacis ductis. Tiberis exundantis aquas stagnantes saepe incusant scriptores. An paludes Pomtinae iam tum, cum minus late Volscorum agros obducerent, aerem corruperint, dicere non ausim. Mancipiorum multitudo in eadem domo in angusta cella habitorum luem haud parum contagio spargere debuit. Tum saepe terrore ab hostibus fines populantibus orto, fuga in urbem facta pecora agrestesque in urbem sunt recepti: (ut Liv. III, 6 et al.) Hac colluie hominum animantiumque tecta ac vias vallesque confertis corporibus opplente, interdum per immodicum aestum, seu frigus insolitum, aliamue aeris intemperiem, contagium per omnes ordines sparsum esse quis miretur?

VIII.

ACADEMIAE GEORGIAE AVGVSTAE

PRORECTOR

IOAN. CHRISTOPH. GATTERER

CVM SENATV

ANNIVERSARIA INAVGVRATIONIS

SACRA XXXXIV.

IN A. D. XVII. SEPT. MDCCCLXXXII.

RITE INDICIT.

*De Leone M. Pontifice Rom. Attilae et Genferico
supplice facto.*

Summi Pontificis Romani Pii VI. iter hac aestate Viennam ad Imperatorem susceptum iis, qui in historiis sunt versati, multarum rerum partim similibus partim dissimilibus memoriam refricit. Vidimus itaque plura in comparisonem adducta. Poterant inter haec legationes Pontificum cum Romanorum tum aliorum de rebus grauibz actae memorari. Nec absonum itaque videri potuisset, si nunc, cum sollennibus crastino die habendis proluendum sit, de Iaddua, Pontifice Iudaeorum, voluissemus agere, Alexandro ad Hierosolyma pergenti in

in occursum prodeunte. Suavis utique narratu fabula. Sed ferebat animus ad alteram narrationem de Leone M. bis legatione functo, altera ad Attilam, altera ad Genfericum Vandalorum regem: quarum tamen prior illa longe maiorem celebritatem assequuta est pictura Raphaelis Vrbinatis nobilissima. Adeo verum est, quod in historiis legendis saepe in animum venit, aliorum plerumque ingeniis potius quam propriae virtuti famam plerorumque ad posteritatem deberi; multas magnas res geri, paucas fatis claras: scilicet nisi ea fortuna contigerit, ut ingeniosorum hominum opera illae nobilitentur *). Picturam hanc his ipsis diebus chalcographico opere, coloribus suis ad tabulae pictae similitudinem scite elaborato, vidimus: quo ipso animus ad alterum hoc argumentum inclinatus est. Verum Leonis legatio altera ad Genfericum si non maiore, saltem non minore admiratione quam prior digna erat; facta et illa ad regem victorem eumque barbarum, ut vrbs propugnatoribus vacua ei dederetur. Quanto melior in hoc fortuna Pii VI. qui, non urgente necessitate, sed consilio ac sponte, adiit Imperatorem omni humanitatis et facilitatis laude celebratum, aequo iure ac loco de rebus communibus egit, et lautissime exceptus mirificeque recreatus ad suos rediit. Rerum cursu procedente mature intelligetur, quae causae fatis graues, qui fructus fatis memorabiles, huius professionis fuerint. Verum ad Leonem Sanctum progrediamur.

Sane

*) Hinc illud: *O fortunate adolescens, qui tuae virtutis praeconem Homerum inueneris!*

Sane quidem in argumento versamur tam trito, et in vulgaribus quoque historiis recocto, ut stolidum esset, si profiteri vellemus, noua nos esse his de rebus allaturos. Neque vero id scriptionis genus aut consilium postulat; et vana est nouitatis laus ex rerum figmentis verborumque fucō puerili; nec quicquam tam alienum ab historiae dignitate, quam leuissima quaeque ingenii commenta (quorum noua semper propago pullulans suppetit etiam minus sollertibus) factorum veritati substituere. Multo minus inanem operam iactare placet in reuocandis ac refellendis iis, quae perperam passim tradita, et ab aliis dudum sunt animaduersa. Interea suum vtique iudicium, sua ratio, cuique potest constare in rebus seu explorandis et trutinandis seu exponendis. Est aliqua laus etiam in hoc, si ad antiqua ornanda, obscura illustranda, ingenium non defuerit. a)

Attilam

- a) Incredibile est, quam multa de Attila narrata sint, cum tam pauca certo tradi possint. Fabulosis commentis onerarunt res Attilae certatim monachi, tum rerum Hungaricarum scriptores, porro Itali, imprimisque qui ciuitatum nonnullarum, ut Mediolani, Mutinae, Patavii, Aquileiae, res exsequuti sunt. Est in gentis Atestinae honorem scriptus libellus a Nicolao Tomaso d' Aquileia, ut praefatio prae se fert, Patriarchae Nicetae (sui vtique eo tempore Nicetas Episcopus Aquileiensis, ut ex S. Leonis Epistolis constat) a Secretis, versus in sermonem prouincialem a Nicolao de Casola Bononiensi, et Italice editus Ferrariae 1568. 4. Habemus cum hoc in manibus alium e bibliotheca academica libellum 1477. italice exaratum quaternionibus impressum, Venetiis haud dubie: *La hystoria de Attila dicto flagellum dei, translata da lingua francescha in latina* - 1421. Est hic libellus is, de quo Sabellicus agit Lib. III. de vetustate Aquileiae p. 72. E. Ital. illustr.
- Heynii Opusc. acad. Vol. III. I

Attilam re in campis Catalaunicis male gesta, refecto exercitu, anno sequente (a. C. 452.) per Pannonias Italiam ingressum, late omnia populando vastasse, Aquileiam vi expugnatam solo aequasse, inde Ticinum et Mediolanum, vi captum, diripuisse satis constat. *b)* Res iam in eo erat, ut victor Romam peteret. Valentiniani Imp. focordia nulli rei prospexerat, quae aut ad auertendum hostem, aut ad tutandam Italiam idonea esset; ne Alpium quidem claustris occupatis, qua aditus ad Italiam erat. Aëtius abfuisse dicitur ad copias parandas; ex Idatio patet, ad Marcianum Imp. Constantino-polin eum esse profectum, unde mox, quod infra videbimus, cum auxiliis rediit. Omnino illa aetate copiae, si parandae erant, arcessebantur a barbaris: hoc

illustr. ut ex nota exemplari nostro adscripta didicimus. Suppar ei nec forte multum aetate superius est carmen nuper a Fischero V. C. vulgatum, de prima expeditione Attilae in Gallias. Iam haec quidem vana signa esse nemo nunc facile dubitet. At tamen meliores quoque scriptores post Sigonium et alios, ipsi, inquam, Muratorii, Belii, Prayi, nimia copiosi videri possunt in Attilae rebus exponendis, cum eadem lance apponant seriorum scriptorum commenta cum iis, quae ex Prisco aut Iornande hausta sunt; ut adeo melius consilium sequutus videatur Gebhardi V. C. in nupera rerum Hungaricarum expositione, allatis tantum iis, quae ex scriptoribus fide dignis hauriri possunt. Ea utique, quae de Attila Italiam ingresso cum fide tradas, ad pauca redeunt, quae ex Prisco Iornande, tum quae Prosper memorat, qui Leonis Pontificis primus Notarius fuit, et secundum hunc Idatium. Nam Historias Miscellas, quae Paulo Diacono subiiciuntur, a seriore manu in hoc loco interpolatas esse nunc satis conuenit.

- b)* Alia urbium nomina sunt in Histor. Miscell. Paulo Diacono subiectis p. 98. Murator.

hoc erat exercituum Romanorum robur. Adeo degenerauerat Romanum nomen; imbelles vulgus, laboris et disciplinae adeo intolerans artisque militaris rude, ut in pugna Catalaunica Attilam loquentem inducat Iornandes: *Nota, inquit, nobis sunt leuia Romanorum arma. Primo enim non dico vulnerare, sed ipso puluere grauantur. De Romanis haec dicta esse quis non obstupescat? Pergit: Dum inordinate coeunt, et acies testudinemque coniectunt: vos confligite praestantibus animis, ut soletis, despicientesque eorum acies, Alanos inuadite, Vefegothis incumbite. c)* In fociis nempe summa pugnae erat posita; Romani ipsi pars agminis vilissima. Mos autem pugnandi erat Hunnorum, idem qui aliorum barbarorum, ut primo impetu effusi aciem hostium perfringerent. Interea a Valentiniano spes in eo posita esse fertur, ut Italia decederet. *d)* Tandem consultius visum est, ut legatione facta Attilae animus tentaretur: *e)*

I 2

Suscepit

c) Iornand. de reb. Get. c. 39.

d) Prosper in Chron. *Herculano et Sporatio Coss.* qui ipsum Aëtium huius consilii arbitrum edit: *Attila redintegratis viribus, quas in Gallia amiserat, Italiam ingredi per Pannonias intendit, nihil duce nostro Aetio, secundum belli prioris opera, prospiciente; ita ut ne clisuris quidem Alpium, quibus hostes prohiberi poterant, videretur: hoc solum spei suis superesse existimans, si ab omni Italia cum Imperatore discederet.*

e) Idem pergit: *Sed cum hoc plenum dedecoris et periculi videretur, continuuit verecundia metum, et tot nobilium prouinciarum latissima euersione credita est saeuitia et cupiditas hostilis expleta; nihilque inter omnia consilia Principis ac Senatus Populique Romani salubrius visum est, quam ut per legatos pax truculentissimi regis expeteretur.*

Suscepit hoc consilium cum viro consulari Auieno f) et viro Praefectorio Trigetorio beatissimus papa Leo, auxilio dei fretus, quem sciret nunquam laboribus piorum defuisse. Nec aliud sequutum est, quam (quod) praesumserat fides. Nam, tota legatione dignanter accepta, ita summi sacerdotis praesentia rex gaudius est, ut et bello abstinere praeciperet et ultra Danubium promissa pace discederet. g)

Haec quidem scriptor, qui rebus interfuit, isque fide dignus; at quam breuiter ea narrata sint, videtis. De consiliis Attilae nihil dictum, nil de conditionibus pacis: nil de causis, quae, ut preces admitteret, Attilam mouerint. Scilicet grauissimorum generis humani euentuum causae plerumque aut nullae aut obscurae et ambiguae habentur; acquiescendum est in causis probabilibus; satisque sumus beati, modo facta ipsa teneamus explorare et cum fide tradita; etsi ea est multorum vanitas, ut iacent se causis, non timide ac verecunde coniectando assequendis, sed audacter, ac si exploratissima afferrent, exponendis, earum rerum, quarum nulla superest aut obscura memoria; ita ut causis reperiis saepe excogitanda sint facta; multo magis id, quod diximus, ita se habet in rebus barbarorum, et in iis saeculis, quae non minus ipsa barbara recte dixeris. Itaque et in his, de quibus nunc agitur, satis est, de ipsa legatione dubitari non posse; etsi plus in ea auctoritatis datum Pontifici, quam ipsa res

f) Fuit is Consul a. 450. v. Sirmond. ad Sidon. I, Ep. 9. p. 18.

g) Prosper l. c. qui a Sirmondo et Duchesnio fuit suppletus.

res et Theodorici Regis verba apud Cassiodorium admittunt; namque is non modo comitem, verum et principem legationis memorat Cassiodorium patrem cum Aetii filio Carpilione, et omnem successum eius constantiae et sollertiae tribuit. *h*) Attilam quoque ab eo loco, quo Pontificem in suum conspectum adduci iusserat, in Aemilia ad Mincii transitum, *i*) Italia excessisse satis constat; etsi, qua via redierit, non magis teneas, quam quibus de causis redierit. Nam Leonis aut dignitatem oris aut eloquentiam tantam vim ad barbari animum habuisse, nemini facile persuaserit Prosper, multo minus auctor miscellarum historiarum. Ad superstitionis, animis Gothorum insidentis, vim reuocat ea, quae facta sunt, Iornandes, et quidem Prisco, qui tum vixit, auctore. *k*) Nec omnino est improbabile, eam tum urbis Romae haberi I 3 potuisse

h) ap. Cassiodorium I. Var. Epp. 4. Etsi ipse Cassiod. in *Chronic. Herculanus et Asporatus. (452.) His Cass. Attila redintegratis viribus Aquileiam magna vi dimicans introiit; cum quo a Valentiniano Imp. Papa Leo directus pacem fecit: ut, saltem aliquas Leonis partes in ea legatione fuisse, dubitari nequeat. Cessit ea ipsi magnae laudi, nam et in Epistola Episcoporum Orientis ad Symmachum a. 512. reuocatur Leonis virtus et pietas in animum.*

i) *Quo Mincius in Padum influit.* Hist. Miscell. l. c. Esse locum nunc *Governolo* dictum infra Mantuam, docuere viri docti.

k) Iornandes l. c. c. 42. *Quumque ad Romam animus fuisset eius (Attilae) attentus accedere, sui eum, ut Priscus refert historicus, remouere; non urbi, cui inimici erant, consulentes, sed Alarici quondam Vespogothorum regis obiicentes exemplum: veriti regis sui fortunam, quia ille post fractam Romam diu non superuixerat, sed protinus rebus excessit humanis.*

potuisse maiestatem et sanctitatem, ut is qui eam diripisset, haud diu superstes facinori crederetur fore: sed an huius superstitionis Christianorum hominum ad Hunni animum magna vis esse potuerit, admodum dubites; cumque mox apud eundem Iordanem subiiciatur: *igitur dum eius animus ancipiti negotio inter ire et non ire fluctuaret secumque deliberans tardaret*: debuere utique causae esse grauiiores, cur Attila incerti animi fluctuaret, curque legatio Roma adueniens tam placita et grata haberetur. Et sunt nonnulla, quae cum aliqua specie veri possint commemorari: Primo loco ea, quae Idatius, nulla legationis mentione facta, memorat: 1) partim morbo partim fame consumptos esse barbaros, late palantes, et vastitiae facta victum sibi ipsos intercipientes; tum collectas ab Aetio copias Marcianique Imp. auxilia appropinquasse, edita iam passim ab Aëtio barbarorum strage; cum interea Marciani exercitus ipsas Hunnorum sedes esset adortus. Accedere his potuere alia: quod onustus praeda militiaeque fessus miles vix bene nouis periculis bellicae casibus obiici videretur. Gratissimus adeo legatorum aduentus esse debuit, quo superbi regis pudori consulereetur; nec minus autem gratus et iucundus legationis splendor, viris

- 1) Idatius Chronic. p. 305. in Sirmondi Opp. *Secundo regni anno principis Marciani Hunni, qui Italiam praedabantur, aliquantis etiam ciuitatibus irruptis, diuinitus, partim fame partim morbo quodam, plagis caelestibus feriuntur: missis etiam per Marcianum principem Aëtio duce caeduntur auxiliis; pariterque in sedibus suis et caelestibus plagis et per Marciani subiguntur exercitum. Et ita subacti, pace facta cum Romanis proprias vniuersi repetunt sedes: ad quas rex eorum Attila mox reuersus interiit.*

viris summae auctoritatis in eam allectis: nam ex iis, quae a Prisco narrata supersunt, apparet, aliquoties regis iram excanduisse missis Constantino-
poli ad se legatis inferioris ordinis. Praesulum au-
tem ut magna erat dignitas et auctoritas, ita et fre-
quens usus in legationibus mittendis; ut hactenus
nihil sit, quod in hac ad Attilam legatione Leonis
cum ceteris mirationem facere debeat. Quae lega-
torum verba fuerint, m) quae pacis condiciones,
nusquam memoratum legitur. Probabile fit, mu-
nera fuisse missa, alia promissa; annum vectigal
exactum, colligere licet ex Hunnorum planctibus
super regis morte; n) et Honoriae redditionem cum
portione regalium opum postulatam arguunt verba
apud Iornandem o).

Cum causas et condiciones pacis idoneas et
probabiles indagare pigeret, ad miraculum confu-
git scriptorum ignavia. Cum Leonis praesentiae
Prosper, alii eius eloquentiae, prosperi successus
laudem assignassent: ecce extiterunt, qui territum
dei nutu Attilam narrarent, eumque post discessum
Leonis rogatum, a suis, cur tanta cum facilitate

I 4

ad

- m) et si oratio ei tributa legitur satis diserta: v. c. apud
Canis. in vita Leonis AA. SS. April. To. II. p. 18.
n) Iornand. c. 49. *qui-utraq; Romanae urbis imperia
captis civitatibus terruit, et, ne praedata reliqua sub-
derent, placatus precibus annum vectigal exegit.*
o) l. c. c. 42. *Qui mox deposito exercitus furore, et re-
diens qua venerat, id est ultra Danubium, promissa
pace discessit: illud prae omnibus denuntians atque inter-
minando discernens, graviora se in Italiam illaturum,
nisi ad se Honoriam Valentiniani principis germanam,
filiam Placidiae Augustae, cum portione sibi regalium
opum debita mitteret etc. vid. reliqua.*

ad omnia Leonis postulata adnuisset, respondisse: „non se eius qui aduenerat personam reueritum esse, sed alium se virum iuxta eum in habitu sacerdotali adstantem vidisse, forma augustiorem; canitie venerabilem, illumque euaginato gladio sibi terribiliter mortem minitantem, nisi cuncta, quae ille expetebat, expleffet., p) Interpretatum hoc et acceptum de Petro: cui postea accessit alter Paullus. q) Verum, etsi vnus apostolus ad terrendum satis esse potuit, magna tamen et mira res videri debet, si ferocissimus nec Christiana superstitione captus homo specie sacerdotis cum gladio minitantis tantopere fuit perterrefactus. Quod si res cum fide idonea tradita est, repugnare nolimus; ea enim veritatis esse debet auctoritas, vt et iis concedamus, quae aegre admittimus. Enimuero in nullo aut eiusdem aut proximae aetatis scriptore eam narrationem reperiri, docuere viri docti. r) Ipsum Leonem, hominem alioqui satis disertum, nihil nec de legatione nec de miraculo illo commemorare, testantur ii qui eius scriptis legendis insudarunt. s)

Hanc

p) Historiae Miscellae lib. XV. ap. Murator. p. 98.

q) v. Canis. in vita Leonis l. c. c. 2.

r) v. Quesnel in diss. l. app. Opp. Leonis p. 165. Nam Historiarum Miscellarum tanta auctoritas esse nequit, cum Paulli Diaconi verba ea non sint; nec Sigeberti Gemblac. qui plus quam D. annis serius vixit. Quid? quod ne Anastasius quidem de vitis Pontificum seu angelorum seu apostolorum meminit: *hic, inquit, propter nomen Romanum suscipiens legationem ambulauit ad Regem Unorum Athilam et liberauit totam Italiam a periculo hostium.*

s) Nam locum ex Serm. 81 mox ipse Quesnel in nota ad e. l. ad alteram legationem versus Genfericum spectare vidit:

Hanc tamen rem quamvis fabulosam praeclarae picturae argumentum fecit Raphael, pictorum princeps, iudicaturque is multorum consensu in hac tabula ipsos artis terminos si non esse egressus certe attigisse. Nobis, quibus Corinthum adire non licuit, iudicium ferendum est exemplis opere chalcographico propositis, in ceteris iudicium sequendum aliorum. Secundum haec negari non posse videtur, Attilae, ad quem omnia in pictura referri necesse est, dignitatem et ipsam speciem esse minorem, quam sancti Pontificis; magnam ad animum vim habere placidum huius vultum et habitum benedictis, pontificio more; *t*) dum interea ille ad spectu Petri et Pauli in aere suspensorum perterrefactus supino et retro lapsuro similis: nec tamen spectrorum ora et gladii intentati sunt in ipsum regem, sed fugare illa videntur Hunnorum agmina

I 5

pone

vidit: et consentiunt in eo fratres Ballerinii, et Pagi ad h. a. At spectat ad huius anni acta altera Epist. 129. (in Baller. 159.) ad Nicetam Episcopum Aquileiensem.

- t*) Vasari in Vita Raphaelis (P. III. p. 100. ed. Bottar.) *Leone III. il quale lo caccia con le sole benedizioni.* quod utique inuentum foret Raphaelis ingenio non indignum. Sed de eo vix cogitare ille potuit, cum Apostolorum visu terreatur rex, non benedictis ad spectu, a quo adeo aversa est facie. Idem Vasari, qui male ad Montem Marium, adeoque ad vicina Romae loca, interuentum Regis reuocat, laudat nonnulla tanquam principe loco, quae alii reprehendunt; laudat Apostolorum species ad terrendum aptas, laudat Attilam cum equo; tanta iudiciorum etiam inter artis peritissimos est diuersitas! verum auctoritatem maiorem minoremue facit non ipsa res, sed hominum opinio. Ipse Raphael Pontifici adiicere maluit ea, quae Attilae subduxit, vt Leonis potius nomine, quam Attilae, tabula insiguienda esse videri debeat. --

pone regem signo discessus dato tergum vertentia, ita ut ea, quae paullo post facta sunt, ad hoc ipsum facti momentum assumisse artifex ingeniosus videri debeat. Vnum Attilam Apostolorum species conspicuum credere licet; reliquorum ora saltem in regem conuersa repentinum eius pauorem animadvertere expectares; enimvero in Leonem oculi animique omnium versi sunt. Occurrere autem putanda est legatio Attilae in medio itinere, agmine profectionem faciente: ita ut Leo mulo et Attila equo insidentes exhiberi possent: hic quidem merito, cum ipse, Hunnorum suorum exemplo, vix vnquam equo descenderet, coenam equo insidens caperet et dormiret. Sed plura alia commoda ad picturam res habuit: nam exercitum ostentare, viros armatos exhibere, equos inprimis generosos et ferocientes summa cum arte reddere licuit; etsi non definire audemus, vtrum in his Attilae equus ceteris insignior sit. Omnino duo Hunni armati adequitant longe speciosiores rege, qui tantum non obscurus in turba latet. Arma Hunnorum adumbrasse fertur pictor ex Columna Traiani. Sunt alia similia in Columna Theodosii: quae an Raphaeli innotescere potuerit dubites. Gratificatum esse in nonnullis Leoni X. cuius iussu tabula illa picta est, cuiusque speciem refert in ea Leo S., monitum est a multis u). Ceterum reliqua, quae ad artis praecepta

u) Sunt etiam delineationum, aere quoque redditatum, exempla, in quibus excluso Pontifice ad Attilam rerum summa refertur; multo grauiore cum iudicio: v. *Nachricht v. Künstlern*. P. II. p. 466. et 7. *Richardson Description*. To. III. p. 393. *Bottari* innotis ad Vasar. l. c. p. 109. 2.

cepta exigenda sunt, diuinitus esse et inuenta et elaborata, consensu omnium constat.

Etsi Raphael tam praeclara pictura praeuertet, non tamen deterritus est summus sculptor Algardi, quo minus idem argumentum opere anaglypho exprimeret, quod in templo S. Petri asseruatur x). nec minus clarum illud tabula Raphaelis habendum; mirantur ii, quibus haec contemplari licuit, eminentes altius, quam facile quis credat, corporum, inprimis Attilae, species; earumque circumscriptiones diligenter, dispositiones prudenter factas; miram totius operis vim ad oculos et animos spectantium. Leonis species ei similis, quem in numis *pacificatoris gestum* appellant, ita ut Attilam aditu Romae tantum non interdicare videatur. Si sequare ea, quae de hoc anaglypho passim commemorantur, dubius haereas, an non in sculptoria arte multo perfectius et absolutius opus habendum sit hoc, quam in pictoria alterum.

Altera Leonis ad Genfericum legatio minus clara vtilitatem maiorem habuisse videri potest. Caeso Valentiniano Imp. ignauo homine, ab eius vidua Eudoxia, Maximo nubere coacta, arcessitus Genfericus Vandalorum rex ex Africa a. 455. aduolauit, tanquam ad praedam paratam, et caeso interea Maximo, ingressus Romam, vrbe per XIV. dies direpta,

x) elaboratum circa a. 1650. Innocentii X. iussu. vt discere licet ex *Giambatt. Passeri vite de' Pittori Scultori* etc. (Ro. 1772) p. 206. 7. vt adeo hinc emendandus sit *La Lande Voy. en Italie* To. III. p. 105. qui annum 1640. edit.

direpta, in Africam rediit: Cuius stuporis nisi innumera superessent exempla, quis tandem crederet aut mulierculae ira et odio occaecatum animum tantam cladem in tantum populum deriuare, aut regem victorem vrbs direptae spoliis exultantem discedere, quam Italiam in ditione retinere, maluisse. Verum ingressuro urbem Genserico obuius factus Leo, deueneratus regem, obtinuisse videtur, vt ne caedibus et incendiis fauiretur, sed contenti essent barbari, si agere et ferre omnia, populari ac diripere contigisset. y) Innumera tum praestantissimae artis opera periere, partim a barbaris direpta et corrupta, partim in Africam auecta: e quibus magnam partem fluctibus sepultam esse constat. z) Etsi enim nos miseri mortales tantum in artibus humanitatis praesidium positum esse arbitramur: aeternae tamen Prouidentiae consiliis summorum ingeniorum opera non maioris esse momenti apparet, quam nostris iudiciis araneorum telas aut vesparum apumue cellas.

Verum

y) Prosper Chronic. sub f. *Post hunc Maximi exitum urbem omni praesidio vacuum Gensericus obtinuit, occurrente sibi extra portas S. Leone Episcopo: cuius supplicatio ita eum deo agente leniit, vt, cum omnia potestatis ipsius essent, tradita sibi ciuitate, ab igne tamen et caede atque suppliciis abstinereetur. Eadem fere in Historiis miscellis p. 98 b. Idatius Chronic. ad h. a. vrbs captae ac direptae meminit, de Leone nil commemorat, vt nec Marcellinus Comes ad h. a. nec Cassiodorus et alii. Tam parum de summis rerum momentis laborare videntur hi homines, e quibus nobis omnis horum temporum historia est haurienda.*

z) Plura de his apud Procop. de B. Vandal. 1. 4. 5. Theophanem Chronograph. p. 74. 75 ed. Ven. quae cum aliis exscripta prostant apud Murator. Annal. ad h. a. Ritter. ad Guthr. To. V. P. I. p. 268. et al.

Verum missas faciamus tandem legationes Leonis; ableganda enim est haec ipsa pagina ad Vos, Princeps Serenissime, Comites Illustrissimi, Generosissimi Barones et Nobiles, Civesque seu profusae generositae, seu, quod multo maius est, ingeniorum animorumque nobilitate commendabiles, ut, si placeat, ad sollemnium crastino die, qui almae huius Academiae dies natalis est, celebranda frequentes adesse velitis. Ducta in templum Academicum pompa habebitur ex more oratio sollemnis, nunc quidem a Professore eloquentiae, qui vobis *litterarum statum, ad quem illae saeculo uno et altero interposito, sub annum c10c10 adductae erunt, delineabit*; eum si non Calchantis more vaticinantem, saltem fabulam Milesiam narrantem audite; tum, id quod grauius est, agentur Deo O. M. gratiae pro beneficiis in rem nostram et academicam et litterariam cumulatis. Vos, o nostri, diuini Numinis prouidentiam veneramini, et tot bonis ita tandem non indignos vos fore arbitramini, si recte iis uti didiceritis. PP. in Georgia Augusta Kal. Septemb. c1010cclxxxii.

E p i m e t r u m.

Ad notam (a) dum animus adhaerescens fluctuationem in re incerta et obscura aegre ferebat, pertinaciter inuestigando bonam horulam perdere placuit; adiuti itaque amica et sedula opera Diezii, qui tunc inter viuos erat, coniunctissimi Collegae, eo peruenimus, vt sequentia explorata habeamus.

Fuit *Nicolaus de Casola Bononiensis*, qui circa a. 1358. poema scripsit lingua Francica, (non Provinciali) quod binis voluminibus seruatur in Bibliotheca domus Atestinae, cuius initium vulgauit *Muratorius* in *Antichità Estensi* P. I. praef. p. XX. Inscriptio est: *Liber primus Atile Fragelli Dei translatus de Cronica in lingua Francie in MCCCLVIII. per Nicolaum olim D. Iohannis de Casola de Bononia.* Heros princeps huius carminis, in gratiam gentis Atestinae et Bonifacii Principis scripti, est Forestus Princeps Atestinus; ornantur res, partim forte ex antiquioribus fabulis petitae, in fabulae Romanensis heroicae morem. Ex eo carmine ductus est liber is, quem 1568. 4. Ferrariae impressum diximus, *La Guerra d'Attila, Flagello di Dio. Tratta dallo Archivio dei Prencipi d'Esti*: recte vltima haec, quatenus Ms. apud gentem illam seruatur; sed commentitium est, forte tamen et hoc ex vetere Ms. mutuatum, quod in praefatione legitur: *che sendo stata scritta in latino per Tomaso d'Aquileia, segretario in quel tempo del Patriarca Niceta, fu dipoi trasportata in lingua prouenzale da Nicolo da Casola Bolognese.* Fuit autem ex Casola conscriptus liber a Io. Bapt. Pigna,

Pigna, vt proluderet operi quod tum parabat: *Historia de Principi di Este*, (Vinegia 1572. 4.) Haec quidem didicimus ex *Muratorio* l. c. *Fontanini dell' Eloquenza Italiana* lib. 1, c. 13. p. 42. et p. 574. quem emendauit in nonnullis *Apostolo Zeno* in noua edit. To. II. p. 191. cf. *Götze Merkwürdigk. der Dresdn. Bibl.* To. III. p. 346. *Tiraboschi storia della Lett. Ital.* To. V. p. 377. nihil de suo attulit.

Sed idem Praeful doctissimus Fontaninius alium librum Romanensem *Guerra d'Attila*, Francice, sed in prosa, scriptum Saeculo XIV. qui seruat in Bibliotheca Canonico. regular. Laterani, inspexit. Est in eo heros primarius *Panducco*; (cum apud *Pignam* *Panduto* sit patruelis *Attilae*.)

Diuerfus tamen etiam ab hoc est tertius ille libellus, quem in nota (a) laudauimus 1421. ex Francico latine factus et Venet. 1477. expressus. In eo est adhuc *Ianus rex Paduae* (*re de Patassia*) qui in *Casola Giglio* est, *prima detto Iano*. Nec quisquam eius meminit; etsi titulum in *Maittaire*, sed falso a. 1472. adscripto, reperimus.

Vulgares tamen fabulae, quibus contaminata est historia Italiae, vt apud *Scardeonium* de antiqu. vrb. Patav. p. 169. 358. *Sabellicum* de vetustate Aquileiae lib. III. et alios; ex *Casola* petita et disseminatae esse videntur.

IX.

ACADEMIAE GEORGIAE AVGVSTAE
 PRORECTOR
 IOAN. CHRISTOPH. GATTERER
 CVM SENATV
 SVCCESOREM
 IN
 MAGISTRATV ACADEMICO
 IOAN. BENIAMIN. KOPPE
 CIVIBVS SVIS
 COMMENDAT
 IN A. D. II. IVLII MDCCCXXXIII.

*De belli Romanorum socialis caussis et euentu, respectu ad
 bellum cum Coloniis Americanis gestum habito.*

Quod a multis inde annis prouideri potuit, et a nemine paullo sagacior non prouisum est, colonias Americanas aliquando imperium Europae esse detrectaturas, nec, re semel tentata, conatus facile successu carituros: id nostra aetate euenisse cum videamus, Comilitones, ea res saepe, cum a belli inde initiis, tum in progressu et exitu, belli Socialis fortunam caussas et euentus in animum reuocauit, quod cum Sociis et Coloniis a Romanis gestum, a similibus caussis profectum, multa habuit, seu vicissitudines et exitus, seu vitia et peccata,

eata, seu consiliorum in nonnullis leuitatem in aliis inconsultam pertinaciam spectes, quae inter se cum fructu comparari possint. Vt igitur ii, qui nos legunt, haec cognoscere suiue ipsi iudicii trutina curatius expendere possint, agedum, imposito hoc praefandi munere, belli huius Romanorum grauissimi ortum, causas et euentus, tanquam in tabula proponamus; nam vt res in eo bello gestas sigillatim recenseamus, aut vt nosmet ipsi comparationem, quam diximus, adhibeamus, id nec loci, nec personae nostrae, nec temporis huius esse manifestum sit.

Summa causarum, a quibus belli Socialis ortus duci debet, ad hoc vnum reuocari potest, quod Socii et Coloniae aequo iure vti, Romani in eos dominari, aequa iuxta et iniqua imperare, vellent. Deploranda est fortuna imperiorum, quae, vi et armis in magnam molem cum coaluerint, non nisi vi et armis, ne dilabantur, contineri possunt. Natum ex iniuria ius non nisi nouis iniuriis defendi potest. Quod si temporum vicissitudines sensum iniuriae, qui, nisi ipsa seruitute in bruta conuersi sint homines, nunquam animis exstinguitur, non tam prouocant, quam vt liberius prorumpat viam faciunt: tum ea, quae male coiere, leui motu succussa rumpi necesse est. Spectant sapientiores ad ius aequum recuperandum, vulgus vecors et temerarium ad eandem vim et iniuriam, quam ipsi depulerant, aliis inferendam ruit. Inter haec res in eum statum adduci solent, vt recte faciendi aut consulendi ne quidem locus relictus sit. Ita cum

longo vsu firmatum Romanorum in Socios esset imperium, postulari aut expectari ab iis nunc non poterat, vt illud repente dimitterent, iisque, in quos sub miti Sociorum et Coloniarum nomine grauem dominationem exercebant, ius aequarent: Contra nec Socios iniqua aut facere aut petere diceret, indignum esse ratos, suis viribus et opibus imperium sustentari, cuius ipsi sint expertes; se delectibus, stipendiis, tributis exhauriri, vt alii praeda, agris, prouinciis locupletentur; vtque totius terrarum orbis spolia in vnam urbem luxu et avaritia perditam conuehantur, se fortunas, sanguinem, vitam impendere, coniugibus liberisque suis macie et squalore deformibus interea vix, vnde vitam miseram sustentent, superesse. Inter haec, quod vix aliter fieri solet, vtraque pars suum tantum ius animo voluere, eius, quod in altera causa iustum inesset, non modo immemor esse, verum etiam, quicquid ex eo iure dictum vel factum esset, ad iniuriam trahere, et poenis suppliciisque dignum id vociferari. Quod itaque etiam moderatis et prudentibus viris in tanta iuris ambiguitate per se difficillimum videri debet, iusti et iniusti limites in medio constituere et vtrinque quantum fieri potest iura et postulata eo dirigere, cum vtrique causae aliquid iusti et iniusti inesse arbitrandum sit; id in tantis animorum iris et odiis multo minus fieri potuit Romae. Superbe et contumeliose responsum Sociis; ita multo magis exasperati sunt animi iniuriae sensu iam ante incensi; altera ex parte cum in eos, quos contemnere assueuissent, Romani nec consilii satis nec virium adhiberent; intra breue tempus pro contemptis et despectis

speculis timendos sibi et, ut caussa, ita viribus, superiores hostes reddiderunt. Verum progrediendum est ad singula, quae causas et ortum belli Socialis continere videri debent.

Semina quidem eius prima iam ab illo tempore, quo Romani imperium in Socios affectarunt, sparsa statuere licet. Alba Longa, e qua triginta coloniae erant deductae, a Romanis capta et diruta, ipsi in metropoleos locum, a qua et ipsi prodierant, succedere et principes Latini nominis haberi voluere. Id a Servio Tullio tentatum, mox a Tarquinio II. perfectum a). Prima foederis lex, ut copiae a Sociis, quoties Romani indicerent, mitterentur: qua in re prima potentiae Romanorum reip. initia et fundamenta scriptores agnoscere debebant. Varie foedus hoc modo ruptum modo renouatum; inque diuersa bellorum fortuna aliis aliae leges foederis scriptae sunt; vniuerse tamen hae: ut suos agros, suas leges, suos magistratus ciuitas quaeque haberet, ut tamen maiestatem populi R. reuereretur, bellum ipsi ne gererent nec publice legatos mitterent; at Romanis bellum gerentibus auxilia e formula foederis mitterent, copiarum numero aliis ciuitatibus aliter constituto; ut ad haec certa stipendia et tributa persoluerent; vno verbo, quod nos solemus dicere: relictum illis cum iure privato ius publicum internum, ademptum cum iure supremo externum. Cum igitur suae quisque ciuitatis legibus, iuribus ac moribus viueret: ciuitatis Romanae iuribus exclusi erant omnes, nihilque adeo conse-

K 2

qui

a) Liv. I, 50 — 52. Dionys. IV. 45 sq.

qui poterant eorum, quae ciuitatis Romanae iure Romanus habebat, vt nec suffragium ferre Romae liceret, nec magistratus petere, nec iura sacrorum, connubiorum, militiae in legionibus, nihil eorum omnium appetere, quae Romae ad statum publicum vel priuatum ciuis pertinerent. In sua itaque vt se contineret quisque ciuitate, necesse erat; nec iniquum id haberi poterat, nisi forte ab iis qui, in sua ciuitate principes copiisque et opibus praepotentes, ad altius fortunae fastigium viam sibi interclusam viderent; reliquum vulgus nihil quod conquereretur habuit, nisi cum stipendiis tributisque attritum se ad alterius populi lubidinem et auaritiam videret. Postquam enim Romani arma extra Latium per Italiam circumferre coeperant, aliae ciuitates in deditionem venere, seruitutis iugo accepto; nullum autem, quod satis constat, esse solet grauius iugum aut durius, quam quod a liberis populis et ciuitatibus imponitur; aliae foederatae factae, specioso Sociorum nomine impertito; legibus quidem valde diuersis, aliae iure aequiore, aliae iniquiore. Erant illis pleraque communia cum Latinis, et primo loco, vt maiestatem populi R. comiter haberent, quod et in nonnullis pactionibus diserte adiectum; vt nec bellum gererent, nec foedus cum aliis populis facerent, vt copias mitterent, tributa penderent, et sic porro; alia tamen erant singularia et cuique ciuitati propria e lege foederis. Ita post Latinos appellati Socii; Italici scilicet nominis; et natum hinc nomen iuris Latini et Italici, respectu nimirum ad ius ciuitatis Romanae facto. Cum suis legibus vterentur Socii, interdum tamen leges Romanas,

manas, iuris puta priuati, ipsi recepere, si fundi fierent, hoc est ipsi sibi auctores essent; interdum ex magistratibus gestis viri principes, aut etiam totae ciuitates foederatae, modo foedere, modo beneficio et lege P. R. ciuitatem Romanam consequutae sunt; etsi et hoc diuersis iurium gradibus: vt sine suffragii iure aut cum eo, si Romam venissent; cum iure honoris petendi, et sic alia. Ita Tusculanos omnia iura ciuium Romanorum habuisse constat; vt adeo eos binas ciuitates, binas patrias, habuisse dicendum sit. In omnia tamen municipia ius Romanorum erat summum, ita vt delectibus, stipendiis tributisque, quicquid seu in vrbe seu in Italia, post extra Italiam esset, teneretur. At Coloniae etsi ad reip. R. formam et exemplum constitutae et e ciuitate quasi erant propagatae, iura tamen institutaque omnia e lege coloniae et formula, non sui arbitrii, habebant, Romae autem ius nulum nec suffragii nec magistratus petendi aut aliud; iisdem imperatae copiae, stipendia, tributa e SCto.

Quod si Romani fortuna sua vti sciuisent, aut suas opes intra Italiae fines continuissent: satis laeta et florens esse poterat hominum suo cuiusque loco fors et conditio. Id vero maioris quam pro humani ingenii modulo sapientiae et moderationis exemplum minime a Romano expectares. Agris neglecto cultu squalentibus aut in villarum latifundia conuersis, plebe omnium rerum penuria laborante, diuitibus regias opes in pessimam luxuriam effundentibus: vnde seu inopiam seu luxum sustentarent, vt suppeteret, ex aliorum populorum depraedatione

K ;

et

et regnorum latrociniiis quaerebatur. Inde bella continua, extra Italiam gesta, quibus Italia viris opibusque exhausta in solitudinem versa. Exinaniri et expilari orbem terrarum diceres, ut in paucorum potentium domos, quicquid vsquam esset, conquireretur et cumularetur. Socii et Coloniae, delectibus, stipendiis et tributis attritae, non ut suas res augerent, sed ut dominorum suorum avaritiam et libidinem explerent, malorum remedia circumspiciebant. Ea quidem in iure aequo restituendo posita esse facile quisque animaduvertebat. Latini quidem bella gessere cum Romanis, saepius iterata, eaque exitiosa et interneciua, non alia de causa. His tamen maxime annis, quibus res ad bellum Sociale spectabant, omnium populorum et ciuitatum consensus fuit eam in rem, non aliter saluos esse se posse nisi aequato inter omnes ciuitates iure, ut ne essent alii qui imperarent intolerabilia, alii qui imperata facerent, sed ut, quemadmodum labores et discrimina, ita et praemia, essent omnibus communia. Erant e Romanis haud pauci qui iusta peti et intelligerent et faterentur; Italiae enim conditio erat longe tristissima: nam, praeterquam quod, ut diximus, post bella primum cum Romanis gesta, mox Pyrrhi et Annibalis, in singulos fere annos delectibus, stipendiis et tributis imperatis exhausta erat copiis; ager a diuitibus occupatus per seruitia colebatur, quod et tutius et fructuosius erat dominis, imprimis cum illa essent immunia a militia; ita per infrequentiam urbium et agrorum tanto grauius onus deuolutum erat in paucos qui supererant ingenuos, ad eadem imperata praestanda, quae antea, quadru-

quadruplicato hominum numero, aegre sustentari poterant. *b*) Si qui erant, quibus paruus ager esset, ab iis propter inopiam ille non bene coli, alienus autem in tanta seruorum copia conducere haud poterat *c*). Nec tamen tantarum miseriarum et aerumnarum modus qui futurus esset, apparebat;

K 4

nam

b) Multa de reip. Romanae institutis praeclaris praedicari solent: nec refragamur multa praeclare inuenta et excogitata esse in eorum utilitatem, quibus fortuna hoc dedit, ut in imperantium partibus numerentur; enimvero sorge te inter eos fuisse, quibus imperata faciendi fors et conditio contigerat. Si rerum veritatem non opinionem sequendam duxeris, fatendum est, in iis quae ad socia et ad provinciales spectant, Romanos nec arte nec consilio praestitisse Othmanis aut ullo alio barbarorum genere. Nam et Othmanorum haec sapientia fuit, ut ad summam simplicitatem constituerent imperii formulam, utque provinciis tributa imperarent ab initio tolerabilia, quam diu pristina terrarum cultura vigeret: Enimvero, per ipsas rerum vices, multo magis per imperantium socordiam et eorum, qui in provincias cum imperio missi essent, avaritiam et rapinas interdum etiam per temporum necessitatem, attritis et exhaustis provinciis, in solitudine et penuria omnium rerum, exiguntur eadem tributa, quae persolvenda erant opibus hominumque frequentia iisdem affluentibus, plerumque adeo maiora, urgentibus imperiorum necessitatibus. Quo ipso fit, ut, quo diuturnior fuerit servitus, eo sit intolerabilior; ut intra duo vel tria saecula vastities obtineat agros frequentia ac cultura insignes; utque paullo post suo ipsa se gladio ingulet imperium magna opibus subnixum. Inter Praetores Legatosque et Paschas Othmanorum quid discriminis intercedat, nemo facile docuerit. Neque aliter in magnis imperiis unquam res poterunt esse constitutae: mole sua labefactari eas, mox ruere necesse est; nullamque adeo maiorem calamitatem praesentiusque exitium generi humano parari posse, quam magna imperia.

c) De his v. Appian. b. Ciu. p. 605. Plutarch. in Gracch. p. 826.

nath res publicā inter bella aliud ex alio continuata aliter sustentari non poterat, potentium autem census his ipsis latifundiis, quibus Socios aut vis aut necessitas deiecerat, aestimabatur; itaque nec Senatus aut miseratione aut aequitate permotus vnquam succurrendum esse censuisset, nisi priuatorum nonnullorum modo vtilitas modo cupiditas, non Sociorum causa, meliora suasisset. Nam factiosi homines aucto per novos ciues suffragiorum numero se in comitiis regnare posse videbant; implicabatur porro Sociorum postulatis legis agrariae et iudicariae contentio iam inde a Tib. Graccho, multo magis decem annis post a Caio (a. 632. v. c.) ita vt ille id ageret, vt Sociis Latinis, tum Italici nominis, aequae ac ciuibus Romanis ius Romae suffragii ferendi esset *d*); cum interea (a. 629.) M. Fuluius Cos. Socios palam ad ciuitatem petendam concitasset, latis quoque legibus de ciuitate Sociis danda, quibus agri dari non possent. Quibus conatibus Senatus acriter cum obstitisset, de defectione clam inter Socios est agitatum. Consequutum est id, quod per omnes humani generis annales factum videmus, vt ii, quos aliena iniuria, superbia et crudelitas, vt vltima experiri malint, adegit, tanquam scelesti et nefaria ausi poenis suppliciisque coererentur. Oppressae Asculanorum et Fregellanorum coniurationes, antequam consilia satis maturuissent, a L. Opimio Praetore. Exulcerati denuo, temerario consilio, Sociorum animi Lege Licinia Mucia a. 659 de ciuibus regundis, ex qua remissi in suas ciuita-

d) Inpr. Plutarch. l. c. καὶ τοὺς Λατίνους ἐπὶ πάντας (leg. ἐπὶ πάντα) ἐκάλει τῶν Ῥωμαίων etc.

ciuitates qui Romae se pro ciuibus gererent nec ciues essent. Ita tandem malum, quanto aegrius fuerat repressum, tanto maiore erupit impetu a. 663. cum M. Liuius Drusus Trib. pl. vñum id agens, vt Senatui iudicia redderet, grauissimum ratus ad obtinendum id, quod volebat, si plebem sibi deuinciret, primo legem agrariam et frumentariam tulit, mox, vt suffragiis vinceret, Sociis Latini nominis Italicisque populis spem ostendit ciuitatis dandae. Intercepit rogationem mors eius repentina. Ita vero Socii, qui Fuluium, Gracchum, Drusum, suae causae patronos, trucidatos viderant, consilia inter se inire, vim parare, in arma ire. Praecipitauit consilia inimicorum Drusi cupiditas, quorum opera factum, vt vno Scto omnes Drusi leges abolerentur, tum inprobissima lex Varia de maiestate (sub eiusd. a 663. exitum) qua quaerere licebat de iis, quorum opera consilioque Socii contra populum R. arma sumfissent *). Vix quicquam cogitari poterat magis inconsultum, et a temporum ratione et conditione reipublicae magis alienum. Adeo ruebant omnes ad malum exacerbandum, cui fanando iam ante, cum tolerabile esset, nulla reperta erat medela. Interea districtis per internas discordias et iudiciorum metus animis non animaduersum, quam late mali labes manaret quantasque vires fumeret, quas primo glifcente morbo cum aegre sustenturi essent Romani, mox, cum ipso tempore primoque successu inualuissent, ferro flammaque multo minus erant restincturi. Constituta a Sociis

K. 5. noua

*) V. Appian. l. c. p. 632. 3. vbi τῶν τε καὶ τῶν τε εἰργασμένων ἀνδρῶν leg. τὸ τε καὶ εἰργ. (et sic ed. Lipsi.)

noua respublica, cuius caput Corfinium erat nunc Italica dicta; Senatus D. virorum, bini quotannis coff. XII. praetores; administratae res prudenter et vigilanter, acti delectus, coactae pecuniae, curata omnia, quae ad bellum essent necessaria. At Romam cum haec essent nuntiata, alii conatus Sociorum tanquam temerarios irridere, vecordiam hominum et stoliditatem exhibilare, alii truculentis dictis factisque audaciam castigare, rem indignam rati, quod homines, qui adhuc Sociorum nomine habitabant, sibi ciuibus Romanis aequari vellent; alii periculi magnitudinem dissimulando eleuare, vires imperii in maius efferre, Sociorum res contentu deprimere, furorem increpare, inuidiam iis et odia, vndeunque res daret, excitare. Ita missa Roman legatio, superbe accepta, mixtas contentui minas renuntiauit. Non quidem deerant, qui mitiora suaderent, et erant multi e Romanis consanguinei et affines vsuque et necessitudine cum iis iuncti in quos nunc arma erant stringenda; nec ab vero abhorret, quod narratum est, clandestina cum hostibus consilia a nonnullis esse agitata; plerosque tamen metu conticescere, interdum etiam, ne in suspicionem venirent, grauiora quam ceteros statuere videres.

Verum nec moderatiores inter Romanos, etsi intelligebant aequa esse quae postulabantur, vnde iis satis fieri posset, reperiabant. Si, quod petebatur, datum esset: aucto in immensum ciuium numero turbari suffragia factionibus et seditionibus, ruere remp. ad extremam perniciem, praeuidebant.

Sin

Sin negatum: quanta clades et vastatio Italiae, quae calamitates et excidia, etiam earum urbium, quae in fide mansissent, ipsi vrbi quantum discrimen imminebat! concurrere armis cum Romanis populos, iisdem institutis, pari militiae usu et disciplina, nec sciencia rei militaris aut virtute inferiores, numero autem, vt caussa, superiores. Nec tamen aut differre rem aut media consilia sequi licebat, vt alteri detraheretur, quod alter sibi adiici volebat. Omnino rebus semel in praeceptis adductis, qui mediocria suadent, vtrisque partibus sunt suspecti mox exosi. Nec compositis ad tempus rebus succensa iniuriis ac superbia odia aut retundi aut restringi possunt, quin mox recrudescant. Adeo, si semel a iure et aequitate recesseris, frustra circumspicias vestigium, cui recto talo insisti possit.

Cum paratiores ad bellum essent Socii quam Romani, satis aduersa belli primordia his fuere; ipse Cos. P. Rutilius (a. 664) clade accepta ex vulnere decessit; alter L. Iulius, cum feliciter primo pugnasset, insidiis circumuentus ipse aegre fuga est elapsus. Hic successus, et ipsa belli iraeque contagio, mox in armorum societatem traxit alios, alios iuuentutis et vulgi temeritas, alios metus. Repressi tamen Umbri et Etrusci, et arma manibus excussa. Nihilominus tanta erat belli moles, vt altero iam anno Senatus, cum remp. ei sustinendae haud parem esse cerneret, antequam extrema experiretur, concedendum esse ratus, L. Iulium cos. legem ferre iuberet, vt, qui ad eum diem populi per Italiam iura foederis sancta atque inuiolata habuissent, ciues Ro-
mani

mani fierent. Ex hac lege quam tempora expresse-
rant, non aequitas et moderatio, vniuerso Latio
et quibusdam Etruscorum ciuitas data.

Hac Senatus prudentia belli impetus retundi
coepit; nam non modo veteres Socii hoc beneficio
artius fuere deuincti et dubii in fide retenti, verum
etiam qui in armis erant ad spem similis gratiae
erecti *). Nec sequentibus quoque annis melius
remedium malo repertum. Nam statim anno altero
(a. 665.) Lex Plautia Papiria lata a M. Plautio
Silano, C. Papirio Carbone Tribb. pl. qua cautum,
vt, qui foederatis ciuitatibus adscripti essent, et, cum
haec lex ferretur, in Italia domicilium haberent, si
LX. diebus apud Praetorem nomen profiterentur,
ii ciues Romani optimo iure essent.

Interea bellum non modo continuatum, ve-
rum, vt fit, omni crudelitatis et faeuitiae genere
exacerbatum; clades vltro citroque illatae et accep-
tae; recepti in fidem a Romanis Peligni, Vestini,
Marfi; Asculum a Cn. Pompeio Strabone Cos. (665.)
vi captum, in captos summa cum immanitate fae-
vitum. Alia ex parte mutua fraude et dolo multa
vtrinque vulnera inflicta; malignitate et odio atro-
ciora etiam, quam quae fiebant, nuntiata; incusata
improbilas hostium, dum, quae ab amicis, etsi fla-
gitiosissime, facta essent, non excusabantur modo,
verum, tanquam praeclare administrata, laudibus
efferebantur. Romani praecipuam operam id da-
bant, vt passim per ciuitates discordias ac factiones
princi-

*) Appian. l. c. p. 649.

principum fererent ac fouerent; proditione, perfidia, infidiis, iidem non minora exequabantur, quam armis; at detectis seu euentu seu proditorum leuitate consiliis fama eorum non minus laborare coepit quam fides; qua semel amissa nihil quicquam vlli regno satis fidum ac tutum esse potest. Nunc tandem, quod diu expectaueras, Socii auxilia externa circumspicere; missi legati ad Mithridatem imperio Romano tum imminentem, et foedus petitum. Sane nimis longinquum erat iter, multis populis et terris interiectis, quam vt in Italiam copias adducere liceret; sed, dum bellum in Asia mouebatur, satis id ad destinandas Romanas vires et abstrahendas ab Italia visum. Nec euentus regem fefellit.

Infregit bellantium studia Sullae aduersus Mithridatem profectio. Sustinebant tamen bellum adhuc Samnites et Lucani cumque his aliae Italicorum populorum reliquiae. Iterum grauius exarsit incendium primo Sulpicii, tum Cinnae conatibus, qui (a. 667.) Capuam profectus Latinos excitauit ad rebellandum. Senatus, Sulla absente cum exercitu, praesidium suis rebus aduersus Cinnam et Marium, quem is ad se aduocauerat, nullum superesse videns, edixit, vt Italicis omnibus, modo arma posuissent, ciuitas daretur. Acceptum beneficium a Lucanis. Samnites et hoc et maioribus praemiis alleetos in suas partes traxit Cinna. Ita potentium discordiae et seditiones, bello Sociorum per aliquod tempus sopitae, ex hoc ipso bello mox nouarum barbarum alimenta petiere, exercitusque inde comparati, quibus in mutuam perniciem concurrere pos-

posset *). Sulla rebus cum Mithridate compositis Italiam ingressus (a. 672.) cum Italicis populis, ne timeretur ab iis, velut erepturus ciuitatem et suffragii ius nuper datum, foedus percussit **). Implicata inde mutuis cladibus belli ciuile Italia, et excidiis, direptionibus, vastationibus, deleti Italici, seu victrices seu victas partes essent sequuti. Mox Sulla victor ademit plerisque ciuitatibus ciuitatem et agros, vt haberet quos assignaret militibus; deductae coloniae militares XXIII. iisque agri diuisi. Ita ius aequum Sociis negatum excidium ipsis et Romanorum libertati diem extremum attulit ***).

Quae adhuc de bello Sociali narrata sunt si quis animo reputet, is intelliget, non tam dedecori quam gloriae et laudi Britannis esse, quod Coloniatarum conatibus tam diu resistere, et septimo demum anno concessere id, quod Romani tanto maioribus opibus instructi vix in tertium annum distulere. Quid enim? an postulari poterat, vt cum prima statim compellatione de iure suo decederet Britannus? et, si facere ac manus victas confestim

*) Est hoc illud, quod Appian. p. 629. ληγων δε και οδε στασεις τε αλλας και στραρχας δυνατωτερους ανεθρεψε. cf. de Cinna Vellei. II, 20.

**) Liv. epit. 86.

***) Bene hinc Vellei. II, 17. Italico bello, quo quidem Romani victis adflitisque ipsi exarmati (iego ex-armari) quam integris vninerfis ciuitatem dare maluerunt.

festim dare voluisset, annon muliebrem ignauiam et pauorem omnes clam palamque incusassent? annon pro virtutis, fortitudinis, constantiae laude, quae vel victis solatio esse potest, et cuius ad populorum salutem, incolumitatem et dignitatem, tam magna vis est, quaque pop. Britannicus nunc cum maxime floret, inter imbelles et paratam iugo cervicem ostendentes populos annumeratus esset? Nunc tantum abest, ut iudicium totius Europae de se vlla indecore gesta re labefactarit, ut potius illorum ipsorum, quibus concedendum fuit, quod negabatur, memoriae tot et tanta fortitudinis et perseuerantiae documenta infixerit, ut in sua fortuna illi lubenter acquiescant. Romani quidem minorem, quam expectares, sapientiae suae fructum abstulere, quoniam intestinis discordiis, paucorum opibus et potentia, et grauiore per omnia grassante peste luxu eiusque comite auaritia, nihil sani in ciuitate erat relictum; ad bellum ciuile res spectabant; eodem mox insequuto omnia pessundata, nec quicquam ex superiore tempore remansit praeterquam vitia hominum et reipublicae.

Quo luxu, qua mollitie, quo otio, magnae ciuitates pereunt, eodem, Commilitones, non minus singulorum hominum fortunas, animi ingenii-que non minus quam corporis vires, spes et vota parentum patriaeque, perire arbitraminor. Ut nulla resp. diu eodem loco stare potest, quae cupiditatum et lubricum illecebris et irritamentis abundat, contra omnis hominum virtus a continentia, frugalitate, temperantia, laborum tolerantia proficiscitur:

ciscitur: ita nec litterarum incrementa virtutumue firmamenta vlla esse possunt satis magna, vbi deliciis, otio, desidia, languore, mollitie, animum infecimus; salus itaque et prosperitas Academiarum non minus quam rerump. in disciplina publice privatimque bene constituta et administrata cernitur; quae vt seuerè vigilanterque adhibeatur, non magis reip. quam singulorum interest, si modo consequi id, cuius causa ad nos confluitis, volueritis. Obsequium itaque nullum graue et durum arbitramur, quod legibus, et magistratibus e lege agentibus, habetur. Quin amore et caritate rependimus curas paternas, vigilias, sollicitudines eorum, qui, vt nobis bene sit, haud raro melius, quam nosmet ipsi in nos statueramus, laborant. Haec praestabitis, Commilitones, viris, alteri nunc magistratu academico decedenti, alteri eundem nunc ineunti. Habebuntur ei rei die crastino solita sollennia, et adibit magistratum Vir venerabilis, cuius bene de vobis merentis voluntatem et caritatem vel ex verbis loco sacro ad vos factis perspectam habetis,

IO. BENI. KOPPE,

ducetur in templum academicum pompa, habitisque ex more orationibus praestitoque iureiurando transferentur in eum noui honoris ornamenta et insignia. Quod vt vobis fiat fauentibus et bona vota facientibus, hoc est, quod a Te, Princeps Serenissime, a vobisque, Comites Illustrissimi, pro vestra facilitate precibus nostris haud aegre impetrabimus;

neque

neque vestra suffragatione destitutos nos videbimus,
Commilitones, generis et ingenii nobilitate suo
quisque loco commendatissimi, et dabitis hoc pre-
cibus nostris, quas nunc cum maxime adhibemus,
ut frequentia vestra, favore, studio, obsequii vestri
et amoris tanquam arrham et pignus habeamus cer-
tissimum ac fidissimum. PP. Kal. Iul. cIdIdccclxxxiii.

X.

ACADEMIAE GEORGIAE AVGVSTAE
 PRORECTOR
 IO. BENIAMIN. KOPPE
 CVM SENATV
 ANNIVERSARIA INAUGVRATIONIS
 SACRA XXXVI.

IN A. D. XVIII. SEPTEMBR. c[1]o[c]cclxxxiii.

RITE INDICIT.

*Foederatarum rerumpublicarum coalitio vix vnquam
 satis fida exemplis ex antiquitate illustratur.*

Nata ex tempore, coeuntibus in remp. foederatam
 prouinciis Americanis, Commentatio.

Cum multae ac variae res sint, Commilitones, a quibus repetendae sunt caussae, cur res publicae in eam, qua vtuntur, formam coaluerint; tempora, locorum situs, metus ab externis, rationes domesticae, prudentia, temeritas, casus ac fortuna; earum rerum publicarum, quae plures numero in commune foedus coeunt, et tanquam in eandem ciuitatem, etsi non iisdem moenibus inclusam, inque vnum corpus imperiumque consociantur, causa vix alia esse solet ac potest, quam vt, quod robur non habent singulae, id nanciscantur vniuersae in
 vnum

vnum corpus collectae. Nec vero esse potest quicquam prudentiae et sensus communis rationibus magis consentaneum; animaduersa quoque rei utilitas per omnia tempora. Sed plerumque instituta fuit illa confociatio tantum ad belli casus; pauciora sunt exempla similis foederis in pacis quoque tempus initi, ad constituendam vnam remp. communem. Hoc tamen alterum genus vnice illud est quod nomine suo dignum habendum sit, quodque habere videtur utilitates tam eximias ac praeclaras, vt inter ceteras humani generis in societatem conveniendi rationes et forma illa inprimis eninere putanda sit. Cadere haec videntur inprimis in *ciuitatum seu rerump. liberarum confociationes*. Cum enim in his in iuris aequalitate *a)* libertas sita sit, nec vero illa nisi in exiguis opibus, vitae simplicitate, morumque seueritate, adeoque in ciuitatibus esse possit, quarum fines, viri, copiae sint modicae; eas autem carere necesse sit iis opibus, quibus ad externos incursus et iniurias propulsandas opus est: foederatae resp. vtrumque consequi videri debent, vt et libertate fruantur et viribus opibusque satis magnis. Ita et singulorum capitum libertatis naturalis quam minima portio detrahitur: et id quod detractum est, siue animi illud ac corporis viribus seu fortunarum expensis praestandum sit, ex reip. utilitate et salute descriptum et circumscriptum est; pericula seu communia seu singulorum depelluntur periculis communiter ac mutuo susceptis; si in singulis ciuitatibus aut aliunde extiterit, qui

L 2

liber-

a) ἰσχυροῦς; ἰσονοῦς. Aliud reip. genus constituebat conuentus Amphictyonum.

libertati infidietur, communibus ille viribus opprimitur; omninoque tolluntur coniunctis mutisque operis aut minuuntur mala, quibus nec vita nec societas humani generis vacare potest, bonorum contra intercurfus est liberrimus. Cum his ipsis tamen bonis, nisi diuina aliqua sapientia in constituendo foedere, aut singularis situs opportunitas contigerit, vix aliud est reipublicae genus, quod magis instabile, incertum ac precarium sit, siue ad res internas ac domesticas siue ad externam vim, cui occurrendum sit, respexeris. Laxat copulata ipsum tempus; inprimis ubi tempora inciderint, in quibus collectis totius reip. viribus ad repentinos casus opus est, cum res in praecipiti constitutae sunt et momento interdum summa rerum inclinatur: tum consiliorum et deliberationum lentitudo, discordiae, vtilitatum priuatarum aut singularum ciuitatum respectus, rebus gerendis moras iniiciunt exitiosas: quae forte aliquando magnorum virorum ingeniis et consiliis superari potuere: enimvero post longae pacis fructum, in rerum bonarum copia, luxu emollitis animis, virorum magnorum seges felix vix vnquam fuit; deficit quoque in multitudine ardor ille, quem interdum furorem dixeris, quo in libertate paranda inflammati erant animi; otio et luxu ad inertiam prolapsa sunt omnia; militiae honor nullus, praemia nulla; itaque nec virtus, nec disciplina; de sua vtilitate sollicitudo cuiusque maior quam de salute communi; inprimis vero vitia haec reip. in apicem proueniunt, cum tributa, multo magis si solito forte grauiora conferenda, militesque alendi et mittendi

mittendi sunt: ad hunc scopulum illud rerump. genus plerumque fortunarum naufragium facit; tum de suis opibus partem in publicam vtilitatem concedere tanto facilius vnus quisque recusat, quo magis libertatis praetexto nomine celare potest refractionem; nec tamen resp. habet vim eminentiorem, qua ad cogendum opus est, vt, quae publice salubria sunt, curentur ab omnibus et in tempore; abit libertas in licentiam, et haec in anarchiam; ex hac quid sequatur facile praeuideri potest. Agitant interea ciuitates cum publice tum priuatim discordiae, odia, dissidia intestina, obiurgationes et inculpationes mutuae; dum onus reip. sustentandae vnaquaeque ciuitas in aliam transfert, vtilitates sibi soli seruat; ita aliorum segnitie et cunctatione aliorum retunduntur studia; soluitur foederis vis et natura. Elabuntur inter haec tempora agendi, succedunt minus opportuna alia, inde in rebus agendis modo inertia, torpor, socordia, modo consilia remissa, alio tempore tumultuaria, decreta praepostera, pleraque, etiam salutaria, alieno loco ac tempore acta; vbi totis viribus discrimini occurrendum erat, inprimis in rerum initiis, id quod exitiosissimum est, pauciores copiae in bellum missae; deficit vbique rerum gerendarum neruus, animorum virtus, copiarum apparatus, in vnum ductum et imperium consensus.

Potest quidem consiliis prudentibus occurri aliqua ex parte malis his, maxime in ipso reip. foedere conscribendo; si potestas cum legum ferendarum, tum consiliorum exsequendorum (veteres *ma-*

gistratum appellabant) sapienter sit descripta, et haec senatus magistratusque vis satis virium et opum ad res iusto tempore et ordine administrandas et ad cogendum, ubi necessitas legem facit, habeat; in primis vero si in morum disciplina severitas vitaeque simplicitas seruetur; hac enim semel sublata ad interitum properat quaevis resp. multo magis foederata, cuius salus fide fiduciaque mutua et iustitia continetur, quae esse potest nulla, ubi semel ad se trahere quisque omnia coeperit; ad bella gerenda omnino ea resp. penitus inepta est; dum pace et otio viuitur, flagrant odia, invidiae, suspiciones, dum metus est, ne nimis magnae opes singulis credantur, potentiam tamen omnes appetunt; ex ipsa felicitate publica, multo magis ex rerum mercaturis et ex navigatione, si copiae et diuitiae creuerunt, succedit luxus, eoque fractis animis corruptisque moribus virtus domi extinguitur, auctoritas foris obscuratur. Interea externa regna ad utilitatem suam hoc referunt, ut discordias alant, dolis atque fallaciis, quae sana sunt, corrumpant; ita eas resp. aut fraude aut vi dissolui necesse est. Omnino videndum est diligenter, ne externa regna reip. negotiis se immisceant: horum enim amicitiae insidiosae multo magis, quam odia aperta, metuenda sunt. Sunt alia, quae per tempora, per locorum situs, per vicinorum ac finitimorum populorum seu stulta seu sapientia consilia emendari possunt: nulla tamen sapientia humana omnia satis expedit.

Fuere inter veteres (vtamur enim antiquitatis auctoritate, quando quidem hoc tutius et salubrius est)

est) foederatae respublicae plures, sed nulla sapientius et prudentius instituta quam *Achaeorum*: nata illa temporibus Graeciae florentissimis, cum reipublicae instituendae rationes a viris sapientissimis, et in ipsis rebus gerendis constitutis, multo magis quam nostris temporibus; essent inspectae et exploratae; nam in vetere Graecorum sapientia nihil diligentius confideratum fuit quam rerum publicarum et legum constituendarum ratio; nec tamen illa resp. per longum temporis spatium floruisse videri debet. b) Non ignoramus, quot quantisque laudibus extulerint eam Graeci scriptores, inprimis Polybius: c)

L 4

nec

b) Per CXXXVI. annos resp. Achaeorum floruisse fertur; enimvero hoc est annos numerare, non res expendere. Nam primum tricesimo demum anno aliquod robur nata est; vix decem anni exierant, cum aliud ex alio bellum eam excepit, raris victoriis, cladibus frequentibus; LX. aliis annis inter haec exactis, cum Sparta vi ad foedus suum adacta, sibi viderentur votorum summam consequuti Achaei, successit Romanorum superbia, fraus et astutia, quae per L. fere annos turbis ac dissidiis ciuitatis foedus labefactauit, mox dissoluit, tandem totam remp. euertit; ita vt vix X. annos commemorare possis, quibus resp. Achaeorum vere floruisse dicenda sit, L. vero anni in tristissima reip. conditione sint exacti.

c) Facta videtur tanta huius reip. Achaeorum praedicatio, primum ex comparatione cum aliarum rerump. per Graeciam statu, quae non coire solebant in foedus nisi belli aut faciendi aut depellendi causa; tum Polybius studio et admiratione Arati, Philopoemenis et Lycortae, inflammatus ad foederis concelebrationem transtulit celebritatem et laudem virorum, qui de eo sane praeclare fuerant meriti, maiora tamen de eo mereri frustra tentauerant. Sequitur porro Polybius Arati commentarios, (v. II, 40.) quem de se suisque consiliis non male tradidisse facile intelligas. Diuersa tamen de ipso

nec inficiamur *magna et praeclara eius reip. fuisse bona, prouisum etiam esse malis nonnullis*, quae id rerump. genus premere solent. Si tamen summam rerum ad calculos reuoces, *non maiorem felicitatem aut singulorum aut ciuitatum singularum*, quam in aliis imperiis, *nec diuturniorem fuisse*, vel inuito fatendum est. Haec quidem, Commilitones, *declarata dabimus ipsis rerum argumentis.*

Coierant igitur Achaei in foedus commune et in remp. confociatione plurium ciuitatum suis legibus iuribusque vtentium coniunctam ea conditione, vt eadem iuris aequalitate nouis aliarum vrbium accessionibus locus esset; etsi res exitum non habuit, vt, quod spectatum et in votis habitum, tota Peloponnesus vna rep. foederata comprehensa esset: quo factum esset, vt mari vndique clausae terrae communi foedere iunctae neminem suae ceruici imminentem habuissent. Itaque ea, quae in simili foedere sunt aut esse possunt, in illo fuere omnia; erat summa *iuris aequalitas. cum singulorum libertate, et in populari statu optime constituto; nec modo legibus iisdem, verum etiam ponderibus, mensuris, pecunia denique eadem utebantur* (Polyb. II, 37.) cc) interea
singulae

ipso Arato tradiderat Phylarchus (in *ιστορίαις* libris, quos numero XXXVIII. condiderat, res inde a Pyrrhi expeditione in Peloponnesum Ol. CXXVII, 1. a. C. 270 vsque ad Ol. CXXXIX, 4. a. C. 221. adeoque L. annis complexus) quem sequitur Plutarch. in Cleomene p. 811. sqq. quod assequi licet inprimis si pag. 815. B. compares; at Polybius eum cupide refellere studet lib. II, 55. 56-63.

- cc) Declarata numerorum aequalitas per monogramma. Magnum autem hoc foederis firmamentum esse debuit,
cum

singulae ciuitates de suis rebus *ex suis legibus* consiliisque statuebant, dum de iis, quae ad *communem temp.* spectabant, *concilio communi* agebatur; eo missi de singulis ciuitatibus delecti, quorum suffragiis creati magistratus iique annui, primo duo, mox vnus *strategus* dictus seu praetor, *ὀπτεύθωνος* ille ipsi concilio; vt delecti suis ciuitatibus; additus *scriba*; affidebant *X. damiurgi*; hos putandum est constituisse cum Praetore senatum perpetuum ac confessum, (*Consilium status*) a quo reip. summa administrabatur; exsequendorum quoque consiliorum et decretorum negotium et cura eidem mandata cum magistratu. Ad concilium summa rerum redibat; itaque de legibus ferendis, bello, pace, foederibus, legationibus arbitrium penes illud; nec tamen hoc nisi *bis in annum* statuto tempore, extra ordinem quoties praetor temporum necessitatem ita postulare iudicabat, conuocari solitum; quod antequam fieret, cum *συναρχόντων* consilio, qui iidem cum damiurgis habendi, *praetor de rebus in concilio agendis praeconsultabat*, d) nec de iis, nisi in id pars maior consentiret, licebat ad concilium referre. Sunt autem praeclara huius reip. instituta multa; e quibus nonnulla saltem in medium afferemus. e)

L 5

Itaque

cum aliae vrbes suis tantum numis vterentur, ac plerumque aliarum vrbiū numos respuerent ac *κίβδηλους* pronuntiarent: quae res commerciis et mercatibus infestissima esse debuit, et foenori, ex numorum permutatione et collybo, imprimis locum dedit. cf. Beyer in Comment. acad. Petrop. To. V. p. 364.

d) v. c. Exc. Legat. c. 52. *συναρχίαι* sunt c. 63.

e) Videas ea, auctoritatibus suis parum suffulta, apud Emmium de rep. Achaeor. p. 573. Schook, Achaia vetus To. V. Thes. Gronon.

Itaque vetitum lege, *ne cui exterae gentis legatio concilium daretur, nisi editis prius mandatis scriptis, per quae ante appareret, cuius rei causa concilium postularetur; f) ne quisquam munus a rege missum acciperet. g)* Inprimis vero illud memorabile, *quod ultra diem tertium concilium gentis (extra ordinem habitum) protrahere non licebat, eo utique die decretum fieri necesse; ne disceptationibus tempus consumeretur. h)* Erant etiam nonnulla, quae fors offerebat, ad sustentandam rem Achaeorum valde utilia: quod ipse Peloponnesi positus eorum res et curas seiungebat ab aliis; acuebat eorum virtutem, quod primis statim annis Spartani, tum Aetoli et Macedones, immincebant; et contigerant ipsis viri aliquot magnis animorum ingeniorumque viribus insignes (Polyb. II, 40.) Cum his ipsis tamen coniuncta erant semina malorum, quae in remp. erupere clademque multiplicem intulere. i)

Primum

f) Paus. VII, 9. Polyb. Exc. Leg. c. 41. p. 624.

g) Exc. Legat. c. 41. p. 618. sq.

h) Liv. XXXII, 22. Praetereo ea, quae ipsa reip. foederatae natura postulabat. Ita inter leges foederis erat, *ne cui Achaici concilii civitati seorsum legatos ad exteram gentem mittere liceret* Paus. VII, 9. p. 544. *ne cui de foedere recedere liceret.* Exc. Legat. c. 51. p. 645. *nec admitti civitatem ad concilium gentis nisi consensu omnium.* In concilio, *ut per praetorem suadendi, si quis vellet, potestas a magistratibus daretur.* Liv. XXXII, 20.

i) Utinam integrum haberemus Polybium, qui ex ea gente oriundus ipse rebus agendis interfuit, et omnia diligentissime exposuerat: ita haberent resp. foederatae tanquam in exemplo aut in tabula proposita. quae maxime fugienda ac timenda sibi intelligerent.

Primum illud male cecidit, quod non tota Peloponnesus in societatem reip. pertrahi potuit; frustra id tentante Arato; *k*) vnde odia, simultates, bella perpetua. Erant Spartani, tum Arcades, Elienses, Messenii, qui in corpus Peloponnesium redigi volebant; inter hos Spartani Achaeis infestissimi; in quos Aratus cum consilium exsequi vellet, Spartanorum arma in Achaeos concitavit; factis aliquot praeliis, Arato ubique rem infeliciter gerente, Aetolis alia ex parte imminentibus, Achaeorum resp. in summum discrimen fuit adducta. Potuisset tamen inter Achaeos et Cleomenem convenire, cum hic aequa postularet, vna hac conditione pacis proposita, ut sibi ab Achaeis principatus deferretur: (Plut. Cleom. p. 811. B. C.) Hic vero Aratus, quam per tot annos tenuerat auctoritatem inter Achiuos manu sua elapsuram praevidens, partim invidia et odio Cleomenis, primum detertere Achiuos et a foedere prohibere annisus, mox rem aggressus est perniciosissimam, ut ad firmandas reip. partes Macedones et Antigoni in Peloponnesum arcefferet, Cleomenem autem exasperaret, ne ad concordiam res adducerentur. (Plut. Arat. p. 1045. Cleom. p. 811.) Quod consilium cum quocunque alio tempore, necessitate ultima urgente, periculosum habendum esset: (quippe cum non socium adsci-

k) Plutarch. Cleom. p. 860. B. vnde non persudendo modo, verum et vim adhibendo, foedus creuisse ait Polyb. II, 38. IV. 1. Minus tuta utique habenda est ea resp. foederata, cui et a tergo imminet provincia aliena, et litus protenditur immensum ab externo hoste pluribus locis aditu facile, externis regibus liberati aut vi aut dolo insidiantibus.

adsciscere sed dominum sibi imponere videri deberent Achaei; nam, vt Macedones Achaeorum vires augerent, expectari non poterat) hoc tamen tempore longe exitiosissimum erat, quandoquidem precibus Achaeorum exoratus Antigonus conditionem tulit, pactusque est, vt Acrocorinthus, qua sibi aditus liber ad Peloponnesum esset, redderetur; ita acceptum est iugum regium; et apparuit exemplo hoc, quam misera sit rerump. foederatarum conditio in hoc, quod vnus hominis potentia et auctoritate florentis obtreptione et peruicacia optima consilia interuerti, pessima praeferri possunt.

Declaratus inde Macedo omnium sociorum dux; (Polyb. II, 54.) ita administrata omnia, quae ad bellum spectarent, ad eius nutum et imperium; qui autem semel consequutus est hoc, ei facile est in rep. adipisci reliqua omnia, quae auctoritatem et potentiam continere possunt. Imperatum nunc a rege, quando et quo copiarum numero adesse deberent Achaei (Polyb. IV, 67.). Melior inde belli fortuna obtigit: ad Sellasiam ingenti cum clade victus Cleomenes. Omnino, id quod in rep. foederata facile expectes, Achaeorum res bellica, nisi forte vno vel altero tempore, pro ingenio ac virtute praetorum, qui praecessent, non optime constituta fuisse videtur. Quoties Aratus copias eduxit, male res administratae sunt, partim in consiliis excogitandis tarditate, partim in exsequendis timiditate et cunctatione; (Polyb. IV, 8.) ad eum tamen belli gerendi vices plerumque rediere. Ita paullo post

post (Ol. CXXXIX, 4. V. C. 533.) bello Aetolico per Aetolorum depredationes Messeniae concitato, cum Timoxenus, eius anni strategus, alieno esset a re periclitanda animo, Aratus quinque diebus maturius magistratum ingressus, aduersus Aetolos populabundos copias duxit, foeda tamen clade accepta rediit. Iam sub hanc expeditionem, florentissimis utique reip. rebus, Polybius causam, cur Timoxenus ductum copiarum subterfugeret, interponit hanc: *quod parum Achaeis fidebat, propterea quod illa tempestate admodum negligenter Achaei in armis erant exercitati*: ab eo inde tempore, quo Cleomenes eos fuga sua tutos a discrimine reddiderat, *partim superioribus bellis fessi, partim duraturum praesentem statum confisi, omnem rei bellicae curam contentui habuerant* (Polyb. IV, 7. p. 440.) Scilicet *alienis manibus se protegi putantes ac sub Macedonum armis latentes per socordiam et inertiam vitam agebant*: (Plutarch. Arat. p. 1049. B.) qua ipsa re ab Aetolis despectui habiti iniuriis lacessiti sunt. Re, ut diximus, ab Arato iterum male gesta, factionum clamoribus, iris et odiis, omnia strepere; (Polyb. IV, 14.) tandem Achaei iterum Macedones et Philippum regem respicere; legatis tamen ultro citoque missis de iniuriis Aetolorum vlciscendis expeditum nihil, sed decretum, ut pax cum Aetolis seruaretur. (ibid. c. 16.) Hancne reip. conditionem quisquam praeclaram ac beatam iudicabit? Aetoli hae ipsa Achaeorum ignauia inuitati nouis eos iniuriis lacessiuere. Exacerbatis ita animis in concilio communi a Philippo et Achaeis bellum in Aetolos decernitur. (Ol. CXL, 1.) Iam quae sub
huius

huius belli initia narrata videas, omnia eiusmodi sunt, vt in rep. foederata rem administrari intelligas. Nam primo Messenii, quorum causam Achaei susceperant, declinare pericula et malle quiete agere; (Polyb. IV, 32-36.) Epirotae tum se bellum indicare velle Aetolis significarunt, quando Philippum arma mouisse vidissent. Interea Aetoli, pertractis in belli societatem Lacedaemoniis et Eleis, oras Achaeorum praedari, castella expugnare. Verum belli euentus commemorare non possumus: sufficit nonnulla afferre, quae ad reip. conditionem cognoscendam vim habere possunt. Itaque apud Polybium (IV, 60) Aratus *ne quidem mercenarium militem conscribere poterat, quod belli Cleomenici tempore partem aliquam stipendiorum Achaei conduxitio militi non persoluerant.* (Quid futurum putabimus in ea rep. foederata, quae ne quidem suis ciuibus, qui ipsis suo sanguine libertatem pepererunt, stipendia et praemia bona fide persoluit?). Interea *Dymaei, Pharaenses et Tritacenses, ubi de auxilio a praetore mittendo desperare coeperunt, communi consilio decreuerunt, nihil amplius in commune Achaeis contribuere:* (iusta indignatio, pestilentissimum tamen consilium!) *sed priuatim sibi milites mercede conducere, quorum praesidio fines suos tutarentur.* Qui cum hoc fecerunt, suis illi quidem priuatis commodis non male existimati sunt consuluisse; publicae vero utilitati omnium Achaeorum pessime. Nouum malum accessit Apelles, regis Philippi dux et amicus, qui, seu consilio seu cupiditate, machinari, vt in subditorum regno Macedonico ordinem redigeret Achaeos; (ibid c. 76.) maligne obtrectando et accusando animum regis ab

Arato

Arato abalienare (c. 82-5). Effectum, vt in annum sequentem crearetur praetor Eparatus, *natura inhabilis ad res agendas et ab omnibus vituperari solitus ita ut omnes eius imperiis parere recusarent.* (V. 1. et 30.) Mox idem Apelles communia belli consilia fraude et proditione interuertere non dubitauit. Conuentu Achaeorum habito, rege praesente, decretum est ab Achaeis, *numeratis extemplo talentis L. trimestre stipendium militi diuidere, et hoc amplius X. M. modium adiicere; in posterum vero, quamdiu in Peloponneso praesens ipse bellum gereret, ut mensura talenta ab Achaeis XVII. acciperet* (Polyb. V, 1). Eo igitur iam tum res erant adductae, vt non suo milite rem gererent, sed alienis armis se defenderent, ne quidem mercenariis conductis bellum facerent, sed regi stipendia persoluerent. Enimuero inter haec nascebantur *difficultates conferendorum tributorum; exhaustae bellis et vexatae depredationibus Aetolorum nec defensae urbes cum aegre admodum ea penderent, stipendia, prorogari nec sua die praestari solita, fecere, ut omnia quotidie in peius ruerent: nihil suo tempore curari, nihil recte agi potuit.* (V. 30). Videamus nunc belli exitum. Nuntiata Romanorum clade ad Cannas Philippus ad res Italiae erectus bellum cum Aetolis abiicere statuit, idque *ne expectatis quidem Achaeorum legatis, qui communibus suffragiis conventionis negotium curarent; sed extemplo Cleonicum Naupactium ad Aetolos misit.* (c. 102.) Conuentum facile est in pacem, (Ol. CXL, 3.) quam omnes lubenter amplectebantur, ea conditione, vt quae iam tenerent, vtrique seruarent. Ita Achaei, cum iniuriis, quibus prouocati bellum cum Aetolis fecerant,

fecerant, nihil praeter damna, clades nouasque iniurias, ex bello reportarunt.

Vix recreati pace Achaei, iterum infestos habuerunt Aetolos, foedere cum Romanis icto feroces et aduentu Romanorum et Attali regis elatos. (Ol. CXLII, 2) Ab altera parte Machanidas Lacedaemoniorum tyrannus imminebat. Inter haec Philopoemen praetor creatus (Ol. CXLIII, 2. a. C. 207.) remp. labantem restituit. Is rem militarem emendare aggressus, primo quidem ordinum et armaturae vitia correxit, (qua de re v. Plutarch. in Philopoem. p. 360. E. Paus. VIII, 50.) luxum delicias sumtumque a vestibis mensisque ad arma conuertit (Polyb. XI, 7. 8.), vrbes circumiuit, animos firmavit, dilectus egit, inde copias aduersus Machanidam duxit, eumque vicit ad Mantineam. Tandem in pacem consensum est ab omnibus Ol. CXLIII, 4. V. C. 549.

Grauius discrimen imminebat Achaeis, bello a Romanis in Philippum suscepto (V. C. 555.). Cum concilium haberetur, legatis et Romanorum et Philippi Achaeos in suas partes trahentibus, altero die, potestate suadendi dissuadendique facta, primum nemo quae sentiret dicere ausus, cum Aristaeus praetor ipse tandem orationem habuisset, *iam non singuli tantum, sed populi uniuersi inter se altercabantur, tum inter magistratus gentis (damiurgos vocant, decem numero creantur) certamen nihilo segnus, quam inter multitudinem esse: vt verbo absoluiamus, cum essent ex aduersantibus qui confurgerent et concilium*

lium relinquerent, aegre decreta est societas cum Romanis atque ita introducta pestis illa, qua deinceps afflata et corrupta Graecia omnis contabuit. 1) Victo Philippo et reddita Graecis libertate, specioso ad auditum nomine, successit bellum Achaeorum cum Nabide tyranno Lacedaemoniorum, quo caeso Sparta in foederis communitatem recepta est, mox disiuncta; nam ab hoc inde tempore nata sunt fraudulenta Romanorum consilia, ut Achaeorum opes deprimerent. Longum esset commemorare ea quae sequuta sunt: discordiae inter Achaeos fuere internae perpetuae, dissidia ex dissidiis nata, Romanis factiones studiose fomentibus, qui palam iam Achaeis denuntiabant, sine auctoritate sua ne quid gererent; de controuersis apud se, aut potius e voluntate sua, ut disceptaretur. (Liv. XXXVIII, 30. 34 XXXIX, 33. 37. 48.) Ita ne aequo quidem iure ea disceptatio facta, sed seruorum loco habiti sunt, qui dominorum iussa acciperent (Liv. XXXIX, 37. Polyb. Exc. Leg. 51). Accessit proditoris Callicratis infamis perfidia, qui, ut aduersam factionem opprimeret, Senatum Rom. speciosa oratione incendit, iactitando, pacatum Achaiae statum fore nullum, nisi Romani dicto audientes Achaeos esse iuberent (Polyb. ibid. 58.) Ita tandem ad apertum bellum res deductae, cuius infestum Achaeis exitum commemorare nihil attinet.

Quae

1) V. Liv. XXXII, 22. v. Iac. Gothofredi Or. Achaica Opusc. p. 86.

Quae cum ita sint, tantum non vana habenda esse videtur praedicatio foederis Achaici; quod saltem habuit communem fortunam ceterarum formarum, ad quas describi possunt ac solent populi: in quamcumque tandem societatem ac rempublicam coeant homines, omnium formarum et bona et mala sunt; alia ex ipsa rerum natura profecta, alia a causis externis, quae in nullius mortalis manu positae sunt, illata aut arcessita. Poterant Achaei feliciter res suas gerere, si pace perpetua et securitate ab externo hoste frui, sique nullos Spartanos * finibus imminentes habere contigisset.

Vix per id, quod aut huic scriptioni superest spatii, aut scribenti otii, satis disertis esse possumus in commemorandis aliis rebusp. foederatis; quarum tamen nulla, nisi *Lyciorum*, (Strab. XIV. p. 980.) institutis et legibus cum rep. Achaeorum fuit comparanda.

Aetoli quidem ad Achaeorum exemplum rerump. confociationem et ipsi instituerant: conuentum annuum, Panaetolium dictum, magistratum annuum, additum ei Senatum, apocletos apellabant, omnia eodem exemplo; enimvero animis ingeniisque ipsi valde diuersi ab Achaeis; per agros ac vicos sparsi ex alienis raptis viuere malebant quam ex agris suis; itaque praedari, bella et incursiones circumspicere, (Polyb. IV, 3.) ex aliena iniuria crescere. (II, 43.) Inde ingeniorum ferocia, consiliorum violentia, cum mira interdum astutia, nullus iustitiae respectus. Vim animis indebat corporum robur, venando et palando per agros indurescentium. Neque adeo animorum facile concordia nisi ad aliorum deprae-

depraedationes; ita ingenia turbida ac temeraria in consilia praecipitia ferri solita breui tempore perdidērunt. Cum semel societatem Romanorum acceperant, nullo alio consilio quam ut in Aethiopes, Macedones, ceterosque, tanto licentius iniuriis grassarentur: eventu rerum et exemplo suo docuerunt, eos, qui suae utilitati cum aliorum iniuriis consulunt, ne eorum quidem, qui inde commodum capiunt, gratia et fide satis confidere posse.

Fuit et *Borotorum* resp. foederata, sed haec non magis quam aliorum Graecorum ad alios, quam bellicos usus, descripta. Extra Graeciam *Iones* fuere, quorum quidem quae coloniae in Asiam ductae, quibus urbibus habitarent, quae eorum fortuna fuerit, dicere nunc nihil attinet, et possunt ea cognosci e Pausan. VII. capp. prior. Strab. XIV pr. Herodot. I, 142 sq. In XII. ciuitates descripti constituerant Panionia (Herodot. I, 148.) laudabili utique consilio; nec tamen rerum eventus instituti praestantiam probauit. Quae quidem foederis leges fuerint, parum constat; ex Herodoti loco (I, 170.) colligere licet ipsum illud institutum non nisi serius accessisse; nam *Thales iussit Iones omnes unum quendam communem Senatorem* (βουλευτήριον) *habere, eumque esse urbem Teo, in medio Ioniae sita; caeteras autem ciuitates nihilo minus legibus suis vsuras.* Ceterum satis constat, iunctas foedere illo urbes, quas ab externo hoste magnis opibus instructo parum tutas fore facile praevideri potuit, *m)* ne in otio quidem diu feliciter res

M 2 gessisse;

m) Scilicet littoralem plagam incolentes maritimis opibus facile tutari se poterant, ne classibus infestarentur; verum

gessisse; intestinis discordiis agitatae, alias tyrannorum dominationi et libidini cessisse, omnes vero externis hostibus obnoxias factas, primo Lydis, mox Persis. Croesus quidem singulos aggressus facilem victoriam habuit (id. I, 14. 15.). Croeso autem victo cum a Cyro ad foedus, quod obtulerant, non admitterentur, ad bellum quidem se accinxerunt; enimvero deseruere foedus causamque communem iam tum a Cyro illecti Milesii, potentissimi inter ceteros Iones, (ibid. I, 141.) nec insulae, quae se a discrimine tutas putabant, belli participes esse voluere; soli Aeolenses in continenti societatem armorum inierunt. (151.) Mox bello facto consulere sibi fuga Phocaeenses et Teii moenibus relictis; (363-8.) reliqui Iones numero et robore imminuto cum Persis congressu facto victi imperata facere spoponderunt. Mox et insulani territi se deditere. (169.) Qui quidem rerum euentus non ita comparati sunt, ut de toto illo Ionum instituto magnifice sentire liceat. Ad idem exemplum *Doricae* ciuitates quinque Triopicum concilium instituerant (Herod. I, 144) Erant etiam *Aeolicae* vrbes XI. in continenti, in insulis quinque aliae inter se foedere iunctae.

In

verum aduersus hostem ab interiore Asia copias adducentem fines habebant parum tutos. Quod sensisse videri debet Bias Prienenfis, qui, Persis Iones prementibus, consilium dedisse fertur, ut Ionia relictâ in Sardiniam migrarent, atque in ea communem omnium Ionum remp. ac ciuitatem constituerent. Herod. I, 170. Nimirum mari undique clausis nulli Persae imminebant. At enim erant Poeni, erant Etrusci, a quibus eadem fuissent metuenda quae a Persis.

In *Magna Graecia* communi consensu *Achaeorum* reip. formam imitari decreuerunt, hortatique sese inuicem *Crotoniatae*, *Sybaritae*, *Cauloniatae*, unanimi *Ioui Homorio* aedem ponunt, et locum in eo ad conuentus agendos et consilia communia habenda; deinde mores legesque *Achaeorum* adsciscunt, illisque in administratione rei suae publicae uti instituunt. (Polyb. II, 39.) Solutum tamen paullo post hoc foedus partim *Dionysii* dominatu partim barbarorum vicinorum praevalente potentia n).

Etrusci vero ingentibus opibus valentes, XII. ciuitatibus, suas quibusque leges et iura retinentibus, aliis suo magistratu vtentibus, aliis sub rege degentibus, habitabant; belli causa dux eligi, de communibus rebus commune concilium indici; (v. c. Liv. IV, 23) aucta resp. XII. coloniis trans *Apeninum*, aliis XII. in *Campaniam* educis. Fractae tamen hae eorum opes dissensionibus, suspicionibus et odiis mutuis. o) Itaque, cum et externa vis ingrueret, primo quoque impetu *Gallorum*, *Samnitium*, *Romanorum*, succubuerunt. Inprimis vero illud inter legendum male habet, quod ciuitates modo singulas, modo plures, bella facere, raro omnes in idem bellum consentire videas. Factis cum *Romanis* multis praeliis a *Veientibus*, tandem *Veii* obsessi: quis credat, tamen vel sic a ceteris dubitatum fuisse an succurrerent (Liv. IV, 61.)? *Veneri* soli *Falisci* et *Capenates*. (V, 8. 13.) *Veis*

M ; captis

n) V. Opusc. Vol II. p. 189. 190. 203. 4.

o) Plura exempla v. Liv. IV, 24. 25. 58. 61. V. 1. 17.

captis anno inde altero Falisci dediti. Ita vrbe alia post aliam foederi subtracta, reliquae Romanis tanto faciliores fuere expugnata. Nec nisi sero, et satis intempestiue, communi populi consensu arma sumpta; venerunt enim in belli societatem Latinis Samnitibusque iam victis et attritis, quibus adhuc integris et valentibus adiungere se debuissent; antequam Romanorum opes ex ipsa victoria crescerent. Ita binis praeliis ingenti cum clade victi in deditionem venire. *)

Essent adhuc alia, quae commemorari possent, ut de Latinorum, Gallorum, Heluetiorumque foederatis ciuitatibus; verum, et remotiora haec sunt, et iam in extrema pagina haerent litterae, sonatque tantum non in auribus campanula, quae pompam in templum ducere iubet: dimitemus itaque vos, Commilitones, modo verbo, cuius rei causa tota haec disputatio instituta sit, monuerimus. Anniuersaria Academiae nostrae sacra bonis cum votis omnibusque

[*) Haud pauca ex iis, quae in hac Commentatione exemplis antiquitatis propositis edocueramus, per quatuor hos annos vix elapsos in confoederata Americanarum rerum publicarum confociatione euentum habuisse, meminerit forte, si quis haec legerit, vel me non monente. Alia in Batauis, misera ciuium discordia in discrimen adductis, experientia et euentus declarata dedit. Omnino non adeo magna vi diuinatrice opus est ad fortunas regnorum et ciuitatum praeuidendas. Initia ac semina malorum praeuidere, praecidere et intercipere, hoc opus, hic labor est; ad haec maioribus ingenii viribus opus est, quam si bella ferere, Europam discordiis agitare, regna tributis et vectigalibus exhaurire, fraude ac dolo, politices nomine ac praetextu, grassari didiceris.]

que celebranda sunt, quibus sollennibus vt Sere-
nissimus Princeps, Comites Illustrissimi, Genero-
sissimi nostrique amantissimi Ciues praesentia sua et
frequentia celebritatem addere velint, obseruanter
et peramanter rogamus. Verba faciet Academiae
nomine eloquentiae Professor, quaestione proposita:
*respublica litteraria meliorne sit democratica an aristocra-
tica.* Vos itaque dicenti fauere vt velitis et petimus
et hortamur. PP. in Georgia Augusta d. XVII.
Septembr 1717 cccclxxxiii.

XI.

ACADEMIAE GEORGIAE AVGVSTAE

PRORECTOR

IO. BENI. KOPPE

CVM SENATV

SVCCESOREM

IN

MAGISTRATV ACADEMICO

IO. STEPHANVM PÜTTER D.

CIVIBVS SVIS

COMMENDAT

INDICTIS SOLLENNIBVS.

IN A. D. VII. AVG. c|o|o CCLXXXIV.

Cur virgis caesi Romano more, qui mox securi percutiendi essent.

I lictor, conliga manus.

In hac vitae nostrae, Ciues, per luxuriam eiusque comites, omnis generis corruptelas, depravatione solatii loco habenda est generosior aliqua, quae et latius increbuit et, per plures didita, vires fumsit, philosophandi ratio, inprimis de humanae naturae dignitate, de libertatis iuribus, de hominum in magnas societates coetusque coeuntium consiliis, circumscribendaque potentium virorum regumque libidine, inque his quod ad poenarum et suppliciorum rationes saniores constituendas conversa sunt sapientium studia; quodque, cum antea

de

de iisdem rebus vix muſſiſſet paſſim vnus et alter ce-
 teris aut fortior aut imprudentior, nunc libere ac
 publice de humanitatis iuribus diſputare licet. Quod
 ſi multa adhuc deſiderari dixeris, vt ex philoſopho-
 rum ſcholis in ipſam legum ferendarum auctoritatem
 melior ratio ſe inſinuet: effulſere tamen nonnulla
 fauſti ominis exempla, quae portendant, fore vt
 ſenſim ſenſimque ad vitae publicae reſceſſus, e qui-
 bus ad vulgus prodire debebat, et ad regnorum ad-
 miniſtrationum adyta ſanior penetret philoſophia,
 expulſa inde peruerſa illa calliditate, quam politi-
 cam vocant, qua omnis reſp. ad vnum caput, eius-
 que vtilitates vel lubidines, aut verius ad domina-
 tionis miniſtros, inanemque aliquam potentiae vel
 auctoritatis apud externos vmbra reuocatur; viſce-
 ribus interea reip. tanquam tabifica lue diſſluentibus;
 ita vt pleraque regna dudum corruere debuiffe dixe-
 ris, niſi priuatorum conſiliis melioribus, populi-
 que ipſius induſtria et patientia, labantes res paſſim
 ſuſtentarentur. Cum tamen inter principes, eos-
 que qui ſummae reipublicae adminiſtrandae aut ad-
 moti ſunt aut admouendi, iam ſint haud pauci, qui
 imperiorum moderandorum artes non ad externa
 tantum deuocandas, verum primo loco in interno
 regni robore populorumque opibus ac copiis fun-
 dandas eſſe intelligant: ſpes, tanquam diluculo, aut
 certa iam die, illuxit iucundiſſima, fore vt tandem
 aliquando ipſo rerum vſu et euentu perſpectum et ex-
 ploratum habeatur, nullas imperii alicuius veras opes
 ac durabilem aut eſſe aut eſſe poſſe proſperitatem,
 niſi interior ciuium proſperitas tanquam vis viuida
 animauerit molem motusque principia impertierit.

Aliud, quo vota nostra rata fore ominamur, auspiciū arbitrari licet decreta principum, qui, ex quo de quaestionis atrocitate et immanitate disputatum est, aut sublatam voluerunt esse aut imminutam tormentorum saeuitiam: quippe cui paucis in capitibus paucisque temporibus locum, in paucioribus effectum esse, aut esse posse, sapientium viro-
rum sagacitas subtiliter demonstrauit.

Inter haec, quae de quaestionis immanitate disputata sunt, inquiri quoque coeptum in rei atrocissimae *origines* siue vniuersim, siue apud Graecos et Romanos, siue denique sequioribus temporibus, e barbariei squalore emergentibus nouis imperiis: necdum satis accurate de singulis actum. Coepit quoque id, quod ultimo loco positum est, a rerum narratarum argumentis ad opinionis et disputationis subtilitatem reuocari, dum *ab ordaliis et iudiciis dei* tormentorum inter recentiores populos quaestionisque origo repetita est. Atqui *ex ipsis historiarum monumentis* declarandum erat, ante ordaliorum usum nullam inter Germanicos populos fuisse quaestionem, tum *exemplis in medium prolati* docendum, *ex istorum temporum iudicatione ac sensu pro dei iudicio et testatione de rei innocentia unquam habitum esse*, si quis tormentorum cruciatibus victus confessionem criminis exprimi sibi passus haud esset. Historiarum quidem fides de iuris legumque inter barbaros populos elementis et ortu non adeo obscura aut ambigua est, quo minus satis accurate teneamus, primum ex Aniani breuiario, quod vulgo vocant, poenarum et quaestionis usum inter Visigothos

gothos receptum, et sub Francis in prouinciis iis, in quibus Romana promulgata erat lex; legibus inde, quas vocant, Visigothorum firmatum; occurrere eundem in RR. Ostrogothorum Edictis, in LL. Salicis; originem autem Romanam clulescere ex eo ipso, quod, eodem discrimine, quod poenarum infligendarum fuit, quaestio tantum in seruos et infimae sortis homines habita est, cum *ingenui* aut iureiurando aut iudicio dei aut certamine vterentur. Ad quae quidem vt prouiores essent animi, facilis esse potuit opportunitas, in illis quidem ex superstitione temporum persuasione de miraculis, in hoc vero, quod inter populos ac duces rerum controuersarum diiudicationem a pugnis peti viderent. Adhiberi postea coepere tormenta in magorum et veneficorum iudiciis, (v. c. Gregor. Turon. VI, 35.) tandem eodem crudelitatis genere faeuitum in haereticos. Nihil in his est, quod non historiarum, legum et monumentorum, fide declaratum sit; *) contra vero *illius opinionis*, quam commemorauimus, *vestigium nullum*.

Vtut

*) Prostant ea quoque passim iam in libellis vulgaribus: v. c. Heineccii Elem. Iur. Germ. III, 9. § 332 sqq. Adeundus primo loco Codex Theodos. tit. XXXV. et comparandus Iac. Gothofr. in Prolegom. c. 5. 6. 7. E Legg. Visigoth. satis est inspicere Lib. VI. tit. I. ubi statim apparebunt iuris Romani vestigia expressa per omnem quaestionis decursus; et in LL. Salic. tit. XLIII. de seruo, qui de furto fuerit inculpatus. LL. Boioar. cap. XII. tit. XVII. Quod si alii populi, vt Sueui et Saxones. quaestionum tormenta non admiserunt, causae in temporum et rerum conditione, quae tum erat, cum primum inter eos mos et lex illata est, quaerendae et indagandae sunt; quod vero in Britannia quaestio

Vtut haec se habeant, nobis pro consilii ratione et paginae angustia leuior aliqua commentatio est instituenda;

quaestio non recepta fuit. hoc ab Saxonibus et Anglis repetendum videtur. Est vero in omni de quaestionis originibus disputatione diligenter discernendum inter res et causas quae primum aditum patefecerunt, et consilia vsusque tormentorum, qui postea successerunt; nec minus haec ad populos barbaros, qui aliorum inventis vsi sunt, pertinere putanda sunt. Cum omnis quaestio, quae quidem vere eo nomine appellatur, (nam tormenta, quae aut ira et saeuitia ad excruciansdum, aut sollers atrocitas ad cogendum inuenit, vt faciat reus quod detrectat facere; cuius generis fuere tormenta ab Antiocho Iudaeis, a Romanis Christianae sectae, a Christianis haereticorum perulaciae admoeri solita; cum quaestione, de qua loquimur, non sunt confundenda) sed omnis quaestio cum veri inueniendi causa reperta sit: inter omnes populos, maxime inter rudes et barbaros, tempora incidere solent suspicionis, irae, timoris et terroris plena, in quibus proditoris et mali ciuis consilia aut socios et conscios resciscere reip. interest; id, nisi vi ac dolore admoto, quomodo consequi licet? a Romano ciuili libertas omnem quaestionem remouit, a liberis corporibus in seruilis traductam; at vero sub principibus etiam in liberos ac ciues illa grassata est, indolesque eius et natura est deflexa et immutata: Non enim modo interrogations inter tormenta exprimi coepit confessio facinoris non obscuris indicia iam confirmati, tum qui socii, qui perpetrati facinoris modi, consilia aliaque eiusmodi; verum etiam, cum scitum esset, vt nemo nisi confessus reus esset damnandus, (l. r. § 1. D. de quaest.) eo adhibita est quaestio, vt confessum reum haberet iudex, cui supplicium lege infligi posset. Ab optimo igitur scito ad atrocissimam calliditatem processum est. vt, quod aliis indicia aut praesumptionibus, quas vocant, deesset, tormentorum vi suppleretur, vt eodem loco et ordine, quo aliae probationes, quaestio, nec non vt inter purgationis modos ea haberetur, et quae sunt alia. Quemadmodum sequioribus quoque aetatibus putanda sunt insinuasae se nonnulla ex moribus

stituenda; traducetur itaque disputatio nostra ad rem, quae in antiquo iure publico Romano saepe mirationem fecit, vnde factum sit, *ut antequam quis securi perculeretur, virgis caederetur*. Quae enim inde aut proficisci potuit reipublicae utilitas, quam tamen in poenis propositam habere fas est, aut quorsum supplicio ultimo additus verberum cruciatus, cum malum ciuem e medio tolli satis esset? quid igitur illud fuit, quod Romanos recepto hoc more spectasse credere liceat?

Ipsa quidem res in historiis Romanis tam obuia est, ut exempla cumulare velle, putidum esset. Prima commemoratio est de Bruti Cos. filiis, (Liv. II, 5.) *missi liſtores ad ſumendum ſupplicium nudator virgis caedunt securique ſerunt*. Quid? quod domesticum iudicium eodem more continebatur. De Sp. Cassio Liuius (II, 41.) *Sunt qui patrem auctorem eius supplicii ſerant: eum cognita domi cauſſa, verberaſſe ac*

moribus Germanorum non minus, quam ex iure Canonico. Verum illa utique omnia a tormentorum originibus longe abſuere. Iam cum quaestio a Romanis ad Visigothos aliosque populos fuit translata, non statim, quantum quidem tenemus, omnis illa iuris Romani subtilitas est admissa, verum rudior ille tantum et simplicior vsus, ut criminis occulti auctor et consilium patesseret: cuius generis exempla e Gregorio Turonensi nota sunt plura: tum in furto maxime, et rapina, et adulterio. Quod si itaque quaestione nulla exprimi posset confessio, nullus sane supplicio locus esse potuit; potuit, et forte pro innocenti haberi reus; ut vero dei iudicium ac voluntas per quaestionem declarata haberetur, an in populorum horum annalibus ac chronicis exempla essent, lectionis copia virorum doctorum demonstratum dabit.

ac necasse, *peculiumque filii Cereri consecrauisse*. Lege Valeria de prouocatione, qua sententiae magilstratus exequendae ius sistitur, eum qui prouocauit, *virgis caedi securique necari* vetitum est; (vt tamen populi condemnatum suffragiis supplicium maneret) donec lex Porcia omnino, *ne ciuem virgis caedi liceret*, cautum est: (Liv. X, 9.) Iterata in eam rem lex Sempronia Tib. Gracchi. Mansit interea lex militiae, vt virgis caederentur milites; sensim tamen legis Porciae vim ad milites quoque traductam fuisse, vel ex M. Liuii Drusi lege *) colligas, qui a DCXXXII. ad populum tulit, ne quem ex *Sociis Latini nominis in exercitu virgis caedere liceret*. Ciues adeo qui essent in exercitu caedere multo minus licuit. Nec tamen lex aut tum perlata est, aut omnino mansit: quo v. c. locus Sallustii (lug 69.) de Turpilio spectat. **) Sed notiora sunt haec, quam vt in iis haerere liceat.

Non aequè in promptu habetur, *cur supplicio addita fuerit virgarum saeuitia*. Satis, vt diximus, videri potuit, vt quis capite plecteretur: quorsum corpus eius verberibus lacerari opus fuit? Vidimus qui *verberationem pro quaestionis genere* haberent ante ipsum supplicium adhiberi solitae: quemadmodum apud Gallofrancos, humanissimum populum, ea etiamnum immanitas frequentatur, vt praeter illam quaestionem, quae, interea dum reus lege interrogatur, adhibita est ad confessionem criminis exprimendam,

*) Plutarch. in Gracch. p. 838. E.

**) V. Lips. de Mil. Rom. V, 18 Ducker ad. Liv. Epit 57.

mendam, ante supplicium sumendum altera admoveatur, qua cogatur reus inter tormenta criminis socios edere *). Nec tamen inter Romanos similis consilii vestigia apparent.

Alia de eo more coniectura fieri possit eo, ut *nouissimo supplicio corporis iniuriam grauemque dolorem accedere* voluerit ea lex, quae virgis caedi iubebat eos, qui securi essent percutiendi; scilicet *ut se mori sentirent*. Ab hac enim acerbitate plerorumque populorum ius criminale profectum esse videri potest, inprimis in poenis et suppliciis statuendis; et vbique fere illud obseruare licet, in barbaris moribus et institutis, meliore humanitatis cultu succedente emendari solitis, ius criminale esse illud, e quo vltimo loco barbariei vestigia eluuntur. Neque mirationem hoc facere debet. Versatur enim res in causis singulorum; de summa reip. agi non putatur; etsi grauissima res, corporum vitaeque incolumitas, in discrimen adducta est, ad se tamen propius adrepisse malum nondum quisquam videt; ii autem qui reip. administrandae praesunt, rem impeditam esse, nec ad tributa et vectigalia quicquam inde redundare videntes, malunt antiqua seruare. Altera ex parte vbique fere ortum est ius criminale in prima illa feritate et barbarie, a qua gentes ad humanita-

*) Altera haec appellatur *la question préalable*, prior vero ordinaria *la question préparatoire*: vid. inter alios *Muyart de Vouglans Loix criminelles de France mises dans leur ordre naturel* p. 59. 797. 817. Superioribus annis multa de acerba et immani hac quaestione tollenda dicta et acta sunt: an euentum habuerint, non teneo.

manitatem progressae sunt; constitutae poenae recenti crimini nouique exempli sceleri *ab animis ira et odio exacerbatis*; illa ipsa supplicii atrocitas mox alias iras et odia hominum inflammauit; vnde noua scelera, noua immanitate punienda. Succedunt aliquando tyrannides et imperia cruenta; aut factiones et seditiones in republica: ita in humanissimo populo Graecorum quot ac quanta exempla atrocissimorum suppliciorum memorantur! Potest et illud euenire, vt in populo, etiam aequis legibus constituto, tempora incidant, vt grauiori facinori poena simplex non respondere videatur: potest adeo augeri et tanquam cumulari illa, adiecto corporis dolore. Si Caesaris verba apud Sallustium (Catil. § 1.) memineris, a Graecis id, de quoquaerimus, acceptum videri potest: *sed eodem illo, inquit, tempore* (quo multa a vicinis fociisque populis sumfere Romani) *Graeciae morem imitati, verberibus animaduvertebant in ciues, de condemnatis summum supplicium sumebant.* Nec tamen, si seuerius inquiras, ea satisfaciunt. Nam primo non de supplicio ita sumto, *vt virgarum verbera antea infligerentur*, loquitur Caesar, sed de vtraque re *separatim*. Virgis caesi Romani in leuioribus criminibus; testabantur illum morem fasces magistratuum; et seruatus mos in militia; hactenus nihil simplicius videri potuit poenis inter Romanos: virgis scilicet expeditis poena omnis seu capitalis seu non capitalis inflicta. Graeci autem, a quibus petitum morem ait Caesar, qui intelligendi sint, non statim assequi licet; nam nec a communi aliquo iure Graecorum nec ab Atheniensibus haec petita esse constat; videtur itaque Graecia magna,

magna, in inferiore Italia, intelligi, in cuius civitatibus hunc morem viguisse, ex eodem hoc loco discere forte licet.

Meliorem tamen illustrationem afferre huic rei possumus, si animum eo attendimus, quod ille virgis caedendi et securi percutiendi mos non primitivus habendus, sed iam paullulum deflexus et immutatus; fuit enim antiquior ille multo severior, ut virgis ad mortem caederetur reus condemnatus: in cuius atrocitatis locum successit mox lenior ratio, ut securi percuteretur ille, antequam sub virgis exspiraret: qua quidem suspicione non male nos duci apparebit ex iis ipsis, quae de antiquiore supplicii genere commemorantur. Apud Suetonium Nero (c. 49.) cum audisset, *se hostem a senatu iudicatum, et quaeri ut puniatur, more maiorum*, interrogato, *quale id genus esset poenae*, comperit, *nudi hominis cervicem inseri furcae, corpus virgis ad necem caedi*. Hoc igitur erat, *more maiorum in aliquem animadvertere* hostem iudicatum (cf. Eutrop. VII, 15.). Mansit scilicet antiquior ille supplicii mos in *perduellibus*; quemadmodum etiam ab initio in perduelles illud supplicium fuit lege constitutum; latiore forte vocis acceptione, quandoquidem etiam Horatius parricidii in sororem reus perduellionis iudicium subiit; nisi forte statuere malis, statim ab initio reip. eam iuris fictionem invaluisse, ut, qui caedem aliudue scelus commisisset, civium numero exemptus inter perduelles, hoc est reip. hostes, referretur, eoque perduellionis poena afficeretur. Ita enim Horatii, qui parricidii reus erat, causa in primis statim

Liuii capitibus comparata fuisse videtur, cum Hostilius rex duumuiros faceret, qui ei perduellionem iudicarent secundum legem; erat autem lex de perduellibus lata: Duumuii perduellionem iudicent: si a duumuiris prouocarit (sc. perduellis), prouocatione certato; si vincent (illi), caput obnubito (sc. is, cui illud populus mandauerit faciendum) infelici arbori recte suspendito; verberato vel intra pomoerium vel extra pomoerium h. e. furcae *) alligatus reus ad necem caeditor. Hunc igitur atrociorum supplicii morem aiebamur cum leniore mox securis, qua virgarum cruciatus sistebatur, permutatum esse.

Mansere tamen plura, quae ad eum alludere videri possunt. Primum, grauius illud supplicium more patrio sumi solitum est ab iis qui virgini Vestali stuprum fecerant **). Perduellionis autem poena capitis fuit etiam post Legem Porciam: nec tamen tam constanter, quo minus aut hominum potentia aut reip. tempora impunitatem facerent (id quod satis colligas ex Caesaris oratione ap. Sallust. Catil. § 1.) nec ubique cum verberatione. Ita Lentulus et reliqui Catilinariae coniurationis focii gula fracta necati: extra ordinem utique et a Senatu, ut pote in rebus subitis summoque reip. discrimi-

*) Eadem aliquoties crux appellata; ut ap. Cic. pro C. Rabir. § 10.

**) Dionys. IX, 40. VIII, 89. Liv. XXII, 57. priore quidem loco Dionysius parum accurate: pontifices, inquit, eum συλλαβόντες ἀναγορεύειν μέστιξιν αἰκισάμενοι, κατὰ πορ ἀνδράποδον, ἀπέκτειναν. Nam ferui flagris, at ille virginis ad necem caesus est.

discrimine. Transiisse tandem perduellionis notio videtur in maiestatis crimen, etsi diuersam vtriusque conditionem adhuc ab Vlpiano commemorari videmus l. ult. D. ad L. Iul. Maj. Semel in L. iuio occurrere meminimus perduellionis reos in exilium ituros; (Censores quidem illi erant C. Claudius et Ti. Sempronius, a Tribunis pl. in iudicium populi adducti: XLIII, 16.) ita vt ab antiqua lege recessisse et in hoc videantur Romani; quam tamen reuocarunt alio tempore, quemadmodum accusatoris acerbitate et iudicum cupiditate factum constat in C. Rabirio perduellionis postulado: pro quo Ciceronis oratio extat: (v. cap. 3. extr. 4. pr.)

Porro antiquus virgis ad necem caedendi mos mansisse videri debet in militia; nam fustis virgae locum occupasse putandus, fuitque *fustuarium*, triste supplicium, quo in castris in grauiora flagitia animaduertebatur: de quo quidem adeundi sunt antiquitatis Romanae libelli *).

N 2

in

*) Inprimis Lips. de Milit. R. lib. V. dial. 17. Fasces apud Coss. et Praetores erant; adeoque virgarum nullus esse vsus potuit in poenis a Tribuno vel Centurione inflictis; at hic vitem gestabat, quam interdum fustis nomine appellatam credere licet; in aliis locis fustis viri opponitur, vt in noto L. iui loco Eoit. 57. *Quem militem Scipio extra ordinem deprehendit, si Romanus esset, vitibus, si extraneus, fustibus cecidit.* In fustuario arreptis vallis milites in commilitonem condemnatum et a Tribuno fuisse percussum saeuisse videntur. Nec ignominia caruisse videtur fustuarium; magis tamen propter ipsam flagitiorum naturam. Neque desinire ausit aliquis, quod in XII. tabb. occorrebat, si quis alterum publice diffamasset et carmen in eum condidisset,

in iis modo caussis, quae Polyb. VI, 35. commemorat, locum habuisse; in aliis vero virgis caesus et securi percussus est reus. Mature tamen successit in securis locum gladius.

Ex quo vero virgarum et securis usus inualuit, simili exemplo etiam deiectionem de rupe Tarpeia praecessit verberatio. Eodem quoque more animaduersum est in seruos, ut, antequam in crucem agerentur, flagris, pro virgis, caederentur. Quid in matronis necandis obseruatum fuerit, non succurrit; strangulatas reperimus, aut fuste percussas *).

Verum dimittendum tandem est e manibus, aut abiiciendum potius, argumentum ab huius diei sollennibus abhorrens et alienum. Quod si veteres adhuc inter nos superstitiones vigerent, verendum utique esset, ne infausti adeo ac sinistri ominis illud haberetur. Nihil tamen in nouo magistratu, qui nunc proditurus est, aut de tormentis ac quaestione aut de virgis et suppliciis metuendum est. Verum in litterarum studiis, quod in scena fieri solet, contingit, ut etiam ex tristibus atroci-

disset, quod ei infamiam flagitiumue faceret, ut fuste feriretur: (*fuste ferito*) sitne cum infamiae nota constitutum, ut fuste pro virga caederetur; nam ut supplicium fustuarium hac lege sancitum esse credamus, non adducimur. Fustis utique sub Impp. virgarum locum occupauit, et fustibus verberati ingenui, serui flagellis; id quod ex LL. notum est. l. 10. l. 28. §. 1. 2. D. de Poen. cf. Spanhem. O. R. cap. 24. Eo tempore fustis etiam in legionibus inter militares poenas esse coepit.

*) v. c. Valer. Max. VI, 3, 8. et 9. Ad reliqua cf. Grunpen de tormentis Rom. in Obs. Iur. Crim. p. 47. sq. e LL. XII. tabb.

atrocibusque spectaculis voluptas capiatur; cum vniuersam rerum temporumque, non ipsam veritatem, ante oculos positam habeas, teque ipsum a tot malis, quae humanitatem obsepiunt, intactum liberumque sentias. Quae res multo magis ita se habet in iuris prudentia, cuius magna pars in iis rebus versatur, quarum usum adspectumque optimus quisque refugit et auersatur. Est autem is, cuius potissimum causa haec scripta sunt, ex Prudentum ordine vir summus, de Academia nostra merentissimus,

IO. STEPHANVS PÛTTER, D.

ad quem magistratus academici crastino die suscipiendi honos cum insignibus publice transferetur: id quod fiet pompa sollenni ex more in templum academicum ducenda. Nos itaque ad officium nostrum pertinere putauimus, ut vobis, Ciues, publice haec declararemus, utque vniuersos ac singulos, inprimisque Te, Princeps Serenissime, vosque, Comites Illustrissimi, Barones ac Nobiles, omnesque, loco quemque suo, stirpe, ingenio, doctrina, virtute, conspicuos, rogatos esse vellemus, ne sollennibus his interesse grauemini, sed ad comitatus non modo et benignitatis, verum ad pietatis quoque et amoris officia eam rem referre haud dedignemini. PP. in Georgia Augusta d. VI. Augusti 1706 CCLXXXIV.

XII.

ACADEMIAE GEORGIAE AVGVSTAE
 PRORECTOR
 IOAN. STEPHAN. PÛTTER
 CVM SENATV
 ANNIVERSARIA INAUGVRATIONIS
 SACRA XXXXVII.
 RITE INDICIT
 SIMVLQVE
 VEN. SVI COLLEGAE
 SAM. CHR. HOLLMANN
 FERIAS MVNERIS PROFESSORII
 SEMISAECVLARES
 CELEBRAT.

*Historiae naturalis fragmenta ex ostentis, prodigijs et
 monstris.*

Commentatio prior.

Anniuersarium Georgiae Augustae inauguratae
 sacrum, Ciues, indicimus *quadragessimum et
 septimum*; vt adeo *tres* desiderentur ad explendum
semisaeculare tempus anni. Interea ex nostro Col-
 legio vnus est, cui ea felicitas contigit, quique
 eam suis Collegis tanquam communem impertit,
 vt

ut muneris sui professorii in hac Academia nostra feliciter gesti annos expleat iam nunc quinquagenos celebretque adeo festum semisaeculare hoc ipso anno, vir aetate meritisque venerabilis, SAM. CHR. HOLLMANN, qui hac ipsa anni parte, imminente autumno, anno saeculi XXXII. ad philosophiam docendam in Academiam hanc tum condendam euocatus, annos exegit munereque professorio. functus de rebus nostris bene meruit per annos inde quinquaginta: multarum ille in litteris inprimis philosophicis inque rebus academicis vicissitudinum et conuersionum testis, auctor, *pars magna*. Vidit ille Collegas alios discessu modo ex hac vrbe modo ex vita facto ereptos, alios immigrantes et munere famaue prioribus succedentes, ipse plerisque superstes. Est enim litteraria vniuersitas arbori illi Cumanae Sibyllae similis, quam Virgilius tam feliciter in Aeneide sua plantauit, *aureo ramo* insignem, quem si decerpseris, *primo auulso non deficit alter aureus, et simili frondescit virga metallo a)*. Cumque ei a multis iam annis aetas honestam missionem fecisset: veteranus tamen ille stipendia facere et, quod docendi partibus decederet, scribendi studio supplere, seu addere, maluit. Viuit itaque, nonagenario iam propior, in otio negotiosus, curis studiisque philosophicis occupatus, nec inertiam et vacuitatem, quae tot senes turpi errore miseros ad vitae poenitentiam adigit, pro quiete et tranquillitate amplexus; prospicitque tanquam e specula philosophiae suae viri-

N 4 daria,

a) Aen. VI. 136 - 144.

daria, multiplici colentium opera, modo *in silvam altam Jouis lucumue Dianae* excrefcentia, modo, reliqua agri parte fentibus spinisque glifcentibus relicta, *in ambulationes gellationesque amoenas contracta*, tum *in topiaria fuauesque areolas ac faepes* efflorefcentia, modo ad cultum rectum ac fimplicem, oftentatione et mollitie procul habita, reuocata. Congratulamur itaque ei fortunam hanc fingularem et vnicam, quod fuum ipfe femifaeculare feftum celebrando femifaeculari academiae fefto trinis faltem annis praeludit; quandoquidem trinis annis, quam vocati erant profeffores, ferius inaugurare Academiam placuerat; quodque ex primis Georgiae Auguftae condendae profefforibus, a conditore Georgio II. Munchhufii cura euocatis, ipfe eft is, qui ceteris fepultis vltimo loco fuperftes eft. Habemus nunc in votis, vt facra quoque ipfius Academiae femifaecularia tertio abhinc anno fucceffura Collegii noftri aetate princeps vicens laetusque inter nos celebret, nec, quod de fenio conqueratur, habeat, nifi quicquid moleftiae ipfa natura abefle negat. Iungentur haec eadem vota votis publicis, quibus ex more diei craftini folennia celebrabuntur, ducta in templum academicum pompa, cui vt frequentes interefle et fua quisque pietate pietatem et hilaritatem vniuerforum accendere velitis, Te quidem, Princeps Sereniffime Naffauienfis, vobifque, Comites S. R. I. Illuftriffimi, praeceuntibus, a vobis, Commilitones maiorum aut propria virtute ornatiffimi, nos ita impetraturos efle fperamus, fi ad animos noftros id gratiffimum et ad officii veftri amorisque
signifi-

significationem validissimum fore profiteamur. Prae-
 ibit autem in votis publice suscipiendis verba Pro-
 fessor Eloquentiae CHR. G. HEYNE verbis factis
 super dicto illo Cardinalis Ximenii, qui, condita
 sua Academia Complutensi, *non modo prandium se,*
sed coenam quoque curare velle professoribus suis b).
 pronuntiauit: exponetur vis et sententia huius dicti
 cum caussis suis, transfereturque fabula a Com-
 plutensis Academiae tanquam scena, ad Georgiam
 nostram Augustam.

Interea, cum, more maiorum, a nobis cu-
 randum sit in pagina hac, vt in extrema ora sub-
 iungantur nonnulla, quae animos vestros tenere
 possint: agedum, Ciues, commentemur pauca de
 re nec a publico sensu nec a priuata doctrina ab-
 horrente, cum votis autem publice faciendis olim
 admodum coniuncta, cum ad *ostenta et prodigia*
nuntiata magna religionum pars vulgo pertineret.

Sane quidem, quae superiore anno fuit mira
 caeli facies caligine ac nebula ceu fumo obducti,
 sole sine splendore rubente, saepe in animum re-
 vocauit veterum saeculorum prodigia et ostenta,
 subindeque gratum laetumque excitauit sensum,
 nostrorum temporum felicitatem reputantibus, cum
 liberati simus ab illa superstitionum seruitute gra-
 uissima, qua deuincti animi, quicquid praeter na-
 turae morem sollennem fieri viderent, pro por-
 tento

N 5

tento

b) Exposita res est accurate ab Aluaro Gomecio de reb.
 gest. Franc. Ximenii lib. IV. p. 1018. in Schotti Hispa-
 nia illustrata.

tento haberent, et, ad iram minasque numinis illud referendo, non nisi atroces inde euentus ominarentur. Si enim superioribus aetatibus similis caeli, quod nos ambit, species sese oculis obtulisset, percussi terroribus animi quot mala futurorum annorum extemplo praerepturi, quas calamitates ex toto terrarum orbe auditas in computationem praedictionum fuissent cumulaturi! Redibat in animum *defectus* ille *solis*, quem vulgo vocabant, *prodigiosus et longior*, (Plin. II, 30 f. 29. seu verius solis lumen caligine obfessum *c*), *totius paene anni pallore continuo*, occiso Dictatore Caesare, coniunctus ille quoque, non minus quam is, quem ipsi vidimus, cum terrae tremoribus, vastis ignium torrentibus ex Aetna se praecipitantibus *d*). Nemo tum fuit cui non persuasum esset, bella ciuilia recrudescencia portendi, quae sane, etiam a minus prudenti, iam tum praeuideri poterant. Vtilitatem res habuisset, si in illo caeli habitu aliquid fuisset, quod vim haberet ad animos, ambitione impotenti et misera regnandi cupiditate attonitos, a consiliorum audacia abstrahendos. Enimuero id hominum genus, quod *ventoso Gloria curru* vehit, caelestia haud facile circumspicit: quales animi etiam nec temporibus nostris desunt; non enim nisi cum humana natura defectura deficient mortales suae seu gloriae seu vtilitatis opinatae messem ex generis humani vastitiae facturi; felices tamen fumus in hoc quod ea mala non metu praesensa bis sentimus.

Est

c) Plutarch. Caes. sub f.

d) v. loc. Virgil. Ge. I, 466 sq. 472.

Est eā naturae humanae imbecillitas, vt, nisi diuinitus sapientia aliqua instilletur, omnis humani generis scientia ab errore proficiscatur; vti enim puerilis ingenii ludibria iuuenilem sagacitatem virilemque ac senilem prudentiam antegrediuntur: ita populorum, quid? quod totius generis humani, historiae docent, praecessisse vbique ea, quae falso credita sunt, antequam ad verum perveniretur. Neque quicquam in hoc est, quod mirari aut indignari liceat. Suscipitur enim omne animi iudicium hominis rudis et imperiti ex primis sensuum impulsibus, nec, etsi saepius iteratis his, veriori existimationi locus est nisi in animis ad contemplandas et comparandas res conuersis. Omnis quidem, quam late patet, philosophia a vanis et erroneis opinionibus progressa, non nisi longis saeculorum anfractibus ad veriora decreta peruenit; neque illa veritas emicuit aut vno momento, aut, tanquam Minerua, ex vno capite; verum sapere coepere homines in singulis et paucis, interdum in quibus vix expectares vt acute viderent, cum interea caecutirent ad alia, quae multo propiora saepe erant et patentia oculis; quid verum esset, vidit populus alius in hoc, alius in alio. Ne iis quidem res continuo feliciter cessit qui primi plura mente complecti auderent; nam vbique fere philosophandi initium factum videmus ab eo, quo post infinitarum rerum notiones fero tandem perueniendum erat; ab rerum quippe elementis constitutoque ex iis hoc vniuerso profecta est sapientia Orientis et Graeciae, cum de singularum rerum naturis considerandis nondum esset

esset cogitatum; naturae vero cognoscendae studium, omnis verae philosophiae fundus, humanae mentis fax certissima, ad ea quoque, quae extra sensibilem naturam posita esse dicuntur, omnium scientiarum maxime sera habuit incunabula et tarda incrementa: e qua tamen antequam lux affulserat, innumerae falsae opinioniones, somnia, superstitiones, errores, hominum animis eximi, aut ex sacris profanisque disciplinis tolli nequiuerunt; itaque nostro quoque tempore in utroque hoc doctrinae genere, quo quis est naturalis scientiae imperitior, eo est in defendendis iis, quae perspecta factis non habet, pertinacior. Idcirco eadem hominum superstitiones diutius, quam alias factum esset, omne naturae studium retardarunt; inprimis eo quod iis, quae praeter naturae morem evenirent, hominum animi multo magis attenderent, quam iis quae ordine rerum sollenni procederent. Iam hunc ipsum ordinem cum tam parum contemplatione et investigatione cognitum haberent etiam doctiores; eorum, quae praeter morem fierent, causas quomodo explicarent, habere non poterant. Itaque confugitum est ad causas, quarum vim multo minus perspicerent, quam ea ipsa, quorum causas elicere volebant, scilicet, ad interuentum deorum; terrorque ex rerum nouitate iniectus deorum iras finxit, quarum ostenta illa essent signa. Cum autem genus humanum vix vlllo tempore ab omni malorum genere vacet: nunquam non ad manus erant calamitates, quae aut tum ingruerent aut mox succederent, quarum causae ab illis ostentis deorum iras portendentibus repeti possent.

possent. Rursus ostentorum nuntiandorum opportunitas haud facile deerat, quandoquidem pleraque ex phaenomenorum numero erant, quae ab aeris intemperie, terrarum exhalationibus, ignium eruptionibus, aquarum eluuiionibus, orta ad vim vitalem, agrorum pecudumque prouentum, humanumque corpus, potestatem et noxam habent. Conuersi hinc ad placandam deorum iram animi ab omni alio caussarum cognoscendarum genere fuere abducti. Itaque vt amnibus exundantibus alluione fundi interdum pars ad alienum agrum adhaerere solet, ita confusis finibus accessit religionibus id, quod philosophiae, inprimis physicae, additum esse debuerat; eaque iniuria, ac verius sacrilegium, cum semel grassari coepisset: inuenta sacra et ritus ad expianda ostenta et auertendam numinis iram, et pro ea disciplina ac scientia, quae rerum naturalium contemplatione caussarumque inuestigatione contineri debebat, nata est alia disciplina, haruspicina et ars auguralis, omninoque diuination, quae a meris commentis et opinionibus visa et audita repetebat. Consuli coepere vates, adiri dii, monstrari ritus expiationum, fundi oracula, recitari vaticinia et carmina Sibyllina: cum Naturae dictata essent accipienda. Neque ipsa philosophia ex his laqueis, quibus semel irretita erat, expedire se potuit; id quod lectis praeclaris Ciceronis de diuinatione libris vnusquisque facile intelligat; ita enim inde ipse discere te sentias, vt, quid ad superstitiones illas tollendas satis validum sit, non habeas, nisi, cum altera philosophorum secta, deorum prouidentiam sublatam

tam esse velis. At primo loco occurrere debebat illud, vt de ipsa re dubitares, vtque et deos esse et eos rebus humanis consulere affirmares, diuinationem autem omnino esse vllam negares, nisi e causis physicis. Verum ad ipsa placitorum principia, tanquam fontem, nemo ausus est accedere, et, quid illis veri falsive insit, videre. Scilicet ea est humani ingenii imbecillitas, vt, admissa semel opinione ac doctrina, aliorum seu temporum seu hominum auctoritate firmata, etsi difficultates ac dubitationes vndique suspicionem de ipsa opinione eiusque fundo moueant, malimus tamen in iis, quae aduersari videantur, tollendis et refellendis vanam operam et subtilitatem adhibere, quam ad ipsum opinionis fontem descendere eiusque venas inspicere. Simili modo obseruationes suas nugatorias studiose prosequuti cum Etrusci aruspices, tum Romani pontifices auguresque, subtiles inuenere rationes causasque, cumque his modos placandi numinis malorumque auertendorum; quibus cum et religionum et annorum auctoritas accessisset: adscripta sunt prodigia et ostenta vna cum procurationibus Pontificum annalibus et Fastis; cumque, ceteris extinctis, hoc veteris memoriae genus antiquitatisque monimentum seruatum esset: mirum non est, si ipsi scriptores, cum iisdem opinionibus imbutos haberent animos, eadem prodigia in rerum gestarum memoria repetere, et in annales suos referre non refugerunt. Itaque Liuius quoque antiquitatis auctoritate motus se *religione quadam teneri* fatetur, *quae prudentissimi viri publice suscipienda censuerint*, vt ea pro dignis

gnis habeat, quae in suos annales referat e). Tam ardua res est humanis ingeniis, ad ipsa rerum principia eniti, iisque sublati mille vanarum opinionum arcem euertere.

Interea, vt in rebus humanis fieri solet, cum his ipsis prauis opinionibus, quas superstitiones disseminarunt, via parata est meliori sapientiae prolusumque philosophiae, quod ab insolitarum ac mirarum rerum contemplatione tandem processum est ad ordinem moremque naturae sollennem et consuetum, cuius diligenti consideratione, quae multo magis stupenda rerum miracula offerre poterat ac debebat, (quandoquidem aeternus et diuinus plane rerum ordo multo plus admirationis habet, quam vna aliaue res, quae ab eo recedere videri potest) philosophia ea tandem incrementa habuit, quae, Aristotelis et Theophrasti aliorumque iis similium virorum obseruandi et iudicandi acumine substructa, mox inani multorum subtilitate disiecta, nostris aetatibus iterum reposita, firmata et aucta, ad praeclaram hanc, quam videmus, regiam excreuerunt. *Maſſi* itaque, vt cum Plinio loquamur, *ingenio esse, caeli interpretes rerumque*

- e) Lib. XLIII, 13. ait ibi: *non sum nescius, ab eadem negligentia, qua nihil deos portendere vulgo nunc credant* (quia eos prouidere rebus humanis negabant: cum his tamen rerum causas naturales non magis tenebant) *neque nuntiari admodum ulla prodigia in publicum* (tam late enim propagatis imperii finibus nullus dies fuisset, quin nuntiatum esset nouum prodigium; recepta itaque persuasio, nullam vim habere et omina et portenta si non susciperentur, h. e. si nemo illa curaret) *neque in annales referri.*

que naturae capaces, argumenti repertiores, quo deos hominesque vicissis. Nobis, quibus, alia in re occupatis, in huius regiae vestibulo tantum obambulare concessum est, dum sacrorum apparatus curantur, licebit alia via ingredi et ex iis superstitionibus et prodigiis, quibus exterriti animi ad vanas expiationes confugerunt, vtilitatem aliquam capere haecenus; vt animaduertamus fuisse ea nihil aliud quam casus insolitos resque praeter naturae morem factas, quibus adeo illustrari possit historia naturalis, inprimis Italiae, vt inde assequamur, quae omnino priscis aetatibus in natura insolita ac mira haberi, quae raro tum contingere, aut hominum sensus maxime mouere, aut quorum ratio et natura inprimis ignorari, consueuerit; simili modo, quo in barbaris aetatibus ex stuporis monachici fraudisque religiosae praestigiis vtilitas aliqua potest percipi, si ad ea attenderis, quae in populo quoque et saeculo ad plebeculae mentes tenendas maxime vim habuerint, quaeque cum opinionibus religiosis et cum reip. administratione maxime coniuncta fuerint; ab hac enim proficiscitur iterumque in eam redundat, quicquid ad animorum vera an falsa iudicia de iis rebus, a quibus morum indoles rerumque actus pendet, vim et potestatem habet.

Vt autem certa ratione procedat nostra commentatio, ex immenso, quo vagari poterat, campo reuocemus eam ad angustiores orbem Romanae antiquitatis; etsi nullus facile fuit populus, qui non sua haberet prodigia et ostenta, diuersi vtique

que generis diuersaeque indolis; ita vt de ingenio nonnullorum populorum, non minus quam temporum, ex ipso prodigiorum narratorum genio fieri possit iudicium; temporum quidem, quatenus feriora plus fraudis et praestigiarum, imitandi quoque vetera narrata studii; antiquiora inscitiae et simplicitatis plus habere solent; populorum autem, quandoquidem Oriens Solem Lunamque de caelo descendentes, montes ambulare solitos, maria exarescentia, dehiscences amnes, narrat; Aegyptus f) deos in conspectum venientes, repertumque aliquius dei sandalium (Herod. II, 91.) regem propter impietatem excaecatam et visum castae mulieris lotio recuperatum (c. 111.) sacerdotum somnia et Assyriorum scuta a muribus corrota; (c. 141.) Sinae dracones e folio regio prodeuntes aut eum in spirac modum ambientes g); Phryges suum Atyn virilibus priuatum magnae deum matri nihilominus probatum; eiusdem deae Pessinunte delapsum signum; Troes suum Palladium; Scythae tonitrua per hiemem facta et terrae motus (Herod. IV. 28.) quae omnia notationem aliquam ingeniorum vnius cuiusque populi et morum habent. Verti quoque res in artem coepit faciendi prodigia. Tunc in prodigiorum locum et nomen succedere miracula. Parum tamen caute prodigiorum nomine appellares rubum ardentem nec flamma consumtum
vocem-

f) De Aegyptiis Herod. II, 82. Τέρατα δὲ πλεον σφὶν ἀνθρώποις ἢ τοῖσι ἄλλοις ἅπασιν ἀνθρώποις.

g) Hist. gen. de la Chine, To. III, p. 429. 501.

Heynii Opusc. acad. Vol. III.

vocemque ex eo auditam, aut Nilum in sanguinem versum et sic porro. Vbi quoque alio modo prodigiis vates inter Hebraeos, et ipse Scruator, instans Hierosolymorum excidium vaticinatus: prodigia, inquit, esse apparitura in sole, et luna, et in astris: quae quidem oratio prophetica quorsum spectet, vulgo nunc intelligitur; S. Ioannes autem magnam visorum partem per prodigia praecipitavit, quibus illa aetate non parum teneri solebant animi; ut vel ex prodigiis ante capta Hierosolyma narratis intelligi potest; etsi studium hoc portenta narrandi nouaque alia comminiscendi nec per sequentia tempora cessauit; plena est barbarorum saeculorum historia omnis generis prodigiis, nec sacra saeculo XVI. repurgata animos ab his superstitionibus abduxere, ut doctissimorum hominum, Philippi Melanchthonis, Ioachimi Camerarii, cuius de ostentis liber habetur, tum aliorum exemplis fatis constat. Facilis et expedita iis omnibus erat prodigiorum interpretatio, dum ad malorum daemonum artes ac fraudes ea referrent; qua via si semel incedere libuerit, physica sane scientia omni aequo animo carebimus. Sed Graeci, Etrusci et Romani, ut ad hos populos redeamus, pleraque inter se habuere communia *h*), vixque vllum est cum omnino diuinationis tum inprimis ostentorum genus,

h) A Pelasgis, adeoque inde a Thracibus et Phrygibus, aliisque ex Asia aduenis, pleraque profecta. Itaque iam in Herodoto Xerxi Helleponto traiecto oblatum prodigium, quod equa leporem enixa, quodque mula mulam utroque sexu instructam peperit (lib. VII, 57.) Nec tamen in hac prodigiorum et miraculorum enumeratione obliuiscendum est, seiungenda esse multa nec confun-

genus, quod non inter eos populos promiscue obferuatum fit, nisi quod alius populus alii generi magis deditus et obnoxius fuit. Vt vero haec quoque, quae de Romanis dicturi sumus, ad meliorem ordinem reuocentur, agite, in classes dispescamus prodigia, ita vt referamus alia *ad aeris caelique apparentia*, alia *ad terrae marisque naturas*, alia *ad animantium, cum brutorum tum hominum*; illa vero prorsus oratione circumscripta sunt, *quae non nisi terrori animorum falsaeque persuasioni, mox fraudi ac praestigiis accepta ferenda sunt*: v. c. quod vox repente e luco audita, aut horrendi clamores, ingentesque tumultus per silentium noctis ad aures allapsi, tuba quoque in caelo canere visa; quod bos locuta, aut canis et serpens, quod infans semestris, aut adeo in vtero matris, triumphum exclamauit. Quid vanas obiectas species memoremus, quibus exterriti hominum animi ad religiones se conuerterunt? vt deos, vt Dioscuros, in conspectum mortalium venientes; vt spectra; vt hominum species candida veste procul visas (Liv. XXI, 62. add. XXIV, 10. Iul. Obf. c. 77. (16.) c. 111. (50.) vt statuas deorum modo annuentes modo respondentes; nam quod loco motae sunt, aut quod sudarunt et lacrimarunt, a causis naturalibus, terrae quassatae, humorum ex aere, repeti potest. His igitur omiſſis prorsusque sepositis nunc saltem *ea prodigia breuiter recensebimus, quae ad aeris caelique phaenomena spectant*, intraque aeris

O. 2

circum-

confundenda aut e mirabilibus a patribus acceptis narrationibus, aut ex symbolis et mythis priscoque narrantium sermone ducta, aut a sacerdotum interpretatione et ab hieroglyphis deriuata.

circumiecti ambitum, seu atmosphaeram, continentur.

In his sunt primo loco imbres insoliti, modo sanguinis, modo lapidum, modo terrae, lactis, cretae: quarum quidem rerum haud difficile est idoneam rationem reddere, ut tamen simul intelligatur, ista in iis terris narrari, in quibus, cum maris eae littoribus et Apenninis iugis mediae inclusae sint, ingentes passim exoriuntur procellae, turbinumque miri impetus; ab his enim ista prodigia profecta esse manifestum fit, dum aut terra argillacea, quae in multis Italiae, inprimis Umbriae et Etruriae, locis rubra effoditur, vnde praecleara illa Etrusca dicta vasa facta, aut creta ab imbre soluta, ut et lactis speciem referret, aut campi lapidei, cuius generis in Ligurum et Salyum finibus notissimi sunt, violentis ventis flagellati, in altum sublati mox turbinis vi iterum in terram deiicerentur. Quod si agrorum sterilitas frugumque inopia aut etiam pestilentia insequuta esse narratur, non illud abhorrens ab anno ob tempestates imbresque parum salubri. Illud vero si miremur, quod inter haec prodigia ventorum et procellarum mentionem nullam factam videmus: reputandum est, notata tantum esse in annalibus, quae prodigii speciem referrent; etsi vel sic haud raro tempestatum mentio facta est *i*); plerumque vero

i) Vt Liv. XXV, 7. Iul. Obf. c. 56. (2) Interdum cum fulminibus, aut cum terrae tremoribus coniuncta res et cum aquis ingentibus lib. XXII. 1. ib. XXX, 38. XXXV, 9. Nec vero prodigium ubique cum fide nuntiatur;

vero plura eius generis prodigia coniunctim narrantur, ut ad intelligendum in promptu sit, a causis iisdem omnia profecta esse. Semel carne pluuisse accepimus V. C. Varr. 295. adeoque fama satis antiqua, cui si quid veri inerat, etsi re in prodigium aucta, ex sacro aliquo epulo magnae procellae vi raptas carnes in alium locum delatas credere licet; ipsos Pontifices similis prodigii exemplum expiationisque modum ignorasse adiiciunt scriptores; utinam iis, antequam expiare vellent, de ipsa re, quae et qualis illa esset, diligentius quaerere libuisset k)!

In fulminum interpretatione obuia est superstitio, ut quisque facile populus in eam incidat; Etrusci tamen aruspices in artis eam ac disciplinae formam redegerunt: de qua Plinius (lib. II. s. 52.) et Seneca (Q. N. II, 12 sq. 32 sq.) consulendi sunt.

O 3

Illud

tatum; nam exiguum fere locum tales pluviae occupant: id quod nonnullis saltem locis nec adiacere neglectum. Ita in villa in Vestinis lapide pluit: Iul. Obs. 111. (50.) in aedis templorum: c. 59. (3.) c. 60 (4) Ita ibid. c. 83. (22.) In comitio sanguine fluxisse dicitur; interdum guttae tantum sanguinis visae, ut in foro, comitio et Capitolio, et terra aliquoties pluit, et caput Vulcani arsit. Liv. XXXIV, 45. quod et ipsum meteorum ad aeris electrica materia gravidam naturam ducit. Nec alio, quam quo imbres cruenti, spectant spicae cruentae in corbem lectae: Liv. XXII, 1. XXVIII, 11. Val. Max. I, 6, 5.

- k) Dionys. X, 2. Liv. III, 10. Valer. Max. I, c. Piscibus pluuisse multis locis ac temporibus, apud Athenaeum auctoribus idoneis notatum legimus lib. VIII. p. 333. maris enim fluctu in terram acto et in aerem turbinis vi rapti pisces alio loco deciderunt in terras. Similes ranarum pluviae vulgo notae sunt.

Illud forte mirum videri potest, quod in iis terris, in quibus nihil frequentius quam fulgura et tonitrua esse solent, res tam vřitata tamen in prodigium verti potuit. Sed ad haec plura responderi possunt: Seruata esse tantum ea fulmina, quae aliquid insoliti haberent, vt cum caelo sereno intonuisset; aut si loca sacra et memorabilia fulmine tacta essent, vt templa, viae, muri, portae, signa deorum, Praetorium, Capitolium. Singulare est, quod sub a. V. C. 680. memoratur de puella virgine fulmine icta, quod per locos muliebres ad os penetrauerat, lingua exserta. (Oros. V, 15. Iul. Obs. c. 97. (35.) cum Plutarcho Qu. R. p. 284. A.) at quod homines fulmine ictos et exanimatos inter prodigia retulere, mirari licet, cum ea res non adeo raro accidere potuerit.

Non attingemus stellas crinitas communi humani generis errore inter atrociora ostenta habitas; nec stellas interdiu visas; cuius generis omnino sunt infinita, nostra quoque aetate notatu digna habita, quorum tamen causae nostris physicis expeditae dudum sunt: vt duo soles, tres soles, duae lunae interdiu, tres lunae; solis orbis minui visus, aut circulo inclusus; sol nocte visus, omninoque noctu multa lux clara; caelum ardere visum, species legionum, vel armorum, vel ararum, vel nauium in nubibus visae: quae ad auroram borealem aliasque atmosphaerae affectiones spectare obuium est; vti et ardentes faces, aut transuersas trabes et arcus igneos. Flamma e terra orta et caelum visa contingere; (Iul. Obs. 103.) Stellae deciduae,

deciduae, quas vocant, seu discurrentes. Sol autem sanguineus similisque caeli facies, qualem et ipsi ante hunc annum vidimus, aliquoties extitisse videtur; vt a 542. Liv. XXV, 7. 641. Iul. Obf. c. 98. (36.) 1.) inprimis post Caesaris caedem. (v. Plut. Caes. sub. f. et alios ad Virgil. Ge. I, 466.) Venere et turbines vehementiores in prodigiorum censum, si signa deorum deiecta essent aut aedium fastigia et tecta. Reate saxum ingens volitare visum (Liv. XXV, 7.) fragor armorum in aere auditus, vt apud. Virgilium (Ge. I, 474. Iul. Obf. c. 76. 101.) Satis de primo genere. Praestat nunc, iis sepositis, ad bona omnia ac vota accedere, et numinis pacem, prosperum rerum cursum, consiliorumque vtilium successus publice privatimque precari. PP. in Georgia Augusta d. XVI. Septemb. c1515cclxxxiv.

- 1) Per omnia fere saecula similes caeli obscuraciones solisque et lunae rubores commemoratos meminere qui in rerum memoriis cognoscendis versati sunt; si tamen ista prodigia colligas, melioribus auctoribus vtendum erit, quam videmus factum a viro caeteroquin sagacissimo Iosepho Toaldo in *Offeruazioni meteorologiche*. Patavii 1783.

ACADEMIAE GEORGIAE AVGVSTAE
 P R O R E C T O R
 IO. STEPHANVS PÛTTER

CVM SENATV

MVNIFICENTIAM REGIAM

IN

CONSTITVENDIS PRAEMIIS

IN A. D. IV. IVNII

REGIS AVGVSTISSIMI NOSTRI NATALEM

DISTRIBVENDIS

CELEBRAT SIMVLQVE

COMMENTATIONVM QVAE AD CERTAMEN

IN A. D. IVNII IV. ANNI MDCCCLXXXV HABENDVM

ADMITTI VOLENT

ARGVMENTA

AB ACADEMIAE NOSTRAE ORDINIBVS

P R O P O S I T A

VNA CVM LEGIBVS MORE AC CONSILIIS CERTAMINIS

P R O M V L G A T

KAL. NOVEMB. MDCCCLXXXIV.

Vix vnquam aliquid, quod ad remp. nostram
 academicam pertineret, tanta cum iucundi-
 tate, Commilitones, vobis ediximus, quam nunc
 nouum institutum, quaestiones de capite aliquo ex
 nostris

nostris disciplinis academicis petito proponendi, a Regia munificentia profectum, vobis quidem, Commilitones, vtilissimum, nobis honorificentissimum, publico praeconio pronuntiamus. De quo quidem vt planius et accuratius vobis constet, et vt, quae eius ratio quodque consilium sit, recte teneatis, expectatur a nobis, vt nonnulla disertius de eo exponamus.

Est studiorum academicorum, quippe quae in tam angustum paucorum annorum curriculum coarctata sint, ratio fere ita comparata, vt *auditione* et *lectione* illa contineantur; quae etsi substructio et quasi crepido sit, quo quodcunque inaedificetur sustineri debeat, non tamen absoluit ipsum opus aut aedificationem. Materiam aedificandi paratis, artem et morem tractandi illam, et rationem coagmentandi, modo animi consideratio et meditatio accesserit, addiscitis; enimvero ad molem educendam alia requiruntur: *dicendi, scribendi, agendi facultas*: cumque huius, quam postremo loco memorauimus, actionis inquam, opportunitas ipsi vitae relinquenda et in illud tempus, quo officiis vitae ac muneribus admouemini, proferenda sit, potest tamen, tanquam verae pugnae, aliqua velitatio ac prolusio in certamine adumbrato multis rebus institui; dicendi autem ac scribendi exercitatio non vno modo haberi et potest et debet, quippe qua ea, quae audita et lecta erant, propria meditatione subacta et in sanguinem ac succum conuersa nostris quasi fibris humoribusque assimulantur, vt ea tandem nostra dici possint, quae

O 5 aliunde

aliunde accepta erant, vtque nobis in promptu sit, de iis rebus, in quibus studia collocauimus, dicto ac scripto agere commode, ad rem praesentem et causam ea, quae vniuerse addidiceramus, adducere, videre quid in quaque re sit, quid ad eam expediendam pertineat, omninoque vsum et exercitationem parare, eoque ipso eam agilitatem ac celeritatem agendi, tum confidentiam et alacritatem, quae ab vfu et habitu proficisci solet: quae quidem omnia sola auditione etsi infinitarum rerum comparari nequeunt. Quid quod multo vtilius multoque optatius videri debet pauca tenere, sed penitus, et ea in potestate habere sic, vt vbique, et quodocunque iis vtendum sit, in promptu illa habeas. Pertinet enim ad alia quoque studia, quod de philosophia egregie apud Senecam *) dicere Demetrius Cynicus solebat: *plus prodesse si pauca praecepta sapientiae teneas, sed illa in promptu tibi et in vfu sint; quam si multa quidem didiceris, sed illa non habeas ad manum.*

Iam in Academiis Germaniae nostrae superioribus quidem aetatibus plerumque satis habitum erat, disputationibus ingenia acuere; reliqua ad scribendi exercitationem reuocabantur, quae tamen intra sermonis Latini emendatiorem vsum plerumque contineri solebat; vt non tam de rebus quam de verbis bene Latinis quaereretur. Erat vtique aliquid praesidii etiam in hoc; qui enim semel exercitationis assiduitate in quocunque genere aut sermone sibi dicendi scribendique vsum comparavit:

*) De Benef. VII, 1.

vit: facultatem saltem sibi peperit cogitata animi verbis efferendi ac commode declarandi. Enim vero orationem vnicuique negotiorum aut rerum tractandarum generi propriam consequi, iudicandi facultatem roborare, in rebus quoque digerendis, non modo in verbis struendis, ingenii acumen expolire, haec isto saltem modo haud facile obtineri possunt. Hac tamen Latinae orationis scholastica exercitatione contentos esse videmus in iuventute erudienda etiam alios populos. Inter nostrates autem cum ab aliquo inde tempore, non minus in scholis quam in academiis, illa quoque scribendi ac disputandi exercitatio neglecta et contempta iacuisset: sentiri tandem coeptum est, facultate illa recte scribendi de iis, quae auditione et lectione acceperant, non bene nostros homines carere. Nostra itaque aetate cogitare coepere viri intelligentes ac prudentes de eiusmodi scholis habendis, quibus, cursu disciplinae academico ad metam fere peracto, subiiceretur spatium aliquod, quo audita ad ipsum usum et scribendi saltem ac tractandi facultatem transferrentur.

Quae cum praeclare constituta sint, cumque acquiescere forte in iis possint pro consilio suo aut ingenio alii, alii tamen habebunt quod conquerrantur se nimis sero nec satis praeuia aliqua facultate scribendi instructos ad illa accedere; nec sufficere siue ad ingenium siue ad stilum acuendum; omninoque in iis quae super argumento docto et ex disciplina aliqua petito, cogitando, commentando ac meditando, in orationem ac disputatio-

nem

ad manus esse; rem nihilominus esse summis votis expetendam, vt excitentur formenturque ingenia, quo aliquid proprio Marte audeant, audita explicit lectione, lectione quae explicita et amplificata sint, scriptione commoda et congrua in arenam producant; ea autem omnia, vt ingenium humanum ferre solet, priuato et obscuro aliquo conatu vix bene obtineri; certamine plurium inter se opus esse, quo acuantur vires, ingenia fuscitentur; fomitem interdum et flabellum esse admouendum; vim, robur, virtutem augeri conatu, spe, audentia; gloriae aliquam cupiditatem, honestatis studium incendendum; curandumque esse, vt locum habeat illud, quod tantam vim ad hominum animos habet, quodque vulgo dicimus: *digito monstrari et dicier: hic est*; quae quidem vna res ad generosos animos excitandos et inflammandos potentior et efficacior esse solet, quam omne consiliorum et monitorum genus aut ratio.

Haec, Commilitones, si qui ex nostris erant, qui perspecta haberent, poterat id laudi aliqua ex parte haberi; expectabatur tamen illud a nostra aetate, iudicio, vsu: etsi vt efficeremus illud quod volebamus, nemo nostrum satis habebat facultatis. Quid vero? si Is, qui primus haec perspexit, perspecta animo versauit, de exsequendo consilia iniit, consilium optimum, modum accommodatissimum, rationem maxime opportunam, congruam et consentaneam, excogitauit, illud nobis inopinantibus denuntiauit, animos nostros rei nouae admiratione percussit;

perculit; ille, inquam, Rex fuit augustissimus, indulgentissimus, GEORGIUS III. Magnae Britanniae Rex, Brunsvicensium terrarum Princeps Elector, Parens Patriae! Cuius prouida cura quum iam antea, his maxime nouissimis annis, tam multis praeclare liberaliterque institutis res academica nostra aucta sit, consequimur nouum hoc beneficium, quod vix votis expetere ausi essemus, vt ad excitanda et alenda ingenia vestra et inflammanda studia proponere vobis, Commilitones, possimus certamen publice, nobis quidem moderatoribus, ineundum, cui ea insint omnia, quae animos laudis pulchrae cupidos excitare ac stimulare possint, siue modum proponendi certaminis, siue iudicandi ac decernendi rationem, siue honorem ac praemium, quod victori ostenditur, respereritis. Quam felices vos, quibus data nunc est copia et facultas, inuitamentum adeo et incitamentum, non modo alendae doctrinae, exercendae orationis, verum et ostentandi ingenii, doctrinae publice declarandae, laudisque hinc consequendae et virtutis ex eadem laude amplificandae: ex vetere enim poetae dicto: *virtus laudata crescit* *).

Constitutum itaque et edictum est a Rege nostro Augustissimo, vt singulis annis a quaternis nostrae Academiae Ordinibus quaterna proponantur certamina super re, sententia, loco, capite, quae-

*) Αρετὴ γὰρ ἐπαινεομένη, δένδρον ὡς, αἰξεται. ap. Clement. Alex. Praedeg. I, p. 131. A. Sylb. vnde Ouid. ex P. IV. 2, 35. *Excitat auditor studium; laudataque virtus crescit, et immensum gloria calcar habet.*

quaestione, problemate, controuersia, ex singulis disciplinis deprompta et publice promulgata; utque commentationi, quae quidem iudicio Ordinis cuiusque Professorum iudicata fuerit praefenda esse ceteris, adiudicetur *praemium*, quod Indulgentissimus Rex de re sua priuata erogatum *numo auro XXV. aureorum ducatorum pondo et valore* esse voluit. Praemia in singulos annos Liberalitas Regia proponi iussit. Fiet diiudicatio pronuntiabiturque publice in Auditorio academico *die natali Regis nostri*, qui est *M. Iunii quartus*; nam et hoc desiderii nostri concessit Principis indulgentia. Eodem die nouae concertationis argumenta in annum sequentem proponuntur; id quod nunc temporum ratio alio mense ac die paullo serius facere coegit.

Regia igitur auctoritate ac munificentia constitutum esse edicimus, ut *singulis annis quaterna argumenta concertationis* ineundae publice vobis, Commilitones, proponantur: materia huic vestrae scriptioni petita erit ex iis disciplinis, quae Ordini cuique assignatae esse solent; quo ipso expectare licet varietatem aliquam ac diuersitatem propositarum rerum, ita ut modo ex hac, modo ex illa disciplinae parte aut genere (disciplinam specialem vocant), modo ex litteris disciplinisque eius patrimonio accensis, petatum sit id, de quo commentandum a vobis erit; uti Theologiae historia ecclesiastica, Philosophico Ordini, mathesis cum physica, historia, et philologia litteras orientales, graecas, romanas, complexa, adnumerata esse solet; spectabit adeo eius, quod ponetur, dilectus ac diiudi-

diinductio, quotiescunque illa fiet, inprimis ad eum, ad quem, actatis in vno quoque ordine habita ratione, muniis in orbem redeuntibus, vices illae peruenerint, Decani tamen cura, auctoritate et auspiciis. Facile, nobis vel non monentibus, assequimini, Commilitones, dilectum habitum iri problematis hunc, vt ex iis, quae in lectionibus ad tradendam disciplinam habitis occurrere vel attingi solent, caput vel locus paullo grauior feligatur, vestris annis, studiis, viribus accomodate, ita quidem vt cum diligenti lectione, tum meditatione ac contemplatione, facile expedire et enodare quaestionem propositam vobis liceat. Ita vnusquisque vestrum publice edito specimine declarare poterit, quantum in disciplina addiscenda profecerit, quantum ingenii virium, quantum facultatis ea, quae didicit, calamo et scriptura eloquendi et proponendi, quam orationem, quod genus scribendi sibi comparauerit. Licebit ita Professoribus de iis inter vos, qui commendatione nostra aliquando fortunis suis aut laudi consultum esse volent, certius et tutius cognoscere et statuere. Ad aliorum autem de vobis iudicium quantum ponderis et auctoritatis accessurum esse putatis iudicio simili ex scriptione vestra publice praemio Regio ornata!

Admittuntur autem ad certamen omnes cum indigenae tum exteri, quotquot in Georgia Augusta hac nostra studiis operam datis, Ciues, etiam examinandi ac promouendi ad honores summos academicos; nec excluduntur praeterquam qui, illo
quidem

quidem tempore, quo euulgata erat quaestio, examine cum stetissent, honores academicos decreto Ordinis sui iam sunt consequuti: hos utique a certamine abstinere fatius est; de eorum enim doctrina iam iudicium factum est illo ipso nouo honore delato; et habent illi alia consilia, tum industriae acuendae praesidia, nec aequum esse videtur, ut veterani iis, qui stipendia adhuc faciunt, praeripiant sua decora ac praemia proposita. Consultum autem esse iudicabitis, id quod ipsa res satis docet, ut ad scriptionem se non accingant nisi qui in disciplinarum curriculo aliquantum spatii iam sint emensi.

Curabitur porro a vobis, ne commentatio sit aut foedis, perplexis et molestis ductibus obscurata; aut nimis protracta, proluxa ac verbosa; spectat etiam ad ipsam subtilitatem dicendi ac scribendi, multo magis super argumento e disciplina aliqua petito, ut non nisi quae ad rem declarandam faciant, apponantur, oratione quidem perspicua, plana, tersa, venusta; nullis verborum cincinnis fuce et calamistris adhibitis, quippe quae a re et consilio aliena sunt.

Oratione uti licebit alia nulla quam Latina; nisi cui libuerit Graeca uti; vernacula exclusa esto omnis: hoc expresse ex Regia auctoritate a nobis pronuntiatur. Etsi enim neminem latet, quam multa bona ad disciplinas peruenerint ex usu linguae vernaculae in eas illato: ingemiscimus tamen nunc clam palamque omnes et per cunctas Germaniae

sentiunt, quod industriae et studii calor refrigit, maxime doctiorum litterarum, quae lectionis variae opes suggerere et infinita ex antiquitate subsidia et adminicula suppeditare poterant ac debebant. Cum non omnes litterae intra mathematicarum ac physicarum disciplinarum fines inclusae sint; quae forte disciplinae antiquis litteris carere possunt, si nil quaeritur quam quod nostra aetas de his rebus commentata est: at reliquae disciplinae litteris graecis latinisque carere non possunt; ex librorum sacrorum legumque interpretatione magnae magnique momenti disciplinae pendent; sunt autem illi libri antiquo sermone scripti, nec, nisi grammaticas copias afferas, recte intelligi possunt; praeterea historiae cum rerum gestarum, tum ipsarum disciplinarum, quomodo sine veterum scriptorum lectione cum fide tradi possunt? quod vero rei arx et caput est, liberalis aliqua institutio, qua iudicium, gustus et amor pulchri ac veri in oratione, scriptione, in artibus artiumque operibus, vnde petenda erit, nisi ex lectione praestantissimorum omnis aetatis scriptorum? Ad hanc igitur mature informanda sunt ingenia nostra. Pellimo errore feruntur, qui omne hoc studium in lingua Latina per se addiscenda positum esse volunt: non linguam curamus; etsi lingua est grammaticis rationibus optime superstructa, expolita et disciplinis tradendis accommodata; sed ea, quae eius linguae beneficio consequi licet, grammaticae perfectae exemplum ad quod alias linguas comparare possimus, logicae bonae et interpretationis callidae praecepta

et vsum; ea curamus, quae ea lingua vñ viri summi scripsere, scripta posteritati reliquere. Huius itaque linguae studio onisso et neglecto, nulloque sermonis docti vñ parato, ne libros quidem de disciplinae suae grauissimis capitibus latine scriptos legere possunt multi, aut lectiones latine habitas assequi; quid? quod ne suae quidem vernaculae vñ facile consequi solent satis castum et elaboratum et ad grammaticam subtilitatem constitutum. Haec ac multa alia perspecta cum haberet Regis augustissimi sapientia: vt sermonis Latini honos firmaretur, et barbaries, quae iam tanquam contagione aliqua grassari coepit, reprimeretur, Regia auctoritate sanxit, vt latine scriptiones exarentur, quae in certamen proditurae sint.

Eaedem hae commentationes, quae ad certamen admitti volunt, in posterum ex lege ante Kalendas Martias, Apriles saltem, redditae sunt. Curabitur autem ab auctoribus, vt ipsi lateant iudices suos: mittent igitur ad Prorectorem, vel ad Decanum, aut si quis malit, ad quemcunque alium Professore eius Ordinis, ad quem quaelibet quaestio spectat, libellum suum bene obsignatum, nullo nomine appposito, nullo sui indicio, vestigio aut suspitione iniecta, verum perscripto nomine in schedula obsignata, cui dictum aliquod vel versus inscriptus sit, qui idem in commentationis fronte legatur.

Cum hac via ac ratione cautum esse velimus, ne vlla suspicio locum habeat, ac si in gratiam ac-
studium

studium cuiuspiam aliqua indicatio facta sit; diligenter cauebitur et illud, ne commentatio, alieno Marte elaborata, nobis obtrudi a quopiam possit; quod ne fiat, non modo vestra cuiusque fide et honesta indole confidimus, verum multis variisque aliis viis ac modis, de quibus inter nos conventum est, dum Professores omnes ac singuli ei rei inuigilabimus, prouidebitur. Quod si tamen fraude ac dolo malo alicuius commissum fuerit, ut praemium is non suae sed alienae doctrinae et ingenii consequatur, extemplo publice flagitium hoc proscribitur, actis litterariis publicis euulgatur, et nota iniusta falsario dedecus summum infligitur.

Commentationi victrici praemium, ut diximus, constitutum esto nummus aureus XXV aureorum ducatorum valore, procusus ad hunc ipsum usum, et Regis augustissimi imagine efficta insignitus. Quaternis itaque scriptionibus victricibus quaterna praemia singulis annis adiudicantur, et IV Iunii, Regis nostri natalis die, nobis vere sollenni ac festo, persoluantur. Instituatur ex edicto sollennis coetus in Auditorio publico, seu templo Academico, praesente Prorectore, actus sollennis huius arbitro et moderatore, et Professorum corpore. Praefabatur nonnulla et sub finem sollennium subiunget e cathedra Professor eloquentiae, academiae orator et interpres; edicet et nuntiabit, quae, et quibus verbis praescriptis, redditae sint scriptiones, quid de singulis iudicauerit Ordo, ad quem eae spectent, tum quae eius iudicio praeferenda esse videatur ceteris; interea a

Decano eius Ordinis schedula soluetur, inde lectum nomen e cathedra publice pronuntiabitur. Eaedem commentationes victrices Regia munificentia prelo excusae ad Regem optimum ac munificentissimum mittentur: id quod diserte Regia auctoritate nobis est iniunctum. Quod si alia qua commentatio fuerit, digna laude publica, quae proxime ad victricem accessisse visa fuerit, ea publice laudabitur ac commendabitur, auctoris quoque in Programmata mox euulgando nomine pronuntiato.

Inter haec, Commilitones, quid animi futurum esse putabitis ei, cuius scriptio victrix publice pronuntiata, utque praemio tam praeclaro ornatur, et ut ad Regem mittatur, digna iudicata fuerit? Frigus glaciale et stuporem plus quam Scythicum obsidere pectus diceretis illud, quod non cogitatione tantae laudis subsiliat. Vos iam animis arrectis haec legere, novae laudis studio et cupiditate incalescere, consilia agitare, successus animis praecipere, videre nobis videmur.

Conuentu sollenni, die IV Iunii, ut supra dictum est, habendo, quo praemia assignabuntur, etiam in subsequentem quemque annum promulgantur, moxque una cum victorum nominibus prelo exarata publice vulgantur, argumenta futurarum scriptionum. Idem in praesenti facimus, et in annum proximum, qui LXXXV saeculi est, problemata, de quibus commentatione agendum erit, promulgamus. Constituta igitur sunt capita controuersa ac quaestiones ab Ordine quoque ex suae disciplinae finibus hae: et quidem.

A THEOLOGICO ORDINE

Homicidium in semetipso patratum, — *Suicidium* vulgo vocant — iustumne est secundum Christi praecepta et dogmata; an iniustum? — Si iustum: num omnino, et ubique; vel nonnunquam tantum; et quando? Licetne, ut exemplo utamur, homini calamitatibus grauissimis obruto, Dei iussu e loco suo se euocatum censere, ideoque αυτοχρησθαι fieri? — Sin autem propria manu sponte cadere nefas est; quibusnam ex causis ita statuendum erit? In tractanda hac quaestione id potissimum est agendum; ut primo a iusta definitione progrediatur oratio, eamque ob causam ius hominis in vitam propriam acute describatur; deinde, ne omnia misceantur, sed diuersae suicidii rationes ac modi probe discernantur; tandem vero sedulo disquiratur, quid et quantum valeant argumenta, quibus facinus hoc vel defendi solet, vel culpari ac damnari.

A IVRIDICO ORDINE

Quodnam sit fundamentum successionis ab intestato iure Romano antiquo? Quibus ex causis illud immutatum sit a iure Iustiniano?

A MEDICO ORDINE

Oleorum vnguinoforum alia magis, alia minus, prout ab artificibus, ita et a medicis, vario scopo opportuna vulgo censeri, res nota est. Quum tamen in haud paucis promiscuo vsui locum esse sagaciores existiment: ad sedandum

hocce diuinitum experimenta naudu parum lacere
Ordo medicus arbitratur, quibus olea huius ge-
neris in re medica vsitata, ratione notarum sen-
sibus obuiarum, grauitatis specifica, frigoris
calorisque in ea efficaciae, miscibilitatis cum
aqua ope commodi adiuuantis, effectus eorum
in sulphurea, salia et metalla, quae medici cen-
sus sunt, item virtutis in vermes infectaque viua,
inter sese conferantur. Hoc igitur argumentum
in disceptationem de praemio Regia munifi-
centia oblato Commilitonibus honoratissimis
proponit.

Ab ORDINE PHILOSOPHICO, NVNC QVI-
DEM QVAESTIO AD PHILOLOGIAM, ET
QVIDEM SACRAM ORIENTISQVE
LITTERATVRAM SPECTANS

Sacris literis perfectius intelligendis multum con-
ferre potest Calendarium Palaestinae oeconomi-
cum, ex itinerariis collectum: quo quid nomine
intelligamus definiendum. Enotanda sunt ex
itinerariis ad omnes anni menses, pluuiarum,
niuium, coeli fereni, tempora, magis in Palae-
stina, quam nostro sub decliuore coelo, stata
ac certa, sationis, floris, maturitatis messisque,
tritici, zae, hordei, oryzae, milii, arborum
quoque et herbarum, quibus florent, maturos-
que fructus legentibus, offerunt, vindemiae
maxime, cum primae tum secundae. Eius-
modi ergo calendarium vt ex itinerariis Palae-
stinae, quorum copiam dabit bibliotheca acade-
mica,

mica, conficiant de praemio certaturi, poscitur, et vero semper addito testis non solum nomine, sed et pagina itinerarii vbi id testatur.

Palaeestinae regionibus cum non eadem sit coeli temperies, sed alia circa Hierichuntem, (haec quidem feruidissima) alia Hierosolymis, in Galilaea, Samaritanis in montibus, in Libano, subiectisque ei vallibus: semper et enotandum, vbi testis id, quod ex eo refertur, viderit. Porro veteres cum non eodem, quo nos, vsi sint calendario, dies ab illis notati ad nostrum referendi, idque ita, vt in ipsa orationis serie dies calendarii nostri ponantur, veteris parentesi inclusi addantur. Quod vt facilius sit colligentibus, sciant, veteri calendario ab anno inde 1700 *dies undecim*, ante illum, *dies decem* addendos esse, vt nostri calendarii diem habeamus, calendario autem vetere vsos esse, *omnes usque ad annum, 1582. — euangelicis sacris addictos in Germania, Danos, Batauos, usque ad annum 1700 — Britannos usque ad annum 1752, — Suecos usque ad annum 1753.*

Caeterum ex folis haec itinerariis colligenda, non ex sacris litteris, non ex Thalmude, aliisque scriptis Iudaicis, ac ne transferenda quidem ad sacras literas illustrandas, ne et nimio labore scribentes distineantur, et moles ipsa scriptionis, aut coniecturarum multitudo, impedimento sit legentibus. Poterunt vero praeter ipsius Palaeestinae, etiam earum regionum Asiae et Africae

excerpi et in subsidium vocari itineraria, quae eidem cum Palaestina coelo subiectae sunt, id est, a gradu latitudinis 30 vsque ad 34, siue adeo 35; (post quem Thapsacus, vltima versus Boream regni Israelitici). Aliarum; quae magis ad Austrum vergunt, inprimis Aegypti, ob immensas planities multo calidioris, ratio nulla habenda.

Cum autem hac quidem prima vice paullo serius indicia sint problemata. de quibus commentandum sit: dies, ante quem redditae sunt commentationes, esto anni instantis II *Aprilis*; at quae serius reddentur, in certamen admitti haud poterunt.

Quod superest, Commilitones, grata ac pia mente deuenerabundi Regiam munificentiam et amorem litterarum, rerumque nostrarum adorate, et ad vestros animos erigendos diligentiamque ac studium acuendum inflammandumque hinc causas petite. Quam singulari et inuidendo prorsus beneficio recreemur, videtis. Non nunc habemus quod vereamur, ne eueniat illud, quod apud Tacitum legimus „*sublatis studiorum pretiis etiam studia peritura* *); quod, quoties legimus, animum contristatum ad tot exempla regnorum ac terrarum circumferre solemus, quae dicto fidem faciunt plus quam vsu rem firmatam agnoscere malle. Litterarum studia in terris nostris, tantum abest, vt contemptui aut neglectui sint, vt potius summum Regem iis animum adiungere, incrementa eorum
cordi

*) Tacit. A. IX, 7.

cordi habere intelligatis, cum et Ipse in mathematicis et physicis curarum relaxamenta quaerere soleat. Ad vestra ingenia et studia excitanda, quid tandem esse, quid cogitari potest potentius et efficacius, quam si animis reputetis, Regis tanti, tam sapientis ac munifici, liberalitate vestrae laudi ac decori esse praemiis propositis prouisum! fore Eum ipsum, cui studia vestra et ingenia innotescant, nomina renuntientur, specimina ante oculos ponantur! Quin vos nobiscum pro salute et incolumitate optimi ac munificentissimi Regis vota deuotis mentibus facite. PP. in Georgia Augusta Kal. Nouemb. cldccclxxxiv,

XIV.

ACADEMIAE GEORGIAE AVGVSTAE
P R Æ C T O R
IO. STEPHANVS PÛTTER
CVM SENATV
CIVIVM SVORVM

QVI
IN CERTAMINE LITTERARIO
IN A. D. IV IVNII

REGIS NOSTRI AVGVSTISSIMI
N A T A L E M
CONSTITVTA EIVS MVNIFICENTIA
PRAEMIA

ORDINVM ACADEMICORVM IVDICIO ABSTVLERVNT
NOMINA PROMVLGAT
SIMVLQVE
COMMENTATIONVM

QVAE
AD CERTAMEN IN A. D. IVNII IV. ANNI MDCCCLXXXVI. HABENDVM
ADMITTI VOLENT

ARGVMENTA
AB ACADEMIAE NOSTRAE ORDINIBVS
PROPOSITA
PROMVLGAT
M. IVNIO MDCCCLXXXV.

Noui moris folleae festum celebratum vidistis,
Commilitones, eique celebrando interfuistis,
cui simile in nostra, forte nec in alia Academia
illuxit

illuxit nullum; eratque illud ita comparatum, vt
 causae hilaritatis publicae non ad vnum aliquem
 Ordinem, non ad solos Professores, ad Ciues Han-
 noueranos, spectarent: verum communes vt essent
 laetandi causae omnibus vobis, quotquot Musarum
 contubernio, litterarumque hac necessitudine
 et communitate, habemini. Omnes enim vos at-
 tingere, ad vos spectare, vestrosque animos, Com-
 militones, commouere necesse erat illud, quod
 communia vestra studia iuuare, alere, incitare,
 multo magis quod ea ornare, in lucem educere,
 praemiisque afficere deberet: idque si ad vos cum
 maxime pertinere arbitrabamini, fieri non potuit,
 quin auctorem quoque tanti beneficii, tantae feli-
 citatis, communi veneratione et pietate colendum,
 et festum diem in eius honorem celebrari solitum
 a vobis quoque vniuersis sollennem sanctumque ha-
 bendum, et panegyri publicaue laetitia rite cele-
 brandum putaretis. Erat autem dies natalis Regis
 nostri Augustissimi, GEORGII, M. Britanniae
 Regis, terrarum Brunsvico-Luneburgensium Prin-
 cipis Electoris, quem saluum et incolumem rei-
 publicae saluti ac prosperitati inuigilantem laetaba-
 mur ac gratulabamur, votisque ac precibus, id
 quod etiamnum facimus, Deum O. M. obsecraba-
 mus, vt Parentem nostrum ac Nutritorem com-
 munem omnibus publicae priuataeque felicitatis bo-
 nis cumulare, vt Reginam Augustissimam, stirpem-
 que Regiam florentissimam, suae tutelae mandatam
 esse iuberet, eamque ab iis malis ac casibus in-
 tactam esse vellet, quibus, vt fors humana fert,
 numerosae sobolis felicitas obnoxia esse solet. Pietas
 igitur

fificiebatur, qua nos commune Principis ac Ciuum
vinculum obstringit, aut qua nos adigunt commu-
nes in terris Brunsvicensibus collocatae fortunarum
fedes; verum alit et inflammat pietatem nostram
multo magis id, quod ad vos omnes, quotquot
his sacris nostris adfuistis atque haec legitis, spectat,
communis haec litterarum parens, alma Georgia
Augusta, commune hoc Musarum domicilium, com-
munis hic quasi conuictus, communes hi discipli-
narum bonarum fructus, qui ad ingenia vestra fin-
genda, polienda, ornanda, ad humanitatem me-
liore cultu et honore amplificandam, felicitatem
suae cuiusque patriae, suorum popularium, vni-
versae Germaniae, proueniunt. Quod enim haec
omnia litterarum ac studiorum instrumenta, appa-
ratus, opes ac copiae, in hac litterarum tanquam
metropoli cumulate adfunt, quod earum opum
procuratores ac promi haud desunt, qui liberaliter
impertiant vestrisque vsibus litterarum penum locu-
pletem aperiant: curae et beneficio optimi Regis
debetis; quem deuenerabundi nominaremus, etiam
si in communi tantum eorum, quae curis publicis
administranda sunt, numero Academiam quoque no-
stram haberet; iam autem singulari aliqua cura et
amore res nostras Ille amplectitur, munificentia-
que regia etiam noua subinde ornamenta ac decora
nostrae Academiae meditatur; inque his consilium
iniit, quo vestra studia, Commilitones, alere et
excitare voluit, cuiusque caussa idem ille noster
confessus, ille coetus vester, in a. d. IV. Iunii in-
dictus erat. Hoc enim ipso die edicendum erat
publice

dierant super quaestionibus superiore anno vestris studiis propositis. Meministis scilicet constitutum esse sancitumque Regio Edicto, vt quotannis quatuor quaestiones de re aliqua, a vestris studiis, annis et profectibus, haud aliena, proponantur, singulae a singulis Ordinibus; cuius instituti consilium iam illo tempore, quo illud indictum fuit *), fatis a nobis est declaratum, vt ii, qui litterarum curriculum iam fere exegerunt, ita vt studia sua mox in forum ac populum prolaturi sint, opportunitatem habeant, qua allecti et impulsu ea, quae didicere, animo recolant, digerant, et oratione ac scriptione exponant, ingenii autem, iudicii, doctrinae et artis, qua ea, quae ipsi didicerunt, excogitarunt aut assequuti sunt, aut aliis sunt tradenda aut negotiorum cura et gestione declaranda, specimen et documentum publice edant: quo intelligi possit non a nobis modo, verum etiam ab aliis, quantum quisque litteris profecerit; et animi ingeniique viribus valeat. Quandoquidem autem in iuuenili aetate haec opera, haec animi contentio, haud facile a multis suscipitur, nisi externa aliqua impulsio accesserit: quid tandem potentius et efficacius esse putabimus hac publica contentione, ad quam multi confluunt, iique aequales, et iisdem magistris, quibus profecistis, iudicibus et arbitris? Non igitur ii modo, qui praemium obtinuerint, vtilitatem et fructum ex hoc certamine sperare debent, verum nec minus ii omnes pro
praenio

*) V. *Programma sup. anni in a. d. Iunii 1V.*

praemio vtilitatem magnam reportabunt, qui adduci se patientur, ut animorum vires intendere assuescant, ut reddendis ac cum subtilitate aliqua et cura perscribendis iis, quae auditione et memoria complexi sunt, manum admoueant, iudicium acuant, utque scientiae suae et doctrinae defectum intelligant, quodque superest curriculi academici ad defectum illum explendum adhibeant, studii vero sui vini et contentionem augeant et accelerent. Hae sunt vtilitates illae, quae unicuique vestrum, Commilitones, propositae sunt, illo saltem studiorum vestrorum momento et articulo, cum rudimenta dudum deposita, progressus autem facti sunt ii, ut iam cortice vestro natare conemini. Latini autem sermonis, quo illa perscribenda sunt, necessitas imposita est, quoniam hoc viatico, hoc instrumento, nullus viator, qui per litterarum fines iter, vel vnus diei, instituturus est, satis bene carere potest; nisi ille, vbi alii acute vident, ipse lippire, vbi alii copiis instructi incedunt, ipse paupere cultu mendicare, stipe tenui contentus, per dumeta repere, malit. Nil utique refert, quo sermone animi cogitata eloquamur: modo subtiliter dicta et acute excogitata sint; enimvero an latine scriptos libros aliquis euoluerit, doctrinae opes in ingenium suum congefferit, id ex eo intelligitur, si latine scribere ipse haud refugerit. Ad has tamen vtilitates, ut iuuenilis aetas fert, pauci vestrum aut contenturi aut peruenturi forent, nisi certaminis ardor pectus inflammaret; hunc autem ardorem incendit praemii spes, quod munificentia Regia nouo prorsus et insolito exemplo proposuit. Est enim

enim constitutum a Rege praemium in singulas
scriptiones victrices numus aureus XXV. aureorum
ducatorum Regia effigie insignitus. Qua in re etfi
Regiam voluntatem artifex destituerat, qui numo
cudendo typum chalybe exsculpere receperat, no-
luerat tamen optimus Rex diem edicendi victores
differri; verum edicto Regio iussi eramus, in a. d.
IV. Iunii indicto coetu sollenni de scriptis in cer-
tamen missis sententiam publice ferre, et, quanam
ceteris ingenio, doctrina, arte, praestare visa esset,
pronuntiare.

Vt igitur Regio iusso pareremus, de singulis
quaestionibus, deque scriptis in certamen prolatis,
et de iudicio arbitrioque Ordinis cuiusque super
scriptis ad singulas quaestiones missis, actum est et
pronuntiatum in illa panegyri; nunc autem curan-
dum est a nobis, Commilitones, vt edicantur pro-
ponanturque scripto hoc publice nomina eorum,
qui victores renuntiati fuere; exponetur omnis cer-
taminis fortuna, et promulgabuntur quaestiones in
futurum annum ad concertandum propositae.

Vt autem ab *Ordine Theologorum* initium fa-
ciamus, proposita erat ab eo quaestio haec:

Homicidium in semetipso patratum, — *Suicidium*
vulgo vocant — iustumne est secundum Christi
praecepta et dogmata; an iniustum? — Si ius-
tum: num omnino, et vbique; vel nonnun-
quam tantum; et quando? licetne, vt exem-
plo vtamur, homini calamitatibus grauissimis
obruo, Dei iussu e loco suo se euocatum cen-
sere,

fere, ideoque *αυτοχυρα* fieri? — Sin autem propria manu sponte cadere nefas est; quibusnam ex causis ita statuendum erit?

Traditae sunt Theologorum Ordini *commentationes septem*: inter quas ceteris praecellere ille iudicavit sequentes:

primo loco eam, quae verba inscripta habet:

Prima sequentem non dedecet in secundis consistere,
ab his autem verbis incipit: (nam alia scriptio eodem dicto praescripto reddita est) *Quo magis in expendenda causa aliqua &c.*

proximo eam, quae versus ex Aeneide in fronte ferebat:

*Qui sibi letum infantes peperere manu lucemque
perosi Proiecere animas.*

duas porro, alteram inscripto Epicteti dicto ex Arriano, alteram Martialis versu:

Fortiter ille facit qui miser esse potest.
accessit et illa, quae dictum praefert:

*Prima sequentem honestum est in secundis
tertiusque consistere.*

Iam illam, quae primo loco commemorata est, ceteris omnibus palmam praeripere iudicavit Ordo Venerabilis; soluere enim visa est propositam quaestionem argumentis idoneis, et iudicio acuto, quod et in ea parte elucescit, qua asserta sua propugnat et ad dubitationes, quae aduersus ea proferri soleant, respondet, subtiliter utique dubitationibus ac difficultatibus ad certum ordinem revocatis et expeditis. Rerum omnino dilectu et lucido ordine se commendat; oratio est perspicua, pressa, simplex et tersa, dictio latina et pura, passim
adeo

adeo exquisita. Propter tot egregias dotes commentationem hanc, inscriptam his verbis

Prima sequentem non dedecet in secundis subsistere,
principem locum tenere, et *praemio proposito dignam*
esse iudicauerat Theologorum Ordo. Resignata
inde a Decano Ord. theol. schedula adiecta nomen
publice recitatum est:

GOTTFRID ERNESTVS GRODDECK *Gedanensis*:
idemque Seminarii philologici sodalis. Proximo
ad illam loco *accedere* visa est altera commentatio,
versu insignita: *Qui sibi letum &c.* Cuius auctorem
se esse mox professus est GE. GVIL. BLOCK *Ratze-*
burgensis.

Quaestio a *Iuridico Ordine* proposita haec erat:

Quodnam sit fundamentum successionis ab intestato iure Romano antiquo? Quibusque ex causis illud immutatum sit iure Iustiniano?

Ad hanc quaestionem in certamen descendebant XII ex vobis, Commilitones, iique tantum non omnes ingenii sui, suorum profectuum, suaeque in pertractando aliquo doctrinae capite facultatis, peritiae et usus, specimen ediderunt praeclarum, ita ut Ordo virorum consultissimorum diu ambiguus et incertus haereret, cui ex multis adiudicandum esset praemium, utque ille non mediocrem laetitiae et iucunditatis fructum ex hac ipsa sua dubitatione iam tum ferret; nulla enim erat scriptio, quae prorsus indigna aut certamine aut praemio haberi posset. Erant autem XII illae commentationes his insignitae sententiis:

Heynii Opusc. acad. Vol. III. Q

I.

*II. Tentanda via est, qua me quoque possim
Tollere humo, victorque virum volitare per ora.
Virg. Georg. III.*

III. Et voluisse sat est.

IV. Omne capax mouet urna nomen.

V. Amant alterna Camenae.

VI. Dubitare et aliquid nescire ausi sunt.

VII. In obscuris inspicere solet, quod verisimilius est.

L. 114. D. de R. I.

VIII. Nulla pallescere culpa.

IX. Extremos pudeat rediisse.

X. Non habeo ingenium; sed rex sic iussit; habebo.

XI. Felix, qui potuit rerum cognoscere causas.

XII. Omnia conando docilis sollertia vincit.

Cum diu anceps cura ac dubitatio viros consultissimos tenuisset, tandem quatuor istae, quas sub

VI. Dubitare et aliquid nescire ausi sunt.

V. Amant alterna Camenae.

XI. Felix, qui potuit etc.

IX. Extremos pudeat rediisse.

memorauimus, industria, studio et subtilitate in rebus exponendis, vna (No. XI.) etiam sermonis concinnitate, ceteras commentationes antecellere visae sunt, ita vt illa, quae quidem Nro. VI. sententiam praefert:

Dubitare et aliquid nescire ausi sunt.

primum locum occupare iussa sit. "In his, quae in prima scriptionis parte de antiqua successionis ratione diligenter disputauit, specimen auctor dedit tractationis criticae, sintne liberi sine sexus discrimine Leg. XII tabb. vocati ad successionem; quod visum est Iulio Paulo et Iustiniano, cum ipse

ipse filias tantum praeteritas esse censeat. Agnouit Ordo in propositis argumentis ingenii acumen, etiam si in Ictorum sententia nihil immutandum esse existimet. In altera scriptionis parte, in exponenda totius successionis ex iure nouiori ratione, ea laude versatus est, vt reliquorum commilitonum diligentiam longe superauerit." Reliquae tres:

V. Amant alterna Camenae.

XI. Felix qui potuit.

IX. Extremos pudeat rediisse.

accedere ad illam et secundum locum iudicatae sunt tenere. Aperta mox schedula, Nro. VI. adiecta, ab Ord. Iurid. Decano, recitatum est victoris nomen:

GUSTAVVS HVGGO *Badensis.*

Declararunt altero inde die ii quoque nomina sua, qui *secundum locum* tenere iudicati sunt: No. V. JOACHIMVS SCHWARZKOPF *Hannoueranus*, XI. ABR. FRIDERICVS DE MVTACH *Bernensis*, et IX. HENR. GVIL. BERGSTRÄSSER *Hanouiensis.*

Proclamato nomine eius, qui a Iuridico Ordine praemio ornandus erat, processum est ad eam quaestionem, quae a *Medico Ordine* promulgata erat.

Oleorum vnguinoforum alia magis, alia minus, prout ab artificibus, ita et a medicis, vario scopo opportuna vulgo censer, res nota est. Quum tamen in haud paucis promiscuo vsui locum esse sagaciores existiment: ad sedandum hocce dissidium experimenta haud parum facere Ordo medicus arbitratus est, quibus olea huius generis in re medica vsitata, ratione notarum

fenfibus obuiarum, grauitatis specifica, frigoris calorisque in ea efficaciae, mifcibilitatis cum aqua ope commodi adiuuantis, effectus eorum in sulphurea, falia et metalla, quae medici cenfus funt, item virtutis in vermes infectaque viuæ, inter fe fe conferantur.

Non fine magna voluptate Ordo medicorum Exper. duas fcriptiones, quae de praemio concertarent, redditae accepit; vtramque laude dignam, nec modo diligentis lectionis et copiofae materiae conquirendae, eiusque fcite disponendae et cum iudicii acumine adhibendae; verum id quoque, quod potiffimum fpectauerat Ordo medicorum, effectum eft, vt experimentis fagaciter institutis oleorum vnguinofoꝝ naturam, quatenus quidem illam cognofcere medicus laboret, diligentius et accuratius, quam adhuc factum erat, exploratam darent. Quae quidem res vti tanto maiorem laudem habere videri debuit, quandoquidem a viris iuuenibus, qui nondum in ftudiis confenuere, intra paucorum menfium fpatium, et per aliorum ftudiorum interualla, negotium illud curatum ac perfectum eft; ita non minus excufationem potuit habere, fi nonnulla effent, quae in vtroque libello defiderarentur. Et fi enim vterque ad quaeftionis fummam recte refpondit, cum tamen plura eius fint capita, fingula figillatim pertractata funt a neutro auctore; id quoque neutri curae fuit, vt in caufas discriminis oleorum iftoꝝ inter fe feuerius inquireret, fintne illae ab ipfa oleoꝝ indole et natura, an a rebus externis, accidentibus, forte

in

in nonnullis a modo et ratione, qua, cum maiore copia parantur, illa olea miscentur ac subiguntur, petendae. Haec quidem de utroque: nunc de singulis.

Alter libellus, verbis Quintiliani inscriptus:

Si quid desit operi, id suppleat aetas, et si quae sint dicta iuueniliter, pro indole accipiantur.

ab iuvene docto profectus est, qui experimenta suo Marte instituit super granitate specifica istorum oleorum; etsi desiderari potest accurata notitia et narratio modi quo instituta illa sunt; quatenus tamen olea ea aqua misceri possint, variis modis exploratum dedit; inter quae illud obseruatu dignum, quod in nonnullis euentus diuersus fuit ab eo, quem cl. French experimentis suis vidit contingere; experimenta quoque multa variis oleis adhibitis in lumbricis ex humano ac porcino corpore, tum in lumbricis terrestribus, fecit, pauciora ad declarandam dulcedinem oleorum, et in salibus ac metallis; illud vero inprimis laudi cedit, quod, quae ex istis experimentis necessario et sua sponte sequantur, sagaciter perspexit et exposuit.

Alter inscriptus est:

Nec casta liquidi corrumpitur usus oliui.

Etsi desiderata sunt ea, quae artem olea vnguinosa cum aqua commiscendi declararent, tum ea quoque, quae oleorum istorum vim et effectum ad insecta viua vermesque extra humanum corpus, respiciunt; omnino tamen in ceteris experimenta afferuntur maiore copia, eaque feliciter satis instituta: in quibus magno cum labore suscepta sunt ea, quibus

bus aciditas oleorum cum aciditate ex adipibus animalium comparatur; laudem porro mereri visa est sollers industria, qua grauitas specifica, et coagulatio eorum ex gelu declarata est; maiore etiam numero ac varietate facta experimenta cum salibus, ad saponem ope eorum conficiendos, et cum metallis, imprimis ad soluenda ea his oleis adhibitis; nec neglecta erat oleorum istorum vis et efficacia ad corpora terrea. Quod si in votis habendum fuit, ut, cum respectu ad medicinam habito quaestio proposita esset, auctor commentationis tam doctae experimentorum suorum rationem, consilium ac vim curatius ad ea praeparata, quae in materia medica iam recepta usu sunt, vel formulas medicas, quae ad lectos aegrorum praecipiuntur, retulisset, utque ea, quae ex eius experimentis inferri ac colligi possunt, dilucidius exponendo lectoris studium cognoscendi adiuuisset: ingenii tamen sui ad noua inuenta felicitis et pertinacissimae in chemicis laboribus exsequendis industriae specimen proposuit eximium. Ex his itaque causis Ordo medicus decreuit eamque sententiam tulit, ut posterior haec commentatio, cum lemmate: *Nec casia liquida corrumpitur usus oliui*, principe loco adeoque praemio condito ornaretur; schedula resignata nomen exiit

JOACHIMVS DIETERICVS BRANDIS *Hildesensis*;
prior autem illa laude et loco *proxime ei accedere* pronuntiata est; cuius auctor mox nomen professus est IUSTVS ARNEMANN *Luneburgensis*.

Peruentum erat ad quaestionem, ab *Ordine philosophico*, nunc tamen ut ad *Philologiam*, et
quidem

quidem sacram orientisque litteraturam spectaret, proposita:

Sacris litteris perfectius intelligendis multum conferre potest Calendarium Palaestinae oeconomicum, ex itinerariis collectum: quo quid nomine intelligamus definiendum. Enotanda sunt ex itinerariis ad omnes anni menses, pluuiarum, niuium, coeli sereni, tempora, magis in Palaestina, quam nostro sub decliuore coelo, stata ac certa, sationis, floris, maturitatis messisque, tritici, zae, hordei, oryzae, milii, arborum quoque et herbarum, quibus florent, maturosque fructus legentibus offerunt, vindemiae maxime, cum primae tum secundae. Eiusmodi ergo calendarium vt ex itinerariis Palaestinae, quorum copiam dabit bibliotheca academica, conficiant de praemio certaturi, poscitur, et vero semper addito testis non solum nomine, sed et pagina itinerarii vbi id testatur.

Exhibitae erant Ordini Philosophico commentationes tres: prima cum symbolo:

I. Laudis studio optimus quisque trahitur. Cicero.

altera

II. Nisi utile est quod facimus, stulta est gloria.

et tertia:

III. Diuum cura nos tuetur.

Ingenium, doctrinam, industriam, auctorum approbarunt eae omnes; etsi sermonis latini elegantiam, curam et artem scribendi exquisitiorem consideraret Ordo philosophicus, cum in conditioni-

Q 4 bus

bus certaminis id vel maxime numeratum esse vellet, ut non modo pure, caste ac diligenter, verum etiam ut terse, nitide et concinne perscripta essent ea, quae sibi offerrentur; facere tamen excusationem poterat tum angustia temporis, quod vix congerendis copiis, ornandis haud facile, sufficiebat; tum ipsius argumenti indoles, cum materia ex multiplici variorum scriptorum, qui suas peregrinationes horrido plerumque et barbaro sermone perscribere, multa lectione congerenda esset. Nunc iudicium maxime ad diligentiam et sedulitatem in rebus congerendis, perspicuitatem in eloquendis, subtilitatem in disponendis, tandem ad sagacitatem in videndo eo, quod inde sequatur, institutum et compositum esse debuit. Ad hanc autem tanquam normam propositam cum exacta essent scripta: facile apparuit, tertium illud in medio cursu substituisse; telam tamen non esse pertexam, tanto magis dolendum erat, quoniam sunt nonnulla in eo scripto acute obseruata nec a ceteris notata. Redibat igitur iudicium ad reliquas duas scriptiones, inter quas illud diu suspensum dubiumque haesit. Praestare vno et altero nomine videri poterat illa, quae inscripta est: *Nisi utile est quod facimus*. Est enim rerum obseruatorum magna copia proposita, multis in partibus cum iudicii maturitate aliqua et variarum rerum intelligentia. Digna igitur erat commentatio haec, quae praemio ornaretur. Ecce vero sua ipse vineta cecidit auctor professione sua, ab animi quidem honestate et candore profecta, et ingenua liberalique indole digna, iudicium tamen votis aduersa et infesta, cum ipse monuerit, se duorum

duorum amicorum opibus copiisque instructum hunc suum libellum conscripisse. Atqui hoc certaminis legibus aduersari visum, quibus *diligenter cauere iussi sumus, ne commentatio alieno Marte elaborata nobis obtrudi a quopiam possit: **) quid? quod exemplo hoc inuitati in posterum operam suam alii plures, amicorum nomine ac titulo, conferre possent in vnum: quo ipso multa alia in legum fraudem excogitari posse perspicuum fit. Atenim suas vnum quemque vires experiri, suae doctrinae suique iudicii documentum dare iubet cum certaminis lex tum ipsa rei ratio et natura. Habuerat quoque consociata illa plurium opera incommoda plura: non eodem orationis colore et habitu libellus est elaboratus; sunt alia tenuiter et ieiune, alia satis grauitur enuntiata; irreplit quoque ex ista copiarum adhibitarum diuersitate error calculi in diebus ad Calendarium vetus et nouum computandis, vt modo XI dies additi modo subducti sint alieno loco et repugnante ipsa re. Concessum igitur est in eam sententiam, vt alteri commentationi locus princeps assignaretur, cum illa industriam, studii pertinaciam, ingenium variis litteris artibusque politum et locupletatum, iudicibus approbasset. Ordinem vtique rerum et dispositionem prudenter instituit auctor secundum plantarum genera, earumque per singulos menses prouentum, regionibus tamen ac terris diligenter notatis; thermometri quoque varietates adiecit, et, cum nullo adiutore vsus sit, maiores haecenus vnus rerum obseruatarum

Q 5 rum

*) V. *Programma anni superioris Kal. Nov. p. 227.*

rum copias attulisse videri debuit. Itaque Ordinis philosophici iudicio praemium adiudicatum est ei commentationi, quae inscripta est:

Laudis studio optimus quisque trahitur.

proximo ab eo loco habita altera: *Nisi utile est quod facimus, stulta est gloria.* Mox schedula prioris a Decano resignata auditum est nomen

JOANN. GOTTLIEB BVHLE *Brunsvicensis*,

Seminarii philologici sodalis. Alterius autem secundo loco memoratae auctor b. nostri Collegae Walchii filius, GE. FR. WALCHIVS, qui, se in patrium ac gentile nomen successurum aliquando esse, his tanquam auspiciis ostendit.

Personuerant aures vestras, Commilitones, victorum nomina statim in illa panegyri: eorum vero nomina, quorum commentationes proxime ad principem accessisse iudicatae sunt, nunc primum in hominum notitiam publice adducuntur, cum libertas proposita esset auctoribus, vtrum ipsi, sibi id non iniucundum fore, Decano sui Ordinis declarare vellent. Euulgabuntur quoque Regia liberalitate prelo expressae Commentationes victrices et in Britanniam missae Regi indulgentissimo exhibebuntur. Victores autem praemia sua repetent a Decano quisque suo, quam primum publice indictum erit, ex Britannia allatum esse chalybem, cui inscripta sunt signa in nouo numismate excudenda. Ceterum non dubitamus, cum victores tum eos, qui secundum illos principes iudicati sunt, moderate fortunam esse laturos, neque aliud
honore

honore ac praemio se affecutos esse illi putabunt, quam ut de successu suorum studiorum laetique profectum, etiam per futurum tempus, euentu bene augurari possint; nec tamen alia via ac ratione, quam continuata et tantum non ingeminata cum lectionis et meditationis, tum scriptionis opera, cura et assiduitate; eo contra turpius ac foedius fore dedecus, si partam laudem non tueri nec his auspiciis erecti ad summa quaeque contendere constanter ac pertinaciter studuerint et allaborauerint. Regi autem Indulgentissimo gratias agent nobiscum deuenerabundi, cuius consilio et munificentia institutum hoc certamen est, quo ipsi sui ingenii vires explorare, suorumque profectum modulum exploratum ac probatum dare, sibi confidere et optima quaeque de se sperare, didicerunt. Ut vero etiam illi, qui metam optatam cursu non attigerunt, diligentiae suae ac studii fructus ferant vberiores: etsi iam ipsa ingenii acuendi et industriae excitandae opportunitas scribendique vsus pro magno et expetendo fructu haberi debet: ut tamen maiores quoque fructus et vtilitates inde auferant, liberum ipsis erit, adire iudices eosque consulere, quid potissimum de viribus ingenii sui sperandum sibi sit, quonam in genere litterarum, quamam in parte, maiores sibi faciendi sint profectus, quid fugiendum, quid appetendum, quid elimandum sit aut emendandum. Ordinis utique theologici Decanus venerabilis id etiam in votorum ac desideriorum suorum parte haberi professus est, ut edocere possit eos, qui viribus suis haud parem operam aggressi sunt.

Restat

Restat nunc vt tanquam praeconio aliquo pronuntientur publice quaestiones in futurum annum, qui est aerae nostrae octogessimus sextus, propositae:

A THEOLOGORVM quidem ORDINE:

Num, et quatenus, vere affirmari queat: constante numinis providentia id effici, vt genus humanum, uniuersim spectatum, continua progressionem ad meliorem conditionem sensim assurgat.

Primum quidem res ipsa ex omni historia, observationibus idem recentioribus, accurate sic euinci debet, vt per quamdam quasi inductionem patefiat, culturam litterarum artiumque, religionis porro atque virtutis, adroque felicitatem, cum publicam tum privatam, extensue et intensue, maiora sensim incrementa cepisse.

Deinde et subsidia opportuna, seu media per quae, et modus, quo accommodatissime haec deus effecerit, declaranda sunt; ita vt inprimis inquiratur, quae et quanta sint religionis vere christianae de hac felicitate communi merita.

Denique luculenter doceatur, omnino pertinere hanc quaestionem recte expositam ad iustam de providentia diuina notionem animis informandam.

AB ORDINE IVRE CONSVLTORVM:

Quodnam sit fundamentum successionis Germanicae, tam allodialis quam feudalis? in quonam consistat potissimum ratio differentiae inter principia istius successionis Germanicae et Romanae, speciatim Iustinianae?

A MEDICORVM ORDINE:

In irritabilitate animali, a qua nisi omnis, saltem maxima sane, pars principii in corpore nostro aduosi pendet,

pendet, varia supersunt, quae pleniorē poscunt eruditorum expositionem. Desideramus itaque solidam, observationibus et experimentis superstructam, responsionem ad varias quaestiones irritabilitatem animalem spectantes:

1. in quam elementorum corporis animalis parte haeret vis irritabilis?

2. qui sunt veri certique fines inter Tonum Stahliani et Irritabilitatem Halleri?

3. quibus adminiculis, siue a climate, aëre et vitae genere pendentibus, siue a cibo potuque, siue a medicamento, desumtis, effici potest, ut, si torpida languet vel plane deficit, excitetur et augeatur? vel si nimis efficax sit, temperetur et coercetur?

4. quale inuicem obseruatur commercium irritabilitatem inter et neruorum systema, in doctrina affectuum animi, temperamentorum, et in genere principii actiui corporis animalis, ullo cum fructu adhibendum?

AB ORDINE PHILOSOPHORVM:

Cum veteres, sideribus ad horizontem conspicuis aut euanescentibus, (ortus et occasus poeticos vocamus) anni tempora distinxerint: eorum, qui ab praemium Regium Ordinis philosophici iudicio permissum certare volent, erit:

colligere praecipua, quae eam ad rem pertinent, scriptorum classicorum loca; quid doceant, explicare; quando et ubi vera fuerint haec praeccepta, ex aequinoctiorum praecessione et horizontum diversitate ostendere; addere calculorum, quibus id ostenditur, rationem;

tionem; et calculos ipsos, nonnullis saltem, maioris momenti exemplis illustrare.

Indictum est certamen in d. IV. Iunii anni proximi; praemia sunt quaterna, singula XXV. aureorum ducatorum, ab Ordine quaeque suo adiudicanda; redduntur autem scriptiones, quae admitti ad concertationem volent, *ante Kalendas Martias* eius anni. Ceterum leges certaminis sunt manentque eadem, quae superiore anno fuere edictae. Licebit in certamen prodire omnibus in litterarum studio prouectioribus, seu indigenae illi sint seu ex-teri; nec fraudi erit, si qui ante illum diem, quo praemia victoribus assignabuntur, studiorum curriculo absoluto Gottinga discefferint; modo ipsi ante discessum scripta sua reddiderint, et in scheda ob-signata seu locum, in quem se contulerunt, adscripserint, seu amicum negotii sui gestorem, e quo illud comperiri possit, reliquerint. Oratione vtentur Latina, eaque vt sit pura, tersa, perspicua, curabunt; ne auctores commentationum, quae Prorectori, Decano, aliue Professori reddentur, vilo indicio se prodant, diligenter cauebitur.

Prosperet ac fortunet numen O. M. destinata haec et in reipublicae vtilitatem salubriter consulta; obtingatque hoc votis nostris, vt Regis optimi consiliis respondeat conatum vestrorum, Commilitones, euentus; ita tandem nostrae operae curaeque praemium ipsi nos tulisse putabimus amplissimum. PP. in Georgia Augusta d. VII. Iunii 1710LXXXV.

XV.

ACADEMIAE GEORGIAE AVGVSTAE

P R O R E C T O R

IOAN. STEPHANVS PÛTTER D.

CVM SENATV

SVCCESOREM

IN

MAGISTRATV ACADEMICO

HENR. AVG. WRISBERG D.

CIVIBVS SVIS

COMMENDAT

INDICTIS SOLLENNIBVS.

IN A D. II IVLII CIOIJCCLXXXV.

*Historiae naturalis fragmenta ex ostentis prodigiis et
monstris.*

Commentatio posterior. *)

Qui in semestre indictus erat magistratus academicus, ex prorogatione in annum protractus, exit nunc, Ciues, feliciter et votorum nos damnat sub eius auspicia susceptorum; euocatque nos ad noua suscipienda vota pro eo, qui nunc
in

*) Commentatio prior sup. p. 195. legitur

in eundem honorem et fortunam succedit, viro experientissimo,

HENRICO AVGVSTO WRISBERG D.

cuius facilitatem et humanitatem cum satis perspectam habeatis, vos eum, Ciues, omni obsequio officioque prosequuturos, eo que tranquillitatem ac prosperitatem rebus nostris haud vuquam defuturam esse, ominibus auguramur certis certioribus. Fausis his ominibus cum humanitate et modestia vestra, Ciues, tum fortuna nostra praesenti firmatis, laeti et erecti progredimur nunc ad illud, quod fere et ipsum inter auspicia et omnia ineuntis magistratus referri potest, vt publica sollennia a disputatione aliqua argumenti proficiscantur litterarii.

Pertexamus itaque, quam nuper exorsi eramus, telam, vt inquiramus vestigia eorum, *quae in prodigiis Romanorum narratis ad historiam naturalem momentum aliquod habere videri possunt*. Prodigia, portenta et omnia a veteribus tradita, alia a falsa persuasione, qua mentes terrore aut fraude seu sua seu aliorum occaecatae erant, alia a causis physicis aut ignoratis aut neglectis aut male perspectis profecta esse, superiore aliqua commentatione a) exposuimus; cumque alterius huius prodigiorum generis classes constituissimus has, vt alia ad *aeris caelique apparentia*, alia ad *terrae marisque naturas*, alia ad *animantium cum brutorum tum hominum ingenia, cultus habitusque*, spectare diceremus: memoratum est satis, pro consilii nostri ratione, de iis, *quae in aeris*

a) In Anniuers. Sacr. XVII. Sept. LXXXIV.

aeris et atmosphaerae affectionibus, mutationibus, imprimis repentinis, et vicissitudinibus haud statis, causas abditas, saltem a primis hominibus parum perspectas, habent. Nonnulla huius generis iam a Frereto exposita *b)* tunc non meminimus: alia infra occurrent, ubi de terrae tremoribus agetur. Adiciemus hic nonnulla, quae cum iis coniuncta sunt, imprimis flammam repente modo in antennis navium, modo in stipulis ac signis castrorum in terra fixis, modo in puerorum et virorum capite visas; aliquando etiam scipio circumcuncti vigilas equiti in manu arsit (*Liv. XXII, 1.*) et caput Vulcani (*XXXIV, 45*) et Anagninae seruo tunica, nullo post extinctum ignem flammae vestigio; (*Iul. Obs. c. 8.*) in Lucanis grex veruecum; (*c. 112.*) quae omnia non minus ominis notam habuere. Electricae materiae vim et naturam his subesse in promptu est suspicari. Ad humidi porro et sicci aeris seu repentinam vicem seu intemperiem satis constat referendos esse sudores signorum et statuarum in templis *c)*. Quod si sanguine dii adeo sudasse narrantur,

b) *Memoires de Litterature T. IV. (ed. in 4.) pag. 411. Reflexions sur les Prodiges rapportés dans les Anciens par Mr. Freret ubi v. pag. 423 sqq.* Essent etiam in his prodigiis in caelo aliqua, hominis historiae naturalis studiosi cura haud indigna, interdum circa vulgaria, v. c. cometas, duo soles saepe visos; mirationem enim in his facit interdum diei pars, caeli plaga, ac similia.

c) Bene ap. Cic. de Div. II, 27. — *et humor allapsus extrinsecus, ut in tectoriis videmus austro, sudorem imitari potuit.* Imprimis austri ea vis, ut miro modo humescant parietes et saxa, imprimis marmora, adeoque et signa ac columnae.

tur, cogitandum est de signis minio obductis prisco ac communi more.

Verum accedamus nunc ad alteram classem, quae *terrae marisque phaenomena* complectitur; habitum enim est in prodigiis, quidquid praeter morem in mari terrae eueniret; quam opinionem, inprimis rudium et indoctorum, hominum animis infedisse, non aegre ferremus, nisi coniunctus fuisset ille animorum error, ut ad iram numinis portendendam grauiumque calamitatum metum iniiciendum illa traherent, indeque ad tetras placandi numinis religiones ac ritus prolaberentur. Itaque nullum facile tempus a terroribus vacare debuit, inprimis in iis terris, in quibus propter specus subterraneos et ignium occultorum alimenta continui essent motus et soli facies subinde mutata. In Italia cum prodigia huius generis per singulos fere annos memorata sint, satis hoc ipsum docet, multo frequentius, quam nostra aetate, illam subterraneis soli incendiis et tremoribus fuisse vexatam: idque iis quoque in locis, ubi nunc raro illae calamitates euenire solent, inprimis in Etruria, Umbria, Latio et locis vicinis d). Eius rei memoriam, ceteroquin obscuratam aut nullam, seruant prodigia, quae non nisi ad motus terrae et agri aut montium exardescentium labores spectare possunt; quo consilio si quis accurate singula notauerit et comparaverit,

d) Cic. de Div. I. 42. *Etrusci — quodque propter aeris crassitudinem de caelo apud eos multa fiebant, et quod ob eandem causam multa inusitata partim e caelo alia ex terra oriebantur, — ostentorum exercitatissimi interpretes extiterunt.*

verit, licebit inde ad historiam naturalem veteris Italiae nonnulla minus nota elicere.

Relati autem sunt inter prodigia primo ipsi *terrarum motus*. Et Romae quidem terra motu concussa saepe memoratur *e*); in Sabinis terra quassata, imprimis Reate; (v. c. V. C. 676. v. *Iul. Obs.* c. 121.) in Picentibus; vt in concursu Romanae cum iis aciei, Sempronio Cos. aduersus eos ducente. V. C. 485. (*Frontin. Stratag.* I, 12.) Creberrimus motus (ap. Plin. II, f. 86.) Punico bello, *intra eundem annum* (V. C. 537.) *septies atque quinquagies nuntiatus Romam*. Quo quidem anno ad *Thrasymenum lacum* *dimicantes maximum motum neque Poeni sensere nec Romani*. Magni illi terrae motus in Liguribus, Gallia, compluribusque insulis, totaque in Italia, facti erant: vt e Coelio apud Ciceronem (de Div. I, 35.) legitur, vt multa oppida corruerint, multis locis labes factae sint, terraeque defederint fluminaque in contrarias partes fluxerint atque in amnes mare influxerit. Montium, ignibus abditis tumentium, effectus per Etruriam narrantur passim, non modo tremores, sed et solum in specus dehiscens et lapi-

R 2

dei

e) Plin. II, 84. f. 86. *Nunquam vrbs Roma tremuit, vt non futuri euentus alicuius id praenuntium esset.* cf. Cic. de Div. I, 18. f. 35. Liv. III, 10 ad V. C. 293. *eo anno caelum ardere visum: terra ingenti concussa motu est.* Habemus adeo (cf. Dionys. X, 2.) similem caeli faciem, quam nuper ipsi vidimus; nisi coruscasse caelum ex Aetnae aut alterius montis ignibus putabimus. Liv. IV, 21. ad a. 310. *crebris motibus terrae ruere in agris nuntiabantur tella.* Etiam sub belli Sullani initia magnus terrae tremor Romae: Appian. B. C. I, 83. et paullo ante Graccho leges agrarias moliente V. C. 626. *Iul. Obs.* 89.

dei imbres et similia: ipsa tamen montium incendia non meminimus memorari. Euenisse eius generis prodigia complura colligere licet ex eo, quod Etrusci interpretationem eorum in artem redegerant. Haecenus iactura librorum auguralium Etruscae gentis in historiae naturalis incommodum facta est f). Deprehensa tamen nostra aetate sunt vestigia craterum, punicum aliarumque rerum, quae talia testantur, circa castellum *Radicosani*. montem *Fiasconi*, *S. Fiora* aliisque locis g). Nec facile motus terrae narrantur, quin simul aut ingentes procellae et tempestates, aut meteora et phaenomena caelestia, aut ignes e solo vel monte erumpentes memorentur. Mirari licet quoque motam per longinqua interualla terram, vti V. C. 720. a. C. n. 32. quo in Iudaea terrae motus ingens, Aetna ignibus finitima vastans et Pisaurum ad mare Adriaticum terrae motu haustum legentibus occurrunt.

Terrae motus, vt modo diximus, haud raro cum ignibus e terra erumpentibus coniuncti sunt, aut etiam ab iis proficiscuntur. Habiti autem et hi ipsi ignes e terra erumpentes inter prodigia. Iam per eas aetates, quibus Romana ciuitas exordia et incrementa habuit, inprimis crebris terrae motibus et ignibus caecis afflictum fuisse videtur solum Albanum h) ac Sabinum, quod nunc nullos facile
motus

f) Cic. de Div. I. 33. quorum alia sunt posita in monumentis et disciplina, quod Etruscorum declarant aruspici et fulgurales et tonitruales libri; nostri etiam augurales. cf. c. 41.

g) Targioni Tozzetti *Viaggi della Toscana* Tom. IX. p. 421 sqq. T. X. p. 59. et passim hoc et sequ. Vol.

h) Conf. Freret l. c. pag. 414.

motus sentit. Eo enim ducunt multa prodigia. Prima rei mentio, etsi fabulose, facta sub Alladio, seu Aremulo, impio Albae Longae rege (v. *Dionys. Halic. I, 71. Aurel. Vict. de orig. G. Rom. 18.*) Lacus Albanus tum prodigiosa eluuiæ facta ipsum regem cum magna aedium parte obrutum merferat; narratum est, apud Dionysium, in quadam lacus parte aquis deficientibus cerni potuisse ruinas et domus vestigia. Iam sub Tullo Hostilio *nuntiatum regi patribusque est, in monte Albano lapidibus pluuisse; quod cum creui vix posset, missis ad id visendum prodigium, in conspectu haud aliter quam cum grandinem venti glomeratam in terras agunt, crebri cecidere lapides.* Haud dubie, si propius accedere ausi essent qui missi erant, lapides vi flammæ e monte actos vidissent. Neque alio pertinet, quod in Veiorum oppugnatione V. C. 356. *nuntiatum fuit, lacum in Albano nemore, sine ullis caelestibus aquis caussare quæ alia, quæ rem miraculo eximeret, in altitudinem insolitam creuisse (Liv. V, 15. et ap. al.) V. C. 542. Tempestates foedæ fuere. In Albano monte biduum continenter lapidibus pluit — Reate saxum ingens visum volitare: sol rubere solito magis sanguineoque similis. (Liv. XXV, 7.) V. C. 641. Mons Albanus nocte ardere visus (Jul. Obs. 98.)* Itaque ipse lacus Albanus nunc pro vetusto cratere Vulcanii montis habetur.

Inter hæc tamen fatendum est, pro magna multitudine vestigiorum ignis subterranei erumpentis, quæ per omnes Italiae oras occurrunt, nimis pauca scriptorum loca et memoriam raram ac te-

nuem similium euentorum extare *hh*). Aut itaque credendum est, incendia illa omnem rerum memoriam multum antevertisse; aut hominum incuriam silentio ea praetermisisse. Nimirum plerumque in annalibus Romanis sola effecta montium ignibus intestinis ardentium et soli motu quassati memorantur, nulla causae notatione adiecta; adeo nulla sollicitudo et cura inquirendi in causas rerum hominum animos tum tenuit. Ita passim terrae mugitus ac fremitus narrantur; terrae hiatus et subsidens in specus solum, quod in ipsa Roma aliquoties factum; vt, cum M. Curtius in voragine se equo immisit; (*Liv. VII, 6.*) interdum erumpente ex sinu terrae igni et flamma lucida, vt Sullae tempore. (*Plutarch. Sulla p. 454. E.*) Agri Priver-natis labem factam v. c. 635. narrat Iulius Obf. c. 96. at ex Cicerone (*de Div. I, 43.*) discitur Apuliam eodem tempore maximis motibus fuisse quassatam. Memorantur porro montes inter se concurrentes, vt in agro Mutinensi V. C. 663. *i*) flammiae repente solo erumpentes; terra sine ignis alimento ardens; inprimis vero imbres lapidei, toties per Italiam, etiam in Auentino memorati; tum quod lapides passim de caelo ceciderunt *k*); idem prodi-

hh) Itaque in libro perdocto Thomae Ittigii de montium incendiis (Lips. 1671) perpaucis huius generis allata esse videas p. 90 sq. p. 137 sq.

i) Plin. II. 83. c. 85. *namque montes duo inter se concurrerunt, crepitu maximo adsultantes recedentesque, inter eos flamma fumoque in caelum exeunte interdum; eo concursu villae omnes elisae.*

k) Liv. XXV, 7. *Reate saxum ingens volitare visum: atqui eodem tempore in Albano monte lapidibus pluit*

prodigium inter Graecos vulgatum, saxo ingenti in Aegos potamon delapso; aucto temere rei miraculo, cum illud prodigium ab Anaxagora praedictum tradidere *l*). Spectant quoque ad montium incendia obscuratus toties aer, subductus sol, aut pallens aut rubens; quod Vesuvio et Aetna exaestuante saepius factum, etsi Romanorum annales id tantum, quod Romae visum erat, memoriae seruafunt, non ea quae remotis a Roma terris euenierant. Ex iisdem, quae erumpente e terra spiritu et igni gigni solent, magnam partem eorum explicandam esse, arbitramur, quae de turbinibus et procellis insolitis narrata sunt, quibus memorati supra imbres lapidei, cineritii, plures alii miri generis *m*) debentur.

Nec aliam causam habuisse videntur fragores ac strepitus ingentes interdum in locis sacris auditi, aucta et versa ex superstitione in miraculum re; apertae repente templorum fores, signa deorum mota vel conuersa, sortes extenuatae seu euolutae, hastae motae; pinnae murorum deiectae; sepulcrorum repagula euulsa, et, quod cum ea religione facile coniunctum esse debuit, Manes luci redditi.

Etiam in *arboribus* ac *plantis* si qua insolita apparerent, ad prodigia referri solita: ita, si arbores repente enatae, aut alieno in loco: vt laurea in

R 4 puppi,

l) Plin. II, 58 f. 59. Marm. Arundel. Diog. Laert. et alii. cf. *Freret* l. c. p. 421.

m) cf. Plin. II, 56 f. 67. Ad laneos imbres spectat, quod apud Iul. Obs. c. 110. habetur: *Praeneste lana volauit*. Eodem referenda ostenta C. Graccho leges agrarias moliente V. C. 626. ap. Iul. Obs. 89.

puppi, palma in templo; vbi simul omen ad prodigium accessit; aut si arefactae reuiruerant *n*). Obscurum est, quod Priuerni lana pulla terra enata fertur (*Liv. XLII, 2*) et quod in Veienti agro lana ex arboribus nata *o*). Notius, quod fruges in arboribus natae narrantur (*V. C. 627. Iul. Obs. c. 85. ubi in not. v. al.*) Ad terrae nostrae vicissitudines, saltem quae superficiem attingunt, spectant narrata de piscibus sub aratro inuentis *p*); quae ad pisces fossiles, iam veteribus obseruatos, pertinere in promptu est *q*). At mulierculae fraudem agnoscas in hoc, quod Arretii mulieri e naso spicae farris natae; eadem farris grana vomuit. (*Iul. Obs. 109.*)

Indignatio subit, quoties superstitionem modo, modo fraudem humanam, in rebus tenuibus et facile

n) Alia dabit Plinius XVII. 38. 25 in quibus vnum est, quod risum faciat: cum in Capitolio, palma prostrata, ficus eodem loco enata esset, ab eo tempore pudicitiam subuersam Piso, grauis auctor, prodidit: Scilicet factus lusus in *ficus* notatione. Ibidem oliuetum viam publicam transgressum, aruisque inde in eius locum transgressis, solum concussum et labefactum arguit; cf. Lib. II, f. 85. cui similia nuper ex Calabria nuntiata sunt.

a) [*Suspiciabatur Blumenbach amiciff. vir, fraudi esse potuisse certa lichenum genera, inprimis ex filamentosis, vti lichenem inbatum, barbatur et sic alios*]. Obscurius illud *Liv. XXXII, 1.* quod Ostiae in *Herculis aede* capillus enatus dicitur; in signo saltem, vt de *Lyfandri* statua narratum herbarum foliis horrente apud *Cic. de Div. I, 34.*

p) *Liv. XLII, 1.* in *Gallico agro*, qua induceretur aratrum, sub existantibus glebis pisces emerfisse.

q) Loca v. ad *Liv. I. c.* Alia ad *Aristot. de audit. mirab. c. 75.* a *Beckmanno* notata.

cile assequendis vulgi tamen oculos animosque occaecasse videmus; ut in signis, vexillis, ipiculis, reluctantibus, cum euellerentur: haud dubie, quia altius et in solo tenaci infixae erant; aut si signis euullis sanguis erupisse dictus, rubentis scilicet aquae scaturigine sub solo latente. In aliis vana religio visa obiecit, inprimis in solitudine agrorum et locorum: ubi fit, ut vocem exaudiisse tibi videaris. Eiusmodi voces auditas saepe inter barbaros Africae et Indiae memorari meminimus. r). Verum, quod ipse Luvius monet, motis semel in religionem animis multa nuntiata temere et credita sunt (XXI, 62. XXIV, 10.) Alias ipse fluctuat in iudicio de prodigiis (XLIII, 15. XXVII, 23.)

Interdum ab iisdem naturae tumultibus, nonnunquam tamen aliis quoque a causis, profectae sunt prodigiosae illae *aquarum eluiones* repentinae et lata vastitiae agros obruentes; inprimis Tiberis; motu terrae interdum diserte cum ipsis commemorato; quo magna aquae vis e terrae visceribus subito effusa ingruisse videtur. Ab iisdem causis, magnis soli ruinis factis, repetemus, si lacus aut repente, et causa externa nulla animaduersa, increvisse vel defecisse, amnes modo retrouersi, modo hiatus terrae absorpti memorantur; s) porro si, aquis a soli cretacei vel argillacei contagione albescentibus vel rubentibus, riui sanguinis aut lactis fluxere;

R s

lacus

r) V. c. *Wolf Beschreib. von Ceylan* II. P. p. 118.

s) Ita Vulturius et Clanis vndas subito retorserunt, Cumani cum barbaris congressuris ap. Dionys. VII, 3.

lacus sanguine manauere; *t*) vnde aquae à procel-
lis in altum raptae aliis in locis imbres cruentos
vel lacteos facere potuere; eodem modo quo sae-
pius multifariam terra pluit. Nec ea, quae de
Comitio sanguine fluente, et de messibus cruenta-
tis reperiuntur, (v. c. *Liv.* XXVIII, 11. XXII, 1.)
ab his aliena; adhaesere forte spicis sordes vel
guttae ex istis imbris, aut natum vitium ex si-
mili causa, e qua Peirescius (*in Vita* p. 111.) in-
terdum pluviae cruentae opinionem natam diuina-
vit, quod ex chrysalide euolantes papiliones rubi-
cunda gutta conspersi spicis adhaeserant, aut forte
ab aliis insectis rubor adpersus. Solent plerumque
haec et his similia plura coniunctim narrari, *u*) vt
satis appareat, a naturalibus causis affecta et tur-
bata soli aerisque natura enata illa esse.

Inde quoque illa apparuere, quod *Ariciae*
simul lapidibus pluit, et multo cruore ex frigidissimo
fonte calidae aquae manarunt; porro quod fons in-
gens antea non visus erupit, aut scaturigo lactis
vel olei, haec quidem, vena forte bituminosa ex
meatu recluso manante. Quam saepe ignes sub-
terranei sub mari arferint, testantur prodigia de
mari

t) Cic. de Div. II, 27. *sed et decoloratio quaedam ex ali-
qua contagione terrena maxime potest sanguini similis*
esse. [Speciem rubentis aquae praebere quoque possunt
insectorum genera, aquae innatantia: quod idem ami-
ciss. *Blumenbach* de pulice monoculo monuit; exem-
plis apud *Swamerdam*, prostantibus p. 79.]

u) V. c. *Liv.* XXIV, 10. XXVII, 4. et in pterisque ap.
Iul. Obf. capp. cuius Scriptoris editores vtinam ea sal-
tem loca adscripissent, vnde ille aut. qui eum sup-
pleuit, *Lycosthenes*, sua petiere. Add. *Orof.* V, 18.
inprimis ostenta post *Caesaris* necem a. 708.

mari ardenti nuntiata; (vt *Liv. XXIII, 31.*) interdum cum mentione Aetnae exundantis, vt *V. C. 628. x)* recessus maris reciproco fluxu, et reliquae in sicco belluae (v. c. *Iul. Obs. c. 120 f. cf. Plin. II, f. 89. f. 110. 111.*)

Prodigia adhuc commemorata pleraque ad medias Italiae partes, agrum Romanum, cum Etruria, Umbria et Latio, spectant; vt adeo antiquis temporibus multo maiores ac crebriores, quam nunc, cum terrae tum aeris et noxae et ex intemperie calamitates euenisse videantur. Videbimus nunc, ex iis prodigiis, quae *ab animantibus* petita erant, num quid ad historiae naturalis studium lucrari queamus.

Quod si prodigia huius generis ad certas rationes redigimus, in prodigiorum numerum venisse apparet bestias, *si raro visae essent*, aut *si insolito aut alieno in loco*, aut *si species insolita*, aut *si quid ab iis factum*, quod *ab earum natura alienum esset*: omnia haec tanto grauiora, si eae natura sua ominosae essent; vt anguis, bubo. Ad *raro visa* spectant angues iubati, (*Liv. XLI, 26. XLIII, 15. (13.)*) et quadrupedes, cuius generis lacertas, et serpentes adeo, memorari videas; cum alioqui ingens serpentum frequentia varietasque per Italiam esse debuerit, quandoquidem inter omina vulgo obuia nihil

x) *Iul. Obs. 89. Aetna mons terrae motu ignes super verticem late diffudit, et ad insulam Liparas mare efferebuit.* — Saepius id factum e Strabone nouimus lib. VI, p. 424. sed quod *super verticem* columna, quam vocant, ignis emicuit, notatu dignum visum nuper quoque Hamiltono in *Philos. Transact.* Vol. LXXII, P. I, pag. 7.

nihil serpentibus frequentius. Ad alterum genus referre licet lupos, saepius oppida Italiae et urbem Romam, etiam Capitolium ingressos; et quidem, quod mireris, post necem Caesaris adhuc, (Ap-
pian. B. C. IV. pr.) quod nunc vix factum audimus; unde colligere licet multo maiorem olim luporum in Italia frequentiam fuisse; anguem ex ara, foribus templi vel columna lignea, elapsum; apum examina signis insidentia aut in foro visa; bouem in tertiam contignationem scandentem, aut in theatrum irruentem; araneas in signis deorum; coruos in aede Iunonis Solpitaë nidum facientes; vulturium frequenti foro in tabernam deuolantem (*Liv.* XXVII, 11. add. 23.) *Insolita species* complectitur *monstra*; quorum tam frequens fit memoratio, ut eorum maior frequentia olim fuisse videri possit, quam nunc facile in ipsa Italia occurrat. Enimvero ipse neglectus huius prodigiorum generis infrequentiae ratio et causa haberi potest: ita ut olim non plures naturae aberrationes fuerint quam nunc, sed eas superstitio ac metus notauit; nunc vero incuria hominum transmittit. Etsi simul cogitandum est, quo magis luxurietur vbertate solum, adeoque pabuli copia et caeli salubritas veneris stimulos subdat, eo maiorem esse pecudum salacitatem; quae eadem subsidit, soli exhausta fertilitate caelique clementia ipso cultus defectu mutata; ut in Calabria et Apulia factum scimus. y) Alia tamen etiamnum

y) Similiter Cic. de Div. I. 42. *Telmisæ, quod agros uberrimos maximeque fertiles incolunt, in quibus multa propter fecunditatem fingi gignique possunt, in ostentis animaduertendis diligentes fuerunt.*

etiamnum doctorum hominum indagationem et explorandi studium prouocatura essent; vt caprae lanatae; agnus cum vbere lactanti natus; (*Liv.* XXVII, 4.) gallina in gallum, gallus in gallinam versus; bos qui equuleum peperit; taurus agrestis qui vaccam aeneam iniit (*Liv.* XLI, 17.) auis incendiaria (v. *Plin.* X, 13. f. 17.) lana purpurea vel aurea, quarum in Lampridio et Capitolino aliquoties mentio fit. Possunt haec omnia forte ad certa naturae euenta et causas reuocari, et similia ex nostris aetatibus exempla commemorari. *Adversus naturam animantium*; quod mures aurum rosere, quod de muribus grauidis etiam nostra aetate cum fide traditum est; *yy*) inprimis vero hoc, quod toties narratum legimus, quod mula pepererat; quam naturae a more suo aberrationem saepius in Italia olim, etsi nec nunc inauditam, accidisse apparet; *z*) modo doctiorum, quam tunc erant, hominum studio ea res explorata fuisset! Quid vero de illo portento dicemus, quod toties bos locuta esse memoratur? Namque canum latratus insoliti causas habuere obuias. At luem etiam auium genus attigisse, aut tetro aliquo ad alitum quoque sensum affectu corpora peste contacta correpta fuisse, colligas ex eo, quod V. C. 579. graui pestilentia homi-

yy) cf. ad Aristot. *Mirab. Andit.* c. 24.

z) Aliquoties apud Obsequ. vt c. 125. *Mula pariens discordiam ciuium, bonorum interitum, mutationem legum, turpes matronarum partus significauit*: a. V. C. 704. sub belli ciuilis initia. Appian. de B. C. I, 83. Xiphil. ex Dione LXIV, vbi v. not. In recentioribus historiae nat. scriptoribus passim exempla partus a mula editi memorantur.

hominum boumque cadauera, non sufficiente Libitina, cum iacerent, vulturius nusquam visus est. (*Liv. XLl, 21. Iul. Obs. 65.*)

Cum hoc prodigiorum genere, quod in animantium naturis spectatur, coniuncta sunt *diuinandi* illa genera, quibus Romani inprimis vsi sunt, inter prodigia non numerata; quandoquidem horum naturam et notionem omnino constituebat hoc, si quid noui et insoliti inesset. Ita omnis diuinatio, quae ex *victimis*, inprimis *extorum inspectione*, petebatur, fausta et infausta nuntiabat; illa, si nihil à natura et bona pecudis valetudine et habitu alienum; haec si partes morbosae, truncatae, aut alio modo vitiosae, occurrerent: in quibus tractandis vtinam extispices seu anatomiae seu physiologiae notiones iustas habuissent et obseruata a se notassent! quot enim quantaque varietates ac diuersitates occurrere debuere circa iecinora, cordis tabes seu tumores, et similia! Etruscorum itaque in summa superstitione scientia anatomica partium internarum haud potuit esse nulla. a) Fieri autem non potest, quin ex pabuli genere, vbertate vel tenuitate, caeli salubritate vel pestilentia, multa in animali corpore varientur et corrumpantur. Multa in his ad *omina* spectabant: quae omnino
ea

a) Cic. de Div. I, 42. *Etrusci autem, quod religione imbuti studiosius et crebrius hostias immolabant, extorum cognitioni se maxime dederunt, quodque propter aeris crassitudinem de caelo apud eos multa fiebant, et quod ob eandem causam multa inusitata partim e caelo, alia ex terra oriebantur, quaedam etiam ex hominum pecudumue conceptu et satù, ostentorum exercitatissimi interpretes extiterunt.*

ea visa complectebantur, quae cum natura rerum, hominum, et animantium, per se satis conuenirent, sed haftenus animum aduerterent, quod certis locis temporibusque euenerant, vti sub egressum ex domo, naue conscensa, armis motis, acie edueta, omnino sub exordia coepti alicuius aut inter rei arduae initia; ita vt animus ad ea aduerteretur; multo magis si captabatur omen: accedebat interdum etiam prodigiosi aliquid, quod et ipsum in omen versum. Inter haec *auguria et auspicia* solita ac communi auium natura continebantur; vt omen caperetur ex volatu, cantu, esu; etsi et in his accedebat interdum aliquid, quod prodigii loco habitum, vti si pulli haud pascere. Totum hoc genus profectum dixeris a barbarorum hominum ingeniis, quibus in vasta solitudine errantibus, dum in magno discrimine versantur aut in aliquam rem cogitatione defixi sunt, ad aures repente accidit auiculae cantus seu evolantis strepitus; quo arrectis animis illi de successu aut desperant aut bona spe ac fiducia firmanentur. *Aruspicina* maxime circa prodigia et exta inspicienda versabatur; nata haud dubie inter victimarum mactationes. Nolumus in hunc censum reuocare, quae de Manibus aut Umbris euocatis passim occurrunt; credidit haec ludibria impia superstitione, cum saepe nocturna visa fraudem faciant somniantibus, vt mortuos sibi adstare putent: quidni, inquebant, hoc ipsum arte fieri posse credamus!

Obiecit et *humana natura* prodigia: inprimis per monstrosos partus, quos fere necari iussit et olim,

olim, et nunc, barbarorum superstitio ex naturae ignoratione nata; tum per androgynos eodem more in mare mitti solitos: in quibus fuere forte, quae diligentiorum viri docti considerationem requirerent. Sed de his satis multa a multis disputata sunt; mirum est, quod apud Iul. Obs. (c. 13.) inter prodigia pueri tergemini nati memorantur, tanquam res prodigiose insolita; cum tamen vel Horationum et Curiatorum memoria in historiis celebrata proflaret; sed locus forte corruptus habendus. Inter haec tamen prodigiorum omnium maximum et incredibile prorsus habendum putamus *ipsum hominem*, qui ad insolita naturae attendere maluit, *b)* quam ad praeclarum et mirabilem naturae ordinem, quique ex istis maluit iras deorum arguere, quam ex hoc numinis propitiam voluntatem et in omne genus humanum indulgentiam intelligere; metus potius et terrores circumspicere, quam malorum solatia anquirere. Terroribus itaque, re noua et insolita obiecta, percussi animi trahebant in prodigium etiam ea, quae nihil quod terreret habebant, aut quae satis frequenter euenirent, ut fulmina, procellas ac tempestates foedas, tum ea omnia in maius augebant; *c)* quid? quod ea quoque, quae
per

b) Fere quod Cic. de Div. II, 22. *Causarum ignoratio in re noua mirationem facit, eadem ignoratio si in rebus usitatis est, non miramur; nam qui mulam peperisse miratur, is, quomodo equa pariat, aut omnino quae natura partum animantis faciat, ignorat.*

c) Cic. de Div. II, 27. *Atque haec in bello plura et maiora videntur timentibus: eadem non tam animaduertuntur in pace; accedit illud etiam, quod in metu et periculo cum creduntur facilius tum finguntur impuni.*

per se iam inter mala et calamitates erant: vt fluminum eluuiēs, grandīnes et turbīnes aliaque his similia. d) Adeo prona est humana mens ad mala vera falso creditis cumulanda, et malignius in se infestiusque saeuunt homines, quam natura aut fortuna statuerat. Nec tamen in his quicquam est a natura humana alienum: in incertis his fortunarum nostrarum, ad futurarum rerum notionem omnes sumus natura procliues; inhiarunt itaque et prominuerunt populi omnes et per omnia saecula in eas res, quae desiderium et votum hoc explere videbantur; nec quicquam est, quod sapientissimos quosque homines adeo in fraudem illaqueauerit quam diuinitio ac futura praesagiendi facultas seu diuinitus animo immissa seu arte parata: vti nec vlla philosophiae percrebrescentis vi effectum iri putamus, vt ab hac insania plerique homines vlllo tempore liberari se patiantur. Itaque, naturae cognitione subtiliore quantum gens humana ad tranquillitatem ac felicitatem profecerit, ita demum intelligimus, si superstitiosos metus timoresque meminimus, quibus illa ante physicam satis expolitam tenebatur: iacent cum iis explosi et damnati inanes illi expiandi, lustrandi et procurandi ritus, quibus humanae mentes erant obstrictae. Ceterum, quod etiam in pessimis exemplis fieri solet, interdum aliqua vtilitas inde ad populos manauit, quemad-

d) E quo genere *Carmen* II. lib. I. Horat. plura complectitur. Eluuiēs Tiberis et aedium ruinae inter prodigia ibi produntur, quibus ira deorum et bellum civile recrudesceus portenditur.

Heynii *Opusc. acad.* Vol. III.

S

quemadmodum iniuria proterue illata, aut facinus immane, quod impune auctori fuerat, posteaquam territum ostentis vulgus causas irae numinis anquissuerat, publice vindicatum fuit; sic cum ostento pluviae sanguineae et subsequuta peste sub Romulo recordatio subierat Romanos, Tatii et legatorum caede violato iure gentium, iram numinis expiandam esse; quare dediti caedis auctores et supplicio affecti. Verum in hoc, ut in multis magnisque generis humani rebus, parua aliqua utilitas magno constitit; habuit etiam barbaries superiorum aetatum sua bona, quibus nunc caremus, sed aequo animo. Verum abstineamus ab iis quae male ominata haberi possint, et conuersis ad bona nostra animis crastino die faustis omnibus persequamur noui Magistratus auspicia. Quod quidem a vestra comitate, humanitate, affectu, Principes Serenissimi, Comites Illustrissimi, Barones Nobilesque seu stirpe seu ingeniis ac virtutibus, nos facile esse consequuturos auguramur. PP. Kal. Iulii c1010cclxxxv.

[Adiiciam nonnulla a Forstero meo familiariter mihi suppeditata. *Lactae pluviae* (p. 212) ortae esse potuere ex polline certarum plantarum per turbinem collecto; etiam ex particulis sulfureis per Vulcania incendia in nubes sublatis, et cum imbre in terras praecipitatis; aut ex certo morbo plantis polline obductis. Si *carne pluit*: potuere carnes esse delectae a vulturis, qui ex aris eas abstulerant. *Mare ardere* videri potuit per naturam phosphoream; *Gallinae autem in gallum versae* obici species, ex senio pennae in cauda incuruatis, forte et crista enata, ut solent pavones feminae, ubi oua parere desierunt, caudam, marium more, oculatam et gemmatam expandere.]

XVI.

ACADEMIAE GEORGIAE AVGVSTAE
 P R O R E C T O R
 HENR. AVGVST. WRISBERG
 CVM SENATV*
 ANNIVERSARIA INAVGVRATIONIS,
 SACRA XXXXVIII.

IN A. D. XVII. SEPTEMBR. CLIO CCLXXXV.

RITE INDICIT.

De foederum ad Romanorum opes imminuendas initiorum euentis eorumque caussis.

Quo magis annorum, quibus res nostra stetit, numerus procedit, semisaecularisque festi solenne appropinquat, Ciues, eo magis sollemnibus nostris anniuersariis augusta aliqua et religiosa celebritas accedere videtur; habetque ea res rationem pietati in parentes nostros similem, quorum caritas tanto maior esse solet, quanto grandiores natu illi sunt. Quem vero sensum nostrum pietatis et hilaritatis esse necesse est, cum, rerum nostrarum statu incolumi ac florente, hic quoque dies anniuersarius XLVIII. iustas laetandi et gratulandi caussas praebeat! quas quidem in coetu sollemni ad templum academicum in crastinum diem ex hoc ipso edicto indicendo exponet is, cui dicendi

vices e muneris lege impositae sunt, CHR. G. HEYNE, oratiuncula praemissa, qua *de consiliorum ad formulam concordiae in litterarum disciplinis constituendam vanitate* paucis declamabit.

Cum vero mos et institutum Academiae postulet, ut in ipso hoc panegyris futurae praeconio nostro praemittatur disputatio aliqua de re ad communes litteras spectante: agite, Ciues, exspatiemur paullulum in quaestionem, ad quam deduxit nos euentum huius anni maxime memorabile, foedus scilicet inter grauissimos libertatis Germanicae vindices initum, quo cautum est, ne corporis Germanici dissolutio aliqua temere aut deminutio fiat; exempli quidem foedus praeclari, quippe quo tranquillitas publica firmata est et stabilita, rerum autem nouandarum studium refrigeratum, quo labe factari potuisset status publicus. Cuius sapientissimi consilii admiratione defixus cum diu haesisset animus, coepit ille tandem circumspicere et inquirere in alia similis foederis exempla, quoties coniunctis plurium viribus quaesitum est hoc, ut opibus imperiorum ad nimis magnam molem euectis obsisteretur; ut, qui tandem tam salubris inuenti fructus et alias fuissent et nunc expectandi sint, in conspectu poneretur. Iam quae temporibus nostris propiora sunt exempla, siue in Ferdinandos, siue in Philippos, siue in Ludouicos compositi foederis, tanquam notiora, nec sine offensione expositu, aut in tam angusto libello comprehensu facilia, lubenter omittimus; desestimisque disputationis tanquam liberiores habenas ad prisca tempora, in quibus

quibus tutius euagari et temporum hominumque notationes ad animi sensum proponere licet; maiore etiam rerum fortunarumque varietate suppetente; dum contra in recentioribus historiis taedium facit par sibi et similis ubique seu fraudum et astutiarum, seu scelerum et iniuriarum, rerum tamen euentu in neutram partem memorabili, ordo ac tenor. Cum autem partim temporis, partim chartae spatio, nec minus operae nostrae consilio, circumscriptum sit omne hoc commentandi genus *a*): subsistemus

S 3

in

- a*) Possent enim alioqui eiusmodi exempla foederum passim ex historiis excitari, quibus aduersus praeualentis populi vel regis vires coiere plures et suas opes coniungere: quemadmodum foedus aduersus Cyaxarem Medum conflatum; (Xenoph. Cyrop. I, 5, 3.) item aduersus Cyrum, Croeso consiliorum duce et auctore; Xerxis et Carthaginensium ad Graeciam opprimendam, tum Graecorum aduersus Xerxem; tum multa Graecorum inter se ad opes Atheniensium aut Spartanorum infringendas facta foedera; forte etiam Philippi et Alexandri foedus cum Graecis ad Persarum regnum excindendum; successorum Alexandri foedus aduersus Antigonem praepotentis opes, tum in Demetrium. Licet etiam in his progressum a rudioribus consiliis ad sagaciora et subtiliora animadvertere; etsi altera ex parte fatendum est; occurrere nec minus exempla incredibilis seu socordiae seu stuporis populorum et regnorum in parando mature per foedera praesidio aduersus praepotentis inimici inualescentes vires, quibus singuli impares essent: inprimis aduersus barbarorum impressiones: ut enim Achaeos taceamus, qui contra Dores et Heraclidas nihil prouisum habuere, quis non Asiae vires in commune collatas expectasset aduersus Cimmericos aut aduersus Scythas? Romanorum, Etruscorum, Vmbrorum et Latinorum aduersus Gallos? nam barbaris Germanicae stirpis in vnum coeuntibus nulli nisi, quos inuadere possent, quam vnus imperii Romani fines patebant. Nullum utique magnum et praepotens
nimis

in rebus Romanis, vt, cum Romanorum opes ad maiorem indies molem auclae tantos terrores per tot saecula inter vicinos remotosque populos sparsissent, quaeramus, an similia aliquando consilia hi populi inierint, vt communi inter se foedere facto illas opes sisterent et minuerent, suas vero firmarent ipsi et augerent. Bene enim meminimus, quoties in lectione Romanarum rerum versaremur, saepe mirationem iacidisse, qui factum esset, vt tantus populorum animos occaecaret stupor, vt singulos se Romanis trucidandos subiugandosque tradere mallent, quam vnitis viribus eos opprimere et pestem communem excidere; id quod multo magis inter domestica plebis et patrum dissidia aut in magna accepta clade factum expectares.

Nec vero putandum est hoc aut simile quid Italiae populis aut exteris regibus nunquam in animum venisse; immo vero exempla similibus consiliorum cum saepe alias, tum iis maxime temporibus agitata fuere, de quibus nunc paucis agere decreuimus: rerum successu illa caruere suo, variis de causis, quas hoc loco ante omnia summatim exponere placet. Et primo quidem foedera illa fecere populi non tam ad suas res firmandas roborandasque, ne a Romanis impetu facto labefactari illae

nimis imperium coalescere potuisset: si mature satis ciuitates ac populi coniunctis viribus vires adhuc exiguae et tenues coercere studuissent. Verum de his vix satis tuto iudicare tibi licet, nisi rebus iam eo adductis, vt nimis sero ad calida prorumpas consilia; in rerum autem initiis haud facile inuenias, cui fidem eorum facias, quae aut temeritas aut ignauus metus animo tuo subiecisse videri poterat.

illae possent; quam ad arma Romanis inferenda, ut ipsi potius fortunae aleam experirentur et in belli casum se committerent; id quod lubricum, plerumque exitiosum fuit. Conuentum porro est in foedus plerumque parum tempestiue, et tempore alieno, hoste iam satis parato validisque viribus instructo; cunctatione quoque consumitum est tempus, ut non nisi sero in certas condiciones consentirent, aut, quae ad bellum necessaria, satis prouisa haberent, aut ad iultum diem copias educerent; quo factum, ut interea Romae compositis patrum et plebis dissidiis in externa odia et iras animi exardescerent. Ita Decemuiris diuina humanaque miscentibus Aequi et Volsci, tum altera parte Sabini, Romanos aggressi, parum prudentibus consiliis vsi, rerum gerendarum opportunitatem manibus dimiserunt. Interdum populi, iuncti societate cum Romanis, foedus, quod ipsi abruperant, in medio discrimine poenitentia ducti repetierunt, aut recipiendi eius spe delusi socios destituerunt, et ipsi otiosi et segnes studia aliorum, quo minus alacritate vterentur, retinuerunt. In primis autem duo maxime successibus obfuisse arbitramur, primo, quod in exsequendis consiliis foederatorum concordia ardorque omnium in commune bonum conspirantium plerumque abfuit et in magna societate abesse solet; quo ipso fieri necesse est, ut foedera a pluribus inita raro successum habeant, ita ut ne a potentiorum quidem multitudine infirmiores opes euertantur; id quod satis docuit cum superiore saeculo XVI. Venetorum fortuna, foedere Cameracensi aduersus eos facto; tum

recens exemplum totius fere Europae in magni regis excidium frustra conspirantis; non enim nisi retardatione consiliorum hostilium opus est, ut refrigescant illa et consenescant; deinde obfuit, quod tum quoque, cum Romanos ipsi ad arma prouocassent, expectare maluerunt, donec suos illi fines ingressi essent, quam id primo loco agere ac videre, ut in Romanorum fines belli molem ipsi a se amolirentur. Tam male illos rebus suis consuluisse videmus, ut, si Hannibalem exceperis, qui bene intelligebat, Romanos nonnisi in Italia, hoc est in suis finibus, vinci posse, vix alii fuerint, qui id, quod summam rei constituebat, perspectum haberent, infractum iam paene esse robur, cui impetus se exserendi aduentus, alienus autem impetus, quem excipiat, expectandus sit. Atque haec ad antiqua maxime tempora referenda sunt, nondum adultis Romanorum opibus; ex quo enim illae adeo inualuerant, ut ne coniunctae quidem multorum regum vires essent pares: multo minus expectari poterat, ut aduersus robur unius vasti et ingentis corporis nerui plurium ad commune consilium intenti celeres satis validosque motus haberent.

Atque haec quidem ita se habere, ipsis rerum argumentis exemplisque declaratum dabimus. Quod igitur primo loco foedus eo consilio initum dici potest, ut opibus Romanorum iam aliquantum auctis occurreretur, Latinorum erat V. C. 253. anno octauo ab expulsis regibus initum, omni Latinorum nomine in bellum in nouam remp. conspiran-

spirante *b*). Quae enim ante id tempus passim commemorantur aut Latinorum inter se, aut Etruscorum, aut etiam utriusque populi in idem foedus aduersus Romanos coeuntis, pactiones, ut inter vicinas gentes, imprimis barbaras, fieri solet, potius ad vim depellendam et vlciscendam, ad res repetendas, aut ira odioque iniuria accepta repente exorto, initae fuerant. Est ex hoc genere foedus inter Latinos, Sabinos et Etruscos, pactum sub Tarquinio seniore apud Dionysium; (III, 51. 57.) si modo homini antiqua in maius augenti et ornanti fides habenda est, Verum illud, quod paullo ante diximus, Latinorum in Romanos foedus tanto magis terrere poterat Romanos, quod eosdem Latinos antea socios amicosque habuerant; sapienti enim consilio iam antea Seruius Tullius id egerat, ut concordiam inter Romanos et Latinos constitueret, moxque Tarquinius alter id effecerat, ut utrumque populum in magnum foedus cogeret, cuius Roma caput esset, feriis quoque Latinis institutis, quibus utriusque populi conuentus haberentur *c*). Nunc idem Tarquinius vrbe expulsus non Romae, sed sibi, principatum illum vindicare, iniuriam suam tanquam illorum communem iactare, audaciam ciuium in metum et suspicionem adducere; cum Tarquinio gener Mamilius, Latini nominis princeps, ut focer reduceretur in urbem, laborare. Irae faces quoque subiiciebant Fidenae

S 5 captae,

b) Dionys. V, 50. 61 sq. Liv. II, 18.

c) Dionys. IV, 25 sq. 45 sq. add. Liv. I, 45. 49 sq. qui rem ad exordia opum Romanarum longe grauissimam nimis leuiter attigit.

captae, inflammabantque odia in Romanos Aricini. Romae tanto maius discrimen instabat, quod graui foenore oppressa plebs nomen militiae dare recusabat. Creato tamen dictatore et plebi et Latinis metus incussus; actum de induciis; altero vel tertio anno pugna ad lacum Regillum facta Latinorum fregit animos. Quod enim facile praeuideri poterat, accidit, ut res in commune curata a singulis esset socorditer, principes quidem Latinorum, muneribus et pollicitationibus Tarquinii et Mamiliii corrupti, alacres ad bellum irent, ipsa autem plebs esset remissa, agerentur quoque incerta de belli gendi ratione consilia; contra Romae dictatore iterum dicto ad unius nutum omnia agebantur intente, cum consilio, et ex edicto d).

Varia inde, aliud ex alio fatum, finitimorum populorum cum Romanis bella: verum capta a Gallis et incensa vrbe (v. c. 365.) facile expectares finitimos populos in commune consulturos idque operam daturus esse, ut urbem, a qua tot mala sibi illata meminerant, ipsis cineribus oppressam sepultamque nullo modo reuiuiscere sinerent. Quod tamen secus accidit; forte quoniam ab iisdem Gallis multas magnasque calamitates experti erant alii, alii e superioribus cladibus, quas a Romanis acceperant, nondum vires receperant; saltem consilia ab iis aut non acta sunt aut non maturata, nisi Romanorum animis viribusque relictis iterum et firmatis. Altero enim anno hinc Volscorum, hinc Etruriae principum, de bello coniuratio facta; defe-

d) Dionys. VI, 2. 4.

defecere quoque Latini Hernicique *e*); sed repressi Volsci a Camillo, dictatore facto; oppressi Etrusci ex improviso; nec ceteri maturis satis consiliis succurrerunt; adeo, societate armorum facta, nisi vnius nutu imperioque ad celeritatem in rebus exsequendis adigantur omnes, ne maximae quidem opes robur habent.

Iam bellum Samniticum, etsi a Campanorum deditione Romanis facta ortum *f*), postea tamen ad tantam molem accreuit, ut Romani etiam de salute sibi bellandum esse cernerent: adiunxere se Samnitibus Latini, Volsci, alique, mox Tarentini, Lucani, Apuli, tandem quoque Etrusci; verum plerique rebus Samnitium iam laborantibus in societatem pertracti, aut viribus haud in vnum coniunctis, aut parum concordibus consiliis. Ita victi et perdomiti alii post alios, belli iuxta ac victoriae tanquam contagio. Etruscos autem saepe mirati sumus, populum pacis bellicae artibus adeo florentem, prudentiaque civili vel in hoc conspicuum, quod XII ciuitates in vnum foedus coniunxerant, vires suas coloniis deductis firmauerant, opes autem nauigatione et commerciis sibi summas pepererant, cum Romanam gentem ferocem et indomitam suis finibus imminentem haberent, non id sibi ante omnia factu opus esse ratos, ut excidio delerent urbem, quam sibi aliquando ipsis excidio futuram esse facile praeuidere poterant; sed eam passos esse vires eas consequi, quibus mox ipsi

e) Liv. VI, 2.

f) Liv. VIII, 29.

ipſi reſiſtere nequirent, inprimis cum nec reip. inſtituta nec ciuium ſtudia militiae ſatis apta eſſent: peccatum tamen ab ipſis eſt in aliis quoque; bello enim ſaepe laceſſitis ciuitatibus foederatis, vt Veientibus, Falifcis, Tarquinienſibus, Volſiniis, permiſere, vt bellum ſingulae pro ſe gererent; comuni vero decreto arma non cepere, niſi cum Romanorum vires iam ita eſſent firmae validaeque, vt iis reſiſti amplius non poſſet. Quod ſi mature ſatis cum Samnitibus arma iunxiſſent: opprimi poterat Romana virtus in ancipiti poſita; enim vero praetulare illi ea, quae in praefens tuta eſſent, minus ſolliciti de futuris etſi ſatis certis; nec adiungere ſe Samnitibus niſi iam fractis ac tantum non debellatis, ita vt omnem belli moleſem ab iis in ſe deuolutam ipſi ſuſtinerent *g*). Victi mox ad lacum Vadimonis fractique ſunt *h*): V. C. 444. Iterum motis armis, ſed conſiliis parum certis parumque firmis, nunc demum de ſocietate cum Gallis Umbrisque iungenda eſt cogitatum *i*): ſed ne tum quidem pugnatum eſt comuni Marte ſignisque in vnum collatis *k*). Victi tandem (v. c. 471.) ad Vadimonis lacum Senones Etruſcique; deditio ab Etruſcis facta *l*).

Quod ſi recentes adhuc et intactae Etruſcorum Samnitiumque vires illo fuiſſent tempore: actum fuiſſet de Romanis, bello Tarentino moto
Pyrrho-

g) Liv. IX, 29. 32. 35 ſq.

h) Liv. IX. 39.

i) Liv. X. 8

k) Liv. X, 27 ſq.

l) Polyb. II, 19. 20.

Pyrrhoque in Italiam accito, Lucanis Bruttiisque in belli societatem plectis. Nec vero faniora fuere consilia ciuitatum Graecarum in extrema Italia: quae nullo communi foedere coniunctae desides expectarunt, donec Romanus arma ad singulas ciuitates circumferret; ipsae Lucanis Bruttiisque in praedae partem adiectae. Scilicet haec illa fuit Romanorum fortuna, cum ipsi, ab initio in summa rerum inopia frugalitati adsueta, corporibus animisque essent induratis, ut, vno excepto Etrusco populo, sed eo luxu, et luxus comite auaritia, privataeque utilitatis studiis corrupto, non nisi paruas ciuitates per omnem viciniam haberent, quibus essent singulis pares; quibusque victis maiores, quam ceteri omnes coniunctim, haberent opes, quae quidem et longinqua terrent. Nam si Roma magna regna et imperia, cum quibus congregandum esset, ab initio statim habuisset: nae virtus illa tantopere iactata in latrociniis rapinisque conseruisset; adeo dubitari potest, ad opes Romanorum tantopere auctas annon fortunae plus quam ipsi illi virtuti imputandum esse censeas.

Debellatum erat in Italia sub a. V. C. 481. Belli Tarentini contagione, et recepta Mamertinorum societate, cum Romanus Siciliae occupandae immineret, Poenus eum a Siciliae aditu prohiberet, bellum Punicum exortum est; quod cum exitum habuisset Poenis infaustum, inde demum consilia agitare coeptum est Carthagine, quomodo Romanae potentiae obsisti posset non modo domesticis, sed et externis viribus adiunctis; et primum

mum quidem societate populorum Africae et Hispaniae, hinc Galliae et Italiae, res tentata; mox Philippus, Macedoniae rex, prudenti consilio, arma cum Poenis sociavit, V. C. 537. ad opprimendam ciuitatem, cuius opes intra Italiae fines haud esse substituras apparebat *m*). Praeclare haec erant consulta et designata. Adfuit tamen et in hoc Romanis fortuna, primo quod interceptis Philippi legatis mature patefacta sunt consilia, tum quod per intestinas discordias et diuersa factionum studia Annibalem nec armis nec copiis iuuerunt Poeni sui; denique, quod Philippus suis rebus, non communi causae, studens nihil prouiderat satis opportune; itaque Romani classe Epiri littora obsidendo Philippum in regno continuerunt; *n*) bello autem cum Poenis fiuito ipsi arma Philippo intulerunt; cuius cum potentia inuisa esset finitimis, quia auaritia et cupiditate prauaque domnandi lubricine omnium iras et odia in se concitauerat, ipsi illi, quorum interesse videri debebat, ut externum populum a suis finibus auerterent, socios se belli Philippo inferendi praebuere; vicitque adeo acceptae iniuriae memoria et ira metum aliarum et grauiorum iniuriarum, quas facile praeuidere poterant a populo, qui honesto sociorum nomine seruientium turbae eos adiiciebat. Ita accrevere in his quoque terris Romanae vires, donec eae tam validae essent, ut frustra Graecorum armis tentarentur. Inde excepere se clades Macedonum, Aetolorum et Achaeorum; qui si communi consilio

m) Liv. XXIII, 33 sqq. Polyb. Exc. VII, 2.

n) Liv. *ibid.* c. 38.

filio ac virtute primis conatibus obstitissent, ceruicem suam a generis humani seruitio intactam forte seruassent.

Noua inde spes affulserat iugi a tot populorum ceruicibus detrahendi, motis ab Antiocho armis; modo ille Annibali obtemperasset, qui in Italiam vt bellum transferret monitis horatibusque instabat; sed, quod imprudentes facere amant, quodque exitio esse solet, medium rex consilium sequi maluit; vt in Asiae quidem terras admittere bellum nollet, nec tamen nisi in Graecia socios armorum quaereret. Verum ne quidem hoc satis prudenter consultum aut in rerum actum perductum; segniter et supine grauissima quaeque curata; opportuna rerum momenta manibus dimissa; aulicorum artibus, assentionibus et suspicionibus, tractatae bellicae res; ita commissum, vt in ipsa tandem Asia cum Romanis esset concurrendum.

Bella deinceps Romanos excepere alia ex aliis; grauissimum sociale V. C. 663. in quo tamen id modo spectatum a fociis, vt aequo cum Romanis iure vterentur. Prudenter ab iis administrata res in hoc quoque, quod legatos miserunt ad Mithridatem o), petentes, vt cum exercitu Italiam ad opprimendos Romanos inuaderet; nec vana ea spes esse potuit; nam Thraces iam tum in armis erant, quos ille mox in societatem belli traxisse videtur: et populos, per quos iter faceret, belli socios habiturus erat; spreto tamen consilio hoc, dete-

o) Diodor. Ecl. XXXVII, 1. p. 540.

deteriora amplexus, rex Ponti constituit in Asia manere, ut et regni fines tutaretur et proxima quaeque occuparet. Ortum ita bellum Mithridaticum: quod cum primum viribus suis aliquantum sustinuisset, posthaec milit ad regem Armeniae, Tigranem, generum suum, ad Arsacem, Parthorum regem, socium et amicum, tum ad reges Syriae et Aegypti, ut arma secum iungerent; Thraces quoque ac Scythicos populos sollicitavit *p*): causam belli odii-que in Romanos concitandi praebebant iustam Nicomedis Bithyniae regis iniuriae, quas Romani aut dissimulabant aut aperte defendebant. Nec facile alias tam clare apparuit, Romani bellica virtute et consilio quantum superessent; etsi enim Italico bello premebantur, et paullo post bellum civile motum erat, distrahebantur autem ducum iurgiis et dissidiis ciuitates et prouinciae, ipsique propter causam belli iniustam odiis omnium laborabant, fausta quoque Mithridati belli erant initia, ita ut victum Nicomedem regno exueret, inde Phrygiam intraret, totamque Asiam suam faceret, in ipsa porro Graecia Athenas arcem opum haberet: missae tamen aduersus eum copiae in illas ipsas prouincias, et coactus ille est paullo post victas Sullae dare manus et pacis conditiones quamuis iniquas accipere. Cum autem Romanorum ducum avaritia et ambitione iterum ac tertio ad arma sumenda fuisset adactus: (V. C. 677.) Sertorii ille Lusitaniam tenentis societate petita, Tigrane quoque ad arma iungenda pellecto, barbaris septentrionis e sedibus suis extractis *q*),

numero-

p) Appian. Mithrid. 15.

q) Ibid. c. 67. 68. 69. 78.

numerofissimas copias parauit; victus tamen Romanorum armis cum in Bosporum fugisset, (V. C. 688.) adeo non fractus est animo, vt et bellum renouare pararet et in ipsam Italiam illud transmittere vellet ^{r)}; ita vt, superato Istro aut per Pannonias et Illyricum facto itinere, Alpium iuga superaret, aut Thracia Macedoniaque peragrata mare Ionium traiceret; quae consilia si euentum habuissent, in summum haud dubie discrimen adducta fuisset res Romana. Intercepta consilia exercitus defectione a Pharnace filio sollicitati.

Atque haec quidem a nobis exposita satis docent, non omnino prudentiam defuisse hominibus, verum non adfuisse fortunam; et fuisse ita in fatis, vt tot populi ac ciuitates, numerosa pube, corporum animorumque virtute rerumque copiis florentes, vnius vrbs auaritia et dominatione excisae, laetissimo Italiae, Siciliae, Graeciae, Asiaeque cultu extincto, solitudine et vastitie squalerent; vtque gentes ingeniis artibusque politissimae, nullo aut exiguo ad ipsa victorum ingenia fructu, (quippe qui ad humanitatem nullo tempore satis expoliti fuere; luxum, pro cultura, habuere) ad barbariem relaberentur. Ad magni imperii molem, qua publica priuataque virtus oppressa deficit, cum res excrescerent: a sano animorum morumque habitu, qui, nisi in mediocribus rebuspublicis aut regnis, vix durare potest, ruentibus omnibus in opum magnarum cupiditatem, et cum hac in luxus libidinum-

^{r)} Ibid. 109.

Heynii Opusc. aed. Vol. III.

dinumque foeditatem, extinctum est, quicquid usquam, aut natura aut studio, lege vel more, esset praeclarum: quibus omnibus si foederum salubri pacione mature obuiam iri potuisset, quanto cum humanitatis omnis fructu id factum fuisse putabimus!

Verum agamus id, cuius causa suscepta erat haec commentatio, et, omissis votis ac desideriis vanis, acquiescamus in rerum nostrarum statu praesenti haud utique poenitendo, cum prouisum saltem sit, ne nostra aetas seruitutis iugum suae cervici impositum sentiat, agamusque deo O. M. gratias pro tanta rerum prosperitate, cuius fructus nobis conceditur. Quod ut rite fiat, agite, Ciues, bonis votis nostram religionem pietatemque prosequimini, ducendaeque in templum academicum pompae, si videbitur, Principes Serenissimi, Comites Illustrissimi, et quique aut generosa stirpe sati ad virtutem annitimini, aut virtute et ingenio vobis nobilitatem parare studetis, interesse fauentes haud dedignamini. PP. in Georgia Augusta d. XVI. Septembr. cIdIdccLXXXV.

XVII.

ACADEMIAE GEORGIAE AVGVSTAE
 P R O R E C T O R
 HENRIC. AVG. WRISBERG D.
 CVM SENATV
 SVCCESOREM

IN
 MAGISTRATV ACADEMICO
 LVDERVM KVLENKAMP
 CIVIBVS SVIS

COMMENDAT
 INDICTIS SOLLENNIBVS.

IN A D. II. IANVARII MDCCCCLXXXVI

Demogorgon daemon, e disciplina Magica repetitus.

Quoties per omnem generis humani historiam in errores, pravas opiniones, superstitiones ac fraudes incidimus, quibus symbolica et allegorica loquendi ratio locum fecit: in illa cogitatione defixi sumus, quot quantisque opinionum monstris superstitionumque ludibriis caritura esset vita humana, si ab initio statim generis humani sermō idoneus extitisset, quo eloqueretur quisque ea,

T 2

quae

quae cogitatione designabat, proprie, nec vtendum fuisset symbolica ratione, qua sensui subiiceretur id quod sub sensum non caderet nec adduci posset. Saltem, ex quo sermo hominum ad philosophicam subtilitatem fuit adductus, vtinam omnis illa symbolica et allegorica oratio et actio e generis humani commerciis expelli potuisset! Nunc autem ita accidit, vt ea symbola, per quae rudiorum aetatum notiones expositae essent, non modo retinerentur, verum adeo acciperentur tanquam proprie dicta, efficerenturque ex iis opinionum portenta, quibus implicita mens humana per omne aeuum tanquam compedibus tenetur, e quibus necdum magnae hominum parti extricandi se nec elabendi vlla est facultas. Ita per omnes aetates et per omnium gentium sapientiam diuinam et humanam regnarunt dogmata et placita ex illis symbolis male acceptis ducta, et ad subtilitatem philosophicam reuocata: quibus tanto difficilius est occurrere, si velis, cum auctoris verba ipsa recitari aliaue auctoritas commemorari possit diserta. Scilicet fecit fraudem illa opinio, qua, quod primi homines, necessitate adducti, sermonis idonei penuria, per symbola et hieroglyphica protulerant, consilio aut fraude factum plerique interpretarentur, inque ipsis disciplinarum primordiis et incunabilis subtilissimas quasque, vix in nostra litterarum luce animaduersas, aut omnem extra humani ingenii modulum positas, arcanas doctrinas sermonis vel scripturae ambagibus et inuolucris occultare voluisse crederentur seu sacerdotes seu philosophi. Quis quaeso, suo iudicio, non aliorum cupiditate, ductus sibi persuadere possit,

possit, patriarchis aut sapientibus primarum aetatum viris de rerum naturis ea cognita fuisse, quae tot virorum subtilissimorum studiis, rerum experimentis, instrumentorum inuentis, multorum saeculorum progressu aut nondum aut vix tandem ad qualemcunque hominum notitiam adducta sunt! Subnata inde interpretantium studia, incerta ac dissona, utpote in symbolis ac signis, quae definitam satis notionem habere nequeunt. In mythis ac ritibus explicandis captatae subtilitates generis omnis. Incussa quoque mentibus religio, ne patefacta in vulgus efferrentur. Eo maior erat venia fingendi absurda *). Natum ex ista opinionum fraude simile aliorum studium vera symbolis, allegoriis, mythis involuendi, arcanas disciplinas condendi: quasi veritas nuda nec adspici possit nec ferri. Exitere adeo per omnes fere inde aetates, qui, cum philosophi videri vellent et multi etiam essent, cogitata animi non proprio, plano ac simplici sermone perspicue reddidere, sed uti maluerunt allegoriis et hieroglyphis; quique ipsa sapientiae principia vocabulis tropicis enuntiarunt; qua ipsa re, cum iisdem signis notiones quisque subiiceret diuersas, ex iisque, probabiliter ut ipsi videbatur, deduceret ea, quae vera esse sibi persuasum haberet, cum indies implicarentur veteres fraudes nouis, et

T 3 in

- o) Appositus ad rem est Macrobiani Sat. 1. 7. locus: „*Saturnaliorum originem illam mihi in medium proferre fas est; non quae ad arcanam diuinitatis naturam refertur, sed quae aut fabulosis admixta differitur aut a physicis in vulgus aperitur. Nam occultas et manantes ex veri fonte rationes ne in ipsis quidem sacris enarrari permittitur; sed si quis illas assequitur, continere intra conscientiam telas iubetur.*

in alia commenta detorquerentur, contexta est in multis rebus ea opinionum, somniorum, nugarum anilium tela, vt interdum difficile sit, stamina singula, e quibus ea contexta sit, retexere. Est sane hoc ex iis, in quibus generis humani calamitas vertitur, quod, quae simplex rerum ratio hominum animis apponit, ea illos haud facile tenent, contra symbolicarum rerum apparatus sensibus percussis eos mouet. Fluxit ex eodem fonte alia malorum eluuius, cum ipsum numen per symbolorum ambages ea, quae hominibus declarare vellet, proponere statuerent. Quod nisi hac persuasione teneri maluissent: vix in illa incidissent, quibus deorum voluntatem significari crediderunt homines. Vix in vaticiniorum obscura et perplexa, aut in portentorum, prodigiorum et ominum ludibria deflexissent: nisi ea opinione ducti fuissent, ipsum numen quae vellet non aliter quam per symbolorum inuolucra subinnuere. Quid tamen numine magis dignum videri poterat, quam, quae vellet, accommodate ad sentiendi et intelligendi vim humanam declarare! Quae cum ita sint, quis in ambiguo positum esse existimet, an nostris adhuc aetatibus vlla symbolica praeciendi ratio accommodata sit? Etsi enim nemo dubitet symbolis ad hominum sensus animosque impellendos magnam inesse vim; deficient tamen nostros homines cetera, quibus inter veteres certi ritus symbolici tantam ad animos vim habere poterant: adsunt contra permulta, quae aut ad mera ludibria aut ad paucorum fraudem et dominatum reuocant, quicquid huius generis inuentum habetur: tantum abest,

abest, ut ad verum videndum acuat oculos obiecta caligo et caecitas. Versatur saltem in lubrico omnis hic conatus homines per veri ignorantiam emendandi, et rectis vnius sapientis consiliis insinuant se sexcentorum fraudes ex aliorum desipientia suis rebus consulentium. Per omnes aetates grassata sunt ea opinionum ludibria, quae, cum symbolice et allegorice essent redhibita, sapienti, qui notionem bonam et sanam, quam subiiceret, haberet, non omnino improbari poterant: cum interea illa animos aliorum phantasmatibus superstitionum ac spectris obiectis turbarent; id quod haud euenisset, si maluissent sapientes vulgus *pauca plane nosse, quam multa obscure ac male*. A Cosmogonia et Theogonia, symbolice declarata, quanta philosophiae veteris pars fluxisse videri debet! Ad seriora etiam tempora in Oriente ista philosophandi ratio permansit; nisi quod, principio malo in disciplinam inducto, suum illa sibi habitum induerat: qui mox, inprimis inter Alexandrinos, aliisque in terris, adscitis Pythagoreo-Platonicis placitis, admodum fuit variatus. Nulla forte aut esset aut fuisset mystica doctrina, si, quae allegorice ac symbolice proposuerant, proprie efferre maluissent illi, qui talium systematum auctores fuere. Ita nec vlla fuisset magia, nisi veterum philosophemata per symbola reddita fraudem hominibus fecissent. Cum enim illa versetur circa virtutes rerum naturae occultas, aut proprietates ac virtutes numinis, quandoquidem et illae et hae veteri cum philosophandi tum eloquendi more in personas, adeoque in deos seu daemones ac genios, essent mutatae, intuentae

T 4

sunt

sunt cum indoctorum hominum seu fraudes seu stupores, tum sagaciorum praestigiae, philosophantium artes theurgicae, sapientiae arcanae mysteria; ex iisque, infinitis modis permixtis, modo necromantia extitit, modo theurgia; modo magia seu Zoroastrea, seu Cabbalistica, seu aliis nominibus celebrata. Quum autem omnia haec per sensuum et phantasiae vim in hominum animos illabantur, tanto potentiora ea sint, necesse est; adeoque mirum non est, si per omnes aetates fuere, qui similem arcanam disciplinam profiterentur, etsi infinitis modis variatam. Est vnum ex hoc genere, quod, cum primo adspectu valde abhorrens et insolens visum esset, accuratiore a nobis inuestigatione facta mox ad genus suum referri potuit.

Memineramus scilicet, Commilitones, quoties in MILTONI lectione peruentum erat ad locum de Satanae professione ad Erebum, vbi Chaos cum Nocte in throno sedens ille conspexerat, teneri nos memorato inter adstantes cum Orco et Hade *Demogorgone* a), quod quidem nomen antiquitatis fide

- a) *Paradise lost* II. 965. — and by them stood
*Orcus and Hades, and the dreaded Name
 Of Demogorgon.*

Excusum est in recentioribus edd. *Damogorgon*. Deletum utrumque hemistichium: *and the dreaded Name of Demogorgon*: malebat BENTLEY; scilicet non lectionem emendans, sed ipsum poetam eiusque iudicium ac verba: id quod sub aliud critices genus cadit. Idem BENTLEY ROGATII inuentum arbitrabatur hoc nomen: *Boccace, I suppose, was the first, that invented this silly word Demogorgon*: meminerat tamen Spenzero quoque nomen frequentari. Alia ex hoc poeta

fide niti haud recordabamur. Ad Bocatium auctorem referri illud solet; nec tamen satis probabile esse videbamus, quod ab hoc eodem inuentum et excogitatum nomen illud traditur. Nuper cum in magicis praestigiis in nomina daemonum et bonorum et malorum inquireremus, pupugit animum, quod in antiquitate, quam eruditam vocamus, nulum alicuius Genii seu Daemonis nomen occurrere recordabamur. Vnde igitur illa, quae vulgo feruntur, ducta putabimus? Scilicet, quod diligentior inuestigatio facile docuit, sunt ea mera ludibria, ex Iudaicis plerumque superstitionibus ducta; vnde harum nugarum origo Cabbalistica intelligi potest. Coepimus itaque iterum in Demogorgonis origines inquirere; nomen graecum, quodque eruditae antiquitatis colorem habere videtur. Cumque nunc proludendum sit indicendis per hanc ipsam tabellam sollennibus noui magistratus academici castino die a Viro Excellentissimo

LVDERO KVLENKAMP

fusciendi: agite, Commilitones, cum argumentum commune aliquod et *publica materies* commentationi huic subternenda sit, dispiciamus paucis

T 5 de

poeta exempla attulit doctus MILTONI commentator Th. NEWTON; idemque ex MILTONI prolusionibus (*Opp. Lat. p. 340.*) locum adiecerat, quo constare potest, cum iudicio Miltonum hoc nomen Demogorgonis adhibuisse: "*apud vetustissimos itaque mythologiae scriptores memoriae datum reperio, Demogorgonem deorum omnium Atauum (quem eundem et Chaos ab antiquis nuncupatum haviolor) inter alios liberos, quos suscepit plurimos, Terram genuisse; hac incerto patre Noctem fuisse procreatam.*"

de hoc daemone, eiusque auctorem et natales exquiramus. Nugae! dicetis, quorsum enim nouum daemonem expilcari, cum eorum numerus iam satis magnus per omnem terrarum orbem emerferit, nuper etiam noua cohors inter certa sodalitia ad stupenda rerum miracula perficienda prodierit! Forte tamen ipsae hae *ducent nos ad jeria nugae*.

Ad Bocatii auctoritatem vulgo Demogorgonis seu Daemogorgonis nomen referri solet. Proferenda igitur et paucis comprehendenda sunt ea, quae is de hoc nomine in *Genealogiae deorum* principio proposuit: „Veternosus ille deorum omnium gentilium proauus, vndique stipatus nebulis et caligine, mediis in visceribus terrae habitat; pallore quodam muscoso, et neglecta humiditate amictus. — „Huius insipidae credulitatis causam dicit THEODONTIVS non a studiosis hominibus habuisse principium, sed a vetustissimis Arcadum rusticis,, qui, cum ex terra fontes emitti, fruges nasci, ignes euomi, viderent, Terram omnium rerum parentem crediderant; „qui autem post hos sequuti sunt, paullo altius sentientes, non terram simpliciter harum rerum dixere auctorem, sed illi mentem implicitam esse diuinam, intellectu et nutu cuius agerentur ista, *eamque mentem in subterraneis habere sedem arbitrati sunt* — quam diuinitatem non alterius quam *Demogorgonis* existimabant. — „Hic igitur cum esset apud vetustissimos Arcades in honore praecipuo, rati taciturnitate nominis diuinitatis augeri maiestatem, seu existimantes indecens esse, tam sublime nomen venire in buc-

cas mortalium, vel forte timentes, ne nominatus irritaretur in eos, consensu publico vetitum est, ne impune nominaretur a quoquam., Prouocatur inde ad duo poetarum loca, de quibus nunc videndum est. Alter est Lucani (lib. VI, 745.) vbi Erichtho saga, vt animam in corpus reuocarer, diis inferis minas facit: — *paretis? an ille Compellendus erit, quo nunquam terra vocato Non concussa tremuit;* (quo vocato semper terra mouetur) *qui Gorgona cernit apertam; Verberibusque suis trepidam castigat Erinnyn; Indespecta tenet vobis qui Tartara; cuius Vos estis superi; Stygias qui peierat undas?* Memorat hic poeta numen ceteris diis inferis potentius in Tartaro sedens; quod in sacris magicis invocatum deos inferos cogere possit. Nihil amplius his versibus inferri, si nihil aliunde intuleris, manifestum est b); et potuit numen illud adumbratum esse ex diis illis, quos summo robore praeditos in Tartarum detrusos fabulata erat in Cosmogoniis antiquitas, Titanes puta et Cronum, et iam ante Centimanos; (v. Apollodor. pr.) forte Briareon (Hesiod. *Θ.* 817 sq.) Aegaeonem (*augustam centeni Aegaeonis umbram* Stat. Theb. IV. 535.) aut Typhoeum. Alter locus est Statii IV. Theb. 516. vbi Tiresias ad Vmbram Laii euocandam deos inferos cunctan-

- b) Quae ad exornationem adiecta sunt, ad maiorem numinis potentiam declarandam valere debent: *qui Gorgona cernit apertam*, h. e. Medusam, nec aut in lapidem mutatur aut, quod saltem hic locum habere videtur, metu ex aspectu et horrore percutitur. Imperat ille Furiis, tenet Tartara, adeoque loca infra Haden seu Orcum sita, vt adeo dii inferi respectu ad illum habito sint superi; tandem Stygem contemnit deorum superiorum terrorem, per quem illi iurare solent.

cunctantes compellat: *Iam nequeo tolerare moram — Spernite ne, moneo: et nobis saeuire facultas. Scimus enim et, dici quicquid noscique timetis, Et turbare Hecaten; ni te, Thymbræe, vererer, Et, triplicis mundi summum quem scire nefasum. Illum sed taceo; prohibet tranquilla senectus.* Ait Tiresias se formulas magicas nosse, quibus ipsa Hecate cogi possit, (quas tamen fratris Apollinis, cuius ipse munere vaticinatur, reuerentia adhibere recusat) et se nosse numen potentius, cui triplex regnum deorum, caeleste, terrene et inferum, pareat. Creditum igitur in rebus magicis, deos inferos, Hecaten et Manes, cogi posse, et quidem per aliud, idque potentius, numen, sed quod arcanum esset, nec extra sacra magica proferendum. Coniuncta cum his debuit esse alia opinio, cum ipso more formulas magicas seu carmina voce submissa recitandi coniuncta, qua numinis istius nomen et ipsum esse arcanum, nec nisi iis, qui magicas artes tenerent, notum ferebatur; mox, nec effari illud cuiquam licere. Latius inde sparsa magica superstitione, accessisse et insinuasse se videntur superstitiones aliae Orientis, Magicae et Iudaicae, mox et Neoplatonicae, quibus nomen dei non vno modo *ἄγρον* et ineffabile habebatur. Nec tamen horum quicquam obuersatum esse videtur seu Statio seu Lucano. Atqui ab iis Demogorgonem respici, et esse hoc arcanum illud numen, non ex Bocatio; tantum abest, ut is primus sit auctor et inuentor nominis; verum ex Lutatius Placido, seu, quem alii vocant, Placido Lactantio discimus ad illum Statii locum: „*dicit deum demogorgona summum, cuius*
nomen

„nomen scire non licet. Infiniti autem philosophorum,
 „Magorum, Persae etiam, confirmant reuera esse c),
 „praeter hos deos cognitos qui coluntur in templis, alium
 „principem, et maxime deum, numinum ordinatorem,
 „de cuius genere sint soli Sol atque Luna: ceteri vero,
 „qui circumferuntur, astra nominantur, quae eius cla-
 „rescunt spiritu; maximis in hoc auctoribus, Pytha-
 „gora et Platone et ipso Tagete, convenientibus.

Non itaque nunc saeculo XIV. illud philoso-
 phema mythicum contineri videmus; sed altius illud
 assurgere. Confecta res esset, si, Lutatius ille cu-
 ias fuerit et quando vixerit, satis recte teneremus.
 Eum ad saeculum VI. saltem esse referendum ex
 laudatis ab eo scriptoribus collegerunt viri docti;
 etsi miratione dignum haberi potest, tam bonum
 Grammaticum et interpretem, saltem antiquiorum
 excerpta cum dilectu proponentem, illo tempore
 nasci potuisse.

Antiquiorem auctoritatem Demogorgoni haud
 facile asseras. Nam locus Hygini, quo ille memo-
 ratur,

- c) Antiquior lectio apud Micyllum ad Lucan. l. c. occur-
 rit: *infiniti autem philosophorum magnorum per se etiam*
confirmant. Ab Omnibono autem haec memorantur:
Multi dicunt, per hunc Demogorgonem animam intelligi
mundanam, quae vegetat omnia, quae omnibus naturis
proposita est, de cuius semine firmamentum, Solem et
Lunam et Stellas natas esse dicebant. Et hoc secundum
Servium. Sed secundum Theocleten, philosophi dicunt,
Daemogorgonem esse rerum omnium et deorum omnium
principem, genitorem Terrae, Erebi et Parcarum; α
δαίμων. quod est sapiens, quia intelligentiam maximam
rerum omnium habent. Videtur hic ex alio fonte hau-
sisse; nec, si Theodontii nomen in Theoclete lateat,
 SERVII tamen unde auctoritatem acceperit, constat.

ratur, haud dubie est interpolatus; et quod ad Chrysippum prouocatur, temere factum arbitrari-
mur d). Interea altera nunc dubitatio subnasci-
tur, vnde Lutatius ille Demogorgonem acceptum
habuerit! Ad quam antequam respondeamus, de
Theodontio videndum est, quem Bocatius tanquam
proximum fontem, e quo sua hauserit, laudare
videtur.

Theodontium non hoc modo loco, sed saepe
alibi, tanquam auctorem eorum, quae apponat,
laudat Bocatius; et ex eo alii. Frustra in hominis
originem et aetatem exquirendam bonam horam
consumimus. Tandem diligentiore inuestigatione
factaprehendimus, falso inter viros doctos sae-
culi XIV. illum hominem haberi: non hominis sed
libri nomen illud fuit aut certae eius particulae, in
qua Theodontio, ficto nomini, dicentis partes fue-
rant datae. Ipse enim Bocatius alio loco (XV, 6.)
vbi

- d) Hygin. praef. p. 14. v. Stav. "Ex (*Demogorgone et*
Terra Python, draco diuinus." Haud dubie hoc ex
interpolatione. Nam e Terra sola editum Pythonem
tradidit antiquitas; alterum adiectum ex Bocat. de
Geneal. deor. l., 7. aut ex simili auctore. De CHRYSI-
SIPPO locus est apud Bocat I, 14. "Erebus, vt Paul-
lus ait (est is Paullus Perusinus, vt paullo post videbi-
mus) a Chrysippo traditum, filius fuit Demogorgonis
et Terrae." Chrysippus esset sane auctor non impro-
babilis interpolatae mythologiae, si quidem ea, quae
de eo memorata sunt, et ex scriptis eius libros *πρὸς*
Θεόν memineris. Sed ex diligentiore inuestigatione
constare nobis visum est, conflatam esse illam Chrysippi
auctoritatem ex Cicerone N. D. III, 17. vbi de ma-
lis et miseriis vitae agitur Chrysippo in partes vocato,
forte e libris *πρὸς καὶ Θεόν*. cf. Tusc. IV, 5. et 10.

vbi viros sui saeculi (erat illud XIV.) doctos, suarum narrationum auctores, interposito singulorum elogio, commemorat, *Paullum Perusinum* insignibus laudibus celebrat, ex eiusque libro multa, „et potissime ea quae sub nomine Theodontii apposita sunt,, se sumsisse profitetur e).

Nondum

- e) Adscribemus locum, emendatius quam in impressis. Paullum Perusinum „qui, et aetate prouectus, et multarum rerum notitia doctus, fuit diu magister et custos bibliothecae Roberti, Hierusalem et Siciliae regis inclyti (regnauit is ab a. 1309-1342); et si vsquam curiosissimus fuit homo in perquirendis, iussu etiam sui principis, peregrinis vndecunque libris, historiis et poeticis operibus, iste fuit: et ob id singulari amicitia Barlaae iunctus, quae a Latinis habere non poterat, eo medio innumera hausit ex Graecis. Hic ingentem scripsit librum, quem *collectionum* titulauerat, in quo inter cetera, quae multa erant et ad varia spectantia, quicquid de diis gentilium, non solum apud Latinos, sed etiam apud Graecos, inueniri potest, adiutorio Barlaae arbitror collegisse. Nec dixisse verebor ego iuuenulus adhuc, longe antequam tu (regem Robertum alloquitur) in hoc opus animum meum traheres, ex illo multa, audius potius, quam intelligens sumsi, et potissime ea, quae sub nomine THEODONTII apposita sunt: quem librum, maximo huius operis incommodo, Biellae, impudicae conlugis, crimine, eo defuncto, cum pluribus aliis ex libris eiusdem deperditum comperi.” Fuit igitur liber Paulli Perusini, *Collectionum*, iam tum, cum Bocatius ista scribebat prouectus aetate, (Ob. 1375) abolitus crimine vxoris, non Theodontii, sed Paulli. In illo libro aut partes loquentis Theodontio datas, aut partem operis Theodontii nomine inscriptam fuisse necesse est, ex quo Bocatius se iuuenem multa transtulisse fatetur. Post illa, quae sic satis liquido constare videntur, euoluimus aequales Bocatii, tum eos, qui de viris saeculi XIV. clavis tradidere; vnum in his Laurentium Mehus in vita Ambrosii Trauersarii p. CCXCIII. vidimus eo deuenisse, vt Paulum

Nondum ex hoc saltu in lucem emerimus. Ecce enim alia larua obiicitur. Nam alio loco, ubi Bocatius de Litigio e Chao nato narrat, *de cuius educatione*, inquit, *a Theodontio recitatur fabula: dicit enim a Pronapide poeta in Protocosmo scribi, quod semel residente Demogorgone, ut quiesceret, in Aeternitatis antro, sensit in utero Chaos tumultuari f)*. Vnde nunc repente inauditi nominis hunc scriptorem enatum esse dicemus! Scilicet Pronapidem Atheniensem, poetam lyricum, Homeri magistrum, antiquiores ferebant g). Inciderat itaque Paullus in

Proto-

lum nomen Theodontii sibi induisse putaret. Est autem Theodontius, aut verius Theodotius, ex Theodoto factum, forma diminutiva, redditumque sic quod Italia Diodatino esset. BARLAAS ille, seu Barlaam, cuius opera Paullus usus esse dicitur, monachus erat Calabriae saec. XIV. Inter eos referendus, qui graecarum litterarum semina in Italia iecere; fuitque ille eandem magister Petrarchae et Bocatius. V. Mehus l. l. p. 219. 268 sq. eundem poeticarum fictionum interpretem optimum vocat Aretinus ibid. p. 219. Ex eo tamen ea, quae de Demogorgone tradita sunt, petita non erant, cum a Latino homine, non a Graeco. profecta ea esset, ipsa res arguat, et laudata Lutatii auctoritas iam omnem scrupulum exemisse videri debeat. Ceterum in Bocatius firmaverat ac perfecerat graecarum litterarum disciplinam consuetudo cum LEONTIO, seu Leone, quem secum Florentiam adduxerat; eo interprete Iliadem legit per tres annos et exempla Homeri Florentiam reduxit; v. Bocat. XV, 7. Add. c. 6. qui locus classicus est; Repetit ea Guadagnius ad Graeca Pandectarum p. 216. cf. Mazzuchelli *Scrittori d'Italia* To. II. P. III. p. 1325 et 1322.

f) De Geneal. Deor. I, 3. add. IV, 54.

g) Vid. Diod. III, 66. et West. cum Fabric. B. G. I. 27. De Protocosmo Gyrardus de Poetar. hist. Dial. II. p. 89. D. Opp. "PRONAPIDUS (ita scribitur) excellenti fuit

Protocosmum, librum, qui eius nomen praeferebat, aut in scriptorem, qui commentitium Pronapidem laudabat; nisi ipsum talem auctoritatem commentum esse suspiceris. Vtrum probabilius habendum sit, non liquet; ferebat illa aetas fraudes huiusmodi multas ac varias.

Iis, quae supra e Lutatio exposita sunt, haud pauca commenta adiecerat auctor Theodontii, apposita illa, et exornata forte, a Bocatio; Erat enim Demogorgoni, miseri in Terrae tenebris principatus patri, socia seu coniux, Aeternitas h); additum Chaos, tanquam materia, et ipsa aeterna, cui posset formam dare. Prognatum agmen lX filiorum et filiarum. Inde Demogorgone et Terra prognatus Erebus i). Vt verbo rem absolvamus:

notionem

fuit ingenio, (hoc ex Diodoro sumtum) atque mundi principium versibus complexus est, quod Πρωτοκόσμου inscripsit, celebratum et citatum ab auctoribus." Videbat itaque Gyraldus, saeculi XVI. scriptor doctissimus, auctores, qui illum librum laudabant.

h) Cuius descriptionem praeclaram afferunt e Claudiano de Laud. Stilic. II, 424 sqq. Idem in Rufin. II, 522 sqq. bene illustrat Chaos in Tartaro situm.

i) *Litigium (Eris) Pax. Clotho, Lachesis et Atropos. Polum. Phytos (ex corruptis voc. Phaethon f. Sol, et Python) Terra, e qua Nox et Tartarus. Fama (e Virgilio Aen. IV.) Tages. Antaeus. Erebi progenies XXI. Amor. Gratia. Labor. Invidentia. Metus. Dolus. Fraus. Pertinacia. Egestas. Miseria. Fames. Querela. Morbus. Senectus. Pallor. Tenebra. Somnus. Mors. Charon. Dies. Aether. Sequitur inde stirps Aetheris, e quo Iupiter, et sic porro. Sunt haec partim ex vulgaribus Theogoniis Hesiodi et al. petita, partim e Cicerone N. D. III, 17. Omnino operae pretium est, in scriptoribus*

Heynii Opusc. acad. Vol. III.

V.

saec.

notionem mali principii, mali daemonis, in mythologiam transtulerat, et cosmogoniam in theogoniam mutauerat, seu personatus ille Pronapides, seu ipse Paullus. Verum notionem ipsam Demogorgonis ad Lutatium redire supra vidimus: eo nunc reuocanda est disputatio.

Iam ex verbis eius supra adscriptis manifestum fit, haustam esse Demogorgonis notionem e philosophia illa barbara Orientis a Magica Persarum disciplina deriuata, qualis erat illa proximis inde a C. N. saeculis, notionibus omnis generis permixta, Platonicis, Iudaicis et Christianis: Orientalem dicunt philosophiam, de qua vana est in verbis haerens disputatio, an vlla fuerit; nulla enim fuit, si singulare aliquod et elaboratum systema intelligas; at fuit vtique, si certa philosophemata, inprimisque illud de duplici rerum principio, ex Oriente profecta ea voce comprehendas. Eadem in vulgus dissemi-

saec. XIII. attendere ad auctores priscos, quos manibus triuere: et esset ea materies praeclari et ad varia consilia vtilissimi libri. Praeter Ouidium, Ciceronem, Lucanum, Statium, et similes, laudantur a Bocatius in primis Lactantius, Seruius, ai. Albericum adhibuit III, 21. Fulgentium IV, 45. Dictyn. Isidorum et ai. Sed haec diligentius essent persequenda. Ceterum fabulas istas, e Theodonto Pauli Perusini receptas, mature deseruere viri docti, etiam Natalis Comes, et si gloriolam captans ex laudandis auctoribus parum vulgo notis; quorum nomina e scholiis vet. descripsit. Chartarius qui eodem fere tempore de imaginibus scripsit (medio saec. XVI.) memorat quidem Demogorgonem, monet tamen in nullo scriptore sibi eum occurrisse. At est Burcardus Pylades Brixianus (saec. XV exeunte) qui Bocatium expressit carmine: *Theogonias libris V.* subiectis Hesiodo in edd, nonnullis.

disseminata erant per sacra Mithriaca. Tradebatur igitur „praeter deos cognitos, qui coluntur in templis, alius princeps (et) maxime deus, ceterorum numinum ordinator, de cuius genere sunt soli Sol atque Luna; ceteri vero, qui circumferuntur, astra nominantur, quae eius clarescunt spiritu., Illud quidem diserte a Lutatio non edicitur, fuisse illum Demogorgonem principium malum; videtur tamen eo ducere opinionis istius, qua malum principium adscitum est, summa celebritas, quae per Orientem regnavit k).

V 2

Enim

- k) At enim confusionem varii generis et originis diuersae notionum agnoscas in seqq. Lutatii verbis: nam primum subiicit: *“maximis in hoc (de vno deo principe et ceterorum numinum ordinatore) auctoribus, Pythagora et Platone et ipso Tagete, consentientibus.”* Tum vero ille alia de suo adiicit, quae Christianum hominem arguunt: *sed dire, inquit, sentiunt, qui eum interesse nefandis artibus actibusque magicis arbitrantur. — Sed hoc dei vocabulum a nullo hominum sciri potest; magos tamen, cum virtutes dei per naturae potestates designarent, pluribus nominibus deum appellasse, h. in plura numina dei nomen distraxisse. Hic sensus inesse videtur illis, quae subiiciuntur, sed admodum corrupta: sed cum magi vellent virtutis eius, ut putabant sese comprehendere singulas appellationes, quas per naturarum potestates abusiue modo designarunt, et quasi plurimorum numinum nobilitate deum appellare conati sunt, quasi ab effectu ductis rei cuiusque vocabulis. Sicut Orpheus fecit, et Moyses summi dei antistes, et Esaias et his similes. Nouissima an aliunde inserta sint, haud facile dixeris. Sed superiorum verborum correctionem tentauit Barthius ad Theb. IV. 514. ut tamen sententiae parum consuluisset videretur. Forte sic constituenda lectio: sed cum magi vellent virtutes eius, ut putabant, comprehendere singulas appellationes, quas per naturae rerum potestates abusiue modo designarunt: quasi plurimorum numinum nobilitate deum appellari conati*

Enim vero restat difficultas nominis *Demogorgonis*, unde illud ductum, a quo inuentum sit. Ad rationem quidem grammaticam fatendum est illud parum scite formatum esse; multo magis si a *daemone* ductum creditur. Erit saltem a terror (*δαῖμα* vel *δαῖμος*) petendum; ut sit adeo *Δαιμονογόρων*;

nati sunt. Ceterum superstitiones Mithriacas arguunt illa quoque quae in eadem Lutatii nota antecedunt: "*Et triplicis mundi. Iuxta picturam illam veterem, in qua haec tormenta descripta sunt et adscensio ad deum.*" Notio ipsa, *αὐτοδός*, occurrebat in Platonica disciplina, ex Heraclito traducta in eam, mox et in Mithriaca recepta, ut vel ex Porphyrio de A. N. constat. Et paullo ante: "*tetigit et philosophice partem sacrorum iuxta picturam, quam in inferiore ad notationem commemorat.*" Leg. adnotatione. Etsi totum scholium ab alia manu in margine adscriptum, nec Lutatii esse putamus. Imbutum autem hominem opinionibus his seu Mithriacis seu Magicis fuisse, aliunde constat, ut ad Theb. I, extr. Ad lib. VI, 364 autem, ubi de anima mundi e Platonis placitis meminerat: *sed huius, inquit, tractatus secretae philosophiae magna laus Persis debetur: vel Perseus scilicet ille magnus (an magus) praeceptor huius philosophiae: nisi haec vltima adfuta e margine. — Sed de his rebus prout ingenio meo connectere potui, ex libris ineffabilis doctrinae Persei praeceptoris seorsum libellum composui.* Narrat etiam de thuria signis libros Tiresiae ad IV, 468.

- 1) In etymologia vocis *Demogorgonis* dici vix potest, quam indocte versentur Bocatius et alii. Ex eius et Omniboni sententia *Daemogorgon* scribendum erit; nam a *δαίμων* ductum esse putant; ita vero *δαιμονογόρων* scribendum fuisset; etsi ne huius quidem formae aliud exemplum meminimus. Debat esse *Γοργοδαίμων*, *Gorgoni* similis *daemon*, seu *Gorgonis* more terribilis; ut in Orphicis *γοργόφονος*, eadem analogia *γοργοδαίμων*, ex capulo *daemon*: de sene capulari. Sed si vere illa vox a graeco homine formata fuit: debuit *δαιμονογόρων* esse a metu dictum; (*δαῖμα* vel *δαῖμος*) etsi vel sic illa difficultas

γων; etsi ne sic quidem res fatis bene procedit. 1) Nominis tamen huius, etsi male inuenti, ortum tanquam manu tenere videmur: debetur enim haud dubie Lucani verbis supra laudatis, male intellectis *qui Gorgona cernit apertam*. Verum suspicamur vel sic nomini causam subesse aliam ex indocta vitiosaque scriptura profectam. *Demiurgus* erat, qui in Demogorgonem deprauatus est.

Scilicet nomen hoc *Demiurgi*, (τοῦ Δημιούργου) bonae notae vocabulum, mox, varia acceptione corruptum, tandem malae notae moneta factum est, ut vix probus vir eo numo uti ausit. Apud Platonem, et ipsum Timaeum, quod fatis constat, *Demiurgus* erat ὁ Νοῦς m), philosophema philosopho hoc haud indignum et in quo cum voluptate mens sanctior ac viuidior versari potest. At Platonici mox infinita super hoc nomine argutati, modo secundum a principe deo, (τὸν λόγον) modo tertium fecere n). Iam per Orientem ea notio

V 3

obtinue-

cultas restat, quod, cum tantum ἡ Γοργὼ vel Γοργῶν dicta sit, etiam ἡ Δαιμογόργων formata esse debuerat. Haecenus igitur multo magis probabile sit, vocem *Demiurgi* in Lactantii codd. corruptam nouum monstrum peperisse. Etiam e Micylli ad Lucanum nota apparet, fuisse iam olim, qui Demogorgonis nomen, ut fictitium ac vanum, reicerent, et pro eo *Demiurgi* vocem restituendam contenderent. Vocatus *Gorgona* terram interpretatur; refert autem versum ad Demogorgonem, quod in visceribus habitet terrae. Sic et Omnibonus ad e. l.

m) *Rerum opifex et creator*, idem ποιητής καὶ πατήρ του παντός. Vid. Plato in Timaeo p. 28 sq. et ipse Timaeus statim pr.

n) Nota haec. L. cl. Plotin. Ennead. V. Lib. I. c 8. p. 489. Numen ap. Euseb. Pr. Ev. XI, 18. et 22. *assiduus mundi sui*

obtinuerat, et adhuc obtinet, etiam per Indiam, non a deo summo, sed ab alio, cui res mandata erat, seu deo seu genio, mundum esse creatum. Igitur tota Gnosticorum cohors, iam inde a Cerintho, a deo emanasse virtutes credidit, a quibus conditus sit mundus: Virtutes in personas mutatae modo Aeones, modo aliis vocabulis designari coepere. Valentinus, quippe Platonicae sapientiae sectator (vt ap. Tertullian. de praescript. c. 30.) subtiliore argutatione post XXXIV. Aeonas *Demiurgum* induxit, a deo summo, inuisibili, ineffabili, non nato, diuersum: dictum tamen et ipsum *deum*, *patrem* ac *regem* o). Substituerunt quoque alii *plures Creatores* eisdemque Regnatores mundi, Angelos vulgo dictos: vt Saturninus VII. at Aeonas VIII. Basilides; indefinito numero Marcion. Succedere inde alii, qui eum malum deum esse maluere, cum mundum malis omnis generis redundantem ille creasset; alii saltem e mala materia mundum creatum contendebant p). Processit inde Manichaeorum disciplina: et infedit infidebitque ea philosophia omni tempore multorum mentibus: haud enim adeo facile habent, vbi subsistant, si semel eo processerint, vt in creando vel corrumpendo mundo daemo-

fui opifex ap. Apulej. in Apolog. Idem βασιλευς et al. Adoptarunt eadem PP. vt Euseb. Pr. Ev. XI, 14. sq.

o) Nolumus in his auctoritates accumulare; adeundus post Moshem. Instit. eccles. vel b. Walchius. Irenaeus, qui si philosophicarum opinionum peritior fuisset, haeresium melior interpret factus esset, inpr. lib. I. adv. Haeres. 5. §. 1. 2. et Massuet diff. in Irenaeum f. 5 sqq. 65. sqq.

p) Disputat adv. hoc Gnosticorum genus Plotin. Enn. II. lib. 9.

daemones inducant. Demiurgum etiam philosophi mystici e Christianis, qui placita Orientis aut Iudaica adsciuissent, amplexi sunt, ut in Poemandro factum. Tandem Demiurgus in teletis non modo disciplina ac doctrina, verum dramatica etiam pompa fuit exhibitus. Aiunt quidem in ipsis Eleusiniis hierophantam sustinuisse Demiurgi personam; qui tamen hoc tradiderit Eusebio antiquior, (Praep. Ev. III, 12.) non nouimus: at in Mithriacis Demiurgi notio haud dubie frequentata. Declaratus ille per ipsum Mithram q).

Cum itaque Demiurgus in sacris Mithriacis, adeoque in philosophematibus Persarum, et in Magica disciplina istorum temporum, viguerit; non improbable videri potest, Lutatium illum, aut ipsum graece parum doctum, nomen *Demiurgi* corrupisse, aut alium praeceuntem in ea re esse sequutum, ut ex eo *Demogorgonem* faceret; restat tertia ratio, ut eius codices in hac voce corrupti fuerint. Quicquid est, attemperari aliquando coepit nomen illud Genio malo, et quidem principi; locum seu erroris seu commento fecit, ut diximus, imprimis versus Lucani male acceptus: *qui Gorgona cernit apertam*. Alter autem locus Statii, inque eo: *triplicis mundi summus, quem scire nefastum*, facile ad Magorum

V 4

rum

q) Porphy. de A. N. 24. ὡς καὶ ὁ ταυρὸς, δημιουργὸς ὡν ὁ Μιθρὰς καὶ γενεσῶς δεσποτῆς. et c. 6. Persae (h. e. Mithriaci) initiant mysten in antro: cum Zoroastres antrum consecrasset eis τιμὴν τοῦ πάντων ποιητοῦ καὶ πατρὸς Μιθρᾶν, εἰκόνα φέροντος αὐτοῦ τοῦ σπηλαιοῦ τοῦ πέσμου ὃν ὁ Μιθρὰς εὐδημιουργῆσα.

rum et Cabbalistarum somnia de nomine dei ineffabili ducere potuit.

Inter haec, si huiusmodi opinionum, quae magicis artibus fidem fecere, tantam per Orientem et Occidentem, idque per omnium temporum decursum, consensum et conspirationem videas; si tot Calliostros per diuersas aetates iisdem vestigiis insistentes cernas: illa consideratio mentem tenere potest, quanta etiam in fraudibus inueniendis ingenii humani angustia sit. Vera, id quod omnes fatemur, pauca numero sunt, quae recte teneamus; verum etiam ea, quae falsa et opinata sunt, vtut multiplicia et innumera videantur, si tamen rite aestimes, eaque ad sua genera, causas et origines, referas, et ipsa numero esse perpauca et alia ex aliis repetita, recocta, deflexa, videas, nec inesse tantam, quam vulgo iactari audias, ne errorum quidem diuersitatem. Nam sunt primo pauca rerum capita, circa quae vulgus philosophantium occupatum esse solet; et, si animum attenderis, ea ipsa ad paucas enuntiationes primarias redigi intelligas. Inprimis autem, quicquid inter homines, quamdiu fuerunt, super rebus supernaturalibus et de natura nostra vltra fines ei constitutas perficienda, siue in philosophia, siue in magia, siue in teletis, mysteriis, sodalitiis, dictum actumque est, in summa rerum similitudine, vbique ad eadem opinionum ludibria redit; nisi quod modo pinguius, modo subtilius iudicium deprehendas. Tenet tamen scena haec, si qua alia, spectantis oculos, si eorum recensum facias, quae inde ab arcanis per mythos inductis

ductis ritibus, sacerdotum contuberniis, hierophantarum disciplinis, philosophorum, initia verius quam scholas habentium, sacrariis, per omnem aetatum decursum tradita fuere; sique accessiones, quas illa per Magiam, Theurgiam, Cabbalam, Alchemiam, Fratrum roseae crucis, reuelationum et id genus somnia alia, habuere, animo reputes. Nec angustos fines ingenii humani in rerum modo materiisprehendas, verum in ipsis rerum phantasmatibus, siue in verba siue in ritus deductis. Ita mystica doctrina Christianorum in Indorum mystica disciplina manibus tenetur. A theogonia et cosmogonia inde persequi licet certas opinionum classes, earumque modo ex Oriente in Occidentem progressum, modo inde in patriam mutato habitu reditum. Mira interdum res, si videas philosophemata, quorum causae in Asia erant, ad Septentrionem vsque a populis diuersi caeli solique, ritus et vitae, recepta, et aliis domesticis opinionibus implicita, qua commixtione noua facies, nouus habitus, procuderetur. Vt ex philosophia in religiones, ita in has ex illis, innumera immigrarunt: et in vtramque per omnes aetates immarunt nonnulla e populari superstitione. Quo fit, vt in multis recentiorum saeculorum opinionibus seu Orientalis, quam vocant philosophiae, seu Platonicae, adhuc vestigia haud obscura agnoscere interdum liceat.

Verum, si noui anni et studiorum nostrorum per hunc annum auspicia hac ipsa scriptione facta putanda sunt: fatis nunc delibatum ex iis esse

V s

videri

videri debet. Supereſt, Ciues, vt ſollennia noſtra in craſtinum diem indicamus: quibus, Princeps Sereniſſime, Comites Illuſtriſſimi, Iuuentus florentiſſima, natalium ingeniorum ſtudioꝝ laude conſpicua, vt intereſſe frequentes velit, nos in votis habere, quidni profiteri liceat?

P. P. in Georgia Auguſta Kal. Ian. cldccclxxxvi.

XVIII.
 ACADEMIAE GEORGIAE AVGVSTAE
 P R O R E C T O R
 L V D E R V S K V L E N K A M P
 C V M S E N A T V
 C I V I V M S V O R V M
 Q V I
 I N C E R T A M I N E L I T T E R A R I O
 I N A. D. I V J V N I I
 R E G I S N O S T R I A V G V S T I S S I M I
 N A T A L E M
 C O N S T I T V T A E I V S M V N I F I C E N T I A
 P R A E M I A
 O R D I N V M A C A D E M I C O R V M I V D I C I O A B S T V L E R V N T
 N O M I N A
 S I M V L Q V E
 C O M M E N T A T I O N V M
 Q V A E
 A D C E R T A M E N I N A. D. J V N I I I V. A N N I F V T V R I L X X X V I I. M A R E N D V M
 A D M I T T I V O L E N T
 A R G V M E N T A
 A B A C A D E M I A E N O S T R A E O R D I N I B V S
 P R O P O S I T A
 P R O M V L G A T
 M. J V N I O C I S I S C C L X X X V I.

Natalem Regis nostri augustissimi, Ciues, quem
 antea votis precibusque tacitis prosequi soleba-
 mus, redeuntem nunc sollenni panegyri celebrari
 vidistis,

vidistis, hulus ipsius Regis Indulgentissimi beneficio, quandoquidem praemiis ad studia vestra excitanda constitutis diem hunc tanto sollenniorem vobis esse voluit. Instituti quidem ratio ut iterum vobis declaretur, necesse non est: satis enim ex iis, quae superiore anno exposita sunt, constare potest, Sapientissimi Regis consilium esse hoc, ut inter vos ii, qui studiorum suorum cursum iam ad vltima fere curricula exegerunt, habeant, quo incitentur ad vires experiundas suas, ad educenda in aciem studia, ad transferenda in scriptum audita, sed commentando et meditando subacta et perpolitata, et ad caput aliquod disciplinae, quam auditione assidua imbibant, suo Marte tractandum et disertius enarrandum. Quaestionem itaque propositam si dicimus, argumentum dicimus e disciplina aliqua petitum, quod vniuscuiusque, qui quantum debuit in litteris profecit, opera docta et ingenua pertractari et expediri potest; nec vero proponuntur quaestiones difficiles et impeditae de re aliqua inter viros doctos parum explorata: cuiusmodi quaestiones esse solent Societatum litterariorum, a quibus id spectatur et agitur, ut noua proferantur, obscura illustrentur, aut difficilia exsolvantur. Quod quaerimus, caput est aliquod doctrinae, e media disciplina petitum, ita tamen comparatum, ut in eo pertractando et exponendo virium ingenii sui profectuumque specimen aliquis ingenue natus et eruditus edere possit. Non adeo incertamen prouocamus nisi eos, qui disciplinarum rudimenta dudum deposuere, quique doctrinae copiis sic satis iam instructi sunt, ut, quid ipsi ingenio

ingenio doctrinaue valeant, experiri possint; quid? quod, quemadmodum his, qui iam profecere aliquantum in studiis suis, auctores sumus, ut et ipsi aliquid audeant, dehortando contra ac dissuadendo auocare solemus et tantum non detertere eos, quorum studia nondum ita expolita sunt, ut ex umbra illi in campum prodire aut pugna configere possint. Verum etiam illos, qui bene instructi ad certamen se accingunt, nolumus quaestioni tractandae ita incumbere, ut alias studiorum suorum partes negligant aut a cursu academico perficiendo auocari se patiantur.

Monita haec a nobis, Ciues, et diligenter exposita fuere iam sub ipsam instituti certaminis huius indictionem, ut iam tum putaremus satis esse occursum aut reprehensioni calumniosae, qua totum hoc institutum eleuari posset, aut prauo nonnullorum inter vos iudicio, qui nec satis parati et instructi, nec ceteris studiis bene attemperatis, certamini se forte committerent. Quod si tamen ab vno et altero nimia fiducia vel imprudentia esset peccatum: num, quod vnius vel alterius vitio et culpa commissum est, ipsam rem attingit, eiusque salubritatem ac praestantiam tollere videri debet? Quid tandem est in rerum natura praestantissimum per se et vtilissimum, quod non prauus insipientium et imprudentium vsus corrumpere et in noxam suam vertere possit? Quin agamus id, quod bonum virum omni in re facere par est: elaboremus pro se quisque, ut prauis rerum studiis prouida cura occurramus; consilio monitisque idoneis instruamus
eos

eos quos errore abripi videmus; rectam rerum rationem, prudentia, auctoritate, opera ac studio, firmemus ac stabiliamus. Non adeo magno acumine opus est ad intelligendum, quid in quaque re seu suo seu aliorum vitio haud satis firmum ac validum sit; verum providere, ne summa rerum labefactata in hanc partem inclinet et ruinam inde trahat, curare, ut bonorum consiliorum fructus non modo non intereant, verum etiam ampliores sint et salubriores, ea demum sapientia est. Multo gravius et perniciosius academias infedit malum illud, cui regia magnificentia occurrere voluit: torpor ingeniorum et ignavia, cum intra audiendi desidiam continet se iuventus, nec vires suas ipsa acuit nec vitae ac foro discit. Haec est vera studiorum pestis, a qua in omnem rempublicam mala grauissima fluxere, quaeque ipsa litterarum studia in contemptum iuxta et neglectum adduxere. Ita natura humana comparata est, ut sine virium seu corporis seu animi intentione consequi possimus nihil; et omnis emendationis institutionis auctores id egerunt, ut ad incitandum studium auxilia ac praesidia idonea circumspicerent. Certaminum quanta ad veterum animorum abstergendum vis esset, vidit Graecia, quae multa alia bene vidit. In rudioribus saeculis corporum, mox ingeniorum certamina proposuit: hisque effecisse sibi visa est, ut ingenue in Graecia natum vel muto adspectu ab omni barbaro, etiam regia stirpe nato, facile dignosceres; si uterque verba facerent, humanitatis cultum in altero facile agnosceres. Athleticis studiis neglectis ingeniorum saltem certamina cur non amplectemur, efficiemusque,

que, vt ingenia nostris curis elaborata et expolita ita emineant, vt Georgiae Augustae alumnum facile agnoscas?

His itaque constitutis, agite, Ciues, accipite nunc aut recognoscite nobiscum ipsius certaminis exitum, et sententias iudicum, iam antea in templo academico e cathedra pronuntiatas, praeconio hoc altero promulgatas cognoscite.

Proposita erat ab *Ordine Theologorum* quaestio:

Num, et quatenus, vere affirmari queat: constante numinis prouidentia id effici, vt genus humanum, vniuersim spectatum, continua progressionem ad meliorem conditionem sensim assurgat.

Primum quidem *res ipsa* ex omni historia, observationibus item recentioribus, accurate sic euinci debebat, vt per quamdam quasi inductionem patefieret, culturam litterarum artiumque, religionis porro atque virtutis, adeoque felicitatem, cum publicam tum priuatam, extensiuè et intensiuè, maiora sensim incrementa cepisse. *Deinde* et *subsidia opportuna*, seu *media per quae*, et *modus*, quo accommodatissime haec deus effecerit, declaranda erant; ita vt inprimis inquiretur, quae et quanta sint *religionis* vere *christianae* de hac felicitate communi merita. *Denique* luculenter docendum erat, omnino pertinere hanc quaestionem recte expositam ad *iustam* de prouidentia diuina *notionem* animis informandam.

Duo qui in arenam descenderunt, cum antiquioribus tum recentioribus litteris probe instructi;
haecenus

hactenus laudem communem abstulere, quod rerum exemplorumque, quae pro argumentis erant, dilectu et dispositione iudicium suum Ordini approbauerant, eratque omnino ambigua ac difficilis iudicii victoria. Alter tamen, cuius libellus dicto insignitus erat:

Gloriosum est etiam cecidisse in praelio,

cum luculenter docuisset, quantum Graecorum litterae publicam priuatamque felicitatem adiuuerint auxerintque, non aequè disertus fuit in docendo, a quibus initiis ista litterarum lux orta per quas vias et opportunitates, easdemque haud fortuitas, sensim ad alias gentes manauerit; hoc idem factu opus erat renascentibus saeculo xv. antiquis litteris, ut doceretur, quosnam effectus ea res habuerit ad ingenia cum caeterorum Europae populorum, tum Germanorum, excitanda animosque virtute incendendos, ut barbariem depellerent, et religionis repurgatae litterarumque faustum connubium iungerent. Alter vero, qui dicto Paullino se insignierat:

Παντες μὲν τρεχουσιν, εἰς δὲ λαμβανει τὸ βραβεῖον,

luculenta rerum expositione summatim facta, a praesenti temporum laeta facie ad primas origines retro procedendo, causarum explicationem non neglexit, et vicissitudines rerum, opportunitates, euentusque, qui vulgo fortuiti habentur, sapienter ab vniuersitatis rerum moderatore deo ad certa consilia attemperatos et nexu admirabili dispositos ante oculos posuit. Huic itaque alteri, quia acumine in causis perspiciendis et eruendis, tum in rebus exponendis subtilitate excellere visus est, βραβεῖον ad iudicatum; resignataque schedula lectum est nomen

JOANNES HENRICVS HEINRICHS

Hannoue-

Hannoueram, Seminarii philologici sodalis.

Ab *Ordine Iureconsultorum* proposita erat quaestio: Quodnam sit fundamentum successionis Germanicae, tam allodialis quam feudalis? in quonam consistat potissimum ratio differentiae inter principia istius successionis Germanicae et Romanae, speciatim Iustinianae?

Quatuor redditae sunt commentationes praescriptis dictis insignitae:

1. *Apis Matinae more modoque.*
2. *Conamur tenues grandia.*
3. *Audentes fortuna iuvat.*
4. *At socii multo gemitu lacrimisque Impositum sento referunt Pallanta frequentes.*

Ordinis quidem expectationi votisque nulla earum ita satisfecisse visa est, ut nihil esset quod desiderari posset. Cum tamen disfitendum non esset, esse in ipsa quaestione nonnullas difficultates: iudicauit Ordo Consultissimus, aequius sibi ac mitius nunc in sententia ferenda esse versandum, probandumque adeo et laudandum conatum, qui ingenii doctrinaeque signa haud obscura prae se ferret. Cum itaque illa Commentatio, cui inscripta erant verba:

Apis Matinae more modoque:

inter ceteras emineret cum rerum expositione tum oratione, Ordo Consultissimus huic ipsi primum locum ac praemium Regium detulit. Nec tamen ille nihil tribuere videri voluit industriae et labori, quem in libellum suum exarandum impenderat auctor commentationis altero loco commemoratae praefixo symbolo: *Conamur tenues grandia.* Ei itaque alterum locum a priore assignauit, ita ut ad

Heynii Opusc. acad. Vol. III.

X

princi-

principem laude et merito accessisse videri debeat. Schedæ aperta victricis Commentationis auctor innotuit:

FRIDERICVS BOUTTERWECK, *Goslariensis*; secundum locum obtinuit idem, qui iam superiore anno proxime a victore abfuisse visus erat, JOACHIMVS SCHWARZKOPF, *Hannoueranus*.

A Medicorum Ordine indicta erat quaestio:

In irritabilitate animali, a qua nisi omnis, saltem maxima sane, pars principii in corpore nostro actiui pendet, cum varia supersint, quae pleniorē poscunt eruditorum expositionem: desiderata est solida, obseruationibus et experimentis superstructa, responsio ad varias quaestiones irritabilitatem animalem spectantes: 1. in quam elementorum corporis animalis parte haeret vis irritabilis? 2. qui sunt veri certique fines inter *Tonum* Stahlī et *Irritabilitatem* Hallerī? 3. quibus adminiculis, siue a climate, aëre et vitae genere pendentibus, siue a cibo potuque siue a medicamento desumptis, effici potest, ut si torpida languet vel plane deficit, excitetur et augeatur? vel si nimis efficax sit, temperetur et coerceatur? 4. quale inuicem obseruatur commercium irritabilitatem inter et neruorum systema, in doctrina affectuum animi, temperamentorum, et in genere principii actiui corporis animalis, villo cum fructu adhibendum?

Qui iam ab initio mentes inceserat metus, in quaestionis subtilitas et difficultas, ipseque rerum
compre

comprehensarum, et varia multiplicique lectione, experimentis et observationibus expediendarum, ambitus, animos deterreret potius quam alliceret, minui tamen videbatur cogitatione numeri centenarii eorum, qui medicis studiis in hac academia nostra nomen suum professi sunt; non enim desore inter hos ingenia, quae ad altiora et doctiora enitantur, quaeque adeo laetatura sint, virium ostentandarum opportunitatem sibi oblatam. Fefellit tamen haec ipsa opinio; nec nisi vna scriptio redita est, inscripta lemmate:

Qui nunquam male, nunquam bene.

Recte vero auctor ipse de se ita iudicavit, ut nunc virium suarum periculum quaecumque fecisse eoque ipso viam sibi parasse videri velit ac prolusisse ad praemium alio anno ferendum.

Ab Ordine Philosophorum proposita erat quaestio:

Cum veteres, sideribus ad horizontem conspicuis aut evanescentibus, (*ortus et occasus poeticos* vocamus) anni tempora distinxerint: iis, qui ob praemium Regium Ordinis philosophici iudicio permixtum certare vellent, id agendum erat, ut *colligerent* praecipua, quae eam ad rem pertinent, scriptorum classicorum loca; ut quid doceant, *explicarent*; quando et ubi vera fuerint haec praeccepta, ex aequinoctiorum praecessione et horizontum diuersitate *ostenderent*; *adderent* calculorum, quibus id ostenditur, rationem; et calculos ipsos, nonnullis saltem maioris momenti, *exemplis illustrarent*.

Prodiere in certamen duumviri vigore ingenii
athletico et doctrinae apparatu bene instructi: quo-
rum alterius commentatio inscripta versibus Ovi-
dianis:

*Felices animas, quibus haec cognoscere primis Inque
domos superas scandere cura fuit;*

alterius scriptio versu Virgiliano insignita:

*Multa dies variusque labor mutabilis aevi Retulit
in melius.*

Habebat vtraque suas laudes, suas reprehensiones.
Posterior maiorem litterarum graecarum latinarum-
que copiam interpretandique facultatem, prior ma-
thematici acuminis variaeque doctrinae documenta
praeclara prodere iudicibus est visa: etsi itaque in
ea desiderata est subtilior illa elegantia, qua mathe-
maticae et astronomicae rationes ad loca veterum
declaranda transferendae erant, doctrinae tamen
mathematicae maiorem apparatus et copiam prae-
mio suo ornare decrevit amplissimus ordo. Itaque
scheda, cui inscriptum erat *Felices animas*, resignata,
victoris nomen recitatum est

JOANNES FRIDERICVS PFAFF
Stuttgartenfis, Philos. Stud.

Alteri commentationi proximus a principe illa locus
est assignatus: eiusque auctorem se postea professus
est probitatis et modestiae eximiae laude conspicuus
iuuenis JO. CONRADVS SCHAVBACH, Meiningensis.

Perfolutum est iis, quorum superior scriptio
iudicata erat, praemium cuique suum a Decanis Or-
dinum numus aureus XXV aureorum ducatorum
pondo: de quo nunc quaedam a nobis interpo-
nenda sunt. Regia enim munificentia non magis
quam

quam ingeniosa elegantia praemium hoc commendat: numus est affabre factus, nec minus subtili diligentia et arte, qua figurae incisae ac circumscriptae sunt, quam inuenti simplicitate et dignitate conspicuus. Altera enim parte Caput Regis laureatum, subscripto titulo: GEORGIUS III. MDCCLXXXV. Altera Genius alatus, innixus clipeo arae seu basi imposito. In clipeo verba: INGENIO ET STUDIO. In arae fronte Georgii II., Conditoris huius academiae nostrae, effigies cernitur: quo quidem memoriae Aui recolendae studio pietatis suae monumentum consecrauit praeclarum Nepos Augustissimus. Inferiore segmento inscripta sunt verba: GEORGIA AVGVSTA ADIVDICANTE.

Certamine peracto et praemiis distributis progressus factus est ad novas quaestiones certamini in annum proximum ineundo pronuntiandas.

Ab ORDINE THEOLOGORVM quaestio
constituta est

Quaenam vera fuit et certa eorum, qui medio secundo atque ineunte tertio seculo praecipue floruerunt, Patrum, maxime vero Iustini Martyris, Athenagorae, Tatiani, Theophili Antiocheni, Clementis Alexandrini, Tertulliani denique, de ratione siue relatione Filii seu Verbi cum Patre sententia? Id vero ita ostendatur, ut,

1. *Quid senserint isti Patres, ex ipsis eorum scriptis proferatur, atque istos etiam vere ita sensisse, iustis quidem argumentis ex usu linguae, ex nexu locorum, ex reliqua opinionum, quas alebant, historia*

enincatur; nec tamen ideo lis ulli eruditorum moueatur, quibus aliter forte sensisse illi visi sunt. Tum vero,

2. Sententiis istis inter se inuicem collatis, quid commune omnibus quidue proprium cuique sit, vel videatur proprium, accurate examinetur, caussaeque dissensus, si quis interest, et si quae afferri possunt, afferantur; quo factō nihilominus prima omnium ex vno fonte deducta origo demonstrari adhuc facile poterit. Denique

3. Illae etiam causae, quantum fieri potest, perspicue proponantur, quibus inducī Patres huius aevi sententiam istam non quidem fidei ac doctrinae ecclesiasticae, at suae tamen Theologiae inferebant; adeoque inprimis explicetur, quid praestare usus eius in informanda doctrina de Trinitate et poterat, et posse ex illorum iudicio videbatur,

Ab ORDINE IVRECONSVLTORVM

Emigrationem ciuium prohibere vel circumscribere, an, et quatenus, fas sit?

Ab ORDINE MEDICORVM

An, uti ossium in casu fracturae complicatae, cariei etc. ita etiam partium mollium in casu vulneris, perāitam substantiam natura humana restituit? An itaque vulnera noua carne replet? Si affirmatur, quaerimus: an caro illa alia ex membranis, alia ex ossibus, alia ex musculis, alia ex tendinibus nascatur? An itaque naturam partis habeat ex qua nascitur? An vero eadem sit, ex quacunque parte demum nata? An omnes vel quasdam tantum partes restituat natura?

An

An in omnibus vel quibusdam tantum casibus? Quae ratione ars regenerationem hanc coercere, iuuare, moderari possit? — Si negatur vulnera noua carne repleri, quaeritur, quonam modo claudantur vulnera variarum partium, e. c. ossium, cerebri etc.

Ab ORDINE PHILOSOPHORVM

Orbis terrarum faciem, qualis depingitur ab Homero, declarare: hoc est, ex utroque poetae principis opere, tam Iliade, quam Odyssaea, quicquid iis geographici argumenti continetur, diligenter ac plene colligere, ita, ut, Homero duce, per tres orbis partes eatur, et, quae de singulis regionibus, earumque populis, montibus, fluuiis, maribus lacubusque, urbibus, oppidis cet. ab Homero commemorata sunt, Geographorum more in unum congerantur. Obscurioribus poetae locis quum saepe lucem affundere possit Strabo, perpetuus Geographiae Homericae interpres: bene recteque agent de praemio certaturi; si Strabone, quotiescunque ipsa res postulatura sit, ad Homerum explicandum utantur. Ita existet, ut speramus, aliqua Homeri Geographia, qua hucusque aegre caruerunt tam Historici quam alii litterarum antiquiorum interpretes.

Accedite itaque ad quaestiones has seu argumenta, diligentiae vestrae, Commilitones, propofita, quotquot vestrum parte iam studiorum exacta, vires quisque suas studiorumque fructus, sintne illi satis magni, experiri vultis; ita tamen ut nec, curriculum academici quicquid superest, segnius decurratis: referuanda sunt illa horis subseciuis, quas scrip-

tionem et commentationem nemo non vestrum consecrare debet. Nihil enim generoso ingenio magis indignum est, quam sola auditione studia academica contineri et absolui putare: qua quidem opinione nihil nouimus aut perniciosius aut stolidius.

Indictum est certamen in diem IV. Junii anni proximi LXXXVII. praemia sunt quaterna, singula XXV aureorum ducatorum pondo, ab Ordine quodque suo, adiudicanda; scriptiones quae ad commissionem admitti volent, *ante Kalendas Martias* eius anni ut redditae sint, curabitis. Leges certaminis, etsi neminem vestrum latere possunt, ex edicto tamen anni LXXXV repetemus has: „Licet in certamen prodire omnibus in litterarum studio prouectioribus, seu indigenae illi sint seu exteri; nec fraudi erit, si qui ante illum diem, quo praemia victoribus assignabuntur, studiorum curriculo absoluto, Gottinga discefferint; modo ipsi ante discessum scripta sua reddiderint, et in scheda obsignata seu locum, in quem se contulerunt, adscripserint, seu amicum negotii sui gestorem, e quo illud comperiri possit, reliquerint. Oratione utentur Latina, eaque ut sit pura, tersa, perspicua, curabunt. Ne auctores commentationum, quae Prorectori, Decano, aliiue Professori reddentur, vlllo indicio se prodant, diligenter cauebitur.„

His peractis ad diei sollemnia reditum est, inque Regis Indulgentissimi natali sollemnia vota ac preces ad Deum O. M. factae, ut huius ipsius beneficii munificentissimum auctorem omnibus iis bonis

nis beet, quorum fructus vitam reddere potest iucundissimam. Iisdem votis ac precibus etiamnum immanemus. Prosperet Numen ac fortunet consilia consiliorumque euentus, inque his iter illud, quo ad sacra nostra florentissimi tres Iuuentutis Principes, Augustissimi Parentis Proles faustissima, proficiscuntur!

Quae omnia vt ex voto Regis Indulgentissimi, et ad Academiae nostrae felicitatem et prosperitatem eueniant, precabimini nobiscum omnes ac singuli.
PP. in Georgia Augusta m. ccccclxxxvi.

X 5

XIX.

XIX.

ACADEMIAE GEORGIAE AVGVSTAE
 PRORECTOR
 LVDERVS KVLENKAMP
 CVM SENATV
 SVCCESOREM

IN
 MAGISTRATV ACADEMICO
 GOTTFRIDVM LESS D.
 CIVIBVS SVIS

COMMENDAT
 INDICTIS SOLLENNIBVS.

IN A. D. JULII III. CLOCCCLXXXVI.

Saeculi felicitas in numis.

Frequens est, Ciues, in Imperatorum Romano-
 rum numis epigraphe: FELICITAS SAECVLI.
 FELICITAS TEMPORVM. Occurrit, si bene memini-
 mus, primum in Antonini Pii numis anni aerae
 Chr. 145. 148 *Temporum Felicitas*; et *Felicitas Sae-*
culi

culi in numo anni 160. Inde variis modis frequentatum a multis titulum hunc videmus a). At Constanti-

- a) *Felicitas Saeculi* in numis Faustinae, Commodi, Severi, Caracallae, Getae, Juliae Piae et passim seriorum: in aliis inde a Faustinae aetate, inuersis verbis, *Saeculi Felicitas*. Similiter *Temporum Felicitas* reperitur in numis Faustinae, M. Aurelii, Commodi et seniorum; *Felicitas Temporum* in aliis L. Veri, a. 162. M. Aurelii, Commodi, Pescennii Nigri, Septimii Severi et hinc multorum. Nec sane aliena ab eadem notione *Felicitas publica*, *Felicitas Augusta*, vtraque saepissime in numis obuia; *Saeculum Felix. Fecundum. Frugiferum*, usurpatum a Clodio Albino, et iam ante a Nerone, Commodi, Pertinace; *Tempora Felicia* a Diocletiano, a. 284 et *Felicia Tempora* in numis Probi et Constantini apud Bandinium. Sane variis modis huic titulo prolusum esse videri potest. Vt memoratum Augusti numum a. V. C. 727. cum verbis *Salus generis humani* apud Golz. t. 57. 2. et Mediob. taceam (graviorem enim auctorem desiderare licet; multo magis alterius anni 721.); in Tiberii numis primum occurrit: *Salus Augusta, Aeternitas Augusta*; in numis Caji, Claudii, Neronis, Galbae prodeunt primum *Spes Augusta. Pax Augusti vel Augusta, Libertas Augusti*, et id genus alia. Galbae numo argenteo (aureus est in Mus. Caes. Vindob. Eckbelli, viri in hoc studio principis To. II. p. 115, 63.) apud Vaillant. To. II. p. 73. est *Salus generis humani*, ducta forte epigraphe ex literis Vindicis ap. Svet. 90. Non repetitam eam vidimus, nisi in numo Traiani anni 98 stante dea Salute ante aram cum patera; apposito temone, in hac altera etiam globo. Etiam in Galbae numis in conspectum venit primum *Felicitas publica*, mox ab aliis passim frequentata: in aliis *Felicitas Augusti* primum legitur: haec quidem posthaec admodum frequens in numis Traiani, Adriani et ceterorum; in aliis *Salus Augusti*. In Othonis numo, sed ap. Golz. *Felicitas Orbis* editur. At in numis Vespasiani, Titi, Domitiani, Traiani, hinc in Severi, Getae, Juliae et multorum frequentari coepit *Felicitas Publica*; pro ea in aliis *Salus Publica*. In vno numo a. C. 76 ap. Golz. Titus *Felicitas Orbis Terrarum*

stantinus et Constans filii *b)* in numis nouam imperii sui commendationem, saepe hinc a successoribus frequentatam *c)*, intulerunt: *Felix temporum Reparatio*, bellis ciuilibus compositis; iam inde ab a. 308.

Iam *Pii temporum felicitatem* praedicari facile feras; si enim vnquam magna humani generis pars felicitate aliqua per plures annos vsa est, Pio imperante id factum esse dixeris, vno omnium qui vnquam fuere Principe optimo; e ceteris autem plerique vix ea aut fortuna aut moribus vsi sunt, vt memorabilis aliqua imperii ac temporum felicitas inde nasci posset: alii etiam infelicissimi: maxime enim frequentatur titulus in numis Impp. saec. III et IV. Verum adulantium improbitas aut stultitia vanitati Principum plerumque eo ipso illudere solet, quod laudum materiam ex iis captat, quae vel maxime in eorum seu ingenio et indole, seu virtute et industria, seu fortuna, desiderantur. In Tiberii, Seueri et similium numis quis expectet *Clementiam*,

rarum editur: at *Felicitas publica* in multis Titi visitur, et suspicari licet alterum esse commentitium. *Felicitas Praeuiarum* in numo Domitiani a. C. 81, in argento Adriani *Felicitas P. R.* quod et e numo Titi laudatur, et saepe in numis Alexandri et Philippi, Constantini, Magnentii, repetitur; in altero Adriani: *Saec. Aur.* mirationem facit nouitate. At in Caracallae numo a. 197 *Imperii Felicitas*, et serius, inde a Caro, *Felicitas Reip.* et a Constantinis *Felicitas Romanorum*, affectata. Sic et variat *Aeternitas*: cf. Eckhel Sylloge I. p. 100.

b) Est vnus qui Constantini nomen prae se fert: sed de eo dubitatur. v. Bandur. To. II. p. 271.

c) Adeatur RASCHII v. c. *Lexicon rei numariae* pag. 939 sq. opus doctrinae et operae pertinacissimae.

tiam, Indulgentiam Aug.? in Gallieno, *Virtutem Aug. Victoriā Aug. Felicitatem Aug.?* Atqui idem in numo (apud Vaillant. T. II. f. 169) *Restitutor Generis Humani*: ita ut nescias, sitne id malorum generis humani grauissimum, quod illudi sibi tam turpiter patiuntur homines, ut, quibus ipsi virtutibus omnino carent, eas sibi accedere putent, modo aliorum impudentia sibi verbo eas tribuat; nisi pro tolerabili bono habendum hoc ipsum dixeris, quod tantam iacturam tam aequo animo et ferunt et refarciunt homines. Haecenus paullo seuerius egisse videri possumus. Altera enim ex parte an ignoramus in palatiis et aulis per omnes aetates verba sollennia frequentari cum publicis tum priuatis congressibus, actis et litteris, quorum sensus aut nullus aut ab vulgari loquendi usu diuersus est? Iam autem *felix* est Romana voce, quicquid ad deos, quicquid ad Principem spectat *d*): ut olim *Roma Felix. Vrbs Felix*. Tolerabilius hoc, quam quod serius in Officiis domus augustae fuit adoptatum, ut omnia, quae ad foedissimos homines, purpura indutos, spectarent, *sacra* appellarentur, utque *sacrum* esset *Cubiculum*, *sacrae Largitiones* in eunuchos et prostibula factae &c. Si tamen in causas inquirimus, a quibus potissimum *Felicitas Temporum* seu *Saeculi* (etiam *Augusti*, nam fere eadem aut cognata sunt nomina) repetita fuit: intelligemus, modo a victoriis et pace facta, modo ab annonae copia et frugum abundantia, modo ab Augustae fecunditate, interdum a Principum aut militum concordia, epigraphen esse petitam. Ab iis causis deducta quoque

d) cf. Spanhem. VI. et Pr. Num. T. II. p. 442.

que sunt symbola, quibus numi insigniti sunt. Ipsa quidem Felicitas figura muliebri adumbratur, quae dextra caduceum tenet, sinistra Cornu Copiae aut hastam. Inde *Felicitas Saeculi* et *Temporum* adiuncta fere habet symbola Pacis, Victoriae, Abundantiae, Securitatis, Fecunditatis, Concordiae: cernitur enim illa fere stolata, columellae innixa, modo caduceum tenens, modo ramum oleagineum, Cornu Copiae, hastam, globum, victoriolam, pateram super ara: quae eadem figurae interdum etiam sine titulo occurrunt; ut contra duplex Cornu Copiae interiecto caduceo seu arista sine figura muliebri in aliis. Adiicitur interdum rostrum navis, aut temo. In Elagabali numo a. 218 est triremis praetoria, et duae Victoriae corollam tenentes in numo Maximini: et sic porro alia. In numis Commodi 183. 190 quatuor anni tempora per pueros designata; in numo Pescennii Nigri canistrum floribus et fructibus onustum, cum verbis *Fel. Temp.* Etiam congiario dato Liberalitas Aug. visitur expressa, ut in numis Caracallae, Getae et ipsius Seueri a. 202. At domus Augustae, prole subnata felicitis, symbola habentur in numo Antonini Pii duo Copiae Cornua capitibus filiorum impositis; in numo Faustinae minoris, duo pueruli in lectisternio, appposito astro; in aliis mulier stans cum quinque et senis puerulis; ipse Seuerus capite tenus adstat inter duos filios; in alio mater cum duobus filiis, et luna crescens cum septem stellis; et sic alia e). Haec igitur ad Felicitatem Saeculi declarandam diuerso quidem

e) Licet nunc congesta haec videre a RASCHIO l. c. p. 983 sqq.

quidem respectu ac sensu non male inuenta videri possunt.

Iam si de *nostri Saeculi Felicitate* quaerimus, quibusnam in rebus aut posita illa sit, aut esse posita a plerisque credatur: difficile erit symbolum inuenire, quo iudicium illud satis bene declaretur: nisi forte *globum* ponas, hoc est, terrarum orbem, *Solis irradiante luce colluistratum*, aut *Phoebo in bigis superius hemisphaerium emetiente*. Iamdudum enim obtundit aures nostras ea saeculi praedicatio, vt inprimis litterarum luce per omnia latissime dispersa et ingeniorum cultura laetissima eminere illa et omnes aetates superare dicatur. Vtimur autem ea in re vernaculo sermone vocibus, quibus lucem per omnia loca diffusam declaramus; f) iam his ipsis vocibus animi sensus aciesque praestringitur; quis enim, si, medio caelo ac die, lucente Sole, colluistratum esse lumine terrarum orbem audierit, se caecutire, aut nubeculam suis oculis esse obiectam fateri ausit! itaque non modo illud locum habet, quod apud poetam est: — *venimus ad summum fortunae! pingimus atque psallimus*; verum, quod multo maius est, *philosophamur* — et quidem subtilius quam omnes omnis aevi sapientes; nec quenquam facile e media turba arripias, qui non physica ac metaphysica crepet! Felices nos quibus in tanta saeculi felicitate nasci contigit! si modo verum est; tali felicitate nos vti, aut talem felicitatem vnquam fuisse, aut vnquam esse posse. Atqui nec fuit illa vnquam, nec esse potest; aut si esset vlla, nullum
ea

f) *Aufklärung. Erleuchtetes, aufgeklärtes Zeitalter.*

ea rerum fructum esset habitura ad genus humanum. Turbavit hic opinionum vanitas plura, quae paullo subtilius disiungere ac discernere iuabit.

Et primo quidem, quoties saeculi felicitatem ex tanta litterarum luce et ingeniorum cultura subnatam praedicari audiimus, fraudi plerumque esse intelleximus ipsas *saeculi* vel *aetatis* voces, tum *lucis* et *culturae* notationem parum definitam. Dum enim saeculum, grandius vocabulum, buccas inflat: tacite subrepat opinio, ut id, quod inde a denis vel vicensis annis in populo nostro, aut in parte eius aliqua, fit aut factum creditur, pro communi generis humani conditione habeatur; porro cum vnum et alterum genus litterarum in aliqua vrbe aut ab aliquot viris laudari ac frequentari viderent vel audirent, fuere ex nostris hominibus, qui statim summum omnium litterarum inter nos honorem prodidere. Sunt adeo, qui, quod in magnis urbibus inter certi ordinis et loci homines interdum memoratum dictum vel factum acceperant, urbanae et rusticae plebis conditioni accommodent, et in ea rem eodem modo se habere putent. Nulla tamen est commemoratio vllius populi barbari, cuius parem stuporem non iuuenias inter huius ordinis homines per omnes terras: si modo propius inspexeris res nostrae plebis rusticae. Tandem alii rem ex libellorum, qui prelo excuduntur, infana multitudine aestimant. Adeo fit *saeculi* plerumque praeconium, quod Germaniae, aut nonnullis eius terris, aut certo hominum ordini, aut paucis ex iis, aut nulli, debetur. Verum et ipsae laudes

a rebus petuntur parum exploratis ac definitis: notionem *culturae* tam male constituta, ut in omnes partes fluctuet et incerta feratur disputatio.

Cultura, quam volumus, varia esse potest ac multiplex: alia *vitae*, *morum* alia, alia *ingeniorum*. Nulla earum bona et salubris est infinite; in hac et in illa inesse possunt bona ac mala varii generis, variae naturae. *Cultura vitae* diuersa habet spatia, quae emetiri illa potest. Alia est populi feritatem exuentis, alia barbarie depulsa; alia ex agricultura, alia ex rerum populorumque commerciis, ex artium diuersi generis expolitione ad vitae usum traducta. Innumerae sunt diuersitates pro imperiorum, populorum, terrarum, caeli, naturis; neque una eademque est omnium cultura, neque ullus populus est aut in populo ordo, in quo omnis generis cultura sit cumulata. Etiam variis iudicii inflexionibus illa interdum uno eodemque in populo aestimari solet, pro ordinum, natalium, stirpium, studiorum, partium diuersitate, multo magis ex philosophica definitione. Faciat aliquis recensum populorum Europae, quos humanitatis cultu imbutos appellare solemus: quam diuersi gradus culturam passim agnoscet! et, si culturae notionem constituat seuerius, ut sit vita iis rebus exulta, quibus usus eius et fructus potest esse liberrimus, vberimus et iucundissimus, cum ex corporis salubritate et habilitate, tum ex animi ingeniique facultate, habitu et usu recto et libero, rationi et naturae consentaneo; legibus et moribus publice priuatimque ita descriptis informatisque,

Heynii Opusc. acad. Vol. III.

Y

vt

vt iis consiliis cum maxime respondeant: fingunt quidem hominum felicitatem hanc passim perierit; at dubitare licet, an eam vilius populus aut magnae eius partis, commune bonum usque deprehensurus sit. Pessima cultura est per luxuriam assiduum et perpetuum vitae excultae comitum. Quo ipso fit, vt res per se bona in omnium perniciem vertatur. Haec quidem est illa cultura vitae, quam tantis laudibus sermonibusque euehant multi inter nos, ac libellis celebrant. Sufficit tamen haec; in promptu enim est cetera mente cogitatione assequi.

Morum cultura si qua bona est, ea esse debet, quae a disciplina publica priuataque proficitur, nec tam legibus, quam bonis institutis exemplisque continetur; commendat illa se simplicitate, concentu cum naturae lege et vi, et consensu communi. At in corruptelis saeculi, quodam miro modo mores excoluisse putatur, primo loco occurrit hoc, quod taediosa formularum decoratione, et subtili in eas commentatione, more fingi putantur, satisque habetur praecepta de virtute auribus instillari aut libellos rhetorice philosophice scriptos in manus tradi. Tum mores laudantur, laudari fere audias eos, qui terno corporis habitu, victu, vestituque cultura hoc est elegantiam, quae placeat, prae se ferunt. Nec temere hoc fieri dixeris, quandoquidem cum dum omne de hominum virtute et merito iudicium ad oculorum auriumque sensum migravit. Verum cui non dictus Hylas! — Nisi itaque accurrat

res constituatur, etiam cultura morum modo in laude modo in vitio haberi potest.

Quod si tandem, quod plerumque factum videmus, saeculi felicitatem ex *ingeniorum cultura et litterarum artiumque expositione* aestimamus: multo magis vagatur omnis praedicatio, ita vt plerumque nec vera omnino, nec prorsus falsa ea sit; quo ipso hominum iudicia in transuersum aguntur. Primum enim, nec omnis, nec omnium artium cultura, felicitatis semina et causas habet, nec omnibus populis nec eodem in populo omnibus ac singulis ingeniorum cultura esse potest optabilis. In quo quidem vel maxime sibi illudi passi sunt nostrates; quod omnino ad felicitatem generis humani illud vim habere putarunt, si omnis generis litterae late per vulgus essent sparsae: quae opinio non modo est vana et falsa, verum etiam perniciofa. Vt enim nunc non vrgeamus, quam multa sint, quae ignorari praestet; infinitarum rerum scientia accurata esse potest nulla, nisi infinitarum aliarum rerum cognitio mentem instruxerit. Atqui hanc paucis consequi contigit; minus autem explorata et subtilis scientia non modo non expedit, verum etiam nocet. Nec etiam vlllo in populo aut euenisse accepimus, aut euenire posse apparet, vt per omnes ordines multarum rerum subtilium seu ex philosophico seu ex theologico acumine suspensarum notitiae disseminentur, multo minus vt cum fructu. Illo tempore, quo Graeci litteras suas cum suo sermone tot tantisque Europae, Asiae Africaeque tractibus impertierant, et

mox Romani easdem terras imperio occupauerant, dubitare licet, an non litterarum ac philosophiae luce haud paullo maior generis humani pars, ac nunc, collustrata fuerit. Verum non est in natura humana situm, vt vlla litterarum luce dispellantur errorum tenebrae, quas aut humana imbecillitas, aut maiorum auctoritas, aut religionum superstitio, aut imperiorum ac vitae instituta offuderunt. Nec vquam expectandum esse videtur, ne infinitorum quidem saeculorum decursu, vt vlla philosophiae aut religiosae doctrinae ope illud efficiatur, vt ea, quam iactant, philosophiae et litterarum disciplina ad magnam vulgi partem deriuetur. Vana et inanis est omnis illa opera instillandis iis, quae vas fundo pertuso recipere aut retinere nequit; nec operae pretium facimus, dum malo ita occurrimus, vt tanto plenioribus vrceis totos riuos infundamus. Quid? quod litterati quoque et docti ad recte beateque viuendum ex scientiae copiis perpauca plerumque mutuuntur. Adeo nec sapere licet nec recte viuere, nisi multarum rerum scientiam animo dimiseris. Delectare possunt multa, aut animi vires acuere; prodesse ad vitam pauca.

Est itaque inter pestes saeculi habendum, quod infinitarum rerum inutilium et a captu ingeniorum multitudinis alienarum notiones sparsae sunt, quarum nec ratio vera, nec verus vsus aut recte doceri aut animis percipi potest. Magnam adeo calamitatem Germaniae nostrae intulisse videri debent ii, qui sibi miro modo placuere in eo, quod ad popularem rationem omnes litteras reuocarunt, dum

nec

nec dilectum earum habuere aut ipsi aut alios, ut facerent, monuere; sed satis habuere omnia vernaculo sermone exponere, et ad palatum vulgi, aut etiam puerorum attemperare. Qua quidem re hydra malorum in nostram patriam excreuit: effectum enim est primo, ut et ii qui litteras ac disciplinas traderent, ab omni subtilitate desciscerent, utque late spargeretur doctrina ieiuna, tolleretur accurata et solida; ex hac peste manauit altera illa, ut scribendi morbus ac scabies tantum hominum numerum corripere: qua quidem re per aliquot annorum decursum res libraria et quaestus libreriorum insigniter fuit auctus, nunc tandem eo res adducta est, ut intra paucos annos monumentum hoc vanitatis Teutonicae sua mole corruietur sit. Nouis quotidie libris, vermiculorum aut lumbricorum more pullulantibus, emtores vix leuibus libellis praesenti aere parandis sufficiunt, deficitque crumena bonis et grauibus libris, exhausta et exinanita iis libellis coemendis quibus reliquorum recens et iudicia fiunt. Inter haec rerum innumerarum notitiae inutiles, aut crudae et parum iudicio subactae, auocant homines a vitae actu, opinionum vanitate eos inflant, ad studia omnis generis inania et superstitiosa pellexerunt, fumum vendentibus obnoxios fecerunt. Haec esse putanda est praecipua ratio, cur nostra aetate in tanta philosophiae et religionum, quae iactatur, luce tanta tamen tot deliramentorum caligine occaecatae sint multorum mentes. Studio illo imprudenti ad popularem rationem reuocandi litterarum sacrarum ac profanarum, diuinarum et humana-

rum, capita et argumenta, quae, nisi multis variisque litteris probe subactus fueris, nec assequi et satis percipere, nec de iis recte statuere possis, effectum est, ut tam miris multi modis confunderent notiones; ut leuissima auctoritate adducti persuaderent sibi incredibilia, et delaberentur ad absurdissima. Multa sunt quae nostro saeculo tanquam propria recte vindices: disciplinarum ac scientiarum, imprimis mathematicarum ac physicarum, latius manarunt studia; nec alia facile est doctrina cuius non magna facta sint incrementa. Inprimis philosophandi subtilitas a verbis ad res traduci, doctrina religiosa ab opinionibus formulariis liberari, ad interpretandi scientiam et artem adigi et ad certas leges constitui coepit. Verum haec intra exiguum hominum numerum subistere. Tum quam angustis cancellis circumscripta sunt multarum rerum studia! ipsa philosophandi de certis rebus, imprimis theologicis et politicis, libertas tantopere iactata quam precaria, maligna, parum tuta! Quotiescunque aliquid paullo liberius ac licentius dictum scriptumue in vulgus dimanauit: quanti concursus, quanti clamores etiam inter eos, qui ipsi de libertate sentiendi ac scribendi magnifice sentiebant, quoties de suis opinionibus statui videbant! Quae autem vulgus beasse iactantur litterarum bona, bone deus, quam ambiguae notae, quam parum fructuosa pleraque et salubria sunt! neque illud mireris, quandoquidem pleraque ab usu vitae, a rerum veritate, a multitudinis conditione et fortuna, abhorrent.

Si quam igitur felicitatem saeculi e litterarum luce latius sparsa sperare volumus: id agendum est,

ut

vt non nisi eae disciplinae ac litterae populo expeditiores reddantur, quarum verus aliquis ad vitam fructus aut iucunditas esse potest. Dimittendum est inane illud studium, vt, quorum notionem iustam nec habere nec assequi vulgus possit, iis animi obruantur. Qui carent auxiliis, subsidiis, praecognitis, quibus ad perspicienda illa, quae traduntur, opus est, non modo non erudiuntur sed obtunduntur. Inanis est et infructuosa omnis illa opera, quae metaphysicis, physicisque ac theologicis subtilioribus placitis in plebis mentes instillandis impenditur. Non doctiorem reddamus populum, sed assuefaciamus eum ad multarum rerum ignorationem; nec imbuamus animos nisi paucissimis vitae virtutisque praeceptis, rerum ad vitam vtilium notitiis fructuosis; exclusis tandem aliquando iis, quae nec vnquam a vulgo bene percipi recte possunt, nec percepta vsum vitae habent. Quibus pauca bene tradi possunt, ex eorum animis effluunt bona et vtilia, si cumulantur et confunduntur cum aliis minus vtilibus. Ingenii et animi, non minus ac vitae, simplicitas vt retineatur aut reuocetur, est videndum; atqui sine multarum rerum ignoratione assequi hoc bonum nequeas; bonis exemplis et disciplinae grauitate familiae aut ciuitates regendae; institutio vero absolventa paucis, iisque necessariis iuxta et vtilibus; praecepta doctrinae christianae a ieiuna commentandi subtilitate liberanda. Ipsae superstitiones et falsae opiniones non disputatione, quam vulgus non assequitur, animis eximendae; sed tacite veriora iis instillanda, quibus semel admissis praua

sponte excidunt. At ingeniorum expolitio et cultura elegantior relinquenda est certis inter ciues ordinibus; subtilisque disciplinarum et litterarum studium mandandum paucis, at selectis, quos ingeniorum felicitas et reipublicae prouida cura eo loco constituerit, vt, quicquid scientiae est inter homines, creditum sibi esse putent et asseruandum et nouis incrementis augendum, vt tamen ex iis ad vitam et vulgus ea deferant, quae vtilitatem et fructum habere possint. Quae igitur ad vitam pie, honeste, feliciter agendam necessaria et vtilia esse possunt, ea nota et vulgata esse debent omnibus doctis pariter et indoctis; at quicquid cum subtilitate disputandi ac declamandi coniunctum est, e generis humani disciplina furcis expellendum; saltem intra librorum claustra virorumque doctorum ac subtilium conuentus est relegandum. Ita tandem veram ingeniorum vitaeque culturam, quae cuique ciuium ordini conuenire potest, et ex ea saeculi felicitatem enasci dixeris, quae non inter paucos potentia, opibus, genere et loco eminentes, verum ad plurimos et omnes, etsi certa ratione ac lege et modo, sparsa sit: ita tenebuntur ea, quae vitam reddere possint aut iucundam aut tolerabilem, dum nec libertatis ius et vsus, nomine forte relicto, sublatus, nec rerum, necessariarum saltem, copia easque parandi facultas, iisque fruendi arbitrium, vlli e populo defuerit. Excolentur ingenia, pro sua cuiusque conditione, notitiis necessariis et salubribus; consequetur vnusquisque id, ad quod a natura erat natus ac factus, nec fortunae et loci malignitate deiectus et exclusus erit

erit ab humanitatis excellentia, nec detrusus infra animantium brutorum sortem et conditionem. Ad hanc felicitatem vtinam genus humanum, saltem vnum magnum populum, vnquam peruenire contingat!

Quam felicitatem generi humano, magnis praecipue imperiis, tantopere exoptandam, dum in votis merito habemus: vota cum iis consociamus alia, quae propius attingunt Academiae nostrae felicitatem, Ciues; hanc vt bonis studiis ac moribus non minus promoueatis, quam votis precibusque a bono numine nobiscum expetatis, videte. Academici magistratus vices cum peruenerint ad Virum Summe Reuerendum, de vobis bene meritum ac merentem,

GOTTFRIDVM LESS D.

initurus ille eum est inter fausta omnia et vota communia crastino die. Erit autem semestris hic magistratus tanto illustrior, et temporum felicitate insignior, quod intra paucos dies huic vrbi et Academiae nouum decus accedet ex trium Principum stirpis Regiae aduentu. Qui vt felix faustusque sit, vtque magistratus suscepti fausta sint auspicia, ita preces facimus, vt haud dubitemus, Ciues, quin, verba praecuntibus nobis, religiose ac pie vota noua sitis concepturi; nec, quin vestra, Principes Serenissimi, Comites Illustrissimi, auctoritate et exemplo nunc, vt alias, confirmaturi sitis religionem nostram. P. P. in Georgia Augusta Jul. II. c1010cclxxxvi.

XX.

ACADEMIAE GEORGIAE AVGVSTAE
 PRORECTOR
 GOTTFR. LESS D.
 CVM SENATV
 SVCCESOREM

IN
 MAGISTRATV ACADEMICO
 JO. NICOLAVM MÖCKERT D.
 CIVIBVS SVIS

COMMENDAT
 INDICTIS SOLLENNIBVS

IN A. D. II. JANVARIJ CIOCCCLXXXVII.

Res a Phocione in rep. Atheniensium gestae in disceptationem vocatae.

Institutum est in nostra hac rep. academica, Cives, vt ab ipsis noui anni auspiciis magistratus noui auspicia procedant, vtque adeo coniungantur vota vtriusque generis, inflammenturque animi pietatis sensu ac laetitia publica a duplici causa profecta. Nec vero haec congratulantium studia omni ad publicam vtilitatem fructu carere putanda sunt,
 modo

modo non, vt alia praeclara maiorum instituta, ad vanam simulationem et nugatoriam consuetudinem rediissent! res enim est potentissima ad animos inter se coniungendos significatio beneuolentiae mutuae, vt in aduersis, ita etiam in laetis fortunae; et videtur vel externa species et sensus significatio vim ad animum nescio quam habere fidemque quodammodo facere ei, quod ostenditur. At in nostris sollennibus ad necessitudinem adeo et officium pietatemque in almam Georgiam Augustam pertinere videtur, vt de fausto et anni et magistratus per semestre gesti exitu lactemur ac congratulemur, vtque vota suscepta, quorum nunc damnati sumus, grato animorum sensu rite persoluamus, nouaque vota in posterum pro reip. incolumitate et perpetuitate suscipiamus. Faciet hoc pro rep. is, cui hoc ipso die magistratus academici mandati insignia publice tradentur, Vir Illustris et Consultissimus,

JO. NICOLAUS MOECKERT D.

Idemque humanitate vestra et modestia, Ciues, permotus spem suscepit iucundissimam, quantum quidem per vestrum seu reip. seu sui amorem ac beneuolentiam fieri potest, magistratus sui decursum fore faustum ac prosperum, et, quae in publica commoda ipse meditata affert, successu suo non esse caritura.

At nobis, Ciues, cum aliquid his ipsis sollennibus praefandum sit, quid tandem in anni his auspiciis auspicatius esse potest, quam sermo a viri memoria ductus, qui virtute sua et insigni probitate

tate cognomen quoque Probi apud populares suos consecutus est; *Phocionem* dicimus, cuius etiam novissimis temporibus recordatio ac memoria revixit. Alienum esset ab hoc consilio ac tempore, quo haec scribuntur, laudes eius aut verbis persequi aut ad iudicii trutinam expendere: contra consentaneum saltem hoc, ut viri antiqua memoria celebrati virtutem recolamus, inprimisque res eius in rep. gestas studiaque et consilia accuratius cognoscamus, quibus ille in tanta aduersae factionis odia ac furores incidit, ut capitis periculum adiret.

De moribus quidem eius, ingenio ac vita, etsi haec cognitu sunt digniora ceteris et utiliora, non tamen afferri possent nisi iam a Plutarcho tradita et a multis repetita, iterumque apponenda; id quod in historiis certo cum consilio perscriptis sine reprehensione facias; non itidem in scripto iis ad legendum proposito, quos credere licet Phocionem haud ignorare qualis fuerit: cuius nomine etiam vulgo uti solemus ad virum bonum ac probum, integritate et vitae innocentia conspicuum, declarandum *a*). Nominis claritatem nihil magis arguit

a) *Χηρός*. Nec tamen satis constantes sunt viri docti in vocis vi constituenda, quo sensu Phocioni cognomen inditum sit: est enim et *probus vir*, et *bonus* et *mitis* ac *lenis*. Ad integritatem vitae refert Nepos; cui tamen *bonus* est. At Plutarchus ad morum facilitatem referre videtur p. 746. C. Consentit Valer. Max. III. 8. ext. 3. Quod vero ap. Suidam legitur p. 638. T. III. vix sanum videtur esse aut recte narratum, multis eum pecunias dedisse aliorumque filias dote instruxisse et inde *Χηρὸν* dictum; unde enim Phocioni istae opes? Videtur

arguit quam quod in obscuritate fortunae Gracorum post Philippi et Alexandri tempora nomen eius solum eminet, hominis tamen qui nulla in
re

Videtur tamen ex Atheniensium indicio ad probitatem et integritatem esse referendum. Etiam apud Aeschlinem *περὶ τῆς παραπρεσβ.* in f. *Φωκίων* — ἡμα δὲ δι-
καιοσύνη διαμνηστέρα πάντων —. Phocionis herma in-
perest apud Vrsinum, sed sine capite, nomine cippo
inscripto. Circumsertur quoque Phocionis caput e-
gemma; est Sardonyx anaglypho opere, (Cameo dici
solet) culus exemplaria passim occurrunt in Museis;
Phocionis illud esse colligitur ex nomine *Φωκίωνος* ar-
tificis manu adiecto: atque perpetuus sculptorum mos est,
ut hoc modo suum ipsi nomen apponant. Insculpsit mox
falsarius, aliqua nomen Pyrgotelis litteris tam indocte
efficta, ut ipsa res fraudem arguat. Constant haec iam
a Winckelm. Hist. Art. p. 351. tradita. Est et Mea-
dianum simile opus, e domo Lancelloti allatum, quod ad
Thomam Hollis et hinc in Museum Britannicum peruenit.
Verum antiquum opus in Collectione Gemmarum Bed-
fordiana assertari alunt: cum antea ingentis Castilio-
nensis cimeliis haberetur, mox dono datum Cardinali
Albani, a quo ad Britannos migravit. Effictum quo-
que est exemplum gemmae ab Alexandro Cesari nobili
artifice, quod Zanettius servabat: expressum in eius
Dactyliotheca tab. III. Nuper quoque signum Phocio-
nis nomine prodit in Museo Pio-Clementino To. II.
t. 43. figura ad herois speciem et dignitatem efficta, capite
callide tecto, et barba accisa, Atheniensium more,
pallio vero tenui et curto induta, quae paupertatem
Phocionis argnere potest. Refert quoque opus manum
et artem alterius signi ex eadem aetate, quod Demo-
sthenem referre creditur, et nunc ad Britanno ablit.
(Exemplum expressum dedit Fes ad calcem Winckel-
manni italice conuersi To. II. tab. VI. Fertur quoque
aliud signum in Villa Aldobrandina extare). Sagaciter
his argumentis alterum illud marmor Phocionem re-
ferre coniecit Viscontini. Caput simile et parua effi-
gles eiusdem viri in eodem Museo visuntur. Visaban-
tur autem statue Phocionis Athenis, ut ex Pausania
et Plutarcho constat.

re aut splendorem consiliorum affectavit aut famam et ostentationem eorum quae gesserat est aucupatus; quique ciuitatem suam maluerat intra fortunae angustias continere, ad quas detruferat illam fatalis rerum ordo, et intra quas illa tuta ac quieta latere potuisset, et statu rerum vti tolerabili.

Animi constantia, grauitate, austeritate, vt humanitate tamen illa et facilitate temperata esset, inprimis ille spectatus fuit; iustum ac propositi tenacem virum facile agnosceres, quem nec *ciuium ardor praua iubentium* nec *minax tyranni vultus* terreret; cumque a natura inditi mores ad firmitatem ac perseverantiam consiliorum eum composuissent, multo plura ex philosophiae studiis in eo profecta erant. Platonem ille audierat et Xenocratem, cuius sanctitatem vitae morumque seueritatem exemplum sibi proposuisse videtur; ita vt Phocion inprimis inter eos habendus sit, qui ex philosophorum disciplina ad remp. accessere *b)*; tantam vtique animi moderationem

b) Plut. de Musica p. 1126. C. Ἀθηναίων δὲ Χαβρίαί τε στρατηγοὶ καὶ Φωκίωνας ἐξ Ἀκαδημίας. Platonem quidem admodum adolescens (ἔτι μαιράκιον ὡν Plut. p. 743. D.) audiuisset narratur. Debuit autem Phocion natus esse Ol. XCIV. 3. ante C. 402. anno altero ante Socratis necem, siquidem Ol. CXIV. 3. quo anno pugna ad Cranonem facta est, iam octogenarius erat. Plut. pag. 752 E. et Tom. II. p. 819. A. Alio loco p. 791. F. *an seni sit resp. ger. ὑπὲρ ὀγδοήκοντα ἔτη γαγονίας.* Excessit autem vita anno inde quarto, aet. LXXXIV. Ol. CXV. 3. ante C. 318. Aelianus III, 47. parum accurate τὰ πάντα καὶ ἐβδόμηκοντα ἔτη, ἀπὸ οὗν διαβίωσεν. — Xenocratis amicus fuit, auditor vix esse potuit, siquidem ille Speusippo successit Ol. CX, a quo Phocion iam sexagenario maior erat.

rationem et in vtraque fortuna aequabilitatem, tantam integritatem, simplicitatem, frugalitatem et honestae paupertatis amorem, tam placidum et ne inimicis quidem asperum ingenium, non nisi philosophiae studium praestare potest. Prudentia itaque mentis cum in deliberando tum in exsequendo fuit ea, quae non nisi mature ac diligenter pensitata admitteret, nec alia praeterquam tuta et extra fortunae aleam posita probaret; nihil casui dare, nihil ad gloriae vanitatem externamque rerum speciem referre; nec nisi id agere, quod res postulabat quodque vtilitatem habere poterat. Celebratur posteritatis fama et commendatione cum maxime animi in eo virtus et prudentia: at vero, dum viueret, militari inprimis virtute clarus fuit habitus, cum ad Chabriae disciplinam et familiaritatem se adinnoxisset. Archontis magistratum an unquam gesserit, non apparet; at copiarum praefecturas (στρατηγίας) quinque et quadraginta gessit; creabantur enim Athenis duces belli ad singulas belli necessitates.

Hic vir, tali animi virtute, hoc mentis habitu, si aliis reip. temporibus vixisset, si Themistocli obiectus fuisset, Aristidis locum tenuisset; si Pericli, si Alcibiadi, aduersarius contigisset, gloriae studium in eorum animis moderando, quam multa reip. vulnera vel auertere vel sanare potuisset! Verum seruata erat eius vita in ea tempora, in quibus ille ciuitatis suae naufragium, suspensum procellis ac fluctibus, per aliquod tempus forte, ne dissolutum pessum iret, gubernare, ne vero fluctibus ali-

quando

quando illud mergeretur, nulla humana ope occurrere poterat. Scilicet, quod non semper facere solent ii, qui de magnorum virorum factis et consiliis cognitionem sibi sumunt, non tam quid quisque fecerit, quam quibus temporibus, quorum rerum statu et conditione, inter quos homines, tentata effecerit, aut non perfecerit, videndum est: idque multo magis in libera ciuitate, cum multorum iudicia et voluntates, nec vi sed persuasione et auctoritate, moderandae sunt.

Vti magna imperia sua vi ac mole ab externa vi facile se tuentur, suis vero ipsa opibus, sua luxuria et ignauia fere vel imperitia eorum, qui remp. administrant, corruunt; ita regna exiguis finibus inclusa, et, quo minus in remp. imperantis lubidini licet, eo melius administrata, externa plerumque vi aut fraude concidunt, quoties in vicinia accubans potentius imperium finibus imminet. Quae quidem multo magis liberarum ciuitatum fortuna est. Ciuitates Graeciae suis ipsae dissidiis ac bellis afflictae et attritae fuere saepenumero: verum pace facta facile pristinas opes et fortunas recuperabant; ad seruitutem et miseriam non fuere redactae nisi regum cupiditate et malis artibus, primum Persarum tum Macedonum. Nec minus Graecorum virtus enituit in eo, quod tam praegrandem ac praeграuantem potentiam et fraudem tamdiu illa sustinuit et seruitutem suam per tantum annorum decursum retardauit: cum magna illa et vastae molis imperia primo ictu ac vulnere conciderint. Si qui sunt qui, non tam reprehensione, quam detestatione

statione et execratione omnis generis humani digni sunt, reges illi et eorum amici consiliorumque ministri habentor, qui homines in rep. bene constituta degentes malis fraudibus aggressi, partim dolo malo circumuentos, partim muneribus corruptos, partim in discordias ciuiles actos, vt seruitutis tandem infamia digni haberentur, effecerunt. At mortales miseri tales pestes generis humani modo heroum immortalium modo prudentium et sagacium nomine impertire solent; inurunt infamiam iis qui perfidia eorum et malis artibus in calamitatem praecipites dati sunt. Esse in liberis ciuitatibus diuersa hominum de rep. et eius vtilitatibus iudicia nemo mirabitur, qui meminerit, inter regum amicos et consiliarios deliberatione de rep. facta haud raro prudentissimos viros in diuersas sententias ire. Quod in ciuitate interdum ex his dissensibus contentiones, odia, inimicitiae eorum, qui contraria in rep. administranda consilia sequuntur, *) existunt; non tam inter mala talis reip. quam inter bona referemus, quibus reip. salus et incolumitas continetur, ingeniorumque vigor et consiliorum prudentia acuitur; exitiosa reip. ea non fiunt, nisi malorum hominum fraude republica iam ad deteriora praecipitata.

In ea iam tempora adducta erat resp. Atheniensium, vt nullis humanis consiliis opibusque illa seruari posset, aut intercedi, quo minus praepotentibus Macedonum opibus illa succumberet. Quod si Macedonici regni stabilis ac perpetua fuisset conditio

*) τῶν ἀντικολιτευομένων.

ditio et status: aequis forte conditionibus parta fuisset Atheniensibus parendi gloria, diuque illa Macedonum imperiis obnoxia artibus litterisque mercatu et nauigatione floruisset. Enimuero cum inter reges, armis ciuilibus se mutuo aggressos, Macedonia victori praeda esset parata, in quam ille inuolaret, regnique praesidia et excubiae quaerendae fere essent in Graecia: illius seu vi seu fraude occupandae consilia agitabantur ab omnibus, qui Macedonum regno inhiabant, ex Asia plerumque profecti. Graeciam autem nemo tenere poterat, nisi qui Piraeum et Athenas in potestate habebat.

Praeceptum erat consilium post mortem Alexandri, quod Graeci non tam foedere facto res suas firmare, id quod prudentis consilii erat, quam in Thessaliam aduersus Antipatrum excurrere maluerant. Phocion, si quid aliud, bene perspexit hoc, ad vnum quidem impetum faciendum opes Graecorum satis magnas esse, ad bellum vero diutius sustentandum vires haud sufficere. Copias enim a Leosthene conscriptas multis mirantibus et Phocionem, annon bene instructas putaret, rogantibus *Recte, inquit, ad stadium; at dolichum belli exhorresco, quod neque stipendium ciuitati aliud, nec naues, nec milites sunt c)*, Interea animose satis Graecos esse expertos, quid pro libertate recuperanda seu virtute seu consilii sagacitas assequi posset, negari nequit. Victo ad Lamiam Antipatro ipsi mox coniunctis Crateri et Leonnati armis superati succubere d)

Fac

e) Plut. p. 742. A. B.

d) Ol. CXIV, 3. ante C. N. 322. anno ante Phocionis decessum quarto.

Fac tamen et hinc eos superiores discessisse, annon alii exercitus in Asia supererant, qui aduenirent?

Victis Atheniensibus leges scripsit Antipater, ut remp. more veteri *e censu* tractarent, praesidium in Munychia acciperent, praeterea impensas belli et multam penderent; adiectum ut Demosthenes et Hyperides dederentur. Nihil in his conditionibus est, quod prudentia non Antipatro suadere debuerit. Athenas, nisi praesidio imposito et republica in alium statum mutata, in obsequio retinere non poterat. Cum inde a Clisthenis lege etiam ii, qui censum non habebant, *Θῆτες*, in comitiis suffragia ferre, iudiciis adscribi, in senatum legi, magistratus capessere possent, plebis egenae suffragiis summa reip. continebatur. Constituta nunc *resp. e censu*, ut qui plus $\text{κλ} \text{κλ}$ drachmarum possiderent, penes hos magistratus et suffragiorum ius et potestas esset e) Qui vero

Z 2 minorem

- e) Plut. p. 743. F. imprimis Diod. XVIII, 18. καὶ προσέταξεν ἀπὸ τμησεως εἶναι τὸ πολίτευμα. καὶ τοὺς μὲν πεκτημένους πλεῖον δραχμῶν διαχιλίων κυρίους εἶναι τοῦ πολιτεύματος καὶ τῆς χειροτονίας. Census *bis mille drachmarum* hoc est $\frac{1}{2}$ talenti, quae summa ad 387. thaleros nostros accederet. Diiucanda res ex Solonis institutis esse videtur. Tres classes ille constituerat civium; primam eorum, qui talentum h. e. 6000 drachmarum, alteram eorum, qui 3000., tertiam eorum, qui X minas, seu 1000 drachmas seu $\frac{1}{2}$ tal. possiderent. Scilicet omnis ager Atticus omniaque civium bona descripta erant Solonia aetate, in summa rerum egestate et argenti penuria, constitutumque iis certum pretium, in commentariis censualibus perscriptum, ad quod tributa civium inferrentur: descriptione et dispartitione eius, quod quisque conferret, ad istum fortunarum modum facta,

minorem censum haberent, omnes *ut turbulentos et bellorum cupidos, a publicorum negotiorum tractatione remouit, agrumque in Thracia, si qui vellent, ad nouas sedes concessit.* Plures ergo XII. millibus id genus ciues a rep. sunt remoti: caeteris, qui censum definitum habebant, IX. millibus circiter, ius vrbis et regionis obtinendae traditum est. *Et hi Solonis deinceps legibus rep. administrarunt, cunctisque possessiones suae integrae et intactae permanferunt.* Quod nisi perditis veterator Polyasperchon consiliis mox Athenienses aggressus esset, per multas aetates illi prospero rerum suarum cursu vti potuissent.

Durissimae conditiones probatae tamen, recte quidem ac prudenter, Phocioni: cuius omnino per haec tempora magna erat auctoritas, cum apud Antipatrum gratia valeret, Menyllum autem Munychiae praefectum necessarium suum haberet. Ignoscendum tamen nec minus altera ex parte miseris ciuibus, qui iure ciuitatis deiectione deos hominesque obtestabantur et iniuriae causam in eum conferebant, cuius opera pax facta erat. Nata hinc odia grauissima quae in eius exitium euasura esse iam tum praeuideri poterat. Aliud in eum coniectum est

facta, etiam pretiis rerum omnino mutatis, cum tantas opes Athenis nauigatio, mercatus, comestus, aerarium auctum, sociorum tributa, metalla aliaeque res intulissent. Nunc igitur Antipater oligarchiam in rep. haftenus instituit, quod non nisi eos ad rep. tractandam admisit, qui tantum fortunarum possiderent, quantum in tabulis censualibus perscriptum ad tertiam talenti partem, seu XX minas, accederet.

est crimen, quod, ne Demosthenes et Hyperides dederentur, nullam suam interposuerat operam.

Atque hic ad ea tempora peruentum est, in quibus Phocionem a nimio partium suarum studio, a pertinacia et imprudentiae culpa, liberare haud facile est. Saltem destitutos nos dicemus disertis fatis rerum et euentuum expositione, quo in meliorem de eo partem iudicare possimus. Plutarchus quidem copiosus est in congerendis iis, quibus virtutem eius declaret; vbi peruentum est ad ipsum rerum articulum, obscurat ille potius et implicat narrata, quam vt expediat. Omnino scriptor ille, in fide eorum, quae tradit, exigenda non vbique satis subtilis aut diligens, ad eum, quem semel animo informauerat, characterem et exemplar narranda refert, interdum adeo ad sententiolam, vt ei consentanea satis sint, accommodat; operosus duntaxat in acute vel sententiose dictis conquirendis. Quod vero haud raro bilem mouet, est, quod auctores, vnde sua hausit, non apposuit. Ita de Phocione nihil vsquam monitum est, quo auctore vsus sit *f*). Diuersa tamen de Phocione tradita esse a diuersis scriptoribus, in quibus Timaeum fuisse probabile fit, satis manifestum est, si Diodorum, et multo magis si Nepotem inspiciamus. Non minus sane his quoque irascendum, quod nec magis ab iis monitum est, aequales ne Phocioni, et quarum partium studiosos, an serio-

Z 3

res

f) Charetem aliquo loco, alio Durim Samium excitat pag. 749. E. in re parum memorabili. A Duri tamen in *Ελληνικοῖς* et *Μακεδονικοῖς* de Phocione narratum esse debuit.

res scriptores exscripserint. Iam vero illi, quos Nepos ante oculos habuit, ita tradiderant, ut non modo patriae male eum consuluisse, sed etiam amicitiae fidem non praestitisse dicerent; Namque, inquit, auctus adiutusque a Demosthene, eum quem tenebat, adscenderat gradum, quum aduersus Charetem eum subornaret: (adeo partium studium etiam in hac Demosthenis amicitia agnoscere licet) ab eodem in iudiciis, cum capitis causam diceret, defensus, aliquoties liberatus discesserat: hunc non solum in periculis non defendit, sed etiam prodidit. Potuit aliqua in his culpa Phocionis esse; potuit tamen nec minus nulla admitti ab Antipatro pro Demosthene intercessio. Quid si ciuitatis incolumitatem stare nullo alio modo intelligebat Phocion quam facibus istis incendii, Demosthene et Hyperide, arma nimis imbecilla nunquam non in Macedones concitantibus, extinctis! Simili feueritate iam antea, cum Thebis excisis Alexander postularet, ut X. Oratores, in quibus Demosthenes erat, sibi dederentur, Phocion aequum erat ratus, ut pro rep. seruanda mortem ultro subirent: (Diod. XVII, 15.) id quod Demostheni aliter se habere visum est. Saltem ubi certiora argumenta defunt, ex indole et moribus hominis de eius factis iudicium facere licet; uti a Demade et aliis suae vanitati et vtilitati consultum esse dicemus, etiam in rebus satis vtilibus ad remp., nisi de eorum consilio meliora aliunde innotuerint.

Interea illud inficiari vix ausis, senem iam grandaeuum aut partibus Antipatri nimis studiosum,

sum, aut sententiae pertinacem, consilia meliora in iis quae sequuta sunt non admisisse: quae ut excusanda sunt, si reputes, quam ardua res sit, sectam, quam per LXXX annos in rep. sequutus sis, eierare; non tamen in prudentiae et moderationis laude haberi possunt. Antipater moriens (Ol. CXV, 2. ante C 319) generoso, ut probabile fit, consilio, Cassandro praeterito, tutelam regum, Aridaei seu Philippi et Alexandri, cum administratione regni ad Polysperchontem detulerat, virum rerum usu et annis prudentem, sed generosi sensus expertem, ad miseras artes et fraudes abjectum, nec regni sed suae salutis intentum. Cassander aegre ferens se a primo gradu deiectum de recuperanda dignitate consilia iniit; cumque Graeciae ciuitates partim praefidiis paternis teneri, partim hospitibus et amicitibus patris voluntates Graecorum sibi fore deuinctas speraret: Graeciae ille primo loco imminuit, misitque Nicanorem, qui Menyllo in Munychiae praefectura succederet. Nuntiata mox Athenas Antipatri morte, exarsit populus in Phocionem, deditque crimini, *quod, cum factus esset ea de re certior, Nicanoris gratia reticuiisset.* Haec ipse Plutarchus (p. 755 extr. 756), hoc adiiciens, agendo et colloquendo cum Nicanore Phocionem eum facilem et benignum Atheniensibus praeuisse. Haec quidem gesta Olymp. CXV, 2. ante C. N. 319.

Polyperchon, Cassandri consilia ut discuteret, Graeciae ciuitatibus libertatem popularem ostendere, hocque pacto paucorum ab Antipatro consti-

tutum regimen antiquare animosque Graecorum a Cassandro abalienare constituit; itaque vt ceteris Graecis (v. Diod. XVIII, 56), sic Atheniensibus, pronuntiari iubet, remp. popularem iis restitui; omnes Athenienses pristinis legibus agere. Redeundi itaque potestas dabatur iis, qui quod minorem censum habebant, vrbe aut discesserant aut vi in Thraciam traducti fuerant, omnesque omnino qui exulatum ierant: quo facto discordiis omnia misceri necesse erat. In Phocionem insidias has machinatum esse censet Plutarchus (p. 756. A. B.), sed grauius erat consilium regum tutori, vt Athenas et Graeciam a Cassandri studiis auocatam sibi adjungeret. Facile tamen praeuideri poterat, turbam illam, pace cum Antipatro facta suffragiorum iure priuatam, nunc, vbi pristinum ius suum recuperasset, primo statim impetu in Phocionem eo esse vsuram. g) Accessit aliud, quod animos exasperaret; cum enim audito regum edicto motus inter Athenienses existerent, atque essent adeo qui postularent, vt Munychia deduceretur praesidium (v. Diod. XVIII, 64): prudenti consilio Nicanor, vt Cassandro Athenas obnoxias retineret, non modo non cessit Munychia, verum etiam Piraceum occupare studuit. Hic vero manifesta est apud ipsum Plutarchum (p. ead. C. D.) accusatio Phocionis,

- g) Hoc est illud quod Nepos hunc in modum parum commode enuntiauit: *Erant eo tempore Athenis duae factiones, quarum una populi causam agebat, altera optimatum. — Harum utraque Macedonum patrimoniis nitebatur. Nam populares Polyperchonti fauebant, optimates cum Cassandro sentiebant. Etiam sequentia parum accurate exposita sunt a Nepote.*

cionis, qui neque admisit amicorum monita et clamores populi, nec arma capere iussos Athenienses aduersus Nicanorem ducere voluit *h*). Fidem eum nimis validam habuisse Nicanori censet Plutarchus; nec minus tamen, si Phocionis bene cognitum habemus ingenium, suo ille iudicio suoque proposito immansisse videri debet, vt ciuitatem vel inuitis ciuibus seruata mallet, quam reductis exulibus turbari praeuidebat, Polysperchontis fraude bene perspecta, qui et ipse hoc spectabat, vt Athenienses circumuentos regiae potestati subiiceret. Si tamen non ad consilii prudentiam et vtilitatem, sed ad legum praescripta haec exigeres: prodicionis crimini implicuisse se videri debebat Phocion; quippe qui imperator creatus copias non ex decreto populi duxerat, ne Piraeus caperetur.

Quod si Cassander iam tum cum classe, quam mox ex Asia adduxit, adfuisset: Athenae cum Phocione saluae fuissent. At enim cum regibus

- h*) Multo grauior accusatio fuit apud eos auctores, quos Nepos sequutus est: *Concidit autem maxime vno crimine, quod, quum apud eum esset summum imperium populi, (στρατηγία) et Nicanorem Cassandri praefectum insidiari Piraeo a Dercyllo moneretur (v. Plut. p. 756. C.) idemque postularet, vt prouideret, ne comaeatibus ciuitas priuaretur: huic, audiente populo, Phocion negauit esse periculum; seque eius rei obsidem fore pollicitus est. Neque ita multo post Nicanor Piraeo est potitus. Ad quem recuperandum (Plut. ad praeuertendum Nicanorem) quum populus armatus concurrisset, ille non modo neminem ad arma vocauit, sed ne armatis quidem praesse voluit. Eumne, qui in summo reip. discrimine, cum in magistratu sit, patriae non succurrit, aliorumque consilia ad remp. tuendam frustratur, a ciuibus suis prodicionis argui mirabimur?*

Z 5

Poly-

Polyperchon in Phocidem progressus filium Alexandrum cum copiis praemisit versus Athenas, verbo contra Nicanorem populo Atheniensium suppetias venturus, et nouam democratiam obfirmaturus; re vero, ut urbem, si facultas daretur, occuparet. Irrupere in urbem exules et faex ciuitatis iterum remp. occupauit. Concio habita in condita et confusa, in qua Phocioni imperio abrogato alii creati duces; et capi potuisset ab Alexandro ciuitas, nisi is, parum callide, cum Nicanore colloquio habito, suspiciones de se fecisset.

Agnonides rhetor confestim adortus Phocionem, prodicionis eum eiusque factionem insimulauit: e qua Callimedon et Pericles trepidantes cessarunt vrbe; Phocion cum aliis amicis ad Polyperchontem concessit. Quid in hoc sequutus sit, aut quo consilio homini se in manus tradiderit, quem sibi infestum et esse debere et esse norat, haud facile assequare. Quod si enim ad Nicanorem confugere noluit, ne ciuibus suis tanto maiorem criminandi se facultatem daret: quocunque tamen alio praestabat exulatum ire *i*). Imprudentia itaque et consilii inopia factum id ne arguas, alia aliunde argumenta petenda sunt, quae tamen temporis

- i*) Ex amicis alii cum ipso in eosdem laqueos se induerant; alii, in quibus Demetrius Phalereus, fuga sibi consuluerunt: Plut. p. 757 A. 758 C. Nepos l. c. Apud hunc, Phocion iam capitis damnatus a populo et vrbe eiectus ad Polyperchontem proficiscitur: quo ut venit — causam iussus est dicere — et iterum Athenas deductus est, ut ibi legibus de eo fieret iudicium. Quam perturbatus hic est narrandi ordo!

poris iniuria inuidit. Nunc, quantum iudicare licet, lupo se credidit ouicula.

Alia narratio, eaque probabilior, etsi Phocionis probitati multo minus consulens, est apud Diodorum (lib. XVIII, 65). Cum Athenienses a Nicanore verba sibi dari nec Munychiam cum Piraeo sibi restitui viderent: Alexandrum, Poly-sperchontis filium, in Atticam copias ducentem eo cum consilio aduenire putarunt, ut, quod ipsi vellent, efficeret. At ille non populo, sed sibi in belli usus, Munychiam et Piraeum occupare voluit. Phocion cum aliis, qui constitutam ab Antipatro ciuitatem tuebantur, legum poenas in noua democratia veritus, Alexandro occurrit, *et quid in rem sit docendo auctor illi est, ut praesidia sibi retineat nec reddat Atheniensibus, donec Cassander sit debellatus.* Quibus obsequutus Alexander cum Nicanore sermones facit. Quo animaduerso populus comitiis tumultuose habitis magistratus praesentes abrogat eosque partim capite partim exilio et facultatum publicatione plectit; inque his Phocionem. Hi ad Alexandrum confugiunt, eius ope incolumes se fore arbitrati: at ille eos ad patrem Polysperchontem remittit.

Interea populus, seu turba Atheniensium, Agnonide rhetore, qui Phocioni infestus erat, suadente, Archestrato autem rogante, legationem misit ad Polysperchontem cum rege Aridaeo in Phocide statua habentem, ad accusandum Phocionem. Cupiditate occaecatos homines agnoscas et
in

in hoc, quod ciuem suum a rege damnari haud recusarunt; nisi forte accusatio eo facta, vt ad supplicium ille sibi dederetur. Hic, cum tumultu et clamore consilio habito, (de quo videndus Plutarchus p. 757. Diod. XVIII. 66. 67.) reiecta est caussa ad populum Atheniensem. Adductis in urbem reis custodia septis a Clito Macedone, cum litteris a rege missis, quibus prodicionis illi crimine conuicti arguebantur, comitia habita, ex nouae quidem ciuitatis lege et ratione admissis promiscue omnibus qui pro ciuibus se gererent. Erat autem prodicionis crimen inter ea, de quibus populi cognitio erat Athenis; itaque non apud iudices, sed coram populo res est disceptata: in quo cum maior nunc numerus esset eorum, qui Phocionis consilio se ciuitate eiectiones esse clamabant, dubitari iam tum non poterat, vtrius partis suffragia essent numero victura. Et iudicium quidem aut supplicium ipsum e Plutarcho adscribere nolumus: apud quem nonnulla legi possunt, quae plebis exasperatae furores satis arguunt *k*). Ceterum ex his manifestum fit, temporum iniuria multo magis quam hominum Phocionem in capitis periculum fuisse adductum. Multi fuere regum amici et administri in rep. gerenda, qui multo leuioribus criminibus supplicio et tormentis sunt addicti. Communis ea generis humani calamitas est, vt, quoties seu

diffidia

k) Adde Nepot. 4. Alia apud Diodor. XVIII. 66. 67. Accusationis libellus hic erat: quod post bellum Lamia-cum ab his reis effectum esset, vt et patria seruitute esset oppressa et popularis administratio legesque solutae.

Diffidia ciuium in rep. seu populorum inter se discordiae existunt, vtraque pars habeat, quo de alterius iniuria conqueratur, et vnde suae causae praesidia, nec commentitia aut vana, petat. Vtra pars vicerit, eius causa superior facta est, non melior vel honestior ac iustior; at integritas et consiliorum prudentia multis in vtraque factione communis esse potest. Phocion aduersus leges commiserat, cum saluti reip. ex sua opinione, non ex reip. lege ac decreto, consuleret, et damnationi suae eo ipso causam idoneam et iustam praestruerat.

Atque haec quidem disputata sunt de causa a Plutarcho obscurata potius quam in luce collocata; digna tamen quae, quod posteritas iure suo facit, in vtramque partem dispecta et agitata esset. *) Vos autem, Ciues, causa cognita animis illud saltem tenete ac reputate, quanto prouidentiae diuinae beneficio nostra vita in ea tempora inciderit, in

- *) Nec accusare Phocionem nec defendere constitueram, cum ista scriberem; tantum id agebam, ut viderem, quanam rerum momenta in eius causa iuissent, et quomodo illa e legibus Atticis esset acta ac iudicata. Nullum animi iudicium praecouceptum aut studio vel ira inflexum attuleram; apposueram tantum ea, quae secundum scriptorum fidem et auctoritatem, et rerum, hominum temporumque rationes, probabiliter disputari posse mihi visa erant: its enim critices in rebus historicis dispiciendis praecepta ferre audieram. Itaque absque omni cupiditate ac studio, nisi veri videendi, ad haec accesseram. Cum tamen facile feram, ut alia aliis probabiliora videantur: liberum per me esto unicuique de his statuendi arbitrium, si quidem causas ac rationes probabilitatis potiores se habere putauerit: quibus et ipse concedendum esse existimabo, si potiores eas esse intellexero.

in quibus ut nec magnae virtuti, ita nec magnae calamitati locus sit; ad priuatae fere vitae ut virtutem ita felicitatem nostra ingenia, mores, disciplinam publicam priuatamque, iura publica priuataque, res diuinas et humanas, esse attemperatas videtis. Ad hanc itaque virtutem, ad hanc felicitatem enitimini; via quidem haud ardua per literarum studia praescripta iis, qui seu loco, quo nati sunt, seu ingenio, seu honestate et industria, tanquam viaticis instructi, eam ingrediuntur,

P. P. Kal. Januariis c1010cclxxxvii.

XXI.

ACADEMIAE GEORGIAE AVGVSTAE
P R O R E C T O R

IO. NIC. MÖCRERT D.

CVM SENATV

CIVIVM SVORVM

QVI

IN CERTAMINE LITTERARIO

IN A. D. IV JUNII

REGIS NOSTRI AVGVSTISSIMI

N A T A L E M

CONSTITVTA EIVS MVNIFICENTIA

P R A E M I A

ORDINVM ACADEMICORVM IVDICIO ABSTVLERVNT

N O M I N A

SIMVLQVE

COMMENTATIONVM

QVAE

AD CERTAMEN IN A. D. JUNII IV. ANNI FVTVRI LXXXVIII. HABENDVM

ADMITTI VOLENT

A R G V M E N T A

AB ACADEMIAE NOSTRAE ORDINIBVS

P R O P O S I T A

PROMVLGAT

M. JUNIO CLS IS CCLXXXVII.

Si inter perfectos homines viueremus, locum forte haberet illud a Stoicis petitum, quo virtus sibi ipsa sola et vnica merces esse dicitur: quicquid

quicquid enim recte, quicquid praeclare seu consultius seu susceptum ac gestum est, ex conscientia recte facti voluptate animum perfundit. Cum tamen sensus ille veri, recti et pulchri, non nisi ab animi habitu, ad quem te composueris, proficiatur: ad intelligendum in promptu est, antequam ille habitus indutus animo fuerit, voluptatem illam eiusque sensum haud magnum esse posse; vel sic tamen ad virtutem multo cum labore enitendum esse, ac deuorandas tolerandasque molestias omnis generis, ab omnium saeculorum sapientibus viris est decantatum, cum arduam esse viam ad virtutis arcem dicerent; multa esse ferenda ac facienda; esse sudandum et algendum; esse sustinendum et abstinendum. In hac rerum conditione pauca erunt ingenia, aut naturae beneficio tam felicia, aut praeclara institutione tam bene nutrita, ut cursu concitato nec intermisso ad arduam illam Sapientiae, hoc est, Veri ac Recti arcem contendant et enitentur. Ut ideo naturae humanae imbecillitati succurratur, quae non excogitata ac tentata sunt! Hortatu ac monitu ingenia iuuenilia excitanda esse, recte iudicatum est. Alii verberibus ac flagellis, poenis ac poenarum minis, ut arduam viam emetirentur, iuuenes impellendos esse censuerunt; non aliter ac si seruos aut iumenta ad opus faciendum instigarent, at non ingenia et animos fingerent et voluntates flecterent. Alii satis fecisse suis partibus putarunt, si praeceptis viae ineundae tradendis pulmones et latera ruperant; alii deuerticula et amoena loca prouidere, quibus ex prospectu ostensis inuitati animi aspera et confragosa
loca

loca perrumperent. Inter haec medium tenere videri debent ii, qui potentissimum ad subeundas exantlandasque doctrinae virtutisque parandae aerumnas incitamentum esse putarunt praemia honoris et laudis proposita. Cum enim sine labore ac molestia nulla nec corporis nec animi perficiendi ratio excogitari possit, adeoque ad vires amplificandas seu intendendas, quicquid auxilii polliceri possumus, referendum sit: cum ipsa rerum et animorum natura nihil magis consentaneum esse videtur, quam ut boni alicuius fructu ex proximo, antequam ipsam arcem expugnaueris, proposito incendatur studium, quo altius enitaris. Multo autem magis hoc incitamento indigere videri debemus hac vita, hoc saeculo, hac aetatis parte, qua luxurie tanquam peste omnia afflante emollita ingenia laborem ac molestiam refugiant. Quo magis celebranda est munificentia Regis nostri Augustissimi, qui antequam ista mollitie et luxuria contagio nostrorum Ciuum ingenia corrumperet, intactos adhuc animos praemiis propositis firmare, ad feliciorum et intentiorem cursum incendere et ad tanto maiora audenda inflammare voluit; Et si consilium ea in re propositum esse debuit haud vnum: nam et reip. multum interest, ut eorum, qui in studiis litterarum excellent, ubi tempora postulent, notitia habeatur facilis et expedita; ita enim qui ad genus quodque rerum ac curarum maxime idonei sint, non diu quaerendi sunt, nec iudicium de iis est praecipitandum. Ad vos autem, Commilitones, quid tandem vestris ipsorum votis expetendum videri potuit maius, quam quod, cum

iam in forum ac vitam producenda sint studia vestra, data vobis est facultas cum experiendarum virum, tum acquirendae laudis et faciendi de vestris ingeniis studiisque iudicii. Ominamur itaque et augramur, cum nostrae almae Georgiae Augustae celebritas inprimis ex industriae vigentisque inter docentes et audientes pari laude studii profecta sit, etiam haec inter vos ingenii et industriae certamina ad laudem illam et profectam inde celebritatem tuendam magnam vim esse habitura. Spesque illa erit tanto certior atque firmior, quanto propius accedent conatus vestri ad bonam laudem eorum, qui praesenti hoc certamine suorum profectuum specimina ad nos attulerunt. Quod enim praefiscine dictum sit, nullus inter eos, qui ad certamen descendunt, fuit, qui non laudem virtutis et doctrinae meruerit. Verum haec sigillatim vt cognoscatis, nunc, ordine erunt exponenda, quae de singulis quaestionibus ad certamen propositis, de scriptis ad concertandum missis, tandemque de iudicio super iis, constituendisque praemiis, commemoranda habemus.

In hunc itaque annum inque Regis nostri Augustissimi diem natalem, quem votis sacrisque sollemnibus celebramus, superiore anno constitutae ac promulgatae quaestiones erant hae:

Ab *Ordine* quidem *Theologorum*:

„Quaenam fuit vera et certa eorum, qui medio secundo atque ineunte tertio seculo praecipue floruerunt, Patrum, maxime vero Iustini Martyris, Athenagorae, Tatiani, Theophili Antiocheni,

cheni, Clementis Alexandrini, Tertulliani denique, de ratione siue relatione Filii cum Patre sententia? Id vero ita ostendi debebat, vt,

- 1) Quid senserint isti Patres, ex ipsis eorum scriptis proferretur, atque istos etiam vere ita sensisse; iustis quidem argumentis ex vsu linguae, ex nexu locorum, ex reliqua opinionum, quas alebant, historia euincatur; nec tamen ideo lis vlli eruditorum moueatur, quibus aliter forte sensisse illi visi sunt. Tum vero,
- 2) Sententiis istorum inter se collatis, quid commune omnibus quidque proprium cuique sit, vel videatur proprium, accurate examinari, causasque dissensus, si quis interesse, et si quae afferri posse videbantur, oportebat afferri, tentarique tamen, num origo omnium ex vno fonte deducta nihilo minus posset demonstrari. Denique
- 3) Illae etiam causae, quantum fieri poterat, perspicuae explicandae erant, quibus inducti Patres huius aevi sententiam istam non quidem fidei ac doctrinae ecclesiasticae, at suae tamen Theologiae inferebant, adeoque inprimis explicandum, quid praestare vsus in informanda doctrina de Trinitate et poterat et posse ex illorum iudicio videbatur.,,

„Ordini Theologorum praeter expectationem quidem accidit, vt, vnico excepto, omnes, quibus quaestio ista superioris anni proposita fuerat, vel defugisse concertationis laborem vel desperasse praemium viderentur; non enim nisi vnus inuentus

est, qui oblato specimine rem, cui experiundae multorum vires haud impares fore videbantur, tentauerit. Verum, ut vix concursus plurium desideraretur, vnus ille effecit, tali exhibito specimine, quale expectari a paucis poterat. Quod igitur auctor libelli inscripti verbis Hilarii:

Optimum esse lectorem, qui dictorum intelligentiam expectet ex dictis potius, quam imponat, et retulerit magis quam attulerit, neque cogat id videri dictis contineri, quod ante lectionem praesumerit intelligendum —

omnibus iis satisfecit, quae non postulari tantum sed sperari etiam in isto iuuenilium virium conflictu poterant; quod quae idem in tractanda quaestione proposita tantum eruditionis quantum in instruenda acuminis; quod in colligendis, quae ad illustrandam quaestionem pertinebant, tantum ingenii, quantum in omittendis, quae omitti sine damno poterant, maturi iudicii; quodque in re historica tantum dilectus seueri in lectione, quantum virilis abstinentiae in fugienda ostentatione multae lectionis adhibuit ostenditque: eas omnes ob causas Ordo Theologorum optime merenti praemium extra pugnam lubens decreuit atque adiudicauit.,, Scheda aperta nomen lectum est:

JOANNES GEORGIUS ARNOLDVS OELRICHS,
Hannoveranus.

Ab *Ordine Iureconsultorum* proposita erat quaestio:
„Emigrationem ciuium prohibere vel circumscribere,
an, et quatenus, fas sit?,,

„Sex redditae erant commentationes, his praescriptis dictis insignitae:

I. Haec

- I. *Haec sunt fundamenta firmissima nostrae libertatis, sui quemque iuris et retinendi et dimittendi esse dominum. Cic.*
- II. *Fas mihi non habiles, et fas tibi, linquere Colchos.*
- III. *Salus populi suprema lex esto.*
- IV. *Non fumum ex fulgore, sed ex fumo dare lucem.*
- V. *Nec timide nec temere.*
- VI. *Fas mihi non habiles, fas et tibi, linquere Colchos.*

„Egerunt omnes id, vt quaestionem maxime ex principiis iuris publici vniuersalis enuclearent: et pleraeque omnes libertati ciuium iustum statuerunt pretium, quarta restrictam ex regula facultatem emigrandi exponit. Agnouit Ordo vim ingenii et industriae, quam singulae commentationes prodiderant. Inter eas tamen argumentorum apparatu, quo haec quaestio, habito ciuium et incolarum discrimine, tractata est, et ipso ordine scribendi, et oratione, primum locum mereri visa est illa, cui inscripta sunt verba:

Haec sunt fundamenta firmissima nostrae libertatis, sui quemque iuris et retinendi et dimittendi esse dominum.

cui Ordo et praemium regium decreuit.

Locum alterum a priore assignandum esse censuit *utrique commentationi*, quae eodem symbolo Nr. II. et VI. insignita est,

Fas mihi non habiles, et fas tibi linquere Colchos.

quarum prior ipsa rerum expositione, posterior orationis cultu se commendat., Victricis Commentationis auctor pronuntiatus est

FRIDERICVS HIRSCH, Goslariensis.

Qui autem secundo ac tertio loco laudem reportarunt, sunt

JO. DETLEF DE HAMMERSTEIN, Hannoveranus;
et JO. FRID. GVILL. SCHLEGEL, Havniensis.

Ab Ordine Medicorum:

„An, vti ossium in casu fracturae complicatae, cariei etc. ita etiam partium mollium in casu vulneris, perditam substantiam natura humana restituit? An itaque vulnera noua carne replet? Si affirmatur, quaerimus: an caro illa alia ex membranis, alia ex ossibus, alia ex musculis, alia ex tendinibus nascatur? An itaque naturam partis habeat ex qua nascitur? An vero eadem sit, ex quacunque parte demum nata? An omnes vel quasdam tantum partes restituat natura? An in omnibus vel quibusdam tantum casibus? Qua ratione ars regenerationem hanc coercere, iuuare, moderari possit? — Si negatur, vulnera noua carne repleri, quaeritur, quonam modo claudantur vulnera variarum partium, e. c. ossium, cerebri etc.„

„Commisssa sunt certamine hoc *medicae scientiae* alumnorum scripta tria: *primum* signatum verbis:

Naturam sequi, artique inpendere vires.
alterum: Non velle videri verus, sed esse.

tertium: ἡ δὲ πείρα σφαλερή.

Quorum *primum* illud ordine luculentò et perspicuitate se commendat, tum lectione eorum, quae ab aliis in hoc genere scripta sunt, cum iudicio mentis subactò instituta; quo factum est, vt multa ab aliis obseruata bene perspexerit auctor et in suam rem conuerterit; interea et ipse experi-
menta

menta multa instituit accurate eaquē explore ac diligenter perscripsit. *Alterum* tamen inscriptum: *non velle videri* — plura experimenta idonea, magna cum varietate, diligentia ac cautione facta, affert, quae sagacitatem ingenii et acumen iudiciumque ac subtilitatem in obseruando et experiundo, ac videndo, quid indecolligi et elici possit, produnt eximiam; vt tamen nec lectione vacet scriptum quam res et consilium postulabat. *Tertium* ab ingenio profectum est haud mediocri, quod, aliorum ductus impatiens, sibi ipsum viam munire mallet; sunt in eo nonnulla recte obseruata, et, quae ex obseruatis sequantur, acute animaduersa; etiam ea, quae auctor lectione cognita habuit, acri cum iudicio sunt explorata et ad res subtiliter translata: desideratur tamen omnino cura et circumspectio in experiundo, tum diligentia seuerior siue in descriptione, dilectu, copia ac varietate experimentorum quae ipse instituit; siue in colligendis ac dispiciendis rebus ac factis, quae in aliorum scriptis occurrunt, ad rem, de qua quaerebatur, idoneis et cognitu necessariis, si id agebatur, vt quod verum esset, perspiceretur.

Quae cum ita sint, Ordo medicus principem locum cum praemio assignauit Commentationi Nro. II. inscriptae verbis: *non velle videri verus, sed esse; accessisse* autem proximo loco ad illam iudicat scriptum Nro. I. *naturam sequi artique impendere vires.,,*

Victoris nomen publice renunciatum est:

ОТТО ГВНН Curonus.

Aa 4

Eius

Eius autem, qui secundo loco palmam est adeptus, nomen est: ANDREAS JO. GEORG. MURRAY, Göttingensis.

Ad quaestionem a *Philosophorum Ordine* propositam nunc accedimus:

„Orbis terrarum faciem, qualis depingitur ab Homero, declarare: hoc est, ex utroque poetae principis opere, tam Iliade, quam Odyssea, quicquid iis geographici argumenti continetur, diligenter ac plene colligere, ita, ut, Homero duce, per tres orbis partes eatur, et, quae de singulis regionibus, earumque populis, montibus, fluviis, maribus lacubusque, urbibus, oppidis cetera ab Homero commemorata sunt, Geographorum more in unum congerantur. Obscurioribus poetae locis quum saepe lucem affundere possit Strabo, perpetuus Geographiae Homericae interpres; bene recteque agent de praemio certaturi, si Strabone, quotiescunque ipsa res postulatura sit, ad Homerum explicandum utantur. Ita existet, ut speramus, aliqua *Homeri Geographia*, qua hucusque aegre caruerunt tam Historici quam alii litterarum antiquiorum interpretes.„

Erat quidem quaestio ita comparata, ut profectus studiorum nonnullos, doctrinaeque apparatus, cum assiduitate inuestigandi ea, quae ad consilium facerent, haud vulgari, postularet. Contigit tamen, quod vix sperare ausi eramus, ut prodirent in arenam quinque athletae animis viribusque omnes insignes, ita ut nullus ex iis esset, qui non praemio

praemio dignus videri posset, si solus certasset; adeoque laus quidem et commendatio ingenii, doctrinae et industriae, omnibus ac singulis communi iudicio deberi visa est; erat tamen certamen comparatione inter eos facta diiudicandum, et videndum, qui et qua in re alii aliis excellerent.

Scripta ab iis exhibita his lemmatibus insignita erant:

I. *Nec tam turpe fuit vinci, quam contendisse decorum.*

II. *Olim meminisse iunabit.*

III. *In rebus tam antiquis si, quae similia veri sint, pro veris accipiantur, satis habeam.* Liv.

IV. *ἡμεῖς δὲ πλεος ἐσθλὸν ἀκούομεν οὐδὲ τι ἰδμεν.*

V. *Εὐθα καὶ ἑμὸς φίλος υἱὸς κραταρὸς καὶ ἀνυμῶν.*

„Quae ad *geographiam Homericam* constituendam postulabantur, spectabant primo ad *enumerationem iustam cui nihil deesset*, tum vero ad *dispositionem ac descriptionem more geographorum factam*. Enumeratione cumulate et accurate facta probandi fuere omnes; etsi in Nro. V. plura se offerrent partim ex Homero partim ex aliis scriptoribus bene animadversa et ad illustrationem idonea. Maius occurrebatur discrimen in altero illo, quo iudicii inclinari debuit trutina: *Geographico more* recensum et descriptionem instituerunt tantum duo, Nro. I. et V. ut ab Occidente initio facto terrarum orbem permearent; reliqui tres ordinem Homericum sequuti sunt, a Catalogo enim navium facto principio, reliquas terras ita subiiciunt, ut, si ex geographica subtilitate rem aestimare velis, certum et ad iustas rationes institutum ordinem, quem sequantur, non habeant; etsi per se opera illa haud improbanda sit, qua a notioribus proceditur ad terras minus

notas, et in Homero illustrando reprehendere
 habere nequit, si Homerum auctorem cunctis
 xime sequaris. Habet tamen etiam ex huius
 quisque praecipui aliquid: No. II. anem
 praemittit; idem, quo sensu πόλις et νῆσοι
 mero accipienda sint, monere haud obli-
 adiecitque indicem geographicum; promissa
 que mappas tres geographicas, quae ma-
 diterranei insulas et littorales plagas, Asian
 rem ac Graeciam, ad Homeri ductum oculi
 cerent: quas ut ille perficiat et euulget, a
 ipsi sumus ac suasores. De Oceano egere No. III.
 et IV. quorum prior ille etiam conspectum
 terrarum ex Homero praefixit, a Catalogo
 per errores Vlyssis et Menelai enumerationem
 corum commode deduxit; an extra Columnas
 culis Oceanus Homero innotuerit, idem
 quaesivit, item de Bosporo Cimmerio.
 ordinem geographicum amplexus, Pelopon-
 diserte satis descripsit, mappa quoque geogra-
 adiecta; omnino diligentiae laudem abstulit
 raque tamen iudicio aliorum magis quam su-
 stituit. No. IV. etsi ordinem geographicum
 riorem haud est sequutus, cum iudicio tan-
 dilectu ea, quae collegerat, disposuit; Can-
 nauium partes esse quinas vnus perspexit; ma-
 geographicam ex d'Anvilliana adornatam a
 No. V. ordine geographico seruato, et enu-
 tione satis locupleti adiecta, litterarum q-
 graecarum copias, comparatione cum ceteris
 maiores et accuratiores iudicibus approbavit;
 stare quoque visus est sermonis latini puritas
 pr

proprietas scribendique cura. Mythica tamen proposuit, de quibus nunc non quaerebatur; locorum etiam graecorum et versuum laudatorum copiam nimis cumulatam: plerumque fatis erat sententiam ac summam rerum exponere, si in verbis nihil esset, quod probandi vim haberet.

Quibus ita constitutis, Ordinis philosophici iudicio *primas* tenere visa est commentatio *quinto* loco commemorata:

ενθα καὶ εἰς φιλος υἱος κρατερος καὶ ἀμυμων.

et ei assignatum praemium regium: pronuntiatumque est auctoris nomen

CAR. TRAUGOTT GOTTLOB SCHOENEMANN
Islebiensis, Seminarii philologici Sodalis.

Accessisse autem *proximo* loco ad praemium, laude autem par esse, visa est scriptio quarta:

ἡμεις δὲ κλεος οἶον ἀκουσμεν οὐδα τι ἴσμεν:

cuius auctor professus est nomen AVGVSTVS WILHELMVS SCHLEGEL, Hannoueranus, Seminarii philologici Sodalis.

Tertia palma assignata *Commentationi primae* verbis inscriptae: *Nec tam turpe fuit vinci quam contendisse decorum*, auctore HERMANNO SCHLICHTHORST Bremensi. Cum *elogio* et commendatione diligentiae et litterarum commemoratae fuere reliquae duae II. et III. Ita Virgilianis versibus vti licebit: *Accipite haec animis laetasque aduertite mentes: Nemo ex hoc numero mihi non donatus abibit!*,

Praeconio nostro pronuntiata audistis, Commilitones, nomina eorum, qui ingenio, doctrina et studio suo meruere, ut praemio regio tam honorifico

norifico ornarentur publice; aliud tamen praemium nec minus insigne et inuidendum reportarunt, laudem publice in illustri confessu Serenissimorum Principum Regiorum M. Britanniae, Celsissimorum Principum et Comitum, inter tot ac tantos arbitros ac testes virtutis. Maesti vero virtute, Iuvenes praestantissimi, maesti, inquam, virtute estote, et, huius illustris et ad totam vestram vitam memorabilis diei memores, ingenii animique vires intendite, ne parto hodierno decore vnquam excidatis, ne vos hoc praemio indignos vlla vnquam dies arguat; contra annitendum vobis esse putate omni studio et opera, vt, cum semel ceteris emineretis vbi et publice iudicati sitis, ita per reliqua studiorum academicorum spatia, per totum vitae, munerum et officiorum, decursum, qui vos aliquando excepturus est, eminere inter alios et virtute, scientia, peritia, industria, ingenioque ad omnia habili excellere videamini; vt animis vestris infixum semper habeatur notum illud: *Αἰνᾷ ἀριστεύειν καὶ ὑπεροχὸν ἐμμεῖναι ἀλλων*. Verbo, operam date, vt ne vnquam arbitros ac iudices vestros, eosdem praeceptores et amicos, iudicii de vobis sui poeniteat.

Supereſt, vt quaestiones in annum futurum LXXXVIII. proponendae nunc publice recitentur. Constituta est ab ORDINE THEOLOGORVM
quaestio haec:

„*Quae voce luxur vulgari loquendi modo comprehendi solent, antiquam enim vocabuli huius, aequae ac luxuriae, vim morum dissolutionem et intemperantiam*

perantiam cupiditatum, luxatarum quasi ac solutarum, denotare constat) *num licita sint e legibus diuinis, praesertim in libris sacris promulgatis an illicita?*

„In tractando hoc argumento summa praesertim sollertia definiendum est, *quid sit luxus?* ne in vanam super verbis altercationem exeat disputatio. His itaque limitibus circumscribi debet tractatio, vt inquiratur in haec: num lautitia, deliciarum ac magnificentiae vsus omnisque sumtuum profusio, curiositas et elegantia, omnino sit reprehendenda ac deuitanda, an certo respectu? et quonam?

Deinde luxuriae historiam sedulo dispicere oportebit iudicem, vt habeat, quonam eius honestas vel turpitude determinari possit. Indagandi igitur sunt luxus effectus spontanei ac fortuiti; quatenam inde necessario existant commoda vel damna? referatne celebris illa genealogia a Platone ingeniose excogitata, pulchreque prolata, luxus comites perpetuos et indissolubiles: ita vt ἡ πολυτελεια semper gignat ac necessario τον τυφον και την τρυφην; atque ab his nunquam non procreentur ὕβρις και παρανομια και αναισχυντια?

Sedulo praeterea distinguenda est profusa splendidaque sumtuositas, respectu ad singulos homines atque ad integras respublicas habito.

Quibus rite peractis, tandem argumenta sententiae ferendae a tribus hisce fontibus, nempe naturae conformatione a summo numine facta, luxus effectibus, atque ex legibus dei scriptis hauriri debent.,

Ab

Ab ORDINE IVRECONSVLTORVM:

„*Ex moribus Germanorum, Iure Communi, Legibusque Imperii exponere, Vtrum cui S. R. I. in externas, vel cui certe territorii Germaniae in aliud territorium, emigrare fas sit, et an et quatenus facultas emigrandi ratione personarum aut bonorum circumscripta sit?*

Quaestio ORDINIS MEDICI:

„*Quum tantopere intersit medicorum, nosse calculi principia, eaque sine dubio non raro a deprauata urinae mixtione pendeant, optat Ordo medicus, ut ex iusta urinae sanae, propriis experimentis suffulta analysi, quantum licet, determinetur, quanam urinae vitia, hanc eius partium mixtionem spectantia, sabulo renum calculoque originem praebent, et quanam exinde consecretaria, tum in praecauendo, tum in sanando hoc malo proficua, fluant.*

Ordini philosophico singulari aliquo munificentiae Regiae exemplo contigit, ut in annum futurum bina praemia distribuenda adeoque binas quaestiones proponere possit. Grati itaque et nos beneficium hoc Regium agnoscimus et vos agnoscetis, Commilitones, quandoquidem nunc laudi reportandae et praemio consequendo duplex facultas et opportunitas vobis, qui in litteras exquisitiores, historici inprimis geographici et antiquarii generis, incumproposita: nec erit conquerendum, qualem aetatem incusandi alias causa satis iusta habetur, litteris eruditioribus, et plus ingenii acuminis et studii sibi postulantibus, nulla constituta esse praemia satis digna.

Propo-

Proposita igitur est studiis vestris, Commilitones, *quaestio alia ordinaria, alia extraordinaria.*

ORDINIS PHILOSOPHICI

quaestiones in Iun. IV. c1010ccclxxxviii. propositae.

Ordinaria quaestio est:

Geographia Africae Herodotea, h. e. notitia Africae geographica ex Herodoto constituta; ita ut populi ac regiones ab eo commemoratae probabiliter geographico more finiantur ac describantur; adiunctis ex aliis scriptoribus non nisi iis, quae ad illustrationem facere possunt; Aegypti summatim tantum ratione habita.

Ad lectionem et interpretationem Herodoti summam operae redire videtis, exactis ad geographicas rationes et geographico more constitutis iis, quae libris IV. et II. et nonnullis aliis in locis tradita sunt. Comparatio institui poterit cum Diodoro Siculo et Sallustio. Ex recentioribus peti forte nonnulla ad illustrationem poterunt, ut ex Bocharto et d' Herbelotio; ex Leone Africano et qui eum sequitur Marmol, Dapper etc. Ludolf; tum ex Shaw, Höst, de Chenier etc.

Quaestio extraordinaria

in Iun. IV. c1010ccclxxxviii

Fabulosam Argonautarum Geographiam ex veterum, tam integris, quae supersunt, monimentis, quam deperditorum fragminibus, eruere: diversas, ex diversorum mente, itineris vias prosequi: regiones denique et vrbes, quas in expeditione accessisse dicuntur Argonautae, accurate determinare, et ad hodiernam istius tractus faciem reuocare.

In

In promptu sunt copiae, quibus ad pertractandum argumentum per se non admodum copiosum vti licebit. Praeter Apollonium Rhodium, Orphica et Valerium Flaccum, petetis reliquarum rerum notitias ex Apollonii Scholiis, Apollodoro et Notis in eum scriptis, et ex iis, quae cum in his tum in Grodeckii Commentatione super Argonauticis Apollonii laudantur.

Indictum est certamen in diem IV. Junii anni proximi LXXXVIII. praemia sunt quina, singula XXV aureorum ducatorum pondo, eo, quem audiivistis, modo adiudicanda; scriptiones quae ad commissionem admitti volent, *ante Kalendas Aprilis* eius anni vt redditae sint, curabitis. Leges certaminis etsi neminem vestrum latere possunt, ex edicto tamen anni LXXXV repetemus has: „Licet in certamen prodire omnibus in litterarum studio prouectioribus, seu indigenae illi sint seu exteri, nec fraudi erit, si qui ante illum diem, quae praemia victoribus assignabuntur, studiorum curriculo absoluto, Gottinga discefferint; modo ipsi ante discessum scripta sua reddiderint, et in scheda obsignata seu locum, in quem se contulerunt, adscripserint, seu amicum negotii sui gestorem, e quo illud comperiri possit, reliquerint. Oratione vtentur Latina, eaque vt sit pura, tersa perspicua, curabunt. Ne auctores commentatorum, quae Prorectori, Decano, aliue Professore reddentur, vilo indicio se prodant, diligenter cauebitur.„

His peractis ad diei sollennia reditum est, in-
que Regis Indulgentissimi natali sollennia vota ac
preces ad Deum O. M. factae, vt huius ipsius
beneficii munificentissimum auctorem omnibus iis
bonis beet, quorum fructus vitam reddere potest
iucundissimam. Eiusdem curae ac tutelae mandata
sunt Regiae indulgentiae ac beneuolentiae in hanc
Academiam pignora, florentissimi tres Iuuentutis
Principes, Augustissimi Parentis Proles faustissima.

Quae omnia vt ex voto Regis Indulgentissimi,
et ad Academiae nostrae felicitatem et prosperitatem
eueniant, precabimini nobiscum omnes ac singuli.
P. P. in Georgia Augusta m. Junio c1010ccclxxxvii.

XXII.

ACADEMIAE GEORGIAE AVGVSTAE
 P R O R E C T O R
 IO. NIC. MOECKERT D.
 CVM SENATV
 SVCCESOREM

IN
 MAGISRATV ACADEMICO
 AVG. GOTTL. RICHTER D.
 CIVIBVS SVIS

COMMENDAT
 INDICTIS SOLLENNIBVS

IN A. D. II. JUL. MDCCCCLXXXVII.

Rerum Chersonesi Tauricae memoria breuiter exposita.

Magistratus academici vice semestri ab Ordine
 ICtorum nunc ad Ordinem medicum prope-
 rante, designatus est nouus Prorektor Vir Experien-
 tissimus, Collega coniunctissimus,

AVG. GOTTL. RICHTER D.

Sollennia itaque in crastinum diem indicimus,
 Ciues, quibus ille magistratus insignibus ornatus
 prodibit

prohibet nouique muneris auspicia faciet, quae ut fausta et secunda sint, et ipsi ex animo precamur, et Vos, Principes Serenissimi, Comites Illustrissimi, omnesque quotquot sacris Musarum litatis et Georgiae Augustae tanquam commune templum frequentatis, ut nostris votis faueatis, ita rogamus, ut inter pietatis non minus in almam nostram matrem, Georgiam Augustam, quam inter beneuolentiae et amoris pignora habituri simus hoc, quod vel humanitas vestra et facilitas nostris precibus esset impertitura.

Hoc erat primum, Ciues, quod, cum hanc tabulam publice proponendam meditaremur, nobis agendum esse intelligebamus; alterum, ut aliqua de re ad communes litteras ac studia spectante praefaremur, eoque ipso testatum faceremus, agi haec, in quibus versamur, munia academica inter homines litteratos, liberaliter institutos, qui variarum litterarum notitiis ingenia ornata, nec vni arti ac scientiae, opificum more, ita intentos animos habeant, ut fastidio sibi placeant reliquarum litterarum, quae humanitatem mentibus instillant, sensum recti ac pulchri ex rerum veritate, non ex opinione vulgi, iis induunt. Non igitur rem aut vanam et inanem, aut a communibus studiis alienam, acturi putabimur, Ciues, si apud vos, etsi in tanta litterarum, quibus vacatis, diuersitate ac varietate, re ex historiarum penetralibus prolata, de *Chersonesi Tauricae antiquitate fortunaeque vicissitudinibus* nonnulla exponamus; cum aures nostras superioribus annis saepius pepulerit Chersonesi Tauri-

cae commemoratio, hoc ipso vero anno variis sermonibus iactata profectio Augustae Russiarum, deductioque Imperatoris Iosephi in eandem peninsulam; et haud dubie inter mirandas rerum vicissitudines referendum sit hoc, quod ante paucos annos vix animo fingere licuisset, fore ut Augustus et Augusta e diuersis sedibus, amicitiae fanciendae causa, confluente ex omni Europa cum legatorum tum aliorum hominum turba, eo cum splendore ac fastu, quem vix olim Asia vidit, congregiantur in littore Ponti Euxini, inter barbaros, quorum maiores a multis inde saeculis vtriusque imperii prouincias ac terras aut graui dominationis iugo oppresserant aut incurfationibus infestauerant, Russiam vero continuis rapinis quo minus vexarent a non multis inde annis coerciti fuerant. Quid vero? si mentis cogitatione ad antiquiora redimus! si congressum hunc factum reputemus iis in locis, in quibus aliquando magnus ille Mithridates, a Romanis victus, noua in eos arma parabat hoc consilio, ut circumducto per easdem terras, quae nunc Russiae et Austriae parent, exercitu Romanos in Italia aggrederetur! si meminerimus, haec esse loca, in quibus ante bis mille annos Cimmerici et Scythae armis infestis pugnabant, Tauri aduenas mactabant! quae porro, cum aliquot saeculis post Graecorum colonorum studiis et artibus egregio vitae cultu efflourissent, ita ut inter feliciores terras Chersonesus Taurica referretur, primo bella continua, tum barbarorum ex Asiae solitudine in Europam effluentia se agmina, iterum adeo efferarunt, ut omni pristino cultu exciderent! Nunc autem quantum illud omni
Europae

Europae et Asiae spectaculum propositum esse putabimus, in ipsa illa Chersoneso, congressos esse Imperatorem et Imperatricem, par mortalium potentia non modo omnes anteeuntium, verum etiam, id quod multo maius est in ea fortuna, prudentia, sagacitate magnoque animo, inter omnes alios mortales eminentium. Quae et quanta haec rerum fortunaeque vicissitudo, digna utique cui contemplandae immorentur animi non omnino ad humiles curas depressi!

His igitur cogitationibus ut, comparatione diuersarum aetatum facta, tanto melius vacare possimus, agite, summatim expositas videamus *res Chersonesi Tauricae rerumque vicissitudines* a prima inde hominum memoria. Nec vero veremini, ne ad Gomeritas et Cimbros vos deducamus; parum placet nunc morari in his, quae ad nominum similitudines ac probabilitates redeunt; etsi eae in hoc rerum genere non nimis seuerè proscribendae sunt, nisi omnem vltimae antiquitatis memoriam interceptam et abolitam esse volumus; enimvero persequemur tantum ea, de quibus historiarum fide explorata tradere licet. Geographiam insulae accuratiorem a nouis colonis Russis expectamus, secundum illa, quae post alios, inprinīs *Thunmanum*, nouissime *Klemano*, *Tott*, *de Peyssonel* a), debemus; ex eadem Strabonis (lib. VII. p. 473 sqq.) praeclaras notitias illustratas habebimus. Nec defuere qui Chersonesi huius res ac fortunas colligerent ac concinnarent: antiquiora quidem in loco historiae

Bb 3

catho-

a) *Traité sur le Commerce de la Mer noire 1787.*

catholicae de Cimмериis, de Bosporano regno, de bello Mithridatico, seriora inprimis a *Desguignas*, exposita sunt; tum a doctiss. viro *de Pryssonel b)*. Nuper quoque a *Ge. Aug. de Breitenbauch* industrie conquistata sunt ex omni aevo ea quae ad *Tauriam* et *Caucasiam* spectarent: ad haec enim nomina ab Augusta Russiarum reuocatae nunc sunt terrae, antea *Crim* et *Cuban* appellatae.

Antiquiorem omnem cum septentrionis omnino, tum Chersonesi Tauricae, memoriam esse fabulosam, non mirabimur, si Graecis, a quibus illa expectanda erat, Pontum Euxinum penitus ignotum fuisse teneamus, donec Iones illud mare nauibus frequentarunt (Strab. VII, p. 458. A.) Itaque Homerus non nisi obscuram aliquam septentrionis notitiam prodidit, primo, dum Ἰππημόλγους, Ἀβίους, Γαλακτοφάγους, commemorat, (vt adeo ipsum Scytharum nomen illa aetate inauditum fuisse credas) tum, quando Cimmeros memorauit, mythice tamen; nam ea, quae de populis septentrionales plagas, aere plerumque pluuiis aut niue obscuratas, incolentibus, vulgo narrata acceperat, ad ea Italiae loca transtulit, in quibus aditum ad loca infera constituerat. Fabulose narrata alia sunt in iis, quae de tentata primum in Pontum Euxinum nauigatione et de Argonautarum in Colchos profectio, primum fama, mox carmine, vulgata fuere. Inter hos, qui Argonautica

b) In *Obss. historiques et géographiques sur les peuples barbares qui ont habité les bords du Danube et du Pont Euxin* 1765.

lisse Argonautas narrarent, e Diodoro (IV, 45.) discimus, quem sua e Dionysio Milesio hausisse probabile fit c). Cum poetae ad narrationem a multis tractatam ornamenta noua circumspicerent: poterat expectari, vt non modo Asiae oram legere Argonautas, verum etiam septentrionale Ponti Euxini littus eos adire iuberent. Cum tamen ignorarentur loca ista; cumque omnino, qualis orbis terrarum habitus aut species in extremis septentrionis et occidentis esset, obscurum esset: miscuerunt multa et finxerunt homines inepte d). Ducentis fere post Homerum annis maior si non istorum locorum, hominum saltem notitia ad Iones peruenit, *Cimmeriorum* vtique, quorum incursatione vexata est Asia haud semel, primo sub Ardye II. Lydiae rege, (circa annum ante C. N. 637.) cum illi a Scolotis seu Scythis pulsi per Caucasias fauces in Asiam fugissent moxque Sinopen occupassent; dum interea Scythae eos persequendo in Medos aberrauerant. A Cimmeriis, in quibus Treres fuere, ferocissima gens, Asia minor vastata, Sardes direptae, Magnesia excisa; donec ab Alyatte II. (circa a. 602.)

Bb 4

Asia

c) v. Commentat. de Diodori fide in Commentatt. Soc. R. Gott. Vol. VII. p. 97.

d) v. c. Orphic. Argonaut. v. 1118 sq. Fuere quoque qui Thoantem Hypsipyles patrem eo delatum dicerent, quos Valer. Fl. sequitur II, 301. Hygin. f. 15. Verum haec inter historias non erant referenda. Aliae fabulae natae sunt e narratione de *Hyperboreis* a poetis variis modis ornata. Aliae in *Heraclis*: cf. ad Apollod. Notae p. 407. Aliae in *Prometheo* in *erroribus Ius*: quod cognoscere licet vel ex *Prometheo Aeschyli*. Cf. Schütz. ad eund. p. 9.

tentrionales se recepere, vbi eos partim permixtos cum aliis barbaris nomen amisisse partim ad vltiora occidentis et septentrionis errantes processisse credere licet e). Mansere tamen vestigia gentis in nomine Bospori Cimmerii, in monte Cimmerio et quae sunt alia f).

Cimmerii itaque primi sunt, quos, diserta historiarum fide, Herodoti inquam, inter Tanaim et Borysthenem sedes habuisse et peninsulam tenuisse, constat. Pulsis his eadem loca occuparunt *Scolotae* seu *Scythae*; in eorum locum successere *Sarmatae*, quos e Media boreali eo deductos esse probabile fit. Obtinet tamen loquendi mos apud scriptores, ut *Scytharum* nomine etiam de his, atque aliis barbaris, vti pergant.

Interea Chersonesum obsederant *Tauri*, ignotae stirpis populus, g) *Scytharum* accola, a *Scolotis*

e) *Cimmeriorum* res vltius non prosequimur; neque iis in historia Chersonesi proprius locus. Egere de iis, qui primo loco nominandi sunt, *Theoph. Sigfr. Bayer* Vol. II. Commentar. Acad. Petrop. Vol. II. (Adeundae quoque aliae eius Commentat. de *Scythia* vetere in iisdem Commentariis, collectae et redhibitae a Klotzio in Opusc. Bayeri.) et *Gattererus* noster, *Synchronist. Universalist.* T. I. p. 149. sq. ut *Freretum* (To. XIX. *Hist. de l'Acad. des Inscr.*) et Guthrianae farraginem To. III. p. 968. sq. taceamus.

f) Herodot. IV, 12. Strab. VII, p. 475. B. vbi *δυναστῶσαν ποτὲ τῶν Κιμμερίων ἐν τῷ Βοσπόρῳ*, lege *δυναστῶσαντων ποτὲ τῶν Κ.*

ff) Nisi cum viris doctis suspiceris fuisse hos eodem *Cimmerios*, qui a *Scolotis* pulsi montana loca occupauerant.

reportato perditus Tauri feritate notabiles; etiam
 propter humana sacrificia, cum hospites, inque
 his inprimis Graecos in illud littus eiectos, macla-
 rent: (Herodot. IV, 103.) faciebant sacra deae,
 quam Graeci cum Diana comparando Dianam Tau-
 ricam effinxere *h*). Coepit inde *Tauricae* nomen fa-
 bulis celebrari tragicis, inprimis Euripidis in Iphi-
 genia et Oreste. Quis primus commentum hoc
 ediderit, non constat; verum Dianae Tauricae ac
 Scythicae nomen inde ad multa loca circumferri
 coepit *i*). Dum tamen in scena haec placebant,
 melior cum Ponti Euxini tum Chersonesi notitia
 inter Graecos propagari coepit per colonias Milefi-
 orum in eam ductas; in quibus inprimis fuit *Pan-*
ticipaeum, tum *Theodosia*, mox *Cassa*, quae nunc
 vetus nomen recuperavit; fuit et *Heraclea* in occi-
 dente insulae ab Heracleotis Asiae condita, et ipsa
Chersonesus dicta *k*), quae, magnas aliquando opes

Bb 5

confe-

- h*) Promontorium ab oriente septentrionem versus *Parthe-*
nium templum habuit deae et signum: Strabo p. 474.
 A. Quae autem apud Lucianum in Toxari de fama
 amicitiae Orestis et Pyladis inter Scythas memorantur,
 in historiae censum non veniunt.
- i*) v. ad vitam Virgilii § 85. et praeter ibi laudd. cf. An-
 tonin. Lib. c. 27. Intpp. ad Vibium p. 170. Solin c.
 2. p. 136. Morisani. Inscriptt. Rheg. p. 91. 92.
- k*) Strabo VII. p. 474. B. *Cherson* seu *Cherrone* apud Me-
 lam legitur II. 1. p. 122 vbi additur: oppidum a *Diana*
conditum et Nymphaeo specu, quod in arce ei et Nym-
phis sacratum est, maxime illustre. Libertate illa a
 Romanis erat donata. Plin. IV, 12. f. 26. Inde crevit
 opibus, de quibus mox agetur. De eius situ varie
 tradi video; haberique pro eadem *Kozlow* vel *Kosleve*;
 hoc

consequuta, mox ruinis sepulta, nostra aetate in-
rum, sed alio loco, nomine tamen seruatō, remi-
xit; noua vrbe, ad Borysthenis inferiores ripas
condita, *Cherson* appellata. Etiam de Scythis l)
certiora innotuere expeditione Darii in Scythas;
alia eaque potiora debentur Herodoto, qui ipse
Scythas adierat.

Verum, vt intra Chersonesum contineat se
narratio, *Scythis*, moxque *Sarmatis* late omnia te-
nentibus, etiam peninsulae interiora m), littorales
plagas

hoc tamen locum Eupatorii veteris occupasse creditur;
redditum quoque hoc nomen a Russiarum Augusta.
Fuisse tamen Chersonen paullo supra urbem in promon-
torio, olim Parthenio dicto, sitam, ex Mela l. c. ma-
nifestum sit. Diuersa a Chersone est *Korsun*, quam
alii pro eadem cum Kinburn habent, alii in Karasbasar
in media peninsula quaerunt; alii aliter statuunt: quod
etiam factum videas in nuperrimo libello cuius auctor
ipsa Augusta esse creditur: *Russische Aufsätze* l. Vol.
p. 168. Non ad studia nostra spectat, vt inquiramus in
haec subtilius; videntur tamen parum adhuc expedita
esse pleraque quae ad Tauricam spectant.

- l) Quorum obscurata erat memoria, per *Aristae Proconnesii Arimaspea*; forte quoque post *Pythae Massiliensis* commenta; de *Aristae* v. Bayer Chronolog. Scyth. vet. p. 177. de *Pythae* b. Murray Nov. Com-
mentar. T. VI. p. 89. *Anacharsidis Scythae* aduen-
tum in Graeciam circa a. ante C. 592. forte et ipsum
inter causas melioris de Scythis notitiae referas.
- m) Interiora adhuc sub Romanis infedere ii, qui Scythae
et Tauri appellantur. *Satarchas et Tauricos* Mela II,
I. p. 124.. *Scythas Satarchas* Plin. IV. l. 26. p. 218.
memorat. Hic idem XXX. populos Tauricam tenere
auctor est, ex iis mediterraneos XXIV. sex quoque
eorum oppida nominibus recenset. Montium iugum
Scythotauros tenere: hoc ab Occidente Chersoneso,
Ortu ab Scythis Satarchis claudi. Quae omnia po-
pulos diuersae stirpis permixtos temporis progressu
confusosque arguunt.

tioni accessit. Expedita hinc est nec obscura *Bosporani regni* historia, quandoquidem Mithridatis extrema ad illa spectant, et ab eius morte Pharnaces Bospori a Romanis rex constitutus omnem Chersonesum tenuit, eique mox regno ac vita privato succedere per multas aetates reguli a Romanis appellati, quorum nomina cum ex historiis tum ex numis illustrata sunt a viris doctis supra laudatis; duratque regni huius memoria ad Valeriani vsque tempora: a C. 253. 4. (Zosim. I, 31 sqq.)

Crescere inter haec Chersonitarum opes: et frequens eorum memoratio, armis quoque ab iis in vicinos motis, iam inde a Diocletiani temporibus. In Romanorum ditione eos adhuc Iustiniani tempore habitos esse videas ap. Procop. de bell. Goth. lib. IV, 5. Oppressis quoque posthaec a barbaris ceteris peninsulae partibus, non totum illi iugum recepisse videntur. (cf. Constantin. Porphy. de administr. Imp. 53.) Nam succedere tempora, quibus septentrio Asiae, maris instar, continuis procellis agitari et vexari coepit. Fortunam peninsula tunc fere habuit communem cum ceteris locis circa Tanain et Maeotidem.

Iam a multis inde saeculis, quod vidimus, ea loca infederant *Sarmatae*, cumque iis haud dubie alii barbari; de quibus tamen nihil diserte traditum reperiatis. Succedere sub prima inde a C. N. faecula *Gothi*: quorum alii *Ostrogothi* dicti, diu ab oriente Tanain incoluere, supra eos ad Tanain Alanis loca tenentibus. Iidem tenuere peninsulam;

vnde

Pontum Euxinum infestum fecere praedationibus. Cesserunt *Hunnis*, terga prementibus, saeculo IV. exeunte; mansisse tamen in iis locis Gothos, etsi Hunnis obnoxios, probabile fit. Fractis Hunnorum post Attilae mortem opibus, inde ab a. 469. loca ab vrbe Chersone ad Tanaim et Maeotidem pertingentia habitarunt *Cuturguri*, ab Ugris oriundi, et sub Hunnorum imperio adhuc habiti: cum iisdem tamen Scythas et Tauros Procopius memorat (de b. Goth. IV, 5.) Vicini iis trans Bosporum et Maeotidem Vtriguri: vtrique posthaec *Avaribus* obnoxii. Nec prorsus inter haec Byzantinorum Imperatorum potentia in peninsula exoleuerat, saltem in locis maritimis. Saeculo VII. exeunte et saec. VIII. imperium in peninsulam sibi vindicarunt *Chazari*, et saec. IX. exeunte *Paczinacae* seu *Petschenegi*, cumque iis *Uzi* et *Comani*: quorum omnium communis fuisse stirps et origo videtur Ugrica. Annumerari ii solent Turcico nomini, et terrae appellari *Kaptschak*. Comani adhuc saeculo X. superiorem peninsulae partem tenebant; littoralem plagam Byzantini: Thema Chersonis dictum *p*). Exeunte saeculo XII. sub Comnenis, cum aliis Italis tum Genuensibus data libertas nauigandi in Ponto Euxino et adeundi Chersonesum. Tandem *Mogoli* circa 1238. victis Comanis Chersonesum suae ditioris fecerunt, misso a Genghis Kano patre filio *Tuschi khan* in terras *Kaptschak*, cui successit filius *Batu*

p) ap. Constantin. Porphyrog. de administr. Imp. v. V. C. Schlözer *Geschichte v. Norden* p. 528. Patzinacae tum inter Tanaim et Istrum accolebant: v. eund. p. 551. etiam inter Mogolicos tumultus.

Batu khan, a quo *Dynastia Mogolorum* in *Kaptschak* ortum habuit. Commercia inter haec et nauigantium aditus a Byzantinis, nec tamen satis tuti ac pacati. Occupato a Latinis Byzantio, multo magis apertus est Ponti aditus. Florentes inde Genuensium in Chersoneso res. *q*) Sub Manuele Palaeologo (annus 1266. editur) Theodosiam in ditionem redegerant, a barbaris Caffam appellatam. Russiae duces stipendiarii erant regulis dictis Mogolicis. Fuit in his dynastis *Tokatmisch*, clarum hoc tempore nomen, exeunte fere saec. XIV. Mogoli bellis civilibus in mutuam internecionem ruebant. *Tokatmisch khan* ad *Timurem Khan* confugerat et impetratis ab eo copiis regnum aliquoties recuperauerat; donec iniuriis laceffitius in iras praeceptis armis aduersus *Timurem* captis infelici successu sibi ipsi regnoque *Kaptschak* excidium attulit. Oriundus ex eius stirpe *Hadschi Kerai Khan*, inde ab a. 1441. peninsulam occupauit et *Dynastiam* condidit, quae usque ad nouissima tempora *Tauricam* obtinuit *r*), obnoxia facta Imperatoribus Othmanicis inde ab anno 1471. *s*) cum stolidi ferocia elati Genuenses, qui Caffam tenebant, permouere Mogolos, ut Othmanorum opes sollicitarent et in peninsulam inducerent. Ita dedita Othmanis Caffa, cumque ea in Othmanorum ditionem redacta omnis peninsula. *Mengheli Kerai Khan* imperium peninsulae accepit,

q) (Müller) *Russische Geschichte* To. II. p. 12. sqq. Genuensium res parum adhuc sunt expeditae.

r) V. *Desguignes* Tom. I. P. I. pag. 293. T. III. pag. 390 sq. et hinc *Weltgeschichte* VII Th. I Band pag. 287 sqq.

s) v. *Kantemir* ad h. a.

Exposita sunt haec a nobis summatim et sub
vnum conspectum, vt varia fortuna, qua penin-
sula haec per omnem temporum decursum vsa est,
tanto melius intelligi possit. Magna huius fortu-
nae pars ex situ causas habuit; barbaris enim in
Occidentem properantibus media illa peninsula erat
interiecta. Verum eiusdem situs nunc, aliter con-
stitutis rebus, opportunitas est maxima siue ad re-
primendos aut subiugandos barbaros, siue ad Oth-
manorum opes iam fractas penitus euertendas.
Probabile itaque fit, non minus magnam eius cla-
ritatem instantibus aetatibus esse futuram.

P. P. in Georgia Augusta Kal. Iulii cIdIdccclxxxvii.

XXIII.
GEORGIAE AVGVSTAE
INAVGVRATIONIS SACRA ANNIVERSARIA
QVINQVAGESIMA

ADEOQVE
SEMISAECVLARIA
SOLLENNIORE RITV
FESTISQVE CAERIMONIIS
CELEBRANDA

IN
DIEM XVII. SEPTEMBRIS
HVIVS ANNI *clodccclxxxvii*
RITE INDICIT

ET
QVOTQVOT NOSTRIS REBVS LITTERISQVE FAVENT
AD HILARITATIS PVBLICAE SOCIETATEM
OBSERVANTER ET OFFICIOSE
INVITAT
GEORGIAE AVGVSTAE
P R O R E C T O R
AVG. GOTTL. RICHTER D.
ET SENATVS

Quae amoris ac benevolentiae plena per se
esse solet, affectus nostri significatio, quo-
ties carorum hominum dies natales redeuntes aut
alios dies sollemnes ac laeto aliquo, quem iis
gratu-

lamur, euentu memorabiles recolimus: eam cum annorum fere progressu et ipsam progredi et augescere videmus; ipso enim tempore, vsu et consuetudine, noua affectus accedunt incrementa, et iucunditatis, ex alterius amore ac beneuolentia per longum tempus perceptae, cogitatio fructum praesentis voluptatis miro modo amplificat. Euenire solet hoc idem circa res, quibus longo vsu adfueuimus; et locorum caritas incredibilis esse solet, in quibus aetatem, inprimis iuuenilem, exegimus, multoque magis si disciplina et institutione in illis accepta profecimus. Itaque, vniuersitatis nostrae litterariae Georgiae Augustae incunabula quoties annis vertentibus sollenni ritu recordabamur, velut progressu aetatis per nouum annum facto, singulari affectu permoti, sollennia non aliter quam carae ac venerandae Parentis natalem, liberorum piis votis exoptatum, indicere solebamus. Quid enim aut nobis, quibus vt recte docendo prodesse possimus, aut vobis, Optimi Ciues, quibus, vt bene institui possitis, cuncta contigerunt, carius ac sanctius esse potest hac ipsa alma Georgia Augusta, in qua tot bona confluxere, vt et docendo et audiendo vel improbis votis satisfieri possit! Nunc ad *semisaecularem* memoriam progressi, quod in parentum aetate prouectorum simili fortuna euenire solet, vt memorabilis hic ritumque consecratus sollenni annorum numerus vim mirificam ad animos, vel narratu et auditu, habeat, id non minus experimur in alma hac nostra Parente; nisi quod in illis senectae inertis et aliquando decrepitae metus instat,

in hac nouum auctumque aetatis vigorem quotannis et incrementa meliora prospicimus. Eueniet enim aliquando, quod auguramur, vt, pleno saeculari spatio exacto, incrementorum gradus metiantur posterius, eodemque spatio se nos antegressos esse laeti agnoscant, quo nos Academiae incunabula reliquisse et profectu auctuque superasse videmur.

Cum itaque saeculare tempus communi hominum vsu ac more sollennis alicuius epochae locum et notionem habeat; idemque etiam in *semisaeculari* spatio obtineat: fieri non potest, quin Parenti nostrae almae, Georgiae Augustae, quam deus fortunet, sollenniore ritu hunc aetatis gradum gratulemur, et festum hunc diem, cui redeunt pauci nostrum, ex nobis aetate prouectioribus utique nemo, intererunt, laeti hilaresque consociata animorum voluntate, tanquam in familiari aliquo sacro, celebremus. Est enim utique res academica in magnae familiae loco habenda, quae communibus Penatibus, communibus iuribus, consiliis, studiis, bonis ac commodis, continetur. Quidni eadem voluntatum ac votorum consensio ac consociatio in omni fortuna omnium ac singulorum merito expectanda sit?

Quae cum inter nos priuatis tacitisque cogitationibus consiliisque agitentur: insigni aliquo exemplo patuit, quanta nostri cura ac studio summi nostrarum rerum administratores ac Curatores teneantur. Quod enim vix palam profiteri eramus ausi, illud nobis ab ipsis ultro oblatum est.

Adiere

erga nos est indulgentia) quod vix auditum erat, est impetratum, significatumque nobis ex Augustissimi Regis iussu, sollenniore ritu celebranda esse sacra nostra semisaecularia. Itaque sollenne hoc festum, quod per se erat memorabile dignumque quod omni celebritate perageremus, nouas causas attulit, cur eum diem inter maxime sollennes haberemus: quod enim tantam augustissimi Regis munificentiam, tantum summorum virorum, qui res nostras curant, studium experti sumus, id quam honorificum nobis sit, videtis, Ciues; intellectumque illud est a nobis tanto clarius, cum ex ipsis verbis mandati Regii ad Summum Terrarum Electoralium regendarum Consilium M. Julio dati, tum ex ipsius Senatus ac Consilii Regii sanctioris Rescripto amplissimo.

Constitutum itaque est, quod deus bene vertat, vt Anniuersaria huius anni sacra, cum sint *semisaecularia*, sollenniore ritu celebrentur. Habebunt quidem illa, etsi nihil aliud accesserit, celebritatem iam per se satis memorabilem ex bonorum, quibus fruimur, copiis, ex rebus nostris florentibus, ex ornamentorum nostrorum incolumitate, ex ciuium frequentia, inprimisque ex praesentia Principum Serenissimorum M. Britanniae, qui sacris nostris interesse haud dedignabuntur, cum Musarum nostrarum sacris initiati ipsi versentur inter nos et sub auspiciis nostris. Curabuntur tamen et alia, quae in sollennibus academicis ex more haberi solent; vtque tanto illustriora illa sint, a

Rege indulgentissimo iussi sunt facram Eius vicem sustinere et nostra sollennia praesentia sua illustrare ac condecorare Viri Illustrissimi, Duumviri Curatores Academiae nostrae grauissimi, et ob summum rerum nostrarum studium et tam insigniter auctas ac florentes res nostras aeternum memorandi, AVG. GVIL. VON DEM BVSSCHE Regi nostro a sanctioribus Consiliis Magnusque Ducatus Cellensis Aduocatus, et altero loco LVD. FRID. DE BEVLWITZ, Regi nostro et ipse a sanctioribus in regendis hisce terris Elect. Princip. Consiliis Impetratum quoque est litteris publice missis, vt spectabilium Ordinum terrarum Electoralium Prouincialium Delegati sollennibus nostris velint interesse; expectamusque hoc ipsum ab Academia Julia, sororio vinculo cum Georgia Augusta coniuncta, quam humanissime rogauimus, vt nomine publico Delegatos ad nos mittat, qui sacra haec academica inuisere et votis publice susceptis fauere velint.

Nunc, cum sollennia haec ac sacra Musarum, frequentiam, quanta maxima esse potest, eorum, qui nos amant, desiderent: solet enim testes quam plurimos flagitare laetitia, inprimisque publica hilaritas; haec ipsa charta proponitur, vulgatur ac pro nuntio publico mittitur ad omnes qui nos amatis, vt nostram urbem adeatis, diesque Septembris XVI. XVII. XVIII. nobiscum inter sollennia academico more ac ritu agitari solita exigatis. Habemus autem nobis persuasum, esse per Germaniam non omnino nullos, qui nostris rebus studeant, nec ad litteras scientiasque nihil inter-

aliae Academiae solis plerumque indigenis ac popularibus creatae et instructae sint: habet Georgia nostra Augusta hanc tanquam praecipuam sui commendationem, quod non terris Hannoveranis, non popularibus solis, non vtilitatibus priuatis aut Principis aut Prouincialium, dicta ac destinata illa est; verum quod Germaniae vniuersae, quod litteris scientiarumque disciplinis ipsis, quam late eae patent, est consecrata.

Est quidem dies vere natalitius is qui XVII est; cum tamen is, qui praecedat, sit Dominicus, quid magis videri potest consentaneum, quam a religioso ritu auspicia vt fiant? Pompa itaque sollemni ad templum academicum ducta, eo die sacra fient more solito, habebiturque pro concione oratio sacra a Viro Ven. D. ac Prof. Theol. primario GODOFREDO LESS. Expectatur adeo, vt ii, qui nos adire dignati fuerint, superiore saltem die XV. Septembr. urbem nostram ingrediantur; eodem die Legatos Regios festa nobilium iuuenum pompa equestri ad urbem deductum iri speramus. Vbi autem dies festus ac sollennis, *o Sol pulcher! o laudande!* altero mane illuxerit, campanarum et ex turribus concentuum musicorum omnigenorum per integram horam strepitu audito excitati, cum, quot quot ad hoc aut inuitati aut euocati fuerint, in Bibliothecae academicae oeco superiore cum antiquiore tum recenter exstructo conuenerint: ducetur inde pompa, (cui, quot quot Musarum sacra nostrae Academiae frequentatis, et Hospites nostros, interfuturos esse speramus), per potiores vrbis vias

rit vllam. In tanta panegyri faciet primum vel
publico iussu CHR. GOTTL. HEYNE, Eloq
Prof. qui muneris sui academici fructum laetior
ac memorabiliorem nunquam se tulisse profiteb
Votis publice faciendis praemittet *enarrationem*
rum memorabilium insigniorum et incrementor
Georgiae Augustae potiorum, quae inde ab in-
bulis reip. nostrae academicae per annos suos dige
vnde intelligetur, per quas fortunae in vtr
que partem vicissitudines illa adoleuerit; m
enim illa iactata est casibus, multis fort
procellis ac tempestatibus: *Sic fortis Etruria c*
nolumus enim addere, ne paullo iactantius di
esse videatur: *Scilicet et rerum facta est pulche*
Roma. Conferentur posthaec ab Academiae n
Ordinibus summi cuiusque Ordinis honores C
datis aliquot dignissimis. Eriget animos auct
Concentus musicus, carmine latino lyrico,
Christophori Guilielmi Mitscherlich, P. P. ing
felix fudit, a *Rudorfio*, templi academici
symphonias curante, ad modos suos redacto.
inde habebit locum illud Virgilianum:

Nunc adeo, melior quoniam pars acta diei

Quod superest, laeti bene gestis corpora :

Procurate, viri, atque epulas sperate pa

Parabuntur enim epulae festae Hospitibus
inter quas a florentissima nostra Iuuentute
mica, festo ac sollenni apparatu pompa in
deducta, cantus curabuntur symphoniaci.
coque vltimo sollennium die primo mane v

blice faciendam ad Legatos Regios Illustrissimos
omnis Academia confluet; habebuntur inde Reci-
tationes publicae in Societatis Regiae Scientiarum
Confessu a CHR. GOTTL. HEYNE, qui Secre-
tarii vicibus fungitur, et a JO. FRID. BLUMEN-
BACH, qui summam Commentationis de *vi vitali
sanguinis* breuiter exponet; breues inde recitationes
instituent, in Confessu Societatis Teutonicarum
litterarum ABR. GOTTH. KÄSTNER, Societatis
Senior, et in Confessu Instituti historici, Director
JO. CHPH. GATTERER. Curabitur inter haec,
ne audientium aures fastidiosa orationis copia one-
rentur magis quam expleantur; cum bene memo-
res simus, in hilaritate publica remittendos esse
animos, non docta subtilitate intendendos. Atque
vtinam his ipsis interesse suaque praesentia decus
summum addere dignetur *Praeses Societatis Regiae
Scientiarum, Serenissimus Princeps ac Dux FERDI-
NANDVS*, Dux Brunsvic. et Luneb. Quanti
gaudii fructum, quantam exultationem ac volup-
tatem ea res nobis esset allatura, si Heroem, cui im-
mortalitatis post fata honorem per multos adhuc an-
nos numen abnuat, praesentem inter nos et comitate
sua omnes deuincientem videre contigeret! Nihil
vtique ad vota nostra etiam audacissima explenda
superesset! Inde prandio sumto decursio equestris
in Hippodromo publico, *Jo. Henr. Ayseri*, rei
equestris magistri, cura, iam satis spectata, parabi-
tur. Fient etiam alia et hoc et superioribus diebus,
quae in publica hilaritate fieri mos est, quibus
nunc enumerandis nec vacamus.

tisque ipsi, Hospites, qui adire nostram urbem vol-
veritis, sintne haec, quae vestris obtutibus occur-
rent, Georgiae Augustae incrementa suis auctori-
bus satis digna? hoc annorum spatio semisaeculari
et expectatione, quam illud facere potest, haud
inferiora? placeatne matrona haec, specie oris cor-
porisque venustate probabili, ornamentis suis face-
nuptiali dignis, decorata, ut ad amorem sui aequos
arbitros et talium formarum spectatores elegantes
pellicere possit? Nec dubitamus, Hospites, ubi
Bibliothecae nostrae opes, a tam tenuibus initiis
profectas, ubi cetera academiae instituta, aliorum-
que liberalia incrementa, aliorum fundamenta iacta,
cognoueritis, quin, non modo condonaturi, ve-
rum etiam aequum iustumque facere nos arbitra-
turi sitis, dum munificentiam Regis nostri Indul-
gentissimi et studium curamque praeclaram Curato-
rum nostrorum tantis laudibus efferre ac praedi-
care nos audieritis; contra vero vos ipsos admira-
tione tot tantorumque bonorum contactos his ipsis
praedicationibus succenturos, in easque consensu-
ros esse auguramur. Saltem hoc ad nostrorum
animorum pietatem gratumque sensum spectare haud
negaueritis, si, quae tantorum virorum beneficio
studio ac sedula cura consequuti sumus decora,
grata mente et ore praedicemus. Ut enim moderate
ferre fortunam videre, quis te dissimulare eam et
celare iubeat? Recensum bonorum suorum facere li-
cet etiam citra invidiam; contra felicitati tuae ipso
iniuriam feceris, si tegere et occultare illam volueris.

In his bonis, quae singularis aliqua prouidentia Numinis O. M. nobis est largita, vnum est admodum memorabile, quod superstitem illa esse voluit vnum, qui ipsis Georgiae Augustae incunabulis interfuit *), **SAMVELEM CHRISTIANVM HOLLMANNVM**, totius corporis academici Seniore, virum de philosophicis per Germaniam studiis et de Academia nostra meritissimum; huic enim contigit, vt in ipso Academiae sacro semisaeculari recordari possit initia reip. huius et inaugurationis sollennia, quibus celebrandis non modo ipse adfuit, verum etiam is fuit, qui primus in hac noua Academia e cathedra doceret, cum trinos iam per annos professorio munere gesto sacra illa anteuertisset. Quibus meritis, qua singulari fortuna, in hoc aetatis gradu, ille conspicuus ac vero nomine venerabilis, dignus vtique videri debet, qui publicis priuatisque acclamationibus et salutationibus celebretur ab omnibus. Gratulamur itaque Seni Optimo incomparabile hoc prouidentiae di-

Cc 5 vinae

*) Adferre sacris ipsis inaugurationis et consecrationis Professores hi:

Ordinis Theologici: Jo. Wilh. *Feuerlin*. Magnus *Crusius*. Ioach. *Oporinus*.

ICti: Ge. Ch. *Gebauer*. Tob. Jac. *Reinhart*. Gottf. *Mascon*. Gott. Sam. *Treuer*. Jo. Jac. *Schmauß*. Henr. Chr. *Senckenberg*. Ge. Henr. *Ayrer*.

Medici: Ge. Gott. *Richter*. Alb. *Haller*. Jo. And. *Segner*.

Philosophici: Chr. Aug. *Heumann*. Jo. Dan. *Köler*. Jo. Matt. *Gesner*. Sam. Chr. *Hollmann*. Jo. Frid. *Cotta*. Jo. Fr. *Penther*, idemque aedificiis tuendis praefectus. Lud. Mart. *Kahle*, Prof. extr.

vinæ munus, eique similes precâmur esse multos ex iis, qui nunc sacra nostra celebrant, vt et ipsi aliquando saeculari sollenni, vt nunc semisæculari, vigentes valentesque inter sint *). Gratulamur et vobis incolumitatem, quotquot inaugurandæ Academiae sacris interfuistis, et nunc superstites incrementa eius adultæ seu præsentis seu absentes bonis votis prosequimini.

Verum ne nimis liberales in pollicitando esse videamur, seruabimus alia ipsius diei sollenni splendori: cuius magna pars a *Principibus Serenissimis Magnæ Britanniae*, trina Regis nostri augustissimi sobole, ERNESTO AVGVSTO, AVGVSTO FRIDERICO, et ADOLPHO FRIDERICO, tum a *Serenissimis Principibus ANNA HENRICO SIGISMVND O RENATO MONTMORENCY LVXEMBURG, Duce Castillonensi*, ac Principe CAROLO EMANVELE SIGISMVND O MONTMORENCY Principe Luxemburgensi, profiscetur; aliud decus nostris sollennibus accedet ab *Illustrissimis Comitibus Orléans*, quos, vt sollennem pompam ducere ne dedignentur, summis precibus rogamus; aliud ab omni Coetu academico florentissimo. Vos itaque, *Ciues Academiae*, quos seu *generosa* stirps et maiorum

rum

*) Incassum tamen cecidere vota nostra. In ipso enim sollennium apparatu, d. IV. Septembr. decimo tertio ante sacrum anniuersarium die, placide obdormiuit Senex venerabilis, ipsaque morte sua, quam incerta, fluxa et fallax fors et conditio humanæ naturæ sit, documentum edidit memorabile.

rae, ornant et commendant; Omnes, inquam, vos precibus appellamus humanissimis, ut pompam sollemnem ducendam comitari inque ea incedere ipsi iusto ordine ac loco, omninoque sacris nostris ore animisque favere velitis. Bonam Academicæ nostræ disciplinae, bonorumque morum, quibus vos floretis, famam nunc in documentum adductam esse arbitramini, et in manu vestra positum paucorumque dierum periculo exploratum iri, quantam iuventus academica nostra modestiæ, verecundiæ et honestatis, laudem per Germaniam, et commendationem ad futura tempora duraturam, habitura sit. Et vobis gratum iucundumque erit ad recordandum, et ad alterum illud solidumque C. annorum saeculare festum memorabile habebitur, proponeturque pro exemplo iis, qui tum erunt, si narratum audiuerint, id, quod instat, sollemne nostrum nullo sinistro ac tristi cuiuspiam facto ac dicto esse interpellatum aut foedatum. Omnino tum multa huius diei, multa eorum, qui celebrando ei interfuerunt, erit memoria, multi de iis, quæ nunc parantur ac designantur, sermones ferentur. Ad commendandam igitur memoriam nostram, et ad parandam in futurum tempus iucundam vestrum ipsorum recordationem huius diei, provideate pro se quisque, ne quid interueniat quod sacra turbet. Date operam, ut posterius nos fortuna nostra ita vestros esse intelligant, ut ea haud indigni fuisse videamur; ut vos ipsi cum exultatione tacita pronuntietis in audientium coetibus: et nos his sollemnibus interfuimus! et nos, ut sacra illa augustiora essent, pro
virili

virili allaborauimus! vt denique posterī hoc nostrum sollenne tanquam exemplar propositum habent, ad quod ipsi studia et consilia sua intendant. Felices nos, si de nobis nostrisque conatibus non sinistre iudicabunt! feliciores ipsi, si apparatus nostrum festique diei celebritatem hanc non modo aequasse, verum etiam superasse videbuntur! Vos, Proceres vtriusque et religiosi et ciuilis ordinis, *Magistratus*, inquam, *urbani* et *sacris operantis Ministerii*, eodem studio, quo et alias nostram Academiam prosequimini, nunc etiam sollennibus nostris adfuturos esse et bona verba precaturos nulli dubitamus. Adeste itaque, Ciues et Hospites, quocunque loco ac nomine honorati, et sacra nostra aequi bonique cognoscite; nos quidem, ne officio nostro omni humanitatis genere vos demerendi deesse videamur, diligenter curabimus. P.P. in Georgia Augusta. Die XVII. Augusti c1010ccclxxxvii.

O R A T I O

IN PANEGYRI

SOLLENNIVM SEMISAECVLARIVM
ACADEMIAE GEORGIAE AVGVSTAE

D. XVII. SEPTEMB. CIO IO CCLXXXVII.

HABITA

A

CHR. G. HEYNE

ELOQV. PROF.

Augustissimi et Potentissimi M. Britanniae Regis Legati Illustrissimi et Excellentissimi, Progenies Regia, Principes M. Britanniae Serenissimi, Serenissimi Principis Landgrauii Hassorum Legate Illustrissime, Ordinum prouincialium Proceres perillustres, Academiae Iuliae Carolinae Delegati Spectatissimi; Vosque Academiae nostrae ornamenta, Principes Montmorency Serenissimi, Prorektor Magnifice, Comites Illustrissimi, Domini, Patroni, Hospites, Collegae, Cives, Auditores omnium ordinum honoratissimi,

In rerum naturis obseruatum est, quo magis lenta ac tarda sint earum incrementa, eo diuturniorem esse durationem. Arbores, quae per saecula durant, sero adolescunt. Platanus, quercus, cedrus, olea, quam longa acui vetustate valent, tam tardo auctu vires sumunt. Neque animan-

animantium natura diuersa est. Opera quoque et instituta mortalium, alia subito nata celeriter florent, celeriter depereunt; alia cum difficultatum molestiis diu colluctata, occulto auctu sumunt firmitatem ac robur, et tanto altiores radices agunt. Academiae nostrae Georgiae Augustae, Auditores, si quid aliud, hoc vtique portendit durationem sempiternam, quod a tenuissimis initiis ea orta, inter multas magnasque difficultates tarde accreuit, et variis fortunae casibus iactata, variis calamitatibus conflictata, vix tandem conualuit. Saepe illa tempestatibus ac procellis conuulsa, damnis et iacturis tamquam ferro accisa, ab ipso ferro noua incrementa, opes animosque, duxit. Itaque decem lustris expletis, tantum abest, vt illa ad senium vergere videri possit, vt potius hac demum aetate semisaeculari adolescere, tanquam iuuenili vigore efflorescere, robur viresque sumere videri debeat: quot enim et quanta ei incrementa his ipsis annis nouissimis accessere! quot ornamenta noua, alia parata sunt, alia cum maxime parantur! inque his hoc ipsum semisaeculare solenne, hic diei splendor, haec confessus vestri dignitas et amplitudo! Licet itaque augurari, tanto diuturniorem Georgiae Augustae fore incolumitatem, quo difficiliore cura illa adoleuit, quo aerumnosior eius fuit auctus. Quod, vt intelligatur, me non temere augurari, venia vestra, Auditores, exponam paucis *varias fortunae vicissitudines, quas illa ab incunabulis inde suis est experta, quibus fluctibus illa est iactata, quo sole recreata, quos Castores illa habuit propitios.* Quam ad rem, vt studium vestrum audiendi, Auditores,

multis

multis exorem, vix mihi laborandum esse video; quod enim mihi dicenti facile negari posset, ipsa diei celebritas pro me a vobis impetrat; et diffidere viderer sensibus et voluntatibus vestris in hanc ipsam Academiam, si de me nimium sollicitus esse vellem. Mihi autem ad excitandum inflammandumque animum quid expectari, quid optari possit maius, quam hoc ipsum diei sollenne, splendidus hic confessus, hilaritas publica! Quid? quod, dum in conspectum vestrum prodeo, in hunc locum escendo, non modo a vobis, qui praesentes estis, audiri, verum mente et cogitatione mihi videor eorum etiam, qui absentes sacris nostris favent, ora in me videre conuersa; ipsam posteritatem, quae huius diei celebritatem aliquando curiose recolet, a me dicta auribus accipere; illi ipsi, qui in locum nostrum aliquando succedent, quoties sacri huius semisaecularis facta erit mentio; multo magis quum altero semisaeculari spatio exacto magnum saeculare sacrum illuxerit, memorabunt vos, Viri Summi, qui huius diei sollennibus interesse dignati estis; memorabunt me in tanta omnium ordinum frequentia dicentem, memorabunt et inuidebunt fortunae meae, cui in tantorum virorum confessu verba facere obtigit; quae mea felicitas ut numeris suis absoluta, ut vere inuidenda sit, audite me, Auditores, beneuole, dicam breuissimis.

Difficultates in ipsa Academia condenda conditaque incredibiles nunc omitto; accessere aliae, ex re natae, aliae casu superuenere; a) in his BRUNQVELLI et ALBRECHTI MOX TREVERI et REINHARTI inopinata

nata mors, repentini discessus SENCKENBERGII; STEINWEHRI; discessus et reditus SCHMAVSSII; alia spes de se conceptas destituerunt, seu ex quo huius aduenerant, seu quoties in locum vacuum qui succederent aliunde erant euocandi; alia ex hominum rerumque vitiis nata incommoda. Inprimis *Ordo theologicus et medicus* multas habuere vicissitudines. *Iure-consultorum Ordo* non nisi a WAHLII b) in hanc Academiam euocatione sine offensa viguit. Melior fuit fortuna *Ordinis philosophici*, qui cum inde a primis annis statum suum firmiter teneret, celebritate sua Academiam in primis illustrauit. Omninoque *huius Ordinis merita* sunt plura, cum in aeuum illud Academiae imbecillum tum ad omnes litteras et ad omnem posteritatem. Primis enim eius auctoribus magna ex parte debetur *Palladium hoc Academiae nostrae*, sentiendi ex animo de rerum diuinarum humanarumque veritate libertas, qua, si qua alia re, Gottinga ad tantam dignitatem et auctoritatem est euecta, aliisque academiis et terris facem praetulit, ad litterarumque conuersiones, quas novissimis annis vidimus, tantum momenti illa habuit; quod si enim primi philosophi sectae condendae aut aliunde inferendae studuissent, nec liberaliter ipsi essent philosophati, optima quaeque vndecunque probando: iacta semel rerum principia diuersa diuersum rerum ordinem fuissent adductura; ita vt nec facile a philosophicis et theologicis quaestionibus ad alias disciplinas, inprimisque ad libertatis publicae facem, historiam, ad politice et ius publicum, inprimis Germaniae, deduci illa libertas potuisset; nec de-
fuere

fuere illo tempore in hac Academia, qui in Wolfii verba iurauerant, iique theologi. Vt tamen libertas et immunitas opinandi ac censendi tanto altiores radices infigeret, nec theologici systematis frigus eam, tamquam nouellam plantam, perimeret; plurimum profuit fluctuans et multis mutationibus obnoxia Ordinis theologici per illa tempora conditio. Medicorum Ordo quod tam laete effloruit, fortunae debetur. ALBRECHTO altero post accessum anno erepto, c) HAMBERGERVS, clarus illo tempore medicus, cum WEDELIO focero Iena huc euocatus, si Gottingam attigisset, actum erat de vero medicinae studio: pro experientia, artis magistra, naturaeque explorandae sedulitate, haberemus vana cum subtilitate *demonstrandi* ea, quae *opinamur*, insaniam. Forte fortuna euenit, vt HALLERVS Berna arcessitus in eorum locum substitueretur: cuius viri immortalis nomine ac meritis prima celebritatis Georgiae Augustae apud exteras gentes fundamenta iacta sunt; tum, cum ad hanc urbem ille accedebat, poematum laus et fama ad academicam frequentiam cogendam profuit; per annos quos hic vixit, scientiae medicae ac physicae incrementa et ornamenta acri studio parauit, et cum sua laude Academiae famam late propagauit. Neque cum animus aduersis casibus exacerbatus, nec concertatio cum collegis, a litterarum augmentis auocauit: ipsa dissidia et odia acuebant virorum doctorum ingenia. De nouis enim inuentis et obseruatis certabatur, non cum quaestus ac mercedis inuidia.

Sedula

c) 1736

Heynii Opuscul. acad. Vol. III. c. Dd

Sedula HALLERI opera, d) mature *Theatrum anatomicum*, cum praeparatis anatomicis, fuit conditum; mox quoque *Hortus botanicus*; aliquanto post *Collegium chirurgicum et obstetricium* e) institutum eiusdem viri indefesso in re medica amplificanda studio. Inter reliqua MVNCHHVSII meditata vnum fuit quo et Academiae et terris vniuersis Luneburgico-Brunsvicensibus consulere voluit, modo consiliis sapientissimis obsequi voluissent ii, quorum res agebatur: *ordinem scholasticum*, seu studiorum scholasticorum regendorum normam, Gesneri opera promulgavit, eoque ipso effecisse videri debet, vt inter primos rei scholasticae emendandae auctores habendus sit Gesnerus; condidit quoque *Seminarium philologicum*, quo saltem hoc est consequutus, vt litterae humaniores non omnino ex his terris exularent, nec ex academicarum disciplinarum numero exciderent.

Decennio iam elapso vix res academica habuit quod ei satis fideres; firmitas tamen illi ac robur accedere visum est, primo, MOSHEMIO f) in Cancellarii locum huc euocato, tum noua Academiae celebritate parta ex aduentu Regis Augustissimi GEORGII II conditoris ac Rectoris sui Magnificentissimi, g) et ex sollennibus huius aduentus caussa curatis. Latius nunc spargi coepit nomen, extendi fama et proferri inter exteros, maior inde esse frequentia adeuntium. Ita enim res humanae ferunt, vt laudes verae et ex ipsis meritis paratae tarde succrescant; contra vero id, quod cum apparatu

d) 1743

e) 1750

f) 1747

g) 1748

ratu specioso ac praeter morem fit, sensus animosque hominum impellat; utque saltem altera res alterius ope et concentu indigeat. Bona autem sua homines melius ex aliorum praedicatione, quam ex aestimatione sua, intelligunt: quo ipso fit, ut fama ac celebritas inter res sint academiis tantopere salutares et exoptabiles; videndum modo, ut fundo illa idoneo sit substructa, utque causas habeat, quae laudem veram ac duraturam faciant.

Curata inter haec fuere multa, sine quibus res academica conualescere nequit: vix tamen fuit vlla res quae non molestias omnis generis ac difficultates obiiceret. Quibus ut occurreretur, sapientia Immortalis viri, MVNCHHVSII, prouisum est. Sagacissimus ille in reperiendis seu praesidiis seu remediis, acquiescens in rerum bonarum initiis etiam si tenuia essent et fragilia; at indefessus idem in iis firmandis, augendis et amplificandis; bona et vtilia consulentibus haud facile obsurdescens, ad decora et ornamenta academiae suae circumspicienda nunquam non intentus; ubi cessandum erat, nihil temere mouens: opportunitati omni insidians; e re nata occupare sollertissimus.

Res fuit diu multumque tentata, ut *librarius mercatus cum re typographica* in hac vrbe effloresceret: quae enim Academia sustentari possit, nulla fama ac celebritate suffulta? unde fama ac celebritas parari nisi vulgatis studiorum fructibus et editis in publicum scriptis? scripta autem quomodo in vulgus spargi, sine officina libraria prudenter instituta?

stituta? Longum esset, si commemorare vellem quam multa incassum fuere consulta, alia quorum successus et euentus seu curis seu consiliis et impensis parum respondit; donec adducta res libraria est in eum statum, in quo nunc illam constitutam videmus, vt et plurimi libri hic prelo excudantur, et excudantur elegantius, et vendendorum librorum proftet insignior copia. Ad famam litterariam Academiae plurimum profuere *Recensus litterarii*: at, quam tenuia et incerta initia ea res habuit! Primo priuatis vsibus ac consiliis tabernae librariae DE MEIERN fuerat opera haec destinata, h) et viro haud indocto DE STEINWEHR commissâ; eo discedente ad TREVERVM, inde ad alios ea cura peruenit; i) donec HALLERI fidei illa fuit tradita: k) ille vero priuatum negotium aliquot annis post in publicam curam vertit eamque curam *Societatis Regiae* l) recens institutae *scientiarum* auctoritate et nomine ornauit. Haec ipsa *Societas* tam infirma habuit initia, moxque tot et tam variis agitata est diffidiis, vt mirationem facere debeat, quod decus hoc Academiae nostrae et lumen non in ipso ortu est extinctum. Famam tamen Georgiae Augustae apud exterarum nationes, et inter viros interioribus studiis et disciplinis addictos, Societas haec eiusque *Commentarii*, tum *quaestiones* cum praemiis ad concertandum propositae, incredibili modo late propagarunt, vt *Recensus litterarii* per Germaniae prouincias; hi iidem vanarum religionum et opinionum contagium saepe aut retuderunt aut a Germaniae finibus propulsa-

uerfa,

h) 1739

i) 1741

k) 1747

l) 1753

verfa, feu exterorum feu noſtratum, ad publicam notitiam diſſeminarunt. Fuere autem inter *commentationes* recitatas multae, quibus nouarum obſervationum vel experimentorum inuenta primum in orbem litterarium fuerunt inducta; e quo genere quis HALLERI, quis ZINNII, TOBIAE MAYERI, recitationes ignorat! huius quidem *tabulae lunares* earumque uſus in inueſtiganda maris longitudine uti auctori nominis perpetuitatem, ita Academiae noſtrae praeclaram laudem attulere. Sermoni patrio expoliendo noſtrorum popularium induſtria ſuperiore tempore admodum erat addiſta: m) iisdem uſibus *Societas teutonica* mature Gefneri conſilio apud nos fuit inſtituta; alia *Societas cosmographica* Norimberga huc euocata temerariis hominum conſiliis mature ſoluta eſt. *Specula aſtris obſeruandis* extructa, n) multis obſervationibus opportunitatem fecit: quibus et caeli ſiderumque ſcientia, et Academiae noſtrae fama, incrementa habuit haud contemnenda. Eſt enim hoc inter ea litterarum genera, quibus totius terrarum orbis eruditi in ſocietatem et collegium cogi videntur. Obſeruata aſtronomica, phyſica, medica et mathematica, per omnes populos vulgantur; de theologicis et iuridicis ſubtilitatibus interdum vix populares multum laborant.

Iam conualuerat aliquantum res academica; acceſſerat quoque famae incrementum ex aduentu PRINCIPVM HASSIAE, o) GEORGII II. NEPOTVM, ultra annum ſpatium hic degentium: cum

Dd 3

repente

m) 1740 . n) 1751 . o) 1755

repente turba malorum nos oppressit, bello septennali ingruente. Praecesserant casus bellicos alii, inque his ipse discessus PRINCIPVM HASSIACORVM acceleratus, p) mors KOELERI, tum MOSHEMII, mox SCHMAVSSII obitus; et SEGNERI discessus; q) cum his Societas scientiarum praecipitibus consiliis tantum non dissoluta. Multis videri potuit actum esse de Georgia Augusta, insidentibus urbem hostibus per sex fere annos continuos. Propitia tamen fortuna contigit, ut per Gallorum Ducum humanitatem ad omne acuum memoratu dignam Musarum sacra turbarentur quidem, nec tamen euerterentur. Immortalis inter nos erit memoria cum aliorum tum MARESCHALLI D'ESTREES, MARCHIONIS DE PERREVSE, COMITIS D' ORLICK, inprimisque EQVITIS DV MVY. Ceterum ipsi tumultus bellici valere ad famam Georgiae Augustae latius disseminandam; frequens enim inter Gallos, ex hostibus hospites factos, ad sua reduces, urbis nostrae commemoratio, bona, quae Academiam commendare poterant, inuidis laudibus ad exterarum terras pertulit.

Euenere, sub extrema belli, alia, quae vulnera grauissima intulerunt Academiae: primo loco ereptus rebus humanis conditor et auctor GEORGIVS II. r) tum vita migrauerant BRENDL, ZINN, mox GESNERVS, TOB. MAYER, RÖDERER, s) et Petropolin discesserat BVSCHING. Superfuit tamen
ad

p) 1756 q) 1755. 57 r) 1760 s) 1758. 59. 63

ad medelam tot damnis ferendam MVNCHHV. SII, t) quem ipsi nos res nostras inspicientem et vtilia multa mente designantem vidimus, animus et sapientia; euocati sunt qui succederent; noua quoque circumspici coeperunt Academiae ornamenta. Inprimis Bibliotheca academica maioribus, quam antea, copiis locupletata, locus quoque spatiosior et ornatio iis curatus. Aui immortalis, GEORGII II. desiderium, leuauit GEORGII III. indulgentia in Academiam, litterarum amor ac munificentia. Decoribus academicis noua accessere instituta. *Collegium rei oratoriae sacrae*, mox aliud *Collegium Repetentium* dictum; u) rerum vsu ad meliora ducente, paullo post ad aliam formam reuocatum. Interea *Institutum historicum* sua incubula habuerat x). Restituta aut firmata sunt instituta alia et vrbis et Academiae, inque his *Orphanotropheum*, iam antea conditum, et *Fiscus viduis Professorum sustentandis* creatus, cui locupletando redditus ex *taberna medica academica* locanda conducenda additi sunt. *Donatio Vffenbachiana* librariae, iconographicae et opticae, y) suppellectilis diu incerta per hos annos noua pacioue munita, z) cum paullo post euentum haberet, Academiae et nouam famam et vtilitatem peperit. Omnino nunc intellectum est, in Bibliotheca rite instructa quantum praesidii positum esset, vt Georgia Augusta inter alias Academiae, etsi plerisque aliis recentior, nomine tamen et fama haud novissimo loco et esset et haberetur; intellectum est,

D d 4

ad

t) 1764

u) 1765

x) 1764

y) 1764

z) 1769

ad studia et docentium et discientium alenda; et ad ingenia, quorum bonam copiam nunquam non suppeditabit alma Natura, fingenda, nihil efficacius et praestantius esse hac ipsa Bibliotheca omnium vñbus proposita; intellectum tandem est, secundum euocationem virorum doctrinis et ingeniis eminentium, qui in loca vacuefacta succedant, his tanquam duabus ancoris teneri nostrae reip. academicae laudem et salutem: altera Bibliotheca academica, altera Societate Scientiarum Regia. Vtraque hac incolumi et salua, nihil timendum esse inter omnium ventorum fluctuumque tumultus. *Fata viam inuenient.*

Insignem splendorem Academiae comparauit praesentia DVCIS EBORACENSIS, *Ser^{mi} Principis Regii, a)* et quarto inde anno alterius *Regii Principis Ser^{mi} DVCIS GLOCESTRIAE; b)* interiectoque tempore FERDINANDI, *c)* *Ducis Brunsvico-Luneburgensis, Principis Ser^{mi}* memorabilis ad hanc urbem et Academiam inuisendam aditus. Idem indulgentissimus PRINCEPS, laudibus cumulatissimus heros, aliquot annis post, HALLERO rebus mortalibus erepto, non dedignatus est PRAESIDIS *Societatis Scientiarum Regiae d)* locum ac titulum sibi oblatum accipere.

Ex MVNCHHVSII nouissimis, antequam ille ad Immortalium sedes discederet, fuit, quod actum est cum HALLERO de reditu ad Academiam nostram, etsi res exitum non habuit; quodque multa aut meditata et inchoata, aut affecta, eius opera fuerunt vel

a) 1765

b) 1769

c) 1768

d) 1780.

vel difficultatibus suis liberata, vel profligata, imprimisque Bibliothecae noua ornamenta destinata. Concessus ille rebus nostris diutius quam vota, quamvis audacia, flagitare potuissent, tandem exuias mortales deposuit *e*). Ad res nostras sustentandas ac roborandas, omnium confessione, hoc vnum vel maxime valuit, quod huius viri vita ad tanti aevi decursum fuit producta. Ab eo enim, cuius cura et prudentia Academiae fundamenta erant iacta, longo rerum usu multa poterant melius constitui, morbida sanari, imbecilla et inualida fulciri aut foueri. Etsi mors eius tam multum ante erat provisā: tanquam repentino tamen luctu Academia percussa obtorpuit. Sollicitudinem leuauit ac metum dispulit BEHRII rebus nostris data cura; efflorescere illa adeo laetius inter spes ostensas, cum inopinata eius mors cuncta destinata ac tentata disiecit *f*). Rediit inde Academiae cura ad DVVMVIROS, alios aliis morte ereptis succedentes; deuoluta tandem eximio prouidentiae munere ad Vos, CVRATORES ILLVSTRISSIMI, quibus res nostras administrantibus Academia tam praeclara habuit et incrementa et ornamenta. Superiore enim tempore coeptorum operum non modo incolumitatem, verum etiam auctus insignes vidimus.

Quod Academiae deerat, ut, praeter librorum opes et ingeniorum omnis aevi monumenta, naturae quoque immensae copiae in vnum locum congestae studiis nostris paterent, id effectum est *Museo* condito, *g*) cuius fundus factus est BÜTTNERI

D d §

*supellex**e*) 1770*f*) 1771*g*) 1773

supellex rerum naturalium numorumque omnis aetatis Acedemiae nostrae ex munificentia Regia comparata; accessit alia Regis munificentia, *h)* *apparatus mineralogicus* Hannouerae seruatus, nec non ab Hercyniis saltibus *i)* paratae a peritissimo viro STELTZNERO, opes *metallicae* in Museum sunt illatae; *k)* etiam *ex insulis australibus* mirandarum rerum copiae in eo repositae. Inter haec insigni laude celebranda venit insignis liberalitas L. B. GEORGII DE ASCH, qui partim Museum, partim Bibliothecam ingentibus opibus et naturae, inprimisque metallorum, et artis, maxime numismatum, etiam librorum praecclaro apparatu, locupletauit, suiue memoriam inter nos ad omnem posteritatem perpetuauit. Alius apparatus, isque *machinarum*, iam dudum academicis vsibus addictus, auctus est machinarum formis operis metallici et exemplis ab eodem STELTZNERO redemptis. Inprimis autem rei medicae consultum est; nam *Collegium clinicum*, primo priuata opera a VOGELIO institutum, *l)* mox publicis suppetiis sustentatum, ad publicas vtilitates satis laetos auctus habuit. Etiam *Nosocomium* publice chirurgicis inprimis vsibus destinatum *m)*. *Laboratorium chemicum* exstructum suaeque supellectili est instructum; *n)* et nunc *arti obstetriciae* quanta parantur praesidia, obstetricantium studiis *hospitio*, ex Regis Ordinumque prouincialium munificentia, designato! Quot et quanta a me commemorari ac praedicari possent alia, per quae accessiones factae sunt institutis academicis, cum *Regum Principumque*, tum *priuatorum virorum*

h) 1777*i)* 1782*k)* 1682*l)* 1764*m)* 1780*n)* 1782

virorum liberalitate! ipsius *Regis* nostri beneficentia in speculam astronomicam ex Britannia quot et quam eximia scientiae astronomicae et opticae instrumenta immigrarunt!

Cum his multis magnisque fortunae propitiae muneribus non intacta mansit resp. academica casibus et euentis aduersis; inprimis mortibus aut discessibus virorum, quorum diuturnior fructus nobis ut fato contingeret optabamus. Obtulit tamen alia laeta et iucunda fortuna melior, primo accessionibus aliorum professorum loco ac laude sua conspicuorum; tum confluente in Academiam nostram frequentia memorabili, externis quoque ex terris, iuuenum generis ingenii morumque laude praestantium; ita ut eorum qui fastis academicis inde ab Academiae conditae origine *inscripti* et consignati sunt, nomina computentur fere ad XV millia: Principum autem et Comitum nomina inter haec superbiant fere ad centena septuagena. Eminent in his ac praefulget magnum nomen *Regii Principis Serenissimi*, EPISCOPI OSNABRVGENSIS, nunc DVCIS EBORACENSIS, cuius aduentus ad hanc Academiam inuisendam o) ante hos sex annos aliam urbi celebritatem addidit; aliam DVCIS WIRTEMBERGENSIS, *Principis Serenissimi*, p) per plures dies in his Musarum sacris commoratio.

Tot et tanta me circumstrepunt laeta et iucunda, ut nouissima, quae omnes memoria tenetis, saltem verbo attingere liceat q). Primum quidem
loco

o) 1781

p) 1781

q) 1784

loco *praemia* a Rege indulgentissimo Ciuibus nostris constituta, quae quantopere multorum ingenia acuerint, igniculos et industriam excitauerint, ex ipsis certaminibus victoriisque per hos annos intellectum est; altero loco aduentus ad hanc urbem et Academiam Regiae sobolis, TRIVM PRINCIPVM MAGNAE BRITANNIAE, r) qui in castris nostris Musarum militant. Nec silentio praetermittenda insignis accessio *Fisci viduis Professorum sustentandis* facta ex Legato VAN DEN HOEKIANO, s) Collegae nostri prouida cura conciliato.

Tam laetum florentemque Georgiae Augustae statum quod in hoc sollenni semisaeculari praedicare mihi licet, et ego, qui dicentis partes suscepi, in felicitatis meae parte ponendum arbitror, et vobis gratulor, Curatores Illustrissimi, gratulor Patribus Academiae, et iuuentuti huic florentissimae, et ipsis litteris. Quod si caelestes animae curant mortalia, et ex beatis sedibus res humanas prospiciunt: non intactum laetitia credere licet animum GEORGII II. conditoris ac nutritoris Georgiae Augustae suae, nec MVNCHHVSII affectum, qui parentalis curae suae fructus tulit tam vberes, tam laetos, quos ille, in tenuibus rerum initiis et per tot annos inualidis, vix animo votisque praecipere potuit.

Quo itaque sensu, quo affectu contactos esse necesse est nos, ad quos horum bonorum omnium fructus ac commoda redundant! Quo primus animi
impe-

impetus nos ferre debet? Scilicet ad hoc, vt gr̃atias agamus Deo immortalī, inter cuius beneficia in genus mortale manantia locum primum obtinent bonae litterae, diuinæ humanæque, fingentes ingenia, polientes ac regentes sensus ac mores, excolentes humanitatem, idque, quod diuinum in nobis est, elicientes ac fouentes. Alterum est, vt faciamus vota pro reip. nostrae perpetuitate eiusque auctorum ac sospitatorum incolumitate. Publicis itaque priuatisque precibus nostris diu condoneris laetusque rebus humanis intersis, GEORGI TERTIE, *Magnae Britanniae Rex* Augustissime, bonarum litterarum tutela, nec magis Fidei Defensor, quam Scientiarum ac Litterarum Columnen ac Praesidium! Digna Tuae pietatis ac virtutis praemia feras, REGINA AVGVSTA, numerosa sobole felix mater, et cum hac ipsa Tua SOBOLE REGIA, omni felicitatis genere, quod in sortem mortalium cadit, propitii numinis indulgentia, fausta ac fortunata, vtere! Ad magnarum rerum, seu pace seu bello gerendarum, gloriam immortalem adolescite, PRINCIPES REGII SERENISSIMI, et, vbi aliquando vero, nec ficto, in meritorum vestrorum laudes consensu, inter populos conspicui facti eritis, nutritiam vestram, Georgiam Augustam, memores diligite. Vos autem, CVRATORES HVIVS ACADEMIAE ILLVSTRISSIMI, nuncque vice sacra ad hoc *sollenne* LEGATI, incolumes laetique vestrarum curarum, euentus successusque optatos habentium, fructus capite. Fortunet numen O. M. consilia vestra, vestrique collegii, SENATVS HARVM TERRARVM REGENDARVM SANC-
TIORIS

TIORIS, ceterorumque COLLEGIORVM in his
 terris, quibus reipublicae incolumitas et vtilitates
 continentur. Iam Tu, LEGATE ILLVSTRIS-
 SIME PRINCIPIS HASSIARVM LANDGRAVII,
 secundo rerum cursu et ipse vttere et PRINCIPI
 TVO SERENISSIMO vota Academiae nostrae pro
 eius incolumitate et felicitate renuntia; haec eadem
 precamur et vos, et pro vobis, DELEGATI OR-
 DINVM PROVINCIALIVM ILLVSTRISSIMI;
 videtis, eorum, quae in hanc Academiam ab Or-
 dinibus conferuntur, qui fructus sint, et qui sen-
 sus noster sit huius in Academiam beneficentiae.
 Vosque, IVLIAE CAROLINAE DELEGATI,
 fororii inter nos vinculi perpetuitatem stabili-
 rebusque vtimini vestris florentibus. Vos porro, HO-
 SPITES ac FAVTORES OMNIS ORDINIS LOCI
 AC DIGNITATIS HONORATISSIMI, inter
 laetos faustosque eorum, quae geritis et consulitis,
 successus, Academiae nostrae porro fauete ac bene
 cupite. Quae vero pro Te vota faciemus, IUVEN-
 TVS FLORENTISSIMA, spes nostra, decus et
 gloria! vota nimirum facimus, quae pro vobis ca-
 rissimi vestri, parentes ac necessarii, facerent: vt
 ad nostras, suaeque vestrum quisque domus, ciui-
 tatis ac patriae, spes adulescat; quamque hodierno
 die modestiae, decori ac congrui obseruantiae, no-
 strique amoris laudem, huic confessui splendidissimo
 approbastis, seruetis intactam; auferatisque ali-
 quando, vbi in sinum parentum ac patriae redie-
 ritis, digna vestris ingeniis studiis ac meritis prae-
 mia. Inter iucundas recordationes exactae aetatis
 saepe vos recreabit et exhilarabit sollennis huius
 diei

diei memoria et commemoratio, et pendeat ex ore vestro audiendi cupida posteritas.

Nos tandem, PATRES AC COLLEGAE, in sollenni hoc die, cuius fructum Collegae nostrae desideratissimo, HOLLMANNO, eheu paucorum dierum interuallo is, qui nos omnes, suo quemque die, euocat, non concessit; hoc die, cuius similem alium pauci nostrum viuendo attingent, qui tamen nostrae dierum summae adiectus vel longae vitae desiderium compensare potest; in hoc die sollenni, laeto ac festo, quae tandem pro nobis ipsis vota faciemus, aut potius quaenam vota reipublicae academicae summam continere videri debent? Nimirum ut propitio numine incolumen hunc Academiae statum retineamus, nec culpa nostra committamus, ut eo excidat, aut ut ex iuuenili hoc vigore repente marcescat, Georgia Augusta. Sit haec eius iuuentas perpetua, vigor perennis, fortuna inoffensa. Transmittamus ad posteritatem, eique tanquam in manus tradamus remp. florentem ornatamque, qualem eam hoc die sollenni vidit hic omnium ordinum coetus, et agamus cum *Aetate ventura* tanquam cum praesenti: En, quotquot in loca nostra, deo volente, succedetis, remp. academicam vobis relinquimus multis difficultatibus liberatam, egregie firmatam, mirabiliter ornatam: vos curate, ut haec Georgiae Augustae laus per vos sit perpetua ac sempiterna; erit autem hoc effectum fide, officio ac religione vestra, disciplinae publicae priuataeque grauitate et constantia, vitae sanctitate, sentiendi ac iudicandi libertate per prudentiam

tiam et honestatem temperata. Quae vobis transmittimus, videtis; vos vt illa retineatis et amplificetis, diligenter curate.

Tu autem, aeternum, *sanctum, sanctum, sanctum Numen*, haec vota nostra piasque preces rata esse iube, et effice, vt per omnem terrarum orbem GEORGIAE AVGVSTAE exemplo manifestum sit, *bonis litteris, cum sapientia et pietate coniunctis, vita et felicitatis mortalium praesidia contineri ad omnem perpetuitatem certissima.*

I N D E X. *)

- A**cademia Georgia Augusta. Eius sacra semisaecularia indicta 398. Oratio in iis habita 411. varia eius fortuna et difficultates quas illa est eluctata 412 sq. eius palladium libertas recte sentiendi et sensa ex animo eloquendi 414. duae ancorae quibus eius laus et salus tenetur 422. primordia tenuia. Medici ordinis claritas vnde nata 415.
- Academica studia non sola auditione et lectione continenda** 217 sq.
- Achaeorum resp. foederata** 167. eius descriptio, et ratio exposita 168 sq. praeclare illa instituta 170. mala quae eam premebant et exitii causae 171 sq. Arati obrectatione Macedo sociorum dux ac tyrannus factus 172. bello Aetolico resp. concussa 173. bellis ac dissidiis Romanorumque superbia soluta ruit 177.
- Aegyptiorum in litteris profectus hieroglyphica litteratura retardati** 27.
- Aeblenses societatem armorum adversus Cyrum iniere** 180. 277.
- Aeolicae vrbes foederatae** 180.
- Aeris phaenomena, inter prodigia habita** 211.
- Aetolicum bellum** 173 sqq. 176.
- Aetolorum resp. foederata** 178.
- Africae aditus ex foedere cum Carthaginiensibus interdictus Romanis** 65.
- Alexandrinorum commercia cum Carthaginiensibus** 77.
- Algardus: eius anaglyphum, Leonem M. cum Attila congressum exhibens** 139.
- Allegoria v. Symbolum.**
- Americani: eorum de deo aliquo summo notio incerta manet** 15. Coloniarum resp. foederata 162. eius fortuna p. 182. *) bellum cum his gestum cum bello Romanorum sociali comparatum 144 sq.
- 'Αναδυσιας** 102. 103. m) n).
- Anima sicca ex mente Heracliti** 97. interpretationes huius dicti variae 99 sq. eius sensus verus 102.

Ani-

*) Debetur et hic Index doctrinae et industriae G. C. F. Seidelii Philosophiae summis honoribus nunc ornati.

Animantia, inter prodigia habita 267.

Anniversaria quinquagesima Ge. Aug. 398 sq.

Antipater Atheniensibus leges scribit 353.

Antonini pii numi 328.

Aratus, de Achaeorum foedere bene meritus 167. Invidia erga Cleomenem adductus, Macedonum et Antigonopibus vititur 171. bello male rem gerit 172. ab Apelle accusatur 174.

Arbores, quae inter prodigia habitae 263.

Archaeanaëtidæ, regni Bosporani conditores 393.

Argonautæ, ad Cherfonesum Tauricam appulisse narrantur 359.

Artium opera, a barbaris direpta 140.

Aruspiciinæ notio 271.

L. B. de Asch liberalitas in academiam 20. 56. 424.

Atheniensium resp. Phocionis ætate conditio 351. ab Antipatro victi leges acceperunt 353. Polysperchon remp. popularem iis restituit 358. Atheniensium causus 353 e).

Attila, 130 sqq. auctores de eo discrepant 129. a) 142. præsertim in eo, cur ab oppugnanda Roma discesserit 132. sq. causæ rei probabiles 134. auctorum ignorantia miraculum affinxit 135.

Auctores prisca quinam scribibus sæculis legi soliti? 306 i).

Auguria et auspicia, qua notione proprie dicantur 271.

Αἰν ψυχῇ 97-105.

Barbari, rebus insolitis ac mirabilibus vel lætitiæ vel metu animo percussi, naturas humana maiores fingunt 7 sq. 9. cultus diuini notiones ex nostris ingenuis perperam ad illos transferuntur. 8. in quibus inter se conueniant 33 sq.

Barlaas, Paulli Perusini amicus, 304. e).

Bellum, Romanorum sociale. eiusque causæ ac successus 145 sqq. Socii atque coloniae æquo iure uti, Romani in eos dominari volebant. 145. cum iure supremo ins. publ. externum iis ademerant 147. civitatis eos Romanæ iuribus excluderant 147. sq. inde principum indignationes et belli semina 148. 150. de defectione clam inter socios agitur 152. constituta noua rep. bellum suscipitur 154. belli successus 155. 156. Motus a Cinna et Mario seditionibus, senatus absente Sulla civitate in Italicis omnibus edixit 157. quam mox Sulla plerisque, cum agris, ademit 158.

Bello Punico primo actum a Romanis, ut Poenos Sicilia excluderent 69. pacis conditiones 71. belli Punici-secundi et tertii exitus 74.

Bias

- Bias Prienensis:** eius consilium Ionibus datum 180. Not.
Bocautius: eius de Demogorgone sententia examinatur 298 sq.
 304 sq.
Boeotorum resp. foederata 179.
Bosporus Cimmerius 390. regnum Bosporanum 393 sq.
Britannorum bellum cum Colonis Americanis 158.
Cassa, 391. fortuna 396.
Callicrates Achaeorum proditor 177.
Carthaginienfes v. Poeni.
Cauloniatarum foedus 187.
Cherfone, quondam Chersonesus 391 sq. k). eius opes 394.
Chersonesi Tauricae antiquitas et fortunae vicissitudines 383.
 antiquissima Tauricae memoria inter Graecos fabulosa
 388. Cimmerii 389. Scythae 390. Sarmatae deinde
 Tauri. ibid. Coloniae Milesiorum. 391. Peninsula in-
 ter illos populos divisa 392. sq. regnum Bosporanum
 393. Omnis Chersonesus Mithridatis ditioni accessit
 393. sq. reguli a Romanis constituti 394. Gothi 394.
 Hunni 395. Cuturgi caeterique peninsulae incolae 395.
Census, e censu temp. tractare Athenis quid fuerit 353 e).
Certaminis litterarii in diem Regis natalem propositi leges ac
 ratio 216 sqq. 254. 316. 337. Argumenta proposita
 in annum LXXXV. 229. 239. — in A. LXXXVI.
 252. 319. — in A. LXXXVII. 213. 368. — in A.
 LXXXVIII. 378. Certaminum et praemiorum utilitas
 commendata 221. 237 sq. 316 sq. 366 sq.
Cimmerii apud Homerum 388. eorum incursiones in Asiam
 389. Chersonesum Tauricam tenent 390.
Cleantis dictum 103.
Cleomenes Arato et Achaeis insensus 171. ad Sellasiam victus 172.
Coloniae, Romanorum vid. Romani — earum conditio et
 ius 83 sq. defectiones 87. coloniarum mittendarum
 necessitatem fecit ius belli immane 85. earum insti-
 tuendarum rationes 85 sq. Americanarum bellum cum
 bello sociali Romanorum comparatum 144.
Commercia. v. Navigatio.
Corfica, a Phocaeensibus occupata 44 sq. Poenis cecit 45.
Cosmogonia, symbolice declarata, magnam philosophiae ve-
 teris partem procreavit 295.
Crotoniatarum foedus 181.
Culturae saeculi notio parum definita 334. culturae varii
 genera 335. vitae ibid. morum 336. ingeniorum 337.
 pestilens nostri saeculi 338 sq. vera et utilis 340 sq.
Cyrnus vid. Corfica.

Demiurgi notiones variae 309.

Demogorgonis daemonis origines 296. perperam a Bentleio Bocatii inventum habitum 296. a) 300. Bocatii de eo sententia examinatur 298. 304. hausta est huius daemonis notio e philosophia barbara orientis 306. nominis etymologia et origo 308. sq.

Deus. dei quae sit notio hominibus feris ac barbaris 7. sqq. deorum notiones ex sensibus nostris perperam tribuuntur barbaris. 9. 31. sq. phaenomenis insolitis homines vel laetitia vel metu, hoc quidem praecipue, animo affecti, ad deorum religiones adducuntur 11. quomodo sol, et sidera, cet. religiose coli coepta. 11. sq. barbarorum de numine iracundo notiones etiam ad numinis O. M. notiones ab ingenuis eius cultoribus misere sunt translatae 13. Numinis summi notio unde orta? 14. — Deorum Graecorum origo 22. eorum forma humana 24. animantium formae quomodo dila ab aliis populis tributae? 25. deos inter homines interdum versari prisci sibi persuadebant 28. a diis iratia mala morboque hominibus mitti. ibid. loca illis sacra humano usu exenta 28.

Diana Taurica 391.

Dionysius senior Italiae littora vastat 59. soluit foedus magnae Graeciae 181. iunior Italiam classe diripit 57.

Divinationis disciplina, naturae studio neglecto orta 205. cf. 270.

Doricae ciuitates foederatae 180.

Drusi, M. Livii, Leges 153.

Eparatus, Achaeorum praetor 175.

Eusebii locus emendatus 103. m).

Etrusci, opibus maritimis valentes 44. bellum gessere cum Phocaeensibus in Corsica 45. latrocinia infestant mare. ibid. cum illis pacta Poenorum de rebus importandis cet. 59. eorum resp. foederata 181. cum sociis coniunctim si Romanos essent adorti, actum de his fuisset 283. sq. 181.

Extispicina unde nata 270.

Europaei, ex suo more et ritu de barbarorum sensibus et iudiciis falsa nuntiant 10.

Fama rerum gestarum aliorum plerumque ingeniis, quam propriae hominum debetur virtuti 128.

Febres epidemicae, Romae falso in pestium censum relatae 111. earum causae sollennes 125.

Felicitas saeculi in numis imperatorum Romanorum 331. sq.
Flamma: inter prodigia 257.

Foedera, inter Poenos ex Romanos super navigatione et mercatura facta 41. sq. foedus primum eiusque leges 43. socii vtriusque populi ei adstricti 46. factum petentibus Romanis 47. interpretatio legum 47. foedus alterum eiusque causae 59. tertium et quartum 66. quintum, bello Pun. primo finito. 71. sextum, ut Poeni Sardinia decederent 71.

Foedera, ad imperiorum nimis potentium opes infringendas iam ab antiquis populis facta 277. huius generis foedera adversus Romanos cur eventu caruere? 278 sq. primum a Latinia factum 280. deinde bellum altero ab vrbe a Gallia capta anno a Volscis et Etruscis motum 282 sq. porro bellum Samniticum adiunctis aliis populis 283. foedera ciuitatum Graecarum 285. Poenorum foedera aduersus Romanorum opes 285. bellum sociale 287. Mithridaticum 288. comparatum cum his foedus Principum reip. Germanicae 276.

Foederatarum rerum publicarum coalitio vix unquam satis fida 162. vid. Resp.

Fregellanorum adversus Romanos coniuratio 152.

Fulminum prodigia 213.

Fulvius Cos. eius leges de ciuitate sociis danda 152.

Fustuarium 195.

Genii, barbarorum de genis opiniones 9. vnde certis locis assignari coepti 13. genii inter Graecos 24.

Genferici et Leonis congressus 139 sq.

Georgiae Augustae anniuersaria semisaecularia 398. variae fortunae eius vicissitudines inde ab incunabulis suis expositae 413. v. Academis.

Georgii tertii munificentia regia insigni de quaternis in singulos annos argumentis, quae a quoque academiae ordine proponuntur, certaturis inuenibus praemia constituta 220.

Germanis priscis religionum subtilitas perperam tribuitur 14 sq.

Gothi in Chersoneso Taurica 394.

Gracchi Legg. agrariae 152.

Graeci. Religionum origines ad rudium hominum opiniones omnino comparatae 22. eorum numina nata sunt e priscis Pelasgorum diis familiaribus partim 22. partim ex diis locorum 22. deorum formas fingebant humanas 24. religiones ab aduenis acceptae 25. a vatibus 26. Graecorum virtus e temporum rationibus aestimanda 350.

Græcia magna foedus Achæorum imitatur 181.
Gyraldus 304. g).

Hannonis navigatio quando facta. 44.

Heracles, sine Chersonesus ab Heracleotis Asiæ condita 391.

Heracliti de animabus sicca placitum 97. omnium rerum principium materiam constituit igneam 102. animam dixit *ἀναδυσλασίω* 103. Aliud dictum de amne eodem nec eodem ibid. m). Aliud: vivere homines mortem deorum 105 p). alia 106 u).

Hippocrates, pestem proprie dictam non attigit scriptis suis. 111.

Hispania Poenis prima exitii causa 58.

Historia vetus narrationibus perigrinantium quomodo illustretur 3.

Historiæ naturalis fragmenta ex ostentis prodigiis ac monstis 198. 256. eius ignoratio superstitionum parens 203 sq.

Hollmanni feriæ saecularæ 198. morte ereptus 407. 408. 429.

Homerus, septentrionis notitiam prodit obscuram 388.

Hanni Chersonesum Tauricam occupant 395.

Hygini locua de Demogorgone interpolatus 304.

Imbres pro prodigiis habiti 212.

Imperatorum Romanorum numi cum epigraphe: felicitas saeculi 328 sq.

Influenza 109. 110.

Ionum resp. foderata 179. discordiis et hostili vi soluta. 180.

Italiae ante bellum sociale conditio tristissima 150. eius historia naturalis ex ostentis 198. 256. multo frequentius olim incendiis subterraneis ac tremoribus vexata videtur. 258. 261.

L. Iulii Cos. in bello sociali clades 155. eius lex de ciuitate pop. Italic. ibid.

Iuris criminalis initia vnde ducta 191 sq.

Lana in Veienti agro ex arboribus nata 264.

Larium ac Penatium religio multo magis in Italia quam in Græcia frequentata 23.

Latinorum foedus, ad opea Romanorum minuendas factum 280.

Leges: Semproniae 152. Licinia Mucia ib. Liuiæ 153.

Varia ib. Iulia 155. Plautia Papiria 156.

Leo M. ad Attilam et Gensericum legatus missus 128 sqq. legationis ad Attilam causæ 130. euentus 132. ad Gensericum legatio 139.

Litte-

Litterae, ad popularem rationem a nostratibus temere reuocatae, quae mala excitauerint 338.

Linii locus illustr. 89. n) 47. q) 194. 90 o).

Lucani locus, de Demogorgone a Bocatio acceptus, illustratur 299.

Lutatius Placidus, de Demogorgone 300. loc. ill. 307 k).

Lyciorum resp. foederata 178.

Lycortae laus 167 c).

Magia a philosophematibus veterum per symbola redditus orta 295 sq.

Maris ardentis prodigium quid sit? 266. 274. maris imperium et opes maritimae cessere virtuti Romanorum 69.

Masinissae perfidia 74.

Massilienses, latrociniis Poenorum resistere 45.

Mastia, nauigationis terminus Romanis constituta 60. de eius situ disputatur. ibid. l).

Messenii, Achaeorum foedus recusabant 171. 174.

Milefii deseruere foedus Ionum 180. eorum coloniae in Chersoneso Taurica 391.

Milioni loc. ill. 296.

Mithridatis bellum aduersus Romanos 157. Chersonesum in ditionem accepit 393.

Monstra 271. 2.

Munchhusii virtus et prudentia in Ge. Aug. condenda et firmanda 416 sq.

Musonius Rufus, philosophus 96.

Naturae rerum ignoratio superstitionum parens 114. 272. 3.

Nauigandi libertates ac iura vt inter recentiores sic inter antiquos legibus ac foederibus fuere circumscripta 40. 47. 61. 76.

Nicolaus de Casola Bononiensis; de poemate eius 142.

Nospov et vorapov 104. o).

Numi imperatorum Romanorum cum epigraphe: felicitas saeculi 328. vnde ea petita 381.

Ominum notio constituta 270. 1.

Opinionum etiam falsarum mirus consensus 312 sq.

Ostenta v. Prodigia.

Panaetolium 178.

Paionia 179.

Panticapaeum, colonia Milefiorum in Chersoneso. 391.

Paullus Perusinus; de eo 303.

Pere-

Peregrinantium narrationes quae commoda attulerint veriori philosophandi rationi 1. historiae veteri 3.

Pestilentia: eius notio parum subtiliter definita III b). 112. proprie sic dicta, ante Saec. II. A. C. nulla 112. febres epidemicae apud Romanos hoc nomine appellatae 111. 113. 125. inænnalibus pontificum relatae. 113. causae febrium e prodigiis vna relatis apparent 114. sq. pestium recens 115 sq. etiam antiquiorum aetatum 121. an Carthaginis et Aegypti ibid.

Phaenomena aeris caelique, a Romanis in prodigia versa 211 sq.

Philippus Achaeorum dux factus 172. Achaeos prodit 175. a Romania vincitur 177.

Philopoemen. 167. c). Praetor creatus res Achaeorum reficit 176.

Philosophia omnia a vanis opinionibus progressa 203. 207. Orientis et Graeciae, a rerum elementia et vniuerso profecta est 203. 295. Philosophia orientalis barbara 306. Philosophia omnino a peregrinantium narrationibus praeclara cepit incrementa 1. de humanitatis dignitate ac iuribus praeciens philosophia inter nos melior, cernitur in quaestionum atrocitate tollenda 184.

Philosophorum antiquissimorum placita, quomodo sint interpretanda 97 sq.

Phocaeenses fuga libertatem sibi vindicant 180. Aleriam in Corsica conduunt 44. mare latrocinii infestant 45. in bello cum Poenis et Etruscis viribus exhausti, insulam relinquunt 45.

Phocion. $\chi\rho\eta\sigma\acute{o}\varsigma$ vnde vocatus 346. a). eius mores. 346. caput e gemma 347. a). secundum reip. Atheniensium conditionem facta eius sunt diiudicanda 350. bellum cum Antipatro bene improbat 352. victis Atheniensibus Antipatri condiciones pacis probat 354. partium suarum studio nimio ac pertinaciae culpa haud facile liberandus 355. Cassandri et Nicanoria partes tuendo in proditionis crimen incidit 357. imperium ei abrogatur 360. ab Agnonide proditionis accusatus ad Polyperchontem concessit 360. ibi a legatia Atheniensium accusatur 361. causa ad populum reiecta damnatur 362. auctorum in causa Phocionis fides 355 sq. 359 a).

Phoenices: eorum coloniae per Africam 44.

Phylarchus 168 c).

Phyticae imperitia, infinitarum superstitionum fuit origo 204. Plutar-

Plutarchi loc. emend. 100 d). 101 g). 114 d). 152 d). in
caussa Phocionis auctor est parum accuratus 355.

Pluuiæ, lacteæ vnde ortæ 274. 212. 266. vnde cruen-
tæ? 266.

Poeni: eorum cum Romanis super navigatione et mercatura
foedera 42 sqq. opes 44 sq. fortuna 69 sq. Hispania
prima Poenis exitii causa 58. milites mercede
conducere incipiunt 58. mancipia petebant ex Eu-
ropa vt nos ex Africa 63.

Polybius, foedera Poenorum Romanorumque e tabulis Romæ,
seruatis, tradidit 41. cur tot laudibus extulerit Achæo-
rum foedus 167 c). eius loca illustrata 49 r). 52 y).
60 l). 64 p). 65 q) s).

Polysperchon, quo consilio Atheniensibus remp. popularem
restituit? 375 sq.

Pontificis R. Pii V. iter Viennense 127.

Pontus Euxinus, Graecis ignotus, donec Iones hoc mare
nauib. frequentabant 388.

Porcia lex, ne ciuem virgis cadere liceret 190.

Porphyrî loca expl. 104. 105.

Praemia concertationum academicarum 222. v. Certamen.

Principum M. Britanniae ad vrbem aduentus: expectatus
327. 343.

Prodigia et ostenta: in rerum naturalium ignorantia eorum
loco habentur res, quæ præter naturæ morem fiunt
204. 115. 203. causis a deorum ira repetitis, eorum
procuraciones in religionem venere 205. ideoque in
monimentis publicis memorantur 206. unicuique po-
pulo suum est prodigiorum genus 209. pro historiae
naturalis fragmentis quomodo illa haberi possint, 208.
Romanorum prodigia, ad historiam naturalem Italiae
spectantia, in classes diuisa 211. ea quæ spectant ad
aeris caelique phaenomena 211. imbres insoliti 212.
fulmina 213. stellæ crinitæ, flammæ e terra ortæ
214. 257. flammæ in antennis nauium et capitibus
hominum 257. sudores signorum ibid. porro quæ
spectant ad terræ marisque phaenomena 258. motus
terræ ibid. montium incendia 259. prodigia in ar-
boribus et plantis 263. aquarum eluuiiones, riuî san-
guinis aut lactis 265. Prodigia denique ab animanti-
bus 267. raro, in loco insolito visis 168. aut siquid
præter morem fecissent 269. Hinc diuinandi genera
270 sq.

Pronapis Atheniensis, poeta lyricus 304. eius commentitii Protocosmos a Paulo Perusino et Gyraldo citatus ibid. g) 305.

Pulchrum promontorium, de eius situ 47 q). Romanis pro termino navigationis constitutum. ibid.

Questionum et tormentorum origines non ab ordaliis sed a iure Romano 186 sq. quaestionis notio accuratius constituta 188 *).

Quaestiones Certaminum academicarum; cuius naturae sint 316. v. Certamen.

Raphaelis pictura, Leonis cum Attila congressum exhibens 137. sqq.

Religionis inter barbaros origines et cultus religiosi prima notio 8 sq. 11. 13. cf. deus. R. falsae ex naturae ignorance natae 203 sq. 272. 3.

Rerum publ. foederatarum finis qui esse debet? 162. quomodo pleraeque ortae 163. cur maxime instabile hoc reip. genus. 164. Achaeorum resp. foed. 167. Lyciorum 178. Aetolorum 178. Boeotorum 179. Ionum 179. Doricarum et Aeolicarum ciuitatum 180. Magnae Graeciae 181. Etruscorum 181.

Romani: eorum prudentia in coloniis regendis 81. sqq. opinione hominum minor 151 b). erga socios et provinciales crudeles fuere ac perfidi. 80. 151 b). cur a foederatis hostibus opes eorum nunquam fractae sint? 278. 285. eorum cum Poenis super navigatione et mercatura foedera 42. sqq. 50. V. Foedera.

Rutilii Cos. clades in bello sociali, 155.

Sacra semisaecularia Ge. Aug. 398. v. Academia.

Saeculi felicitas in numis imperatorum Romanorum 328. quae tum intelligebatur felicitas? 331. quae sit saeculi nostri felicitas 333. sqq.

Sardinia, arcebantur Romani a Poenis 65.

Sarmariae, Chersonesum Tauricam occupant 390.

Scythae, pulsus Cimmeriis Tauricam occupant 390.

Scythae Satarchae et Scythotauri 392 m).

Siciliae ora a Poenis occupata 44. negotiandi ibi libertas Romanis concessa 66. primo Punico bello Poeni inde exclusi 71.

Socii. Sociale bellum v. Bellum.

Statii locus illustratur 299. sq.

Stephanus Byz ill. 61 l).

Stobaeus, ex eo Musonii Rufi sermo 96 b) c).

Stoici,

Stoici, Heracliti placita suis rationibus accommodauere 101.
Strabo em. 390 f).

Sulla, ius aequum sociis, libertatem Romanis adimit. 158.

Superstitiones a naturae ignoratione profectae 203 sq. 272. 3.
ab oratione symbolica et allegorica profectae 291. superstitionum fraudes multifariae ad paucas reuocari possunt classes 312.

Supplicii sumendi apud Romanos ratio 189.

Sybaritarum foedus 181. :

Symbolum. Symbolorum usus et symbolica loquendi ratio quae mala intulerit 291 sq. spectat illa ad generis humani infantiam 292. adeoque nec magnam doctrinam nec subtilem tradere ea potuit ibid. aliena est a nostris aetatibus 294. peperit illa falsas religiones, philosophorum ludibria, mysticam doctrinam, magiam ibid.

Tarseium, navigationis terminus Romanorum 60. de eius situ ibid. 1).

Tauri, Chersonesum occupant 390.

Taurica Diana 391.

Terrae phaenomena inter prodigia habita 258 sq.

Theodontius, non hominis, sed libri Paulli Perusini nomen 302 sq.

Theodosia, l. Theudisia, (v. Periplos Ponti Euxini) colonia Milefiorum 391.

Tomaso d'Aquileia. 129. 142.

Tormenta v. Quaestio.

Triopicum concilium 180.

Tyrii 58. 60.

Ugricae stirpis populi Chersonesum tenentes 395.

Uticenses 60.

Vates Graeci, quomodo mythis religiosis vsi sint? 26.

Vaticinandi morbus communis barbaris et rudibus populis 36.

Virgis cur caederentur apud Romanos, qui securi percutiendi essent 189. 193.

τὸ ὑπὸν Heracliti 105. 106.

Zenonis sententia de anima 102.

ADDENDA.

ad p. 39 sqq.

A Schweighäusero, v. c. cuius studio et doctrinae nonam, et, ut a viro acuto et melioribus subsidiis instructo expectare licet, meliorem recensionem Polybii debebimus, observationes nonnullas ad haec Poenorum foedera mihi communicatas apponam, dignas sane, quae ad calcem commentationis meae subiciantur.

Primo quidem, quae p. 47. primo foederis capite habentur: nec ultra V. dies commorandi sit facultas: ἐν πέντε ἡμέραις ἢ ἀπεριεχόμενον εἰ καὶ ἐκχέοντες ex vno Perotti libro profecta sunt, a ceteris libris abstant. Fixantur tamen verba ex ipsa Polybii disputatione cap. sequ.

p. 49. Nota r) Polybii locus est III, 23 (non c. 49). Pro ἑμίσια melius ex codd. legitur ἑμίσια. et mox pro ταῦτα παρῆεν in Polybio: ταῦτα, πάρεξ δὲ μὴδὲν, εἰσὶναι δὲν λαμβάνειν, καὶ κατ' ἀνάγκην ἐν πέντε ἡμέραις ἀπαλλάττεσθαι τοὺς καθ' ἑκάστην.

p. 51. In altero hoc capite verba: μὴδὲν ἔγωγε τέλος πλὴν ἐνὶ κίβρωι ἢ γυμνασίῃ, quae quidem durius dicta sentiebam hoc sensu: vestigal nullum pendunt; recte vidit vir doctus ita esse accipienda: nullum negotium ratum esto, nisi quod adhibito praecône vel scriba fuerit confectum, ita ut occurratur omni mercaturae priuatis consiliis et artibus institutae. Quorsum etiam tendant ea quae subiiciuntur: nullius contractus nisi ad hanc legem facti fidem praestari.

p. 61. Nota p) Vir doctiss. lacunam sic explet: Καρχηδονίαι. [ἱμαίαι δὲ μὴ δὲ Καρχηδονίαι] πεισίστην. εἰ δὲ, μὴ ἰδίᾳ μεταπορεύεσθαι. cum his commentibus ut cui eorum, quibuscum pax et amicitia est Carthaginiensibus, iniuriam facito. Similiter Carthaginiensis ne facito. Sin fecerit, priuatum persecutio eius ne instituitur; sed si quis tale quid admiseric: publica iniuria esto.

ERRATA.

p. 95. l. 7. a S. cofabulantium l. conf.

p. 104. l. 3. a. f. ὁρατον l. varaton.

p. 111. l. 5. ignoramus l. ignotamus.

p. 275. l. 1. XIII. leg. XVI.

p. 287. l. 7. hortatibus leg. hortatibus.

p. 294. l. 8. porcuffis leg. percuffis.

p. 309. l. 12. piobus leg. probus.

p. 319. sequitur p. 203 pro 320. tum 319 pro 321.



